

სტუკ
ეზის
სურსეთის
წიგნი
I

გამოიცა შიომღვიმის მონასტრის ლოცვა-კურთხევით

შემდგენლები: გელა აროშვილი

ზურაბ აროშვილი

გიორგი გაბაშვილი

რედაქტორი ვახტანგ ხარჩილავა

წიგნი გამოიცა შემდგენელთა ხარჯით

შემოსავლის ნაწილი მოხმარდება შიომღვიმის მონასტერს.

წინასიტყვაობა

სადიდებლად უფლისა ღვთისა და მაცხოვრისა ჩვენისა იესო ქრისტესი გამოიცა ეს წიგნი და მზადდება მისი მომღვეწო წიგნები. პირველად, ვმადლობ ღმერთს ესოდენ დიდი წყალობისათვის. თითქმის ერთი საუკუნეა, რაც ქართულ ენაზე სასულიერო წიგნები არ გამოქვეყნებულა, თუ არ ჩავთვლით ბოლო 12 წლის მანძილზე მცირე ტირაჟით გამოცემულ საეკლესიო კალენდარს და საღვთისმეტყველო კრებულს, უფრო შეზღუდული უფლებებით რომ იბეჭდებოდა. ათეიზმის 65-წლიანმა სასტიკმა მძვინვარებამ განელევა დაიწყო. რამდენი ხნით ან საიდან და რა საშუალებით დაიწყებს მორიგ შეტევას, არ ვიცით. მაგრამ ის კი ვიცით, რომ ბოლო ჟამს „დრო შემცირდება“. ამიტომ მადლობა ღმერთს, რომ მოგვცა ძალა დღევანდელი პირობების შესაბამისი საშუალებების გამოყენებისა ერის სულიერი განათლებისათვის.

1988—89წ. საქართველოს საპატრიარქოს დაუბრუნდა 150 ტაძარი და ხუთიოდე მონასტერი, მაგრამ იმისათვის, რომ ყველა მათგანი მოქმედი გახდეს, ჯერ კიდევ ბევრი რამ არის საჭირო და უპირველეს ყოვლისა, რამოდენიმე მშვიდობიანი წელი თავისუფლად ღვთის სიტყვის ქადაგებისა.

XX საუკუნის დასაწყისში საქართველოში 2000-მდე მოქმედი ტაძარი იყო, რწმენა კი მცირდებოდა ერში. ამის შესახებ გაბრიელ ეპისკოპოსი წერდა: „ერთი ფრიად სამწუხარო ყოველთა ქრისტეს მოსაგვთათვის გარემოება გამოჩნდა და ძლიერდება ყოველთა ქვეყანათა შინა... განმრავლდნენ კაცნი წინააღმდეგნი საღმრთოისა სჯულისანი... პირველი და უმთავრესი ჰაზრი, ანუ საბუთი ყოვლისა ურწმუნოისა და განდრეკილისა კაცისა არის ესრეთი: ოღონდ მე კი კარგი, პატიოსანი და მართალი კაცი ვიყოო სჯმით და ყოფაქცევით, თორემ რაც გინდა მწამდეს, ეს სულ ერთი არისო“ (ქადაგებანი იმერეთის ეპისკოპოსის გაბრიელისა, ტ. I, „მოდღვრება მართლ-მადიდებლობის კვირიაკისა“).

დღეს ასეთი აზრი, შეიძლება ითქვას, მთელ მსოფლიოშია გაბატონებული. აშკარა ათეიზმთან ერთად, გრძელდება კაცობრიობის სარწმუნოებრივი დაქუცმაცება ათასგვარ სექტებად. მაგრამ სამწუხაროდ საპირისპირო, გამაერთიანებელი მოძრაობაც — ეკუმენიზმი, ამავე ნიშნით მიმდინარეობს. ეკუმენიზმი გვთავაზობს სარწმუნოებრივი განსხვავებები მეორეხარისხოვნად ჩავთვალოთ და უგულვებელვყოთ, და სოციალურ-კულტურულ-ეკონომიკური პრობლემების გარშემო გავერთიანდეთ. ეს ჰუმანიზმის სახით შენიღბული ურწმუნოებაა, რომლისაგან XIX ს. აფრთხილებდა გაბრიელ ებისკოპოსი და ეკლესიის სხვა მამები. დღეს გაცილებით უფრო მძიმე მდგომარეობაა. ამოო სოფელი ცდილობს დაარღვიოს მართლმადიდებელი ეკლესიის ერთობა, დააუძღუროს იგი. უფალი წმიდა წერილის სიტყვით გვაუწყებს და გვასწავლის, რომ „ძალა ღვთისა უძლურებაში ვლინდება“.

გვწამს, რომ არ გამოიღვეა ქვეყანაზე ჰეშმარიტების მაძიებელი და ჰეშმარიტებისათვის თავდადებული ადამიანი. უფალი ბოლო ჟამის შესახებ ამბობს: „ვითარცა — იგი დღეთა მათ ნოესთა... ჰამდეს და სუმიდეს, იჰორწინებდეს და განჰორწინებდეს მუნ დღემდღე, ვიდრემდღე შევიდა ნოე კიდობნად და ვერ ცნეს, ვიდრემდღე მოიწია წყლით რღუნაჲ იგი და წარილო ყოველი; ესრეთ იყოს მოსვლაჲცა ძისა კაცისაჲ“ (მთ. XXIV, 37—39). მართალ ადამიანს ასეთ დროს ყველაზე მეტად სულიერი საზრდოს მოპოვება და სიმართლის შენარჩუნება უჭირს. ვინც კეთილად იღვაწებს, ღმერთი მას ნოესავით არ დაივიწყებს. ეს მოღვაწეობა სიყვარულით ცხოვრებაში მდგომარეობს, ღვთისა და მოყვასისადმი სიყვარულში. თვითოეულ ადამიანის მიერ ამ ზოგადი მცნებების განხორციელება ეკლესიურ ცხოვრებას წარმოადგენს. ეკლესიური ცხოვრების გამოცდილება დაუნჯებელია წმიდა მამების სიტყვებით: მარხვასა და ლოცვის, სინანულისა და საკუთარ ვნებებთან ბრძოლის, ზნეობრივსა და სარწმუნოებრივი ცხოვრების, ჰეშმარიტი რწმენისა და მწვალებლური სწავლებებისაგან დახსნის და მომავალი ცხოვრების შესახებ. ყველა მართლმადიდებელი ქრისტიანისათვის სარწმუნოა სახელები: იუსტინე ფილოსოფოსისა, ეგნატე ღმერთშემოსილისა, ირინეოს ლიონელისა, ათა-

ნასე დიდისა, ბასილი დიდისა, გრიგოლ ნოსელისა, გრიგოლ ღვთისმეტყველისა, იოანე ოქროპირისა, მაქსიმე აღმსარებელისა, იოანე დამასკელისა, სვიმეონ ახალი ღვთისმეტყველისა, გრიგოლი პალამასი და მრავალ სხვათა სახელები, რომელნი გაბრწყინდნენ II საუკუნიდან XX-მდე. სასიხარულოა, რომ დღეს სულიერი გაჭირვების უამს, ქართულ საზოგადოებას ქრისტეს ეკლესიის მამების სასულიერო მემკვიდრეობის თანამედროვე ქართულ ენაზე გაცნობის საშუალება ეძლევა. მხოლოდ ღვთის სიტყვა, სწორად გაგებული და განხორციელებული, გადაარჩენს ადამიანს, ერს, კაცობრიობას.

სასულიერო აკადემიისა და სემინარიის რექტორი

პროტოპრესვიტერი ზიორზი.

„რომელსა უნდეს ცხოვრებად, პირველ ყოვლისა თანა არს მას პყრობად კათოლიკისა* სარწმუნოებისა, რომელი უკეთუ-ცა ვინმე არა დაიმარხოს სრულად და უბიწოდ, თვინიერ ყოვლისავე რაისამე მიზეზისა, საუკუნოდ წარწყმდების იგი“. — ბრძანებს წმიდა მღვდელმთავარი ათანასე ალექსანდრიელი. სწორედ ამ სარწმუნოების მკითხველისათვის გაცნობას ისახავს მიზნად წინამდებარე წიგნი, რადგან „ჭეშმარიტების არმცოდნეს არც ჭეშმარიტი სარწმუნოების პყრობა ძალუძს, რამეთუ ცოდნა არის დასაბამი რწმენისა“. (წმ. ისიხი პრესვიტერი იერუსალიმისა). დღეს, როდესაც ნაკლებად გაისმის სიტყვა მართლისა სარწმუნოებისა, „რამეთუ შოაკლდა წმიდაჲ, რამეთუ შემცირდეს ჭეშმარიტებანი ძეთა კაცთაგან“ (ფს. 11, 1), განსაკუთრებით მნიშვნელოვანია მართლმადიდებელი სარწმუნოების საფუძვლიანი ცოდნა. ამ წიგნში ჩვენ შევეცადეთ შეგვეტანა წმიდა მამათა და მასწავლებელთა ის თხზულებანი, რომლებშიც სწორედ სარწმუნოების საკითხია გაშუქებული. „დასაბამი ყოვლისა სათნოებისა არს შიში ღმრთისაჲ, და არს იგი ნაშობი სარწმუნოებისა“. (წმ. ისააკ ასური), აგრეთვე „რომელსა არა აქვს სარწმუნოება მართალი, და იქმნ მოღვაწებასა, მსგავს არს კაცსა რომელი აღმოასხამნ წყალსა, და შთაასხამნ ჭურსა განხურეტილსა“ (წმ. იოანე კიბისაღმწერელი). ასეთ უდიდეს მნიშვნელობას ანიჭებდნენ მამები მართალ სარწმუნოებას.

გარდა ამისა, წიგნში შესულია სწავლებანი სარწმუნოების საქმეებზე: ლოცვის, სინანულის, მარხვის, მოწყალეების და სხვა სათნოებათა შესახებ, რამეთუ „ვითარცა ხორცნი თვინიერ სულისა მკუდარ-არიან, ეგრეთვე სარწმუნოება თვინიერ საქმეთასა მკუდარ-არს“ (იაკობ, 2, 26).

შ ე მ დ გ ე ნ ლ ე ბ ი

* კათოლიკე — ბერძნული სიტყვაა ნიშნავს „საყოველთაოს“ ამ სიტყვით აღინიშნება ჭეშმარიტი სარწმუნოება. არ უნდა აგვირიოს „კათოლიკურ“ აღმსარებლობაში.

ეპისტოლე დიოგენესადმი

წ ი ნ ა თ ქ მ ა

თხზულება, რომლის თარგმანსაც ქვემოთ ვაქვეყნებთ, ქრისტიანული ლიტერატურის ერთერთი უადრესი ძეგლია. იგი მიმართულია ვინმე დიოგენესადმი, რომელსაც სურს ქვეშარიტება გაიგოს ქრისტიანული სარწმუნოების შესახებ. ავტორი „ეპისტოლისა“ უცნობია, თუმცა თვით ძეგლიდან ცხადი ხდება, რომ საქმე გვაქვს მოციქულთა უშუალო მოწაფის შრომასთან. თხზულების ბოლო ნაწილში ავტორი ასე მიმართავს დიოგენეტეს: „არა ვქადაგებ რაიმე უცხოს, არც უგუნურად ვეძიებ რასმე, არამედ რადგანაც მოწაფე ვიქმენ მოციქულთა, ვარ მოძღვარი ხალხთა. რაც გადმომეცა, გადავცემ იმათ, რომლებიც ღირსეულად დაემოწაფნენ ქვეშარიტებას“ (ბერძნული ტექსტი იხ. პგ. 2, გვ. 1181 ა). მკვლევარები ნ. ბონეფი და რ. კონოლი მიიჩნევდნენ, რომ ეპისტოლის ავტორი არის ძველ ქართულ მწერლობაში კარგად ცნობილი წმ. იპოლიტე რომაელი, რაც თხზულებას III ს-ში შექმნილ ძეგლად წარმოაჩენს. პ. ანდრისენის აზრით, ავტორი უნდა იყოს ქრისტიანული აპოლოგეტიკის პირველი წარმომადგენელი კოდრატე (II ს-ის I ნახევარი), რომლის შესახებ ცნობებს გვაწვდის IV ს-ის ცნობილი საეკლესიო ისტორიკოსი ევსები კესარიელი (იხ. მისი „საეკლესიო ისტორია“, 4, 3, 1—2). პ. ანდრისენი ფიქრობს, რომ ხსენებული ეპისტოლე გულისხმობს სწორედ კოდრატეს მიერ დაწერილ „აპოლოგიას“, რომელიც დაკარგულად ითვლება. ყუ რადღებას იქცევს ის, რომ კოდრატე ტრადიციულად მოციქულთა მოწაფედ არის მიჩნეული. მოგვაქვს ევსების სიტყვები: „[ტრაიანეს შემდეგ] აილიოს ჰადრიანემ მიიღო ხელისუფლება. სწორედ მისდამი წარმოთქვა სიტყვა კოდრატემ (ბერძნ. „კოდრატოს“; ლათ. „კვადრატუს“), რომელმაც შეთხზა აპოლოგია ჩვენეული ღვთისმსახურებისა („აპოლოგიან სვენტაქსას ჰიუპერტეს კათ'ჰემას თეოსებეიას“), რადგანაც ზოგმა უკეთურმა ადამიანმა ქრისტიანთა (სიტყვ. „ჩვენეიანების“) ვნება განიზარაზა.

ეს შრომა დღესაც გავრცელებულია მრავალ ძმათა შორის და ჩვენთანაც. შრომაში განიჭვრიტება ამ კაცის (ე. ი. ავტორის, ე. ჭ.) გონებისა და მოციქულებრივი მართლმკვეთელობის („ორთოტომია“) აშკარა ნიშნები. თვითვე ასაჩინოებს თავის სიძველეს („არხაიოტეს“), როდესაც ამგვარი სიტყვებით გვაუწყებს იგი: „ჩვენი მაცხოვრის საქმენი ყოველთვის იყო, რადგანაც ჭეშმარიტი იყო. ისინი, რომლებიც განკურნა მან და რომლებიც აღადგინა მკვდრებით, არა მხოლოდ მაშინ გამოჩნდნენ, როდესაც განიკურნენ და აღდგნენ, არამედ მარადის თანამყოფნი არიან, და არა მხოლოდ მაცხოვრის ამქვეყნიური ცხოვრების ყამს, არამედ მისი გარდაცვალების შემდეგაც დიდხანს იყვნენ ისინი, ისე რომ თვით ჩვენს დრომდეც მოაღწია ზოგმა მათგანმა“ (ევესები კესარიელი, საეკლესიო ისტორია, IV, III, 1—2). მართალია ევესების მიერ ციტირებული სიტყვები კოდრატეს „აპოლოგიიდან“ ზემოხსენებული ეპისტოლის ტექსტში არ გვხვდება, მაგრამ რადგანაც ის ერთადერთი ხელნაწერი, რომელმაც „ეპისტოლე დიოგნეტესადმი“ შემოგვინახა, შუა ნაწილში ნაკლულია, შესაძლოა, ზემოციტირებული სიტყვები სწორედ ამ ნაწილში ყოფილიყო (იხ. ი. კვასტენი, მიახლება ეკლესიის მამებთან, ტ. I, პარიზი 1955, გვ. 282). ძველის ატრიბუციის თაობაზე არის სხვა მოსაზრებანიც: ჰ. ი. მარუს მტკიცებით, ავტორი კლიმენტი ალექსანდრიელია (II—III სს.); ძველად, ბარატერიუსი ეპისტოლის ავტორად კლიმენტი რომაელს (I—II სს.) მიიჩნევდა (იხ. პგ. 11, სვ. 1165). საგულისხმოა გალანდის მოსაზრება იმის თაობაზე, რომ შესაძლოა ავტორი იყოს მოციქულთა მოწაფე აპოლონი, რომლის შესახებ ცნობებს გვაწვდის „საქმე მოციქულთა“ (XVIII, 24—28): „ჭურიაა ვინმე, აპოლოა (ძველი რედაქციით „აპელს“) სახელით, ალექსანდრიელი ნათესავით, კაცი სიტყუა-მეცნიერი, მოვიდა ეფესოდ, ძლიერ იყო წიგნთაგან. ესე იყო სწავლულ გზათა უფლისათა და მდულარე სულითა, ეტყოდა და ასწავებდა ჭეშმარიტად იესუმსთვს და იცოდა ნათლისცემად ხოლო იოვანესი. ამან იწყო განცხადებად შესაკრებელსა შორის; ესმა მისი აკვლას და პრისკილას და მოიყვანეს იგი და უჭეშმარიტესადრე უთხრეს მას გზაა უფლისაა; და ვითარ-იგი ეგულებოდა მას აქამად წიად-სლვად, უბრძანეს ძმათა და მიუწერეს მოწა-

ფეთა მათ შეწყნარებად მისი, რომელი მივიდა და შეეწოდა მორწმუნეთა მათ ფრიად მადლისა მის მიერ“ (პგ. 11, სვ. 1165). ჰ. ლიცმანის აზრით, დიოგნეტე, რომლისადმიც მიმართულია ეპისტოლე, შესაძლებელია ყოფილიყო მარკუს ავრელიუსის მასწავლებელი (ი. კვასტენი, დასახ. შრომა).

თხზულება, როგორც აღვნიშნეთ, წარმოდგენილია ერთადერთ ხელნაწერში, XIII—XIV ს-ისა, რომელიც რამდენჯერმე გამოიცა. სამწუხაროდ, თვით ხელნაწერი დღეისათვის უკვე მიუწვდომელია, რადგანაც იგი 1870 წ.-ს დაიწვა ბიბლიოთეკასთან ერთად. საყურადღებოა, რომ ამ ხელნაწერში „ეპისტოლე დიოგნეტესადმი“ შეტანილი იყო წმ. იუსტინე მარტიელის (II ს.) შრომათა შორის.

რამდენადაც ხსენებული ეპისტოლე ერთერთი უმნიშვნელოვანესი ძეგლია აპოსტოლურ-აპოლოგეტური პერიოდის ქრისტიანული მწერლობისა, იგი, ვფიქრობთ, ქართველი მკითხველის ჯეროვან ყურადღებასაც მიიქცევს, რაც თავისთავად იქნება გამართლება ამ ძეგლის ახალ ქართულად თარგმნისა. თარგმანი შესრულებულია ყ. მინის გამოცემის მიხედვით (იხ. პატროლოგია გრეკა-პგ, გამოსცა ყ. მინმა, ტ. 2, სვ. 1168—1185).

ე დ ი შ ე რ ქ ე ლ ი ძ ე

ვხედავ, რომ მეტად მოსურნე ხარ, რჩეულო დიოგენეტე, შე-
ისწავლო ქრისტიანთა ღვთისმსახურება. გულმოდგინედ ეძიებ,
რომ მთელი სისრულით გაიგო მათ შესახებ ყოველივე, თუ
რომელ ღმერთს ერწმუნენ ისინი, ანდა როგორ მსახურებენ
მას, რამეთუ ქრისტიანები ამ სამყაროს განეკრძალვიან, ხო-
ლო სიკვდილს არაარად რაცხენ. არც ელინთა ცრუ ღმერთებს
თვლიან ისინი ღმერთებად, არც იუდეველთა ღვთისმოშიშებას¹
იწყნარებენ. გინდა გაიგო იმ წრფელი სიყვარულის² შესახებ,
მათ შორის რომ სუფევს. იმასაც ეძიებ, თუ რა არის ეს ახა-
ლი ტომი ანდა ახალი წესი ცხოვრებისა, რომელიც ადრე
არ იყო და ამჟამად გაჩნდა.

ვიწყნარებ შენს ამ სურვილს და ვითხოვ ღვთისაგან, რო-
მელიც გვანიჭებს ყველას მეტყველებისა და სმენის უნარს,
მოგვმადლოს ორივეს, — მე ნიჭი იმგვარად თქმისა, რომ უმე-
ტესად გარგოს ჩემს მსმენელს, ხოლო შენ იმგვარი გულის-
ყური, რომ ცუდად არ დაშვრეს ჩემი ენა.

დროა, განიწმიდო თავი ყველა იმ აზრისაგან, წინდაწინ
რომ დაუბყრია შენი გონება; უკუაგდე მცდარი ჩვეულება და
იქმენ ახალი კაცი, როგორც ეს იყო დასაბამიდან, რომ ამ გზით
გახდე (როგორც თვითვე აღიარებ) მსმენელი ახალი სიტყვისა,
ჯერ კი იხილე (არა მხოლოდ თვალთ, არამედ გონებითაც),
თუ რა არის არსება და გვარი მათი, რომლებსაც თქვენ ღმერ-
თებად თვლით და სახელდებთ ასე. განა ქვა არ არის ზოგი
მათგანი, მსგავსი იმ ქვისა, ფეხს რომ ვაბიჯებთ, სხვა კი განა
სპილენძი არ არის, არაფრით უმჯობესი იმ სპილენძისა, რის-
განაც ჩვენთვის გამოსადეგ ჭურჭლებს ვამზადებთ? ასევე,
ზოგი მათგანი ხეა, თანაც უკვე დამზალი, ზოგი ვერცხლია,
რასაც სჭირდება ვინმე მცველი, რომ არავინ მოიპაროს. ზოგი
რკინაა, ჟანგისაგან შექმული, ზოგიც თიხაა, არაფრით უკეთე-
სი იმ თიხისა, რისგანაც უმეტესად შეურაცხი საჭიროების
ჭურჭელს ამზადებენ.

ნუთუ ყოველივე ეს ხრწნადი ნივთისაგან არ არის ქმნილი?
ნუთუ რკინისა და ცეცხლისაგან არ გამოქედეს ისინი? ნუთუ
ქვისმთლელმა არ გამოაქანდაკა ერთი მათგანი, მეორე კი —
სპილენძის ოსტატმა, მესამე — ვერცხლისმჭედელმა, ხოლო მე-

ოთხე — მექოთნემ? ნუთუ ყოველი ნივთი, რომელიც ხელოსანმა ამგვარად გამოკვეთა, სხვა სახით არ იყო შექმნილი? ნუთუ იმავე ნივთისაგან დამზადებულ ჭურჭლებს ხსენებული ხელოსნები ღმერთთა მსგავსად ვერ გარდაქმნიან? ნუთუ არ ძალუძს ადამიანის ხელს, კვლავ ჭურჭლად აქციოს თქვენი სათაყვანო კერპი? განა არ არიან ისინი ყრუ, ბრმა, უსულო ან უგრძნობელი, უძრავი თუ ყოვლითურთ ლობადი და ხრწნადი? მათ თქვენ ღმერთებად უხმობთ, მათვე ემონებით და ეთაყვანებით, ემსგავსებით კიდევ სავსებით. ქრისტიანებიც იმიტომ გძაგთ, რომ ღმერთებად არ რაცხენ მათ, თუმცა თავად თქვენ, რომლებიც ამგვარ კერპებს ღმერთებს უწოდებთ, ქრისტიანებზე მეტად შეურაცხყოფთ მათ, მეტად დასცინით და აბუჩად იგდებთ, რადგანაც ქვისა და თიხის კერპი დაუცველად გაქვთ და ისე სცემთ თაყვანს, ხოლო ვერცხლისასა და ოქროსას ღამით ჩაკეტავთ, დღისით კი მცველებს დაუსვამთ წინ, რომ არავინ მოიპაროს. თუ ეს კერპები რაიმეს გრძნობენ, თქვენეული მსხვერპლშეწირვა სატანჯველია მათთვის, ხოლო თუ უგრძნობელნი არიან ისინი, მაშინ მართლაც რომ შეურაცხყოფთ მათ, როდესაც სისხლითა და ცმელით აღასრულებთ თქვენს მსახურებას. განა ვინმე თქვენგანი გაუძლებს ამას, განა აიტანს ვინმე ამგვარ მოპყრობას? ადამიანთაგან არავინ იქნება, ნებით რომ იტვირთოს მსგავსი სასჯელი, რადგანაც გრძნობა აქვს მას და გონება, ხოლო ქვა იტვირთებს, რადგანაც ვერაფერს გრძნობს იგი.

ამგვარად, თქვენვე ამხილებთ, რომ უგრძნობელნი არიან თქვენი კერპები, ქრისტიანები კი ამგვარ ღმერთებს არა ჰმონებენ; ამის შესახებ კვლავაც შემეძლო ბევრი მეთქვა, მაგრამ მათთვის, რომლებიც ზემოთქმულს არ იკმარებენ, კიდევ მეტის თქმა ფუჭი იქნება.

ვფიქრობ, უფრო მეტად ის გასურს გაიგო, რატომ არ არის ქრისტიანული ღვთისმსახურება ისეთივე, როგორიც იუდაური: თუმცა იუდეველნი ზემოთქმულ მეკერპეობას უარყოფენ, თუმცა ერთ ღმერთსა სცემენ თაყვანს და თვლიან, რომ ყოველთა უფალს გულისხმყოფენ, მაინც ისინიც მეკერპეთა მსგავსად აღასრულებენ ღვთისადმი მსახურებას და ცთომილებაში ვარდებიან. თუკი უგრძნობელთა და ყრუთა მიმართ ელინური მსხვერპლშეწირვა უგუნურების მაგალითია, იუდეველთა თაყ-

ვანება სისულელე უფროა, ვიდრე ღვთისმსახურება, რადგანაც იმგვარად მიაქვთ შესაწირავი, თითქოს ღმერთს რამე ეჭირვებოდეს. ვინც შექმნა ცა და მიწა და ყოველივე მათ შორის, ვინც ჩვენ გვანიჭებს ყოველივეს, რასაც ვითხოვთ, ცხადია, მას არაფერი ეჭირვება იმდაგვარი, რასაც თავად უბოძებს მათვე, რომლებიც თვლიან, რომ თვით უძღვნიან!

იუდეველნი ფიქრობენ, რომ სისხლით, ცმელით და ყოვლადდასაწველთა მიერ აღსრულდება მსხვერპლშეწირვა და რომ ამგვარი ძღვენი თაყვანისცემაა უფლისა; ამიტომაც, ვგონებ, არაფრით განირჩევიან მათგან, რომლებიც ყრუ კერპთა მიძარტ ავლენენ მსგავს პატივდებას; თუკი, ერთი მხრივ, კერპებს სწირავენ, რომლებსაც არ ძალუძთ ამგვარ პატივთან ზიარება, მეორე მხრივ, მას უძღვნიან, ვისაც არაფერი არ ეჭირვება.

იუდეველთა სიფრთხილე საჭმელთა გამო, აგრეთვე შაბათისადმი მათი რწმენა, წინადაცვეთის ნიშნით ქადილი, მარხვისა და ახალმთვარის შესახებ მათეული წარმოსახვანი სასაცილოა მხოლოდ და სათქმელად არ ღირს. როგორ არ არის ურჯულოება, ქმნილებათა შორის, რაც კი ადამიანებს შეუქმნა ღმერთმა, რომ ერგო მათგან, ერთნი მიიღო, ვითარცა კეთილად ქმნილნი, სხვა კი უარყო, როგორც ზედმეტი და უსარგებლო? როგორ არ არის უღვთოება ფიქრი იმისა, რომ კრძალავს ღმერთი კეთილის ქმნას შაბათისათვის? როგორ არ არის დაცივნის ღირსი, ვინც სხეულის დაკლებულ ნაწილს რჩეულობის ნიშნად მიიჩნევს⁴, ისე თითქოს ამგვარნი პირნი გამორჩევით უყვარდეს უფალს? ნუთუ ვინმე ღვთისმსახურებად ჩათვლის (თუ არა უმალ უგუნურების სახედ) მათ მცდელობას, რომ ვარსკვლავებსა და მთვარეზე თვალის დევნებით თვეთა და დღეთა შესახებ დაკვირვებანი აწარმოონ, შემდეგ კი ღვთის განგებანი და ჟამთა ცვლანი სურვილისამებრ განაწესონ დღესასწაულებად და გლოვის დღეებად.

გფიქრობ, საკმაოდ გაუწყე იმის შესახებ, რომ მართებულად უარყოფენ ქრისტიანები როგორც საერთოდ ყოველგვარ ფუჭ საქმესა და ცთომილებას, ასევე იუდეველთა ცნობისმოყვარეობასა და ამპარტავნებას. თვით ქრისტიანთა ღვთისმსახურების საიდუმლო კი კაცთაგან არ ისწავლება; ნურც შენ მოელი.

ქრისტიანები არც საცხოვრებელი ადგილით, არც მეტყველებით, არც ჩვეულებებით არ განიჩივებიან სხვათაგან. ისინი არც სადმე კერძო ქალაქებში სახლობენ, არც სხვა ენაზე მეტყველებენ, არც რაღაც უჩვეულო ცხოვრების წესს მისდევენ, თუმცა მათი მოძღვრება ცნობისმოყვარე კაცთა გონებისა და გულმოდგინების ნაყოფი როდისა არცთუ ადამიანურ სწავლებებს იმარხავენ ისინი ზოგთა მსგავსად.

ქრისტიანები ელინთა ქალაქებშიც მკვიდრობენ და ბარბაროსთა შორისაც, შესაბამისად თითოეულის წილხვედრისა. ადგილობრივ ჩვეულებებსაც იცავენ ისინი ტანსაცმლით, ყოფით, მთელი დანარჩენი ცხოვრებით, თუმცა, ამასთან ერთად, მოქალაქეობის საკვირველ და ჭეშმარიტად უჩვეულო წესსაც ავლენენ: თითქოს საკუთარ მამულებში მკვიდრობენ, მაგრამ მკვიდრობენ, როგორც უცხონი. მოქალაქეთა მსგავსად ერთგებიან ყოველ საქმეში, მაგრამ დაითმენენ ყოველივეს, როგორც სტუმარნი. ყოველგვარი უდაბურება მამულია მათი და ყოველი მამული — უდაბურება. იქორწინებენ, როგორც სხვები, შეილებსაც შობენ, თუმცა შობილთ უპატრონოდ როდი ტოვებენ. ტრაპეზს ზიარად დააგებენ, მაგრამ არათუ-სარეცელსაც. ხორციელნი არიან, თუმცა ხორცის მიხედვით არ ცხოვრობენ. მიწაზე მკვიდრობენ, მაგრამ ცასა შინა მოქალაქეობენ. არ ეურჩებიან დადგენილ კანონებს, მაგრამ მათივე ცხოვრების წესით იმარჯვებენ კანონებზე. უყვართ ყველანი და ყველასაგან იდევნებიან; შეურაცხყოფენ მათ, სჯიან და კლავენ, ისინი კი ცხოველდებიან; გლახაკნი არიან და მრავალს განამდიდრებენ. ყველაფერი აკლიათ და უხვად აქვთ ყოველივე; უპატიო-ყოფენ მათ და უპატიობათა წილ იდიდებიენ; ბრალს დებენ მათ და ისინი მართლდებიან; აძაგებენ, ისინი კი აკურთხებენ; შეურაცხყოფენ, ისინი კი პატივს მიაგებენ; კეთილს იქმან და ისჯებიან, როგორც ბოროტნი, დასჯილნი კი იხარებენ, ვით ცხოველქმნილნი. უცხოტომელთა მსგავსად ებრძვიან მათ იუდეველნი, ელინები კი დევნიან, თუმცა მიზეზად მტრობისა მოძულენი ვერას ამბობენ.

მარტივად რომ ვთქვათ, რაც არის სული სხეულში, ქრისტიანებიც იგივე არიან ამ სამყაროში და როგორც სული განეფინება სხეულის- ნაწილთა შორის, ასევე ქრისტიანებიც — ქვეყნიერების ქალაქებში. სული თუმცა ხორცში მკვიდრობს,

არ არის ხორცისაგან, ქრისტიანებიც თუმცა ამქვეყნად სახლობენ, ამქვეყნისანი არ არიან. უხილავია სული, ხილულ სხეულში შეკრძალებული; ქრისტიანებიც თუმცა ამქვეყნად იმყოფებიან, უხილავად ჰკიეს მათმიერი ღვთისმსახურება, სძაგს სული ხორცს და ებრძვის მას, თუმცა ვერაფერს აკლებს, რადგანაც სული სიამეთაგან განაკრძალებს თავს. ქრისტიანებიც სძაგს ქვეყნიერებას, მაგრამ ვნებას ვერ მოაწევს მათზე, რადგანაც ისინიც განუდგებიან სიამეებს. უყვარს სულს მისი მოძულე სხეული და სხეულის ნაწილები. ქრისტიანებსაც უყვართ მათი მოძულეები; დახშულია სული სხეულში, მაგრამ სწორედ სული შეამტკიცებს იმავე სხეულს; ქრისტიანებიც პყრობილნი არიან ამ სამყაროში, როგორც ციხეში, მაგრამ სწორედ მათ უპყრიათ ეს სამყარო. უკვდავი სული მოკვდავ კარავში მკვიდრობს; ქრისტიანებიც მოკვდავთა შორის სახლობენ, მაგრამ ცათა შინა უკვდავებას მოელიან. საჰმელ-სასმელს მოკლებული სული აღორძინდება, ქრისტიანებიც, რომლებიც დღემუდამ იგვემებიან, მეტად და მეტად მრავლდებიან. ასეთი ხვედრი განაწესა მათთვის უფალმა, რისგან განდგომაც არ ეგების.

როგორც უკვე ვთქვი, არათუ ამქვეყნიური რამ მოძღვრება გადაეცათ მათ, არათუ იმას იღვწიან ისინი, რომ კვდომადი აზრები დაიმარხონ, არათუ კაცობრივ საიდუმლოთა განგებულებას ერწმუნებიან; თავად ყოვლისმპყრობელმა, ყოვლის შემოქმედმა და უხილავმა ღმერთმა, თავად მან, ცათაგან დააფუძნა კაცთა შორის ჭეშმარიტება — წმიდა და გონებით აღუქმელი სიტყვა; მათ გულებში დაამტკიცა მან იგი. არა ისე, როგორც შეიძლება იფიქროს ზოგმა, თითქოს კაცთათვის მოავლინა მან ვინმე მსახური, ან ანგელოზი ან არქონტი ანთუ ერთერთი გამგებელი ქვეყნიერებისა ანდა თუნდაც ვინმე ისეთი, ვისაც ერწმუნა ცათა შინა განმგებლობა, არამედ ის მოავლინა, ვინც თავად არის ყოველივეს შემოქმედი და დამბადებელი, რომლის მიერაც ცანი შექმნა მან, რომლის მიერაც ზღვა მოჩქცია თავის საზღვრებში; ის მოავლინა, ვისი საიდუმლონიც საიმედოდ დამარხულია ყველა სტიქიონში, ვისი ძალითაც იცავს მზე საზომს ღღეთა სანგრძლივობისა, ვინც უბრძანა მთვარეს ღამით ამოსვლა, ვისაც ჰმორჩილებენ ვარსკვლავნი, მთვარის სრბოლას მიდევნებულნი, ვინც განაწესებს, განსაზღვრავს და განაგებს ყოველივეს: ცას და ცის წიაღს, მიწას და იმას, რაც მიწაშია,

ზღვას და ზღვის სიღრმეს, ცეცხლს, ჰაერს, უფსკრულს, — ყოველივეს მაღალთა შინა, სიღრმეებში და მათ შორისაც.

ეს მოავლინა მან კაცთა შორის, თუმცა არა იმიტომ (შეიძლება ასეც იფიქრონ) თითქოს მძლავრებას ანდა ვინმესათვის შიშისა თუ ძრწოლის მოგვრას განიზრახავდა, არამედ — მხოლოდ მოწყალებისა და სიმდაბლის გამო. მან, თვით მეუფემ, მოავლინა ძე თავისი, როგორც მეუფე; მოავლინა, როგორც ღმერთი, როგორც კაცი კაცთა შორის; მოავლინა როგორც მხსნელი; გვარწმუნებს მისგან მოვლენილი, არათუ გემძლავრობს, რადგანაც მძლავრება უცხოა ღვთისათვის; მოგვივლინა თავისი ძე, რომ გვიწოდოს მან, არათუ გვღვენოს; მოგვივლინა, რომ გვიყვაროს, არათუ გვსაჯოს; ხოლო მოავლენს მას მსაჯულადაც და ვინ იქნება, რომ იტვირთოს მისი ამგვარი მოვლინება?⁵..

მსეცებს მიუგდეს ისინი, რომ უარეყოთ უფალი, მაგრამ ვერ სძლიეს. ნუთუ ვერ ამჩნევ, რაც უფრო მეტად ტანჯავენ მათ. უფრო და უფრო მრავლდებიან? ამგვარი საქმენი კაცთაგან როდი ზდება. ღვთის ძლიერებაა ყოველივე ეს და ნიშნებია მისი მოვლინებისა.

განა საერთოდ იცოდა ვინმემ, რა არის ღმერთი, ვიდრე მის მოსვლამდე? ან იქნებ ღირსადსარწმუნო ფილოსოფოსთა ცარიელი და ფუჭი სიტყვები გესათნობა, რომელთაგან ზოგი ცეცხლს ამბობს ღმერთად (სწორედ იმას უწოდებენ ღმერთს, რაშიც მოელით მათ შესვლა), ზოგი წყალს, სხვა კიდევ სხვა სტიქიონს, თუმცა ესენი თავად არიან ღვთისაგან ქმნილნი. თუ სარწმუნოა რომელიმე ამ სიტყვათაგან, შეიძლებოდა მსგავსადვე ღმერთად დაგვესახა ყველა ქმნილება. მაგრამ ეს ყოველივე ზმანებაა და ცთომილება მსახვრალთა. კაცთაგან არავის უხილავს ღმერთი, არცთუ შეუცვნია იგი. თვით გააცხადა თავისი თავი დაგააცხადა სარწმუნოების წიად, რადგანაც მხოლოდ ამ გზით შეიძლება მისი ხილვა⁶. უფალი ღმერთი, შემოქმედი ყოველთა, რომელმაც შექმნა ყოველივე და მწყობრად შეაწყო, არა მარტოდენ კაცთმოყვარე გვექმნა ჩვენ, არამედ სულგრძელიც. ამგვარი იყო იგი მარადჟამს; არის და იქნება კიდევ ყოველთვის კეთილი და ქველი, ურისხველი და ქეშმარიტი. მხოლოდ იგია ქეშმარიტად სახიერი; ამიტომაც განიზ-

რახა მან ზრახვა დიადი, ერთ უთქმელი, რაც მარტოოდენ ძეს გაანდო. და ვიდრე იგი საიდუმლოდ იცავდა და იმარხავდა თავის ბრძნულ ზრახვას, ისე ჩანდა, თითქოს არად მიეჩინდით, თითქოს არას ზრუნავდა ჩვენთვის, მაგრამ როდესაც საყვარელი ძის მიერ გაგვიცხადა და საჩინო-გვიყო დასაბამიდან განზრახული, ერთობლივად მოგვმადლა ყოველივე: ვეზიარეთ მის ქველ საქმეებს, ვიხილეთ კიდევ და შევიმეცნეთ. ვინ ელოდა ამას ჩვენგანი? მან კი უწყოდა განგებულად ყოველივე მის ძესთან ერთად.

ბოლო უამამდე გვადროვა ღმერთმა, რომ ნებისამებრ მივყოლოდით უწყსო ვნებებს, გულისთქმასა და სიტკბოებას მივცემოდით, თუმცა არათუ იხარებდა ჩვენი ცოდვებით, არამედ დაითმენდა, არათუ სათნო-უჩინდა ჩვენეული უსამართლობა, არამედ ჰბადებდა სიმართლის გონებას, რომ იმუამინდელ საქმეთა გამო მხილებულნი და არადირსნი ცხოვრებისა აწ ღვთის წყალობით ვღირსებოდით იმავე ცხოვრებას, რო მ ჩვენ, რომლებსაც თვით ჩვენივე უძლურება მოგვაკლებდა ღვთის სასუფეველს, აწ ღვთის შეწევნით ძალმოსილება შეგვძინა. რაჟამს ბოლომდე აღვასრულეთ უსამართლობა, რაჟამს სრულიად ცხადი გახდა, რომ დავისჯებით და მოგვეგება ცოდვის გამო, რომ სიკვდილია ჩვენს წინაშე, მაშინ დრო დადგა, ის დრო, რომელიც წინდაწინვე განსაზღვრა ღმერთმა, რომ ამიერიდან გამოვევლინა მას წყალობა და ძალი თვისი.

ზექარბი კაცთმოყვარებისა და სიყვარულის გამო არ მოგვიძაგა, არ განგვაგდო უფალმა ჩვენ, არ მოიხსენა უკეთურება ჩვენი, არამედ სულგრძელობით დაითმინა ყოველივე და ჩვენი ხსნისათვის განსცა ძე თვისი, ურჯულოთათვის — წმიდა, ბოროტთათვის — უბოროტო, უსამართლოთათვის — სამართლიანი, ხრწნადთათვის — უხრწნელი, მოკვდავთათვის — უკვდავი. სხვას რას შეეძლო დაეფარა ჩვენი ცოდვები, თუ არა მის სიმართლეს? ვისგან შეგვეძლო ჩვენ, უღვთოებსა და ურჯულოებს, შეგვეძინა განმართლება, თუ არა ოდენ ძე ღვთისას მიერ? ჰოა, უტკბესო ნაცვალგებაჲ! ჰოა, მიუწვდომელო დაბადებაჲ! ჰოა, უჩვეულო ქველისსაქმენო! რამეთუ მრავალთა ურჯულოება ერთმა მართალმა დაიფარა და იმ ერთის სიმართლემ მრავალი ურჯულო განამართლა. წინარე ღროში ის ცხადყო ღმერ-

თქმა, რომ უძლურია ჩვენი ბუნება. თვით მიწვედეს ცხოვრებას. აწ კი მანვე მაცხოვარი გამოგვიჩინა, რომელსაც ძალუძს იხსნას უძლურბაი. ორივე მზრივ ის სურდა უფალს, რომ გვერწმუნა მისი სიკეთე და შეგვეერაცხა იგი მზრდელად, მამად და მოძღვრად, თანამზრახველად და მკურნალად ჩვენდა, აგრეთვე, გონებად, სინათლედ, პატივად, დიდებად, ძალად, ცხოვრებად, რომ არ გვეზრუნა სამოსისა თუ საზრდელისათვის.

თუ ამგვარ რწმენას დაეშურები და შეიწყნარებ, უპირველესად შეიცნობ მამას; რადგანაც ღმერთმა შეიყვარა კაცნი და შეუქმნა მათ სამყარო, მათვე დაუმორჩილა ყოველივე ამქვეყნიური, მიანიჭა მათ მეტყველება და გონიერება, მხოლოდ ისინი ღირს-ყო მისდა საქვერეტად, შექმნა ისინი საკუთარი სატისაგან⁷, მოუვლინა მათ ძე თვისი მხოლოდშობილი და აღუთქვა ცათა შინა სასუფეველი, რასაც მიმადლებს მის მოყვარულებს.

შეიცან, რაოდენი სიხარულით უნდა აღივსო, რაოდენ უნდა შეიყვარო უფალი შენი, ვინც უწინარეს აგრერიგად შეგიყვარა შენ. თუ შეიყვარებ, მის სიკეთესაც უნდა აბაძობ. ნუ გაიკვირვებ, ვით ძალუძს კაცს ღვთისადმი ბაძვა. თუკი ინებებს, ძალუძს კიდევც⁸! არათუ ის არის სიკეთე, რომ მოყვასს მძლავრობდე. ანდა გასურდეს, ჰმეტობდე უძლურს, ან სიმდიდრეს ეშურებოდე ანდა გლახაკთ აჭირვებდე. ამ გზით ვერავეინ გახდება მბაძველი ღვთისა. ეს ყოველივე ვერ ეთვისება მის სიღიადეს.

როდესაც ვინმე მოყვასის ტვირთსაც თვით იტვირთებს და შეეცდება, რომ მასზე უძლურს თვისი ძალით კეთილი უქმნას, როდესაც იგი ღვთისგან ბოძებულს გლახაკთ განუყოფს და მათთვის ღმერთად გამოჩნდება, ასეთი ვინმე მართლაც არის მბაძველი ღვთისა. და შენც, როდესაც ჰეშმარიტად შეიმეცნებ ციურ ცხოვრებას, ზმანებულ სიკვდილს არად შეერაცხავ, ხოლო შიში გექნება ჰეშმარიტისა, რაც დაეწინდათ საუკუნო ცეცხლში დასჯილებს (ცეცხლი კი ყველას სრულად დასჯის, ვინც მასში შევა), მაშინ იხილავ მიწაზე მყოფი, რომ ღმერთი მოქალაქეობს ცათა შინა, მაშინ შენც იწყებ ღვთის საიდუძლოთა გამოთქმას, შეიყვარებ და თაყვანსცემ ყველას, ვინც არ ინება სასჯელის შიშით ღვთის უარყოფა, მაშინ შენც დაგმობ

საწუთროს მზაკეობასა და ცთომილებას და გაგაოცებს იმათი სიძხნე, ვინც დაითმინა ცეცხლში დაწვა სიმართლისათვის; ნეტარყოფ მათ, რაჟამს შეიცნობ სხვა ცეცხლის ძალას.

არა ვქადაგებ რაიმე უცხოს, არც უგუნურად ვეძიებ რასმე, არამედ რადგანაც მოწაფე ვიქმენ მოციქულთა, ვარ მოძღვარი ხალხთა. რაც გადმომეცა, გადავცემ იმათ, რომლებიც ღირსეულად დაემოწაფნენ ჭეშმარიტებას. ვინც მართლსწავლება მიიღო და სათაყვანო სიტყვისაგან იშვა, იმას ეძიებს, რომ ცხადად შეიცნოს ყოველივე, რაც თავად სიტყვამ გაუმქლავნა მის მოწაფეებს. დაუფარავად ეტყოდა მათ და აუწყებდა ყოველივეს ცხადქმნილი სიტყვა, რაც ვერ შეიცნეს ურწმუნოებმა, მოწაფეებს კი განემართათ. ვინც ის ირწმუნა, შეიცნო კიდევ საიდუმლონი მამისა; მოგვივლინა მამამ სიტყვა, რომ სოფელს გაცხადებოდა იგი. ეს სიტყვა ხალხმა შეურაცხყო, მაგრამ მოციქულებმა იქადაგეს მის შესახებ და წარმართებმა ირწმუნეს იგი. დასაბამიდან იყო სიტყვა, აწ კი გამოჩნდა, როგორც ახალი; ჟამიერ-იქმნა... მარად ახალი იშვება წმიდათა გულებში, ვინც მულამ იყო, დღეს კი ძედ შეირაცხა, ვინც განამდიდრებს ეკლესიას.

მადლი ივრცობა და მრავლდება წმიდათა შორის, რომლებსაც მისგან ენიჭებათ გონება და უმქლავნდებათ საიდუმლონი. ეგვევ მადლი აუწყებს მათ ჟამთა შესახებ, განიხარებს მორწმუნეთათვის, მიემადლება მამიებლებს, თუ არ გადავლენ ისინი რწმენის საზღვრებს და თუ მამათა განჩინებებს არ დაარღვევენ.

შემდეგ⁹, მოშიშება რჯულისა იგალობება, წინასწარმეტყველთა მადლი ცნაურდება, სახარებათა სარწმუნოება მკვიდრდება, მოციქულთა გადმოცემა კანონდება და ეკლესიათა მადლი იხარებს¹⁰. თუ ამ მადლს არ შეაუბრებ, შეიცნობ იმას, რასაც სიტყვა გვიქადაგებს, ვისგანაც ნებაგს, როდესაც ნებაგს. ამავე სიტყვის ნებითა და ბრძანებით გემეტყველებით და რაც გვეუწყა, სიყვარულით თქვენც გაზიარებთ. წადიერად ისმინეთ და შეიწყნარეთ, და შეიცანით, თუ რაოდენს მიმადლებს ღმერთი, რომლებსაც წრფელად უყვართ იგი. სწორედ ისინი არიან „სამოთხე ფუფუნებისა“, რამეთუ ყოვლადნაყოფიერ, კეთილყვავილოვან ხეს აღმოაცენებენ თავის თავში და მრავალფერი

ხილით გამშვენდებიან. ასეთ ადგილზე იზრდება ხე ცნობადი-სა კეთილისა და ბოროტისა და ხე ცხოვრებისა (შდრ. შესაქმე, 11. 17). ხოლო არათუ „ცნობადობა“ ანუ „ცოდნა“ წარწყმედს, არამედ — ურჩება. ნათლად ამბობს წერილი, რომ ღმერთმა დასაბამიდან სამოთხის შუაში დანერგა ხე ცნობადისა და ხე ცხოვრებისა; ამით „ცოდნისმიერი“ „ცხოვრება“ ცხადყო მან, რაც არაწმინდად იგემეს პირველმშობლებმა. ამიტომაც, გველისაგან ცთუნებულნი, გაშიშვლდნენ; არ არსებობს „ცხოვრება“ „ცოდნის“ გარეშე და არ არსებობს უცთომელი „ცოდნა“ ჭეშმარიტი „ცხოვრების“ გარეშე. სწორედ ამ მიზეზით იყო ორივე ხე გვერდიგვერდ დანერგილი. ყოველივე ეს განკვრიტა მოციქულმა, როდესაც გაკიცხა იმგვარი „ცოდნა“, რომელიც ჭეშმარიტების მცნების გარეშე ესწრაფვის „ცხოვრებას“. ასე თქვა მან: „ცოდნა განალაღებს, სიყვარული კი აღაშენებს“ (1 კორ. 8. 1). ვინც თვლის, რომ ჭეშმარიტი და ცხოვრებით შეწამებული ცოდნის გარეშე იცის რამე, ვერ შეუცვნია, რომ გველისაგან არის ცთუნებული, რადგანაც არ უყვარს მას „ცხოვრება“. ხოლო თუკი ვინმე მოშიშებით ეძიებს „ცოდნას“ და ცხოვრებას ესწრაფვის, სასობაზე ემყნობა იგი და ნაყოფს მოელის. დაე, შენი გული იყოს შენივე „ცოდნა“, ხოლო სიტყვა ჭეშმარიტი, რომელიც უნდა შეიწყნარო, „ცხოვრებად“ გექმნეს. იტვირთე ძელი მისი და ეტრფიალე მის ნაყოფს; დღემუდამ მოისთველე ის, რაც საღვთოდ სასურველია, რასაც გველი ვერ შეეხება, რის ფერსაც ცოდვა ვერ მიიღებს, რისგანაც ევა არ გაიხრწნება, რაც მოგვანიჭებს რწმენას ქალწულისადმი და გაგვიცხადებს მაცხოვარებას, რაც განაბრძნობს მოციქულებს, რაც უწინამძღვრებს უფლის აღდგომას, შემოკრებს ქოროს და განამშვენებს მას სამკაულით, რაც მოძღვრავს წმინდანთ და იხარებს თვითვე, რომლის მიერ ვადიდებთ მამას. დიდება მისდა, უკუნისამდე, ამინ!

კ ო მ ე ნ ტ ა რ ე ბ ი

1. „ღვთისმოშიშება“ — „ღვისიდაიმონია“. ხსენებული ბერძნული სიტყვა, ზვეულებრივ, განიმარტება, როგორც „შიში ღვთისა“, ხოლო უარყოფითი აზრით, „ცრურწმენა“ („ღვილო“, — მეშინია; „ღვიმონიონ“ — ღვთიურობა). რამდენადაც ბერძნული სიტყვა „ღვიმონ“, რომელიც ანტიკურ პერიოდში „ღმერთს“ ნიშნავდა, ქრისტიანულ ხანაში „ღვთო-

- ნის". „ცრუ ღმერთის“, „ეშმაკის“ აღმნიშვნელად გარდაიქმნება, აბდენად, ზემომოტანილი კომპოზიტიც მსგავსი შინაარსით იტვირთება. ძველი ქართული მთარგმნელები მას, ჩვეულებრივ, თარგმნიან, როგორც „მარჩობლესმაკეული“ (როგორც ჩანს კომპოზიტიც პირველი წვერი „დეისი“ გაუიგივეს სიტყვას „დკოისი“. რაც „ორის“ აღმნიშვნელი ბერძნული სიტყვის მიცემითი ბრუნვაა მრ. რ-ისა).
2. „წრფელი სიყვარული“ — „ფილოსტორგია“. ხსენებული სიტყვა, ჩვეულებრივ, განიმარტება, როგორც ფაქიზი, სათუთი სიყვარული, რაც მშობლიურობის განცდას შეიცავს (მაგ. სიყვარული დედისადმი, შვილისადმი, სამშობლოსადმი).
 3. შდრ. პგ. II, სვ. 1160.
 4. იგულისხმება წინადაცვეთა, რასაც ებრაელები გამორჩეულობის ნიშნად თვლიდნენ.
 5. აქ ტექსტს აკლია. მომდევნო ნაწილიდან ჩანს, რომ ავტორი ქადაგებს მარტივობას.
 6. თვალსაზრისი იმის შესახებ, რომ ღმერთი ყველასაგან უხილაკია და მისტიკური განცდის ეპოს მხოლოდ სარწმუნოებით შეიძლება მისი წვდომა, განსაკუთრებით მკაფიოდ გამოთქვა წმ. გრიგოლ ნოსელმა: „როდესაც დავცილდი მთელ შესაქმეს, როდესაც განველე ყოველივე ის, რაც ქმნილია და შემეცნების ყოველგვარი გზა მივატოვე, მაშინ სარწმუნოებით ვპოვე საყვარელი ჩემი“ შდრ. ძველი ქართული თარგმანი: „რამაჲს დაუტევენ ყოველნი დაბადებულნი და თანაწარპკედ ყოველთა აგებულებათა და ყოველთა უხილაეთა და ხილულთა არსებათა და ყოველივე მისაწოდომელად საგონებელი გამოძიებად დაუტევე. სარწმუნოებისა შეიერ კპოვე საყუარელი იგი“ (საქართველოს ეკლესიის კალენდარი, თბ., 1989, გვ. 258).
 7. შდრ. „ეკ ტეს იდიას ეიკონოს ეპლასე“; რამდენადმე სხვაგვარია ლათინური თარგმანი: „და იმაგინემ სუამ ფორმავეიტ“ („რომლებიც თავისი ხატის მიმართ გამოსახა“).
 8. შესაბამისი ბერძნული ტექსტი „დიუნატამ, თელონტოს აუტუ“ შეიძლება ორგვარად გავიგოთ: „შემძლებელია (კაცი), როდესაც ინებებს (ღმერთი)“ და „შემძლებელია (კაცი), როდესაც ინებებს (თვით კაცი)“.
 9. იგულისხმება ქრისტიანობაში წვდომის მომდევნო სათეხური
 10. „იხარებს“ — „სკირტა“ ბერძნული სიტყვა პირდაპირი აზრით ნიშნავს „ხსლომას“, გადატანით კი (აღნიშნულ კონტექსტში) „სიხარულით აღტაცებას“.

ძველი ბერძნულიდან თარგმნა, წინათქმა და
კომენტარები დაურთო ელიშერ კელიძემ.

ჰერმენი

მოციქულთა შემდეგ ქრისტიანთაგან მცირედი თუ შეეცდებოდა ხოლმე საკუთარი რწმენის წერილობით გადმოცემას. მათ შორის ბევრი უბრალო. ლატაკი ხალხი იყო და ქრისტეს სწავლებას ისინი კაცობრივი სიბრძნისა და გონიერების წყალობით როდი სწვდებოდნენ, არამედ სული წმიდის ძალით. თავად მოციქულებიც, მხოლოდ განსაკუთრებული შემთხვევის გამო თუ დაწერდნენ ხოლმე რაიმეს. და მაინც, ჩვენამდე მოაღწია ადრექრისტიანული ხანის მოღვაწეების ნაშრომებმა, რომლებიც ძველი და ახალი აღთქმის ყველაზე უფრო ავტორიტეტულ კომენტარებად დარჩა.

ამასთან, წმ. მამები საღმრთო წერილის განმარტებით როდი იფარგლებოდნენ. მათ ნაწერებში ლაპარაკია ქრისტიანულ რწმენაზე, დოგმატებზე. ქრისტიანული ცხოვრების სიძნელეებზე, ნაჩვენებია უშეცდომო გზა ცხოვნებისა — სინანული. პერმესის წიგნიც სწორედ ასეთი ხასიათისაა. წიგნის ავტორი მოციქულთა მოწაფეადაა მიჩნეული. არსებობს მოსაზრება, რომ იგი სწორედ ის პერმესი უნდა იყოს, რომელსაც პავლე მოციქული იხსენიებს (რომ. 16, 14). ეს მხოლოდ ვარაუდებია, უეჭველი ცნობები კი მისი ვინაობის შესახებ არაა მოპოვებული. დანამდვილებით ერთი რამის თქმა შეიძლება მხოლოდ, რომ ავტორი ამ წიგნისა პატიოსანი და ღმრთის მოშიში კაცი ყოფილა (ეს ყოველივე მის ნაწერებში ნათლად ჩანს), რომელიც დაუნდობელი დევნის ეამსაც ქრისტეს ერთგული დარჩა.

მისი ნაწერები სამ წიგნადაა წარმოდგენილი: „ჩვენებები“, „მცნებები“ და „იგავეები“. იგი გახლავთ აპოკრიფული ხასიათის ერთგვარი აპოკალიფსისი. ავტორი მოგვითხრობს იმ ჩვენებების შესახებ, რომლებიც მას თავად ჰქონია რომში. ჩანს, რომ ეს ნაწერები დიდი ავტორიტეტით სარგებლობდა; ერთ დროს იგი „ახალი აღთქმის“ წიგნებს შორისაც ირიცხე-

ბოდა, ეთიოპიაში კი იგი დღემდე ახალი აღთქმის ერთერთ წიგნად ითვლება.

ჰერმესის წიგნები ლათინურ ენაზე დაიწერა; თარგმანი, რომელსაც ჩვენ ახლა გთავაზობთ, გადმოღებულია რუსული ენიდან¹. ამჯერად გთავაზობთ პირველ წიგნს — „ჩვენებებს“.

¹ Антология. Ранние Отцы Церкви. Брюссель, 1988, გვ. 165—252. სადაც გამეორებით დაიბეჭდა მღვდელ პეტრე პრეობრაჟენსკის თარგმანის 1895 წლის გამოცემა.

ჩვენება

ხილვა პირველი

რომის მახლობლად მზრდიდნენ. იქვე ერთი გოგონაც იყო. კარგა ხნის მერე შევხვდი, ვიცანი, დასავით მიყვარდა. გამობდა ხანი და ვნახე ისევ, მდინარე ტიბრში ბანაობდა. ხელი შევაშველე, ამოვიყვანე წყლიდან. ვიფიქრე: „რა ბედნიერი ვიქნებოდი ასეთი ლამაზი სახისა და ზნის ცოლი რომ მყოლოდა-მეთქი“. ეს იყო და ეს, ამაზე შორს ფიქრი არ წამსვლია. გადიოდა დრო და მე კვლავ იგივე გულისთქმა დამყვებოდა თან. ერთხელ, გზად მიმავალი, ვაქებდი უფლის შესაქმეს და ვფიქრობდი: რა ბრწყინვალე და დიდებულია-მეთქი იგი. სეირნობისას, ჩამეძინა. სულმა ამიტაცა და ძეხორციელი რომ თავისით ვერასგზით ვერ გაივლიდა, ისეთი ადგილებისაკენ წამიღო. კლდოვანი იყო იქაურობა, გაუფალი და ღვარქნილი ბილიკებით დასერილი. გავიარე ეს ადგილი, გავივაკე. სწორ ადგილას, სალოცავად მოვიყარე მუხლი, საკუთარი ცოდვების აღსარებას მოვეყევი. სწორედ ამ დროს, ლოცვისას, ცა გაიხსნა და ის ქალი გამოჩნდა, ამდენ ხანს ჩემად რომ ვნატრობდი. მომესალმა ქალი ციდან და მითხრა: „გამარჯობათ, ჰერმეს“. შევხედე და ვკითხე: „ქალბატონო, აქ რას აკეთებთ-მეთქი?“ „შენი ცოდვების მხილება მსურს ღვთის წინაშე, აქ იმიტომ მოვედიო“. — „ქალბატონო, განა რა შეგცოდეთ-მეთქი“, — „მე არაო, მითხრა, მაგრამ ცათა შინა მყოფი უფალი, რომელმაც არაფრისაგან წმინდა ეკლესიას ქვეყნიერება მისცა და გაუმრავლა, გრისხავს, რამეთუ სცოდნე წინაშე ჩემსა“. „ქალბატონო, როდის და რით შეგცოდე რა მოვიქმოდე შენი საწინააღმდეგო. განა თაყვანს არა გცემდი, როგორც ქალბატონს, აკი დად მიმაჩნდი-მეთქი, მუდამ“. გაეღიმა ამის გაგონებაზე და მითხრა: „შენს გულში არაწმინდა გულის-თქმა გაჩნდა. განა არ იცი, მართალ კაცს უხიაგი აზრიც კი უმსგავსო საქციელის ტოლზე მოეკითხება. მართალი კაცისათვის ძვირი ფიქრიც კი მძიმე

კოდვან, რადგან მართალი კაცი, მართალსა და სწორზე ფიქრობს მუდამ. და როცა ჭეშმარიტზე ზრუნავს და გულმოდგინედ მიისწრაფვის მისკენ, უფლისაგან ენიჭება მადლი ყოველსა საქმესა ზედა. ხოლო, არაწმიდა სურვილებით გულდამძიმებულთ, სიკვდილი და საუკუნო ტყვეობა ელით. ეს განსაკუთრებით ეხება იმ ხალხს, რომელნიც ძლიერად შეემსჭვალნენ ამ სოფელს. წარმავალ სიმდიდრეში განცხრომილთ დაავიწყდათ სიკეთენი მომავლისა, საუკუნო ცხოვრებისა. და დაინთქმება მათი სულელები მარადიულ ცეცხლში: ეს ორგულთა ცხოვრების ნირია. არ გააჩნიათ მათ სასოება უფლისა, უდებებასა და დაუდევრობაში ილევა ცხოვრება მათი. შენ კი, ვევედრე უფალს, ის დაგხსნის კოდვებს შენაც და სახლეულთა შენთაც და ყოველთა წმიდათა“.

2. დაასრულა ეს სიტყვები და კიდევ დაიხურა ცის კაბადონი. ღრმა წუხილითა და შიშით დავრჩი მოცული. ჩემთვის ვფიქრობდი: „ეს მცირედიც თუ კოდვად შემერაცხა, იმ უამრავ კოდვებს რა ვუყო, რით ვიცხოვნო სული, როგორ ვევედრო უფალს, რა პირით ვთხოვო მოწყალება შენდობისა“. ამ ფიქრში ვიყავი, რომ უტებ, ჩემს წინ, თოვლივით თეთრი მერხი დაეშვა. მერე ქალი მოვიდა ბრწყინვალე ტანსაცმლით მოსილი, წიგნი ჰქონდა ხელთ. დაჯდა, მომესალმა. „გამარჯობა, ჰერმეს“. ცრემლსავსემ და შეჭირვებულმა ვუპასუხე: გამარჯობა-მეთქი, დედოფალო“. „რა დაგემართა, ჰერმეს, რა იქნა შენი სიმშვიდე, ზომიერება და მხიარულება“. ვუპასუხე: „დედოფალო, ერთმა მშვენიერმა ქალმა, თითქოსდა შემეცოდოს მის წინაშე რაიმე, ისე გამკიცხა-მეთქი“. მითხრა: „გულში ხომ გაგიჩნდაო იმ ქალის სურვილი — ღვთის მონას კი ასეთი რამ არ შეჰფერის. მათ ასეთი აზრიც კი, კოდვად ერაცხებათ. არაწმიდა ფიქრი უცხო უნდა იყოს ღვთის მონისათვის. სუფთა გულს უჭერო გულისთქმა არ უნდა შეეპაროს. მით უმეტეს, შენ, ჰერმეს. რაკი გაემიჯნე ყველა კოდვიან სურვილს და მოიპოვე უმანკოება დიდებული და სრული უბრალოება“.

3. „ისე კი. უფალი, საკუთრივ შენი კოდვებისათვის კი არ გრისხავს, არამედ შენთა სახლეულთა გამო. რომელთაც არაწმინდებით შეურაცხყვეს უფალი და მშობელნი თვისნი. შენ შეიღების სიყვარულმა გძლია. დროზე არ იტვირთე მათი

მხილება და სწორედ ამით შეუწყვე ხელი მათ უფრო და უფრო გარყვნას. ძლიერ დაცემას. ამის გამო გრისხავს უფალი. ამ ცოდვების გამო ხარ სწორედ ამსოფლიურ საქმეებში გახლართული, დამძიმებული. მაგრამ შეგეწევთ უფალი და შეგენდობა ყველა ცოდვა, რომელიც კი ქმნილა აქამომდე შენს ჭერქვეშ. გიხსნათ ღვთის მოწყალებამ შენ და სახლეულნიც შენნი, შეგინარჩუნა დიდება სულიერი. მოიკრიბე სულგრძელობა. შფოთისა და ყოყმანის გარეშე, ესწრაფე შენთა სახლეულთა განმტკიცებას. იხსენებდე მკედელს, რომელიც მანამ არ გაუშვებს ხელიდან ჩაქუჩს, სანამ თავისას არ გამოკვერავს, მოუღალავია მარჯვენა მისი. შენაც მის დარად, თავდაუზოგავად მოძღვრე შვილები შენი. დღენი-დაგ, მოუწყინებლად ჩანერგილი ჭეშმარიტი სიტყვის წინაშე უძლურია ბოროტი. წინასწარ ხედავს უფალი: გულით შეინანებენ სახლეულნი შენნი საკუთარ ცოდვებს. ჩაიწერება მათი სახელები ცხოვრების წიგნში¹.

დაასრულა ეს სიტყვები და მკითხა: „გსურს იმის მოსმენა, რასაც წავიკითხავ?“ „მსურს-მეთქი, დედოფალო“. „რაკი ასეა, მისმინე-ო“. გაშალა წიგნი, დაიწყო დიდებული, განმაცვიფრებელი კითხვა. წაკითხულის დატევნა ჩემს მეხსიერებას არ ძალუძდა, რამეთუ ყოველი სიტყვა შემადრწუნებელი იყო, მათი ხსომება გათანგავდა კაცს. თუმცა, სულ ბოლო სიტყვები, ცოტა იყო, თანაც ნუგეშის მომგვრელი და ამიტომ დამამახსოვრდა კიდევ: „აი, უფალი ძალთა, რომელმაც უზილავი ძალითა და დიდებული გონით შექმნა სამყარო. თავისი დიდებული ნებით კეთილქმნა არსება ყოველი. თავისივე ყოვლადძლიერი სიტყვით დაამტკიცა ცა, ხმელი დააფუძნა წყალზე, თავისივე ყოვლისმომცველი ძალით დაადგინა ეკლესია, აკურთხა იგი და იგივე ძალა შეუცვლის ნირს ცასა და მთას, კლდესა და ზღვას და გასწორდება ყოველი რჩეულთათვის, რათა აღესრულოს აღთქმა, რომელიც ბრწყინვალე დიდებაში მისცა მან თვისთა რჩეულთ, თუკი ისინი შეუვალნი სარწმუნოებით ყოფენ ცნებებს, რომელიც მიეცათ უფლისაგან“.

IV. კითხვას რომ მორჩა, წამოდგა მერხიდან. ოთხი ჭაბუკი

¹ მ. ფილ. 4. 3. აპოკ. 20—15.

მოვიდა. მერხი აღმოსავლეთისაკენ წაიღეს. თავისთან მომიხმო, მომიახლოვდა, და მკითხა: „მოგეწონათ ჩემი წაკითხული?“ — „დედოფალო, სულ ბოლო სიტყვები მომეწონა, წინა კი, საშიში და შემაძრწუნებელი იყო-მეთქი“. მითხრა: „ბოლო სიტყვები ღირსეულთ ეხებათ, პირველი კი — განდგომილთა და წარმართ“, ჯერ კიდევ ვსაუბრობდით, რომ უცებ ორი კაცი გამოგვეცხადა. მხრებზე შეისვეს იგი და იმ აღმოსავლეთისაკენ წარასხნეს. მხიარული მცილდებოდა, დამშვიდობებისას მითხრა: „განმტკიცდიო, ჰერმეს“.

ხ ი ლ ვ ა მ ე ო რ ა ე

1. გასულ წელს რომ ჩვენება ვიხილე, დაახლოებით ის დრო იყო. სეირნობისას გამახსენდა წინა გამოცხადება, კვლავ ამიტაცა სულმა და სწორედ იმ ადგილას მიმიყვანა, სადაც ადრე მომეცა ხილვა. მივალწიე თუ არა იმ ადგილს, მუხლი მოვიყარე ლოცვად: ვადიდებდი და ვმადლობდი უფალს, ჩემი ცოდვების წარმოჩინებისათვის. ლოცვა რომ დავასრულე, კვლავ ის მოხუცი ქალი ვიხილე, უწინ რომ მეჩვენა, სეირნობდა და რაღაც წიგნს კითხულობდა. უცებ მომმართა: „შეგიძლია ღვთის რჩეულთ აუწყოო მოსმენილი?“ ვუპასუხე: „დედოფალო, ბევრს ვერ დავიხსომებ, მათხოვე წიგნი და გადავიწერ-მეთქი“. „აილე და დამიბრუნეო უკან“. გამოვართვი წიგნი. განვმარტოვდი. ასო-ასო ვიწერდი ყველაფერს, რადგან ამოკითხულის აზრი სრულიად გაუგებარი იყო. წერას მოვრჩიო თუ არა, თავისთავად წამერთვა წიგნი, ვისგან თუ რისგან, არ ვიცი.

15 დღიანი მარხვისა და ლოცვის შემდეგ გამიხსნა უფალმა გადაწერილის აზრი. აი, ამოკითხულის შინაარსი: „ჰერმეს, უფალს განუდგნენ შენი შვილები, გმობდნენ მას. ამასთან, საშინელი უღმრთობა ჩაიდინეს: საკუთარი მშობლები დაასმინეს: ამით მათ დედ-მამის მიმცემთა სახელი დაიდგინეს: მშობელთა ღალატი არ იკმარეს. ამ ცოდვას აღვირახსნილი ბილწიერება შემატეს და აღივსო მათი ცოდვათა საწყაული უღმრთოებითა და უსამართლობით.

მაგრამ განუცხადე ეს სიტყვები შვილებსა და ცოლს შენ-

სას, (რომელიც ჯერ არს გახდეს დაი შენი. მას ჯერაც ვერ მოუთოკავს ენა და ამიტომაა „პირმან მისმან განამრავლა უკეთურება“¹...) მას მერე როც აუწყებ მას სიტყვებს, რომლის განცხადებაც უფალმა შენთვის მიბრძანა, მოეგება ცოლი შენი კეთილგონიერებას, დაიმჯირავს ენას თვისას და მიემადლება შეწყალება. ცოდვათა შენდობა ეწევა არა მარტო სახლეულთა შენთა, არამედ ყოველთა წმიდანთა, აქამომდე ცხორებულთა. თუკი ისინი მთელი გულით შეინანებენ საკუთარ ცოდვებს და თუკი მოიკვეთენ უნდობლობას უფლისა მიმართ, გულსა შინა თვისთა.

ამიტომაც აუწყე ეკლესიის წინამძღვართ, რომ განუხრელად ემსახურონ სიმართლეს, თუ სურთ სრულყოფილი დიდების მიღწევა. მართლის მოქმედთაც მოგეთხოვებათ სიმტკიცე და ერთგულება, თუკი გსურთ წმიდა ანგელოსთა თანადგომა. ნეტარ არიან, რომელთა დაითმინონ საშინელი დევნა საკუთარი სიცოცხლის ფასად, რამეთუ იფიცა უფალმა ძეი თვისი სანატრელი: უარყოფელნი ღვთისა, დაუსრულებელ სატანჯელს განიმზადებენო მომავალში. ეს სიტყვები განსაკუთრებით ეხებათ მათ, რომელნიც მომავალში განუდგებიან უფალს. აქამომდე შეცდენილთ, უფალმა თავისი დიდი წყალობა, შენდობა მიჰმალა“.

3. „შენაც დაივიწყე, ჰერმეს, ცოდვანი სახლეულთა შენთა. ნუ მიატოვებ დას შენსას. იზრუნე მათი გამოსწორებისათვის: ამოძიარე მათში უწინდელი უსჯულოებანი. ეს რომ შეძლო თავად შენ, ნამდვილად აღარ უნდა გქონდეს გულში სახლეულთა შენთა მიმართ წყრომა და ხსოვნა მათი ადრინდელი ცოდვებისა. ასეთნაირად გაწმენდილი გულიდან გამოსული შენი სწორი რჩევა, საკმარისია მათი მოქცევისათვის. ავის ხსოვნა — სიკვდილს შობს, სრული დაივიწყება მისი — სიცოცხლეს მარადიულს. შენთა სახლეულთა ცოდვების გამო, აკი შენც ბევრი ამქვეყნიური სიმწარე გერგო, ჰერმეს, რადგან თვითონ შენ, ნაკლებად აქცევდი მათ ცოდვებს ყურადღებას და უსარგებლო დაწესებულების საქმეებს მიეცი თავი, მაგრამ შენ, გაცხოვნებს უფალი, რამეთუ თავად არ განუდექი ღმერთს. თუ ბოლომდე შეინარჩუნებ შენს უბრალოებასა და შენივე საოცარ უნარს — საცდურისაგან კრძალვისას, მა-

თი მეშვეობით ცხონდები სწორედ. და არა მარტო შენ, ყველა, ვინაც კი შეიძლებს ამ სათნობათა შორის განმტკიცებას, ცხონდება. სიწმინდესა და უბრალოებაში მოარულნი სძლევენ ყოველგვარ ბოროტებას, მოიპოვებენ მარადიულ ცხოვრებას. ნეტარ იყვნენ სიმაართლის მყოფელნი... არ ეწყუათ მათ წარწყმედა უკუნისამდე. ვიცი, მეტყვი: წინ დიდი დევნააო მოსალოდნელი. თუ გაშინებს მომავალი, უარ-მყავუფალი ყოველთვის მიხედავს მსასოებელთა და მძებნელთა მისთა“.

4. ძილში, ძმებო, მშვენიერი ქაბუკი გამომეცხადა და მითხრა: „როგორ გგონია, ვინ იყო ის მოხუცი ქალი, წიგნი რომ მოგცაო?“ — სივილა-მეთქი — ვუპასუხე. „ცდები, ის სივილა არ ყოფილაო“ — მითხრა. „აბა ვინ იყო-მეთქი, ბატონო“ — „უფლის ეკლესიის სახეაო იგი“. „მოხუცი რატომ იყო-მეთქი?“ — ვკითხე. „ვიდრე შექმნამდე ხილულისა და უხილავისა (იგი უკვე არსებობდა, ამიტომაცაო ხანდაზმული, სწორედ მისთვის შეიქმნა სოფელი“. ამის შემდეგ საკუთარ სახლში ვიხილე ჩვენება, კვლავ ის მოხუცი ქალი მოვიდა და მკითხა: „თუ მიეციო ის წიგნი ეკლესიის წინამძღოლთ?“ — „არა-მეთქი, ჭერ“ — „კარგი გიქნია, კიდევ რამოდენიმე სიტყვის დამატება მსურს, როცა მოვრჩები ჩემს სათქმელს, დაე, შენგან ეუწყოს სიტყვები ჩემი რჩეულთა ჩემთა. ერში კი მათ მიერ განცხადდეს სიტყვები ესე. ორი წიგნი უნდა დაწერო. ერთს კლიმენტოს მისცემ, მეორეს — გრაპტეს. პირველი მათ გარე ქალაქებში გაავრცელებს, რადგან ეს მასზეა მინდობილი; გრაპტე ობლებსა და ქვრივებს დამოძღვრის. შენ კი, ამ ქალაქში, ეკლესიის მსახურთა შორის აუწყე ეს სიტყვები ერს“.

ხ ი ლ ვ ა მ ე ს ა მ ე

დიდხანს ვლოცულობდი და ვევედრებოდი უფალს, გაეხსნა ჩემთვის ის იღუმალი, რომლის განცხადებაც მან იგივე მოხუცი ქალის მეშვეობით აღმითქვა და ერთხელაც ძმებო, ასეთი ჩვენება მომეცა, მოხუცი ქალი გამომეცხადა ლამით და მითხრა: „რაკი ასე გსურს ყველაფრის ცოდნა, იმავე მინდორზე და-

ახლოებით ექვსი საათისათვის მოდიო. გეჩვენები და გაუწყებ იმდენს, რამდენიც საკმარისია შენთვის“. ვკითხე: „რომელ მინდორზე მოვიდე-მეთქი?“ „სადაც გსურსო, — მითხრა. გუნებაში ერთი მშვენიერი ადგილი ამოვარჩიე და ის იყო უნდა მეთქვა, რომ „მანდ მოვალ, რახან ასე გსურსო“ — მითხრა. ხოდა, ასე ძმებო, წავედი დათქმულ ადგილას, დავინიშნე საათი. მივედი, რას ვხედავ? სავარძელი არ დგას იმ ადგილზე? ზედ სელის ბალიში დევს, ზემოდან ზეწარი ჰქონდა საჩრდილობელად გადაჭიმული. შევეძრწუნდი. მარტო ვარ, ირგვლივ არავინაა, თმები ყალყზე დამიდგა. გონს რომ მოვეგე, დავეწინარდი, ღვთის მოწყალება მოვიწამე, გავმხნევედი, მუხლი მოვიყარე და მაშინდელივით, პატიება ვთხოვე უფალს შეცოდებისათვის. ლოცვისას მობრძანდა მოხუცი ქალი იმ მშვენიერ ექვს ჰაბუკთან ერთად, უწინაც რომ ახლდნენ; უკან დამიდგა, ასე ისმენდა ჩემს ლოცვასა და აღსარებას. მერე შემეხო და მითხრა: „ღმერთს მხოლოდ ცოდვების შენდობას ნუ ევედრები. თხოვე უფალს, გაგიმკლავნოს სიმაართლე მისი იღუმალი, რათა მისი ნაწილი მაინც ერგოს ნუგეშად სახლეულთა შენთა“.

წამომაყენა, ხელი მომიკიდა, სავარძელთან რომ მიმიყვანა, ჰაბუკებს უთხრა: „წადით, აშენეთო“. ჰაბუკების განშორების შემდეგ მარტონი დავრჩით და „აქ დაჯექი-ო“ — მითხრა. „დედოფალო, ჭერ ხუცესნი დასხდნენ-მეთქი“, რომ გეუბნები, დაჯექი-ო — მითხრა. და როცა მის გვერდით, მარჯვენა მხარეს დაჯდომა მოვინდომე, არ დამანება, ხელით მანიშნა, მარცხნივ დამიჯექიო. დავფიქრდი, დავნაღვლიანდი, რაკი მარჯვენა მხარეს დაჯდომის უფლება არ მომეცა. „ჰერმეს, რას ჩაფიქრდი — მითხრა, მარჯვენა ადგილი მათთვისაა განკუთვნილი, ვინაც უკვე ეწამა ღვთის სიყვარულისათვის და შესწირა უფალს მსხვერპლად ღვაწლი კეთილი. მათთან ერთად ყოფნას ჭერ არ იმსახურებ, ბევრი გიკლია. მაგრამ თუ შეინარჩუნებ შენს ამჟამინდელ უბრალოებას. შენცა და ყველა დანარჩენთ, რომელნიც ვააგრძელებენ საქმეთა მათთა და დაითმენენ იმდენს. რამდენიც მათ დაითმინეს. მოგეცემათ მათთან თანადგომის ნება“.

7. ვკითხე; დედოფალო, გამაგებინე, ასეთი რა დაითმინეს-მეთქი. მისმინეო, — მითხრა: „მძვინვარება ნადირთა, უმოწყა-

ლო გვემა, სატუსალოები ბნელი — ასეთი ჯვრები დაითმინეს მისი სახელით. ამიტომაც მიეგოთ მათ მარჯვენა მხარე და არა მარტო მათ, ყველას, ვინც იგივეს უფლის სახელით დაითმენს, ეწევა წყალობა მარჯვნივ დგომისა. ისე კი, ყველას, მარჯვნივ და მარცხნივ მდგომარეთაც, ერთიდაიგივე მადლი და დიდება აქვთ ღვთისგან მინიჭებული. ეგაა, ოლონდ, მარჯვენა მხარეს მდგომთ, მეტი პატივი აქვთ ღვთის წინაშე. შენაც მათთან თანადგომის სურვილი გაქვს, მაგრამ ჯერ კიდევ ბევრი სისუსტე გაქვს დასაძლევით. ცხოვრებას მერმის მის საუკუნისასა, შენცა და ყველა მისი გულით მაძიებელი, ცოდვათაგან განთავისუფლებული უნდა შეხვდეს, განიწმინდეთ თავნი თქვენნი“ ეს მოთხრა და წასვლა დააპირა, ფეხებში ჩავუვარდი, ვევედრებოდი, ღვთის გულისათვის, მიჩვენე-მეთქი, ხილვა აღთქმული. ისევ წამომამყენა, ხელი მომიკიდა, მარცხენა მხარეს, სკამზე დამისვა, რაღაც საოცრად ელვარე კვერთხი აღმართა და მკითხა: — თუ ხედავო, იმ დიდ ნაგებობას? ვერა-მეთქი, დედოფალო. „ნუთუ ვერ ხედავ, შენს წინ წყალზე, კოშკი რომ შენდება, ელვარე ოთხკუთხედი ქვებით? მერე მართლაც დავინახე ოთხკუთხედის მსგავსი კოშკი შენდებოდა. კოშკს სწორედ ის ექვსი ჭაბუკი აგებდა მოსვლისას მას რომ თან ახლდნენ. სხვებს, ათასობით კაცი იქნებოდა, ქვები მოჰქონდათ: ზოგიერთებს წყლის ფსკერიდან ამოჰქონდათ ქვები, სხვები ჭაბუკებს მიწიდან აღებულ ქვებს აწვდიდნენ. ექვსი ჭაბუკი კი მათი მოწოდებული ქვებით აგრძელებდა მუშაობას. წყლის ფსკერიდან ამოღებულ ქვებს პირდაპირ სვამდნენ კოშკის კედელში, რადგან თითოეული მათგანის ზედაპირი თანაბრად იყო გადასწორებულ-გადათლილი ისინი მიწიდან მოტანილ ქვებსაც კარგად ერგებოდნენ, იმდენად კარგად, რომ მათი გვერდი-გვერდ შეწყობისას, შეერთების კვალის დანახვაც პირდა, ქვათა სხვადასხვაობა შეუმჩნეველი რჩებოდა. ასე რომ, ერთი შეხედვით, კოშკი დიდი ერთი მთლიანი ქვით ნაგებსა ჰგავდა. დანარჩენ ქვებს, მიწიდან აღებულს, ზოგს კოშკის ახლოს აწყობდნენ ზოგს მოშორებით, ნაწილს პირდაპირ კოშკის კედელს უდებდნენ. სხვებს კი დახეთქავდნენ, დაჭრიდნენ და კოშკიდან შორ მანძილზე ისროდნენ. ნაწილს, ნაგებობის

ახლოს დალაგებულ ქვეებიდან, არ ატანდნენ კოშკის კედელს, რადგან ზოგიერთი მათგანი ხორკლიანი იყო, ნაწილი დაბზარული, სხვა კი მრგვალი, უწახნაგო, ბაცი ფერისა და ამდენად ნაგებობისათვის უსარგებლო და შეუფერებელიც. კოშკიდან შორს მოსროლილი ქვეები შარაზე მიგორავდნენ, ზოგი უდაბურ ადგილას ვარდებოდა, ზოგი ცეცხლში ცვივოდა და იწვოდა, ზოგიც წყლის ნაპირს მიღწეული, ამაოდ ცდილობდა წყალში მოხვედრას“.

3. მიჩვენა ეს მოხუცმა ქალმა და წასვლასაც დაეპირა. ვუთხარი: დედოფალო, რა აზრი აქვს ყველაფერ ამის ნახვას, თუკი არ მეცოდინება აზრი და მნიშვნელობა ამ მშენებლობისა-მეთქი? მითხრა: „დიდი ცნობისმოყვარე კაცი კი ყოფილხარ, თუკი ამ კოშკის მნიშვნელობის გაგებაც მართლა გასურსო?“ — სწორედ, რომ ასეა-მეთქი, დედოფალო, მინდა ვიცოდე ყველაფერი და იგივე მსურს ვაუწყო ძმათ ჩემთა, რათა ერთობით ვაქოთ და ვადიდოთ უფალი. მითხრა: „მოსმენით და გაგებით ბევრი გაიგებს, ეგაა, ოღონდ, გამგონეთ შორის ნაწილს თუ ეწევა სიხარული, დანარჩენები გლოვას მიეცემაინ. თუმცა ამ უკანასკნელთაც მიეგებათ სიხარული, თუკი ამ სიტყვების მოსმენის შემდეგ მაინც შეიძლებენ გულითად სინანულს. ახლა მისმინე, კოშკის მნიშვნელობას გაგიმარტავ, გაგიმჟღავნებ დაფარულს, ოღონდ გამოცხადებების თხოვნით, ნულარ შემაწყენ. გამოცხადებებსაც თავისი ზღვარი აქვთ, რამეთუ განსრულდა უამი მათი. შენ კი შენსას არ იშლი და დაუინებით ითხოვ ჩვენებებს. მაშ ასე, ის კოშკი, ახლა რომ შენდება, თავად მე, ეკლესია ვარ. ახლაც და უწინაც მე გეცხადებოდი. მკითხე, რისი გაგებაც გასურს კოშკის შესახებ, გაგიხსნი დაფარულს, რათა შენაც განიხარო წმინდათა შორის. დედოფალო, რადგან მხოლოდ ამ ერთხელ მეძლევა წყალობა გამოცხადებისა, მაშინ გამიმჟღავნე-მეთქი საიდუმლონი კოშკისა. „თუკი გულით მიენდობი უფალს და ყველაფრისა მიუხედავად არ შეუორგულდები მას, შენი წილი რამდენიც კმა არს შენდა, სრულად გაეხსნება“. ვკითხე: წყალზე რატომაა-მეთქი, კოშკი დაშენებული? მითხრა: „უწინამც მითქვამს ცნობისმოყვარე ხარ-მეთქი, სიმართლეს კი გულმოდგინედ ეძიებ. მოიძიე ჭეშმარიტება და ჰპოვებ მას. ახლა მო-

მისმინე და გეტყვი. რატომაც შენდება კოშკი წყალზე: წყალში მიენიჭა და ენიჭება კაცობრიობას წყალობა ხსნისა¹. კოშკი კი, ყოვლადღიერის სიტყვამ დაამტკიცა, უხილავად იცავს მას ძალი ღმრთისა“.

4. „საკვირველ არს საქმენი მისნი“ — მივუგე პასუხად და იქვე ვკითხე: დედოფალო, ის ექვსი ჭაბუკი ვინ იყო, კოშკს რომ აშენებდნენ-მეთქი? — „ისინი ღვთის პირველქმნილი ანგელოზები არიან, რომელთაც უფალმა მიანდო შესაქმე თვისი, რათა მათ განამრავლონ, კეთილქმნან და მართონ შესაქმე მისი. მათი მეშვეობითვე დასრულდება კოშკის მშენებლობაც“. ის სხვები ვინდა არიან, ქვებს რომ ეზიდებიან-მეთქი? — „ისინიც უფლის წმიდა ანგელოზები არიან, მაგრამ პირველნი მათზე მაღლა დგანან. მშენებლობის განსრულებისას, კოშკის მახლობლად შეიყრებიან ყველანი, გამართავენ ლიტანიობას, ქებას შეასხამენ უფალს კოშკის განსრულებისათვის“. ვუთხარი: მსურს ვიცოდე რა განსხვავებაა ქვებს შორის და როგორია-მეთქი, მნიშვნელობა მათი. „ხალხია, შენზე მაღლა მდგომი და ღირსეული. აი ისინი იმსახურებენ ამ საიდუმლოს გახსნას, მაგრამ შენ, რომელიც არაფრით აღემატები მათ, შენაც კი გეძლევა ეს განცხადება. გეძლევა ორი რამის გამო: რათა განითქვას სახელი უფლისა და ორგულთა გამო, აკი მათ გულს ჭერაც ღრღნის ეკვი იმის გამო, მართლა არსებობს თუ არა აქაურობა²? აუწყე მათ, რომ ჭეშმარიტია ეს ყველაფერი, რომ არაფერია ამაში ცრუ და გამოგონილი, რომ კლდესავით მტკიცე და ძლიერია სამყოფელი ესე“.

5. „ახლა იმ ქვებზე ვიამბობ, ნაგებობისათვის რომ იყენებენ და მისმინე. ოთხკუთხედი, თეთრი, ლამაზად გათლილი მიწიდან აღებული ქვები სახეა მოციქულთა, მოძღვართა და დიაკონთა. აწ განსვენებულთა და დღესდღეობით ცხონებულთა, რომელთაც წმინდად დაიცვეს მცნებები ღვთისა, გამოიძიეს სჯული მისი და განისწავლნენ მასში. (წმინდად, უზადოდ ემსახურებოდნენ ისინი ღვთის რჩეულთ, სრული მშვიდობა და მორ-

¹ იგულისხმება ნათლისღების საიდუმლოება.

² აქაურობა, იგულისხმება — სასუფეველი.

ჩილება სუფევდა მათში. კოშკის კედელსაც ამიტომ შეეწყვნენ ქვები მოხდენილად). წყლის სიღრმიდან ამოღებულ ქვები, რომლებიც ასევე კარგად შეეწყვნენ მიწიდან მოკრეფილთ, უკვე კედელში დატანებულ ქვებს, სახეა გარდაცვლილ, ღვთის სახელით წამებულ მარტვილთა“. — დედოფალო, და სხვა ქვები, ასევე მიწიდან მოკრეფილი, ისინი რაღას ნიშნავენ-მეთქი? — „კოშკის საძირკველს დაყოლებული ქვები სახეა იმ ხალხისა, რომელთაც სიმართლითა და ღვთის ცნებების აღსრულებაში განვლეს სოფელი ესე. ხოლო ნაგებობის კედელს დატანებული ქვები, ახლად და მტკიცედმოქცეული ხალხთა სახეა. ანგელოზებს ედარებიან ისინი სულიერი სათნოებით, აღარ იპოვება მათ შორის ზრახვა ავი“ — და ის ქვები, კოშკს ახლოს, გარშემო რომ შემოუწყვეს-მეთქი? — „ეს ქვები იმ ხალხის სახეა, რომელთაც სცოდნეს წინაშე უფლისა, მაგრამ ახლა ეძიებენ სინანულს. შესაძლოა მათ შეიძინონ სინანული წრფელი, რის შედეგადაც მიენიჭებათ კოშკის კედელში მოხვედრის ღირსება, ამიტომაც შემოუწყვეს ისინი კოშკს ახლოს. სინანულის მაძიებელთ უნდა ახსოვდეთ, რომ გულისხმიერი და დროული უნდა იყოს სინანული მათი. კოშკის განსრულებამდე უნდა მოიპოვონ მათ ასეთი სინანული. სხვანაირად, კოშკის კედელში, როგორ მოხვდებიან? გვიანი სინანულით ვერ დაიმკვიდრებენ ადგილს კოშკის კედელში, მის სიახლოვეს თუ ეწყობიან მხოლოდ“.

6. შორს მოსროლილ, დახეთქილ-დაპოზილი ქვების მნიშვნელობის გაგებაც გასურსო? — მსურს-მეთქი, დედოფალო. „ისინი არიან ძენი უსჯულოებისანი. თვალისასახვევად იწამეს უფალი და არ განეშორნენ მრავალგვარ სახეს უღმრთოებისას. მათ კოშკის კედელში ადგილი არ მიეცემათ, მათივე უსამართლობის გამო და არ ეწვეათ წყალობა ხსნისა. ამიტომაც დაიპენ ისინი. ღვთის რისხვამ გადაკარგა სახე მათი, რამეთუ შეურაცხყვეს მათ უფალი. ხოლო ის მრავალ ხორკლიანი ქვა, გვერდზე გადაწყობილი და ნაგებობისათვის უხმარი, სახეა იმ ხალხისა, რომელთაც იგემეს, შეიმეცნეს ქვეშარიტება და არ ჰყვეს რჯული ღვთისა ზრახვად ცხოვრებისა თვისისა¹ და

¹ მს. 118, 77.

არ არიან ნაწილი წმინდათა: უსარგებლოა არსება მათი. დაბზარული ქვეები კი სახეა იმ ხალხისა, რომელთაც ერთმანეთის მტერობითა და ღვარძლით აივსეს გული, არ იპოება სიმშვიდე მათ შორის. შეიყრებიან ერთად, მოიძიებენ მშვიდობას; გაყრილთ, კვლავ ბოროტებითა და სიძულვილით ევსებათ გული. მოკლე ნატეხებად ქცეული ქვეები სახეა იმ ხალხისა, რომელთაც იწამეს უფალი, მაგრამ ვერ განეშორნენ უღმრთოებათა თვისთა. დარღვეულია მათში მთლიანობა სათნოებისა. აკი ამიტომაც არიან ასე მოკლე ნატეხებად ქცეულნი“.

— „ის მრგვალი, უწახნაგო და ბაცი ფერის ქვეები, კოშკის კედელს არდატანებული რალას ნიშნავს-მეთქი? „როდემდე უნდა იყო ასეთი უგულისხმო, როდის შეიგნებ შენით? მე როდემდე უნდა მეკითხებოდე? ესაა სახე მორწმუნე ხალხისა, რომელნიც აღივსნენ ამქვეყნიური სიმდიდრით, უზრუნველობითა და ფუფუნებით. ღვენის ჟამს ისინი განუდგებიან უფალს, ამსოფლიურ საუნჯეთა გამო“. „ოდესმე მაინც თუ იქცევიან-მეთქი ისინი ღვთისათვის სასურველი?“ „როცა მოიკვეთენ საკუთარ სიმდიდრეს, რომელიც მათ ამაო სიძლიერედ და სიმშვიდედ ექცათ, აი მაშინ გახდებიან ღვთის შენობისათვის შესაფერნი. მრავალი ქვა, თავისით ვერ იქცევა ოთხკუთხედად, თუ არ გათაღე და არ დააწახნავე. ასევე მდიდარი, საკუთარი სიმდიდრის მოუკვეთლად, უსარგებლო და უხმარი მონაა ღვთისათვის. ეს ყველაზე კარგად, პირველ რიგში, შენ უნდა გვესმოდეს. სანამ მდიდარი იყავ, აკი შენაც უსარგებლო იყავ უფლისათვის. ახლა კი ხარ ღვთის წინაშე მონა სახმარ და სარგებელ. ადრე კი, შენაც სწორედ მაგ ქვათა რიცხვში ერიეო. და ბოლოს ქვეები, განსოვს, ვზაზე რომ მიგორავდნენ და უდაბურ ადგილას ცვივოდნენ, სახეა ადამიანთა, რომელთაც იწამესო თითქოს ჭეშმარიტება, მაგრამ ეჭვმა და ორჭოფობამ სძლიათ, ჭეშმარიტს, უკეთესი გზის მოძიების იმედით განუდგნენ. ამ უდაბურ გზაზე სიარულია მათი ცთომისა და განსაცდელში მოხვედრის მიზეზი. ცეცხლში მოხვედრილი და დამწვარი ქვეები კი ის ხალხია, რომელიც მთლიანად განუდგა ცხოველ ღმერთს და საბოლოოდ დაკარგა ცნობა და

ხსოვნა მისი. აზრადაც აღარ მოსდით სინანული, მონად გაუხდნენ საკუთარ გულისთქმებსა და ვნებებს“.

„ის ქვები, წყლის ნაპირს მიღწეულნი, ასე რომ ცდილობდნენ-მეთქი წყალში მოხვედრას?“ — „ეს ის ხალხია, რომელთაც ისმინეს სიტყვანი ჭეშმარიტებისანი და წმინდა ნათლის ღებაც კი მოისურვეს. მათ აქვთ ხსომება და ცოდნა წმიდა მცნებებისა და მაინც ბილწ გულისთქმათა ნებას მისდევენ“. ამით დაამთავრა მან კოშკის მნიშვნელობის ახსნა-განმარტება.

8. ის იყო შეკითხვებს მოვრჩი, რომ თვითონ მითხრა: „სხვა რამის ხილვა არ გინდაო?“ — რასაკვირველია, მინდოდა, თანაც ისე ძლიერ, რომ ეს სურვილი სახეზეც გამომეხატა. შემხედა, გაეღიმა და მითხრა: „ხედავ კოშკის გარშემო შვიდ ქალს?“ ვხედავ-მეთქი, დედოფალო. „ეს კოშკი, ღვთის ნებით, ამ ქალების მეშვეობითაა განმტკიცებული. მისმინე, თითოეული მათგანის შესახებ გიამბობ: პირველს, ხელებით რომ უჭირავს ეკლესია, რწმენა ჰქვია. ღვთის რჩეულნი, მისი ძალით ცხონდებიან. მეორეს, მხნეობაშემოსულს, კოშკს რომაა გარსშემოვლებული, კრძალულება ჰქვია. იგი რწმენის ქალიშვილია. ნეტარ არს კაცი კრძალული და მომარხულე, რამეთუ იგი ყველა ავი საქმისაგან მოიზღუდავს თავს, იმ რწმენითა და სასოებით, რომ აქ, ბოროტი ზრახვისაგან განდგომილს სამუდამო სამყოფელში მიეგება წილი კეთილი“. დანარჩენი ხუთი ქალბატონი ვინლა-მეთქი? „ერთიმეორეს შვილები არიან: ერთს უბრალოება ჰქვია, მეორეს უბიწოება, მესამეს სიმდაბლე, მეოთხეს გონიერება, მეხუთეს — სიყვარული. პირველ რიგში მათი დედის კვალს უნდა მიჰყვე, მხოლოდ ასე თუ შეიძლება მისი ქალიშვილების გზით სიარულს“. დედოფალო, რა ძალა აქვს თთოეულ მათგანს, ეგეც მინდა ვიცოდე-მეთქი. მისმინეო, მითხრა: „ძალა თანაბარი აქვთ. მათი შობაც ერთიმეორის მიყოლებით მოხდა. ამიტომაა, ერთმანეთს მისდევენ და მჭიდროდ არიან შეკავშირებულნი. ასე რომ, რწმენა შობს კრძალულებასა და უბრალოებას, უბრალოება — უბიწოებას, უბიწოება — სიმდაბლეს, სიმდაბლე — გონიერებას, გონიერება — სიყვარულს. უმანკო, წმიდა და ღირსეულია საქმენი მათნი. ვინც მოიკრეფს ძალას და აღასრულებს საქმეთა მათთა, ღვთის კოშკში, წმინდათათანა მიეცემა სავანე“. ვკითხე:

განა არ განსრულდა-მეთქი ჟამი, კოშკის შენებისა? „უგუნურო ადამიანო, ხმამალა წამოიძახა. — განა ვერ ხედავ, ჯერ კიდევ რომ მიმდინარეობს კოშკის მშენებლობა? როდესაც დამთავრდება მისი შენება, აი, მაშინ დადგება ჟამი აღსასრულისა. ეს ჟამი კი მალე მოიწევა. ამის მეტი აღარაფერი მკითხო. შენთვის და ყველა წმინდანისთვისაც, სულის გასამხნეველად და მოშვრის შესახსენებლად, ესეც კმარა. და კიდევ მხოლოდ შენთვის, შენი სულისათვის კი არ მოგეცა ეს განცხადება, არამედ იმისათვის, რომ ნანახი ყველას აუწყო. ამასთან ერთად, ჰერმეს, იმას, რასაც ახლა გეტყვი, კარგად შეიგნე და გაიზარე. სამი დღის შემდეგ ჩემი ნათქვამი უნდა მიაწვდინო ყველა წმინდანის გულისყურს, რათა ამ სიტყვების შემდეგ, შენცა და ისინიც განიწმინდოთ ყველანაირი არაწმინდებისაგან.

9. „მისმინეთ შვილნო. მე ღვთის წყალობით ჰემმარიტ უბრალოება უმანკოებასა და სიწმინდეში გზრდიდით. მანვე აწვიმა თქვენზე, განსაწმენდელად თქვენთა, სიმრთელე თვისი, რათა აღარ იპოებოდეს თქვენს შორის არანაირი უღმრთოება და სიბილწე. მისმინეთ და ჰყავთ მშვიდობა ურთიერთშორის, მიხედეთ და გაამხნევეთ ერთმანეთი, ღვთის მოცემულს მხოლოდ სათავისოდ ნუ იხმართ, უხვად მიაგებეთ შეჭირვებულს, ზოგიერთი ნაყროვანებითა და ნამეტნაობით ვნებს სხეულს, ასუსტებს და წარაგებს ძალას მისას. ზოგის სხეულს კი უსახსრობა და საზრდელის უქონლობა განლევსა და ასუსტებს. ვაი, იმ მკვდართა წინდაუხედაობას, რომელნიც ვერ მიმხვდარან შეჭირვებულთა განკითხვას, მოწყალების გაღებას. გაიხსენეთ სამსჯავრო მომავალი! თქვენ, რომელთაც გარდაგმეტებით ქონება, დროით კოშკის დამთავრებამდე უნდა მოიძიოთ შემშეთლნი და წყალობის მთხოვნელნი. რამეთუ კოშკის განსრულების შემდეგ, მოისურვებთ წყალობის გაღებას და გვიანი იქნება. აღარ შეიწირება საქმენი თქვენნი. გაფრთხილდით, ნამეტნაობით განდიდებულნო, გაიღეთ საუხრჯენი თქვენნი შეჭირვებულთათვის, რამეთუ არგანკითხულთა გოდებას უფალი ისმენს. არ შეგენდობათ უმოწყალობა, არ გელირსებათ ხილვა კოშკისა. ახლა კი, თქვენ, ეკლესიის წინამძღვართ მოგმართავთ: ნუ ემსგავსებით მწამლავთა, რომელთაც საცავად შხამისა თვისისა რაიმე ჭურჭელი უჩნთ, თქვენ კი საკუთარი გუ-

ლი გიქცევიათ ჭურად შხამისა და არა ცდილობთ მათ განწმენდას. მხოლოდ სუფთა გულს ძალუძს მიახლება დიდ მეუფისა, ასეთ გულს ენიჭება წყალობა ღმრთისა. ამ გზიდან განდგომა, საუკუნო გზის დაკარგვას უდრის, გაფრთხილდით, შეილწო! ან როგორ უნდა შეიძლოს თქვენ აღზრდა ღვთის რჩეულთა, თუკი თავად არა ხართ განსწავლულნი! გულისხმა-ჰყავთ მცნებანი ჩემნი და ყავთ მშვიდობა შორის თქვენსა. რათა სიხარულით ვეჩვენო მამას თქვენსას. შევიძლო ღვთის წინაშე, თქვენთა საქმეთა გამო. გება პასუხისა“.

10. ჩემთან საუბარს მორჩა და კოშკს რომ აგებდნენ, ის ჰაბუტები მოვიდნენ. ორმა იგი წაიყვანა კოშკისაკენ. დანარჩენმა ოთხმა, სავარძელი წაიღო, კოშკის მიმართულებით წავიდნენ. ჰაბუტთა სახეებს ვერ ვხედავდი, ზურგიით იყვნენ. განშორებისას კიდევ ვთხოვე მოხუც ქალს: ისიც მითხარი, სამჯერ, სხვადასხვა სახით რატომ მეჩვენეთ-მეთქი?“ მაგის პასუხი სხვამ უნდა მოგცესო“, — მითხრა, მისი სამი სახით ჩვენება კი, ასეთი იყო ძმებო, პირველი ჩვენებისას. შარშან, ძალიან მოხუცად მეჩვენა, სკამზე იჯდა. მეორე ჩვენებისას სახე ახალგაზრდისა ჰქონდა, სხეული და თმები მოხუცისა. ფეხზე იდგა, ისე მესაუბრებოდა, თუმცა პირველზე უფრო მხიარულად გამოიყურებოდა. მესამედ კი, სრულიად ახალგაზრდული, მშვენიერებასავე სახით მეჩვენა, თუმცა თმა ჰქონდა. სკამზე იჯდა, სიხარულით მოსილი. ვერ ამეხსნა ნანახის მნიშვნელობა, ვდარდობდი ძლიერ, სანამ ასეთი ჩვენება არ ვიხილე. სიზმარში კვლავ ის მოხუცი ქალი მეჩვენა და მითხრა: „ლოცვას მუდამ სიმდაბლე უნდა ახლდესო. თან იმარხულე, აგისრულებსო უფალი გულის წადილს“. ერთი დღე ვიმარხულე და იმავე ღამეს ჰაბუტი მომეველინა და მითხრა: „რა ხშირად ითხოვ ლოცვაში უფლისაგან ჩვენებებს, გაფრთხილდი, მეტის ცოდნის წადილმა არ ავნოს სულს შენსას. ვანა რაც მოგეცა არ იყო საკმარისი? შეიძლებ კი იმაზე დიდი ჩვენებების ტვირთვას, ვიდრე მოგეცაო?“ პასუხად მივეუბნე: „უფალო, ერთსა გთხოვ მხოლოდ, გასაგებად ამიხსენი რატომ მეჩვენა მოხუცი ქალი სამჯერ სხვადასხვა სახით-მეთქი? მითხრა: „როდემდე უნდა იყო ასეთი უგულისხმო. ღმერთს არა ხართ მინდობილნი. ექვებით ხართ შეპყრობილ-

ნი. ეგაა თქვენი უგნურების მიზეზიც“. — შენი პასუხი უცთონელი იქნება, იმიტომ გთხოვე-მეთქი — ვუთხარი. „მისმინეო, — მითხრა — იმ სამი სახის შესახებ ვიამბობ, შენ რომ მთხოვდი. რატომ იყო იგი პირველად მოხუცი და სკამზე რატომ იჯდა? — იმიტომ, რომ დაგიძაბუნდათ სულები, ძალა გამოგელიათ, რადგან გული ცოდვებითა და ეჭვებით აივსეთ. და როგორაც მოხუცს, აღარა აქვს იმედი ძალთა განახლებისა და სარეცელზე მწოლიარე სიკვდილის მეტს აღარაფერს ელის, თქვენაც, ამსოფლიურ საქმეებში გახლართულებმა, უბრუნველობას მიეცით თავი და აღარ გახსოვთ და გეიმედებათ უფალი. დაგისუსტდათ გონება, ჩაბერდით თქვენსავე დარდებში“. — „სკამზე რატომ იჯდა ისიც მინდა ვიცოდე-მეთქი? — „იმიტომ, რომ უძლური ფეხზე ვერ იდგება, უნდა იჯდეს, რაკი საბეჯანად აღარ ეგულება თავისი სუსტი სხეული. ეს პირველი ჩვენების ახსნაა“.

11. „მეორე ჩვენებაში იგი გაახალგაზრდავებული გეჩვენა, ფეხზე იდგა და აღრინდელზე უფრო მხიარულად გამოიყურებოდა. სხეული და თმები კვლავ მოხუცისა ჰქონდა“, — მითხრა და თანაც ეს იგავი მოაყოლა: „როცა ვინმე ძლიერ მოხუცდება, საკუთარი სიძაბუნისა და უძლურების შემყურეს, გული გაუტყდება და თავისი სიკვდილის მეტს, აღარაფერს ელის. უცებ, გაიკვივევა, რომ მას, მემკვიდრეობით ერგო ჭონება. წამოხტება ამის გაგონებაზე, აღსდგება მწოლარე, განუახლდება სული, ძველი ამბებით დამძიმებული და გულხელდაკრეფილი კი აღარ ზის, არამედ მხნედ ნოქმედებს. ზუსტად იგივე დაგემართათ თქვენ. იმ გამოცხადების შემდეგ, ღეთისგან რომ მოგეცათ. შეგეწიათ უფალი და მოგმადლათ განახლება სულისა. ამან დაგათრგუნიათ უძლურება, ამან მოგანიჭათ სიმხნე და სიმტკიცე რწმენისა. მოგხედათ უფალმა და იხილა სიმტკიცე თქვენი რწმენისა და განიხარა მან თვისთა შვილთა ზედა და მოგმადლათ: ჩვენება კოშკის შენებისა, მაგრამ თქვენ, მოგეცემათ უფროისი ამისა, თუკი იქნება მშვიდობა თქვენს შორის გულისხმიერი. მესამე ჩვენებაში უფრო ახალგაზრდა და მხიარული იხილე, თითქოს ანათებდაო მისი სახე. წარმოიდგინე, ვინმე გულშიწარებულს რალაც მეტად სასიხარულო ამბავი რომ მოუვიდეს, ზომ დაი-

ვიწყებს იმავე წამს წუხილს უწინდელს?! ძველს აღარ დაუბრუნდება გული მისი, რადგან გულს ეს ბოლო სასიხარულო ამბავი აიტაცებს, გაამხნევებს, სიხარულს მიანიჭებს, სულის ძალას განუახლებს. თქვენაც იგივე დაგემართათ, რაკი გეუწყათ წყალობა ღვთისა. სკამი კი ნიშანია სიმტკიცისა და შეურყევლობისა, ამიტომაც იჭდა იგი სკამზე და როგორაც სკამია ოთხი ფეხით მიწას მტკიცედ დაყრდნობილი, ამ ქვეყანასაც სკამის დარად, ოთხი სტიქია განუწყესა უფალმა საბჭენად. ვინაც შეიძლებს გულითად სინანულს, მიეცემა სიმტკიცე სულიერი. ახლა უკვე ყველაფერი იცი. გამოცხადებებს ნულარითხოვ. რაიც ჯერ არს, თავისით მოგეცემაო.

ხ ი ლ ვ ა მ ე ო თ ხ ა

1. წინა ხილვებიდან ოცი დღეც არ იყო გასული, რომ ახალი ჩვენებით მომავალი დევნა ვიხილე. კამპანის გზაზე მივდიოდი. მთავარი გზიდან, ასე, ათი უტევანით იქნება ეს მინდორი დაშორებული. ამ ადგილებში იშვიათად შეხვდება კაცი მგზავრს, ცუდი გზაა. მარტო ვიყავი, ღმერთს ვევედრებოდი: დაამტკიცე-მეთქი, უფალო, გამოცხადებანი შენნი, რომელიც მომანიჭე მეცა და ყოველთა ცოდვილთა მონათა შენთა, რათა განითქვას სახელი შენი დიდებული და საკვირველი, იმავ ჩვენებათა გამო, რომლის ღირსიც გამხადე-მეთქი. ღმერთს ვადიდებდი და ვმადლობდი, რომ უეცრად თითქოს რაღაც ხმა გამომეპასუხა: „პერმეს, არ შეორგულდე-“ო შეეცბუნდი და ვიფიქრე ჩემთვის: „უფალმა თავისი ნებითა და ძალით გასაოცარი ხილვები მიწყალობა, განმამტკიცა რწმენაში, ნეტა რალამ უნდა დამაეჭვოს-მეთქი? ცოტა მანძილი კიდეე ვავიარე, ძმებო და ვხედავ, მტვერი ცასა სწვდება. ვიფიქრე: ცხოველთა რემა გაივლიდა, ის აამტვერებდა-მეთქი აქაურობას. იმ ბუღს ასიოდე ნაბიჯი მაშორებდა. მტვერი სულ უფრო და უფრო მკვრივდებოდა. ეს ყველაფერი უჩვეულოს, არაბუნებრივს გავდა. მერე ის იყო, მზემ ოღნავ გამოაჰყიტა და უზარმაზარი, ვეშაპისმაგვარი მხეცი ვიხილე. პირიდან ცეცხლს აკვესებდა. სიგრძით, ასი ფუტი იქნებოდა, თავი კეცის ჭურს მიუგავდა. ამის შემხედვარე ტირილსა და მუდარას მოყვევი: „მიხსენი-მეთქი, უფალო, ამ ურჩხულისაგან“. უცებ ის სი-

ტყეები მომაგონდა, რაღაც ხმამ რომ მითხრა: „არ შეორგულდო, ჰერმეს“. და ამის გახსენებაზე მოვიკრიბე სარწმუნოება ღვთისა, გავიხსენე საქმენი მისნი საკვირველნი, უშიშრად წავედი ურჩხულისაკენ. ნადირი კი ბრდღვინავდა და ისეთი ძალით მოიწევდა ჩემსკენ, რომ მე კი არა, მისი ერთი შეხება მთელს ქალაქს დაამხოდა. მივუახლოვდი და ეს უზარმაზარი ცხოველი მიწას განერთხო, ძალაწართმეული ენას ძლივს ასავესავებდა, ისე ჩაუთარე, არც კი შერხეულა. ურჩხულს ოთხი ფერი გადაჰკრავდა თავზე: შავი, შემდეგ ცეცხლისფერ-სისხლისფერი, მერე ოქროსფერი და ბოლოს თეთრი.

12. ჩაუთარე ნადირს და ასე, 30 ფუტის სიშორეზე, ქალწული ვიხილე. თხემიდან ტერფამდე თეთრში იყო შემოსილი, სასძლო პალატიდან გამოსულსა ჰგავდა. თავსაბურავად მიტრა ჰქონდა. თმები — ჭაღარა. წინა ჩვენებების მიხედვით ვიცანი, ეკლესია იყო. გამიხარდა. მომესალმა: „გამარჯობაო შენი, ადამიანო“. ხალისიანად მივუგე: გამარჯობა-მეთქი, დედოფალო. მითხრა: „გზაზედ რამე ხომ არ შეგხვედრიაო, ადამიანო?“ კი, ურჩხული ვიხილე-მეთქი, დედოფალო. თანაც ისეთი, მთელი კაცობრიობის შემუსვრა, რომ არ გაუჭირდებოდა-მეთქი. „ბედნიერად გადარჩენილხარ, რამეთუ მიანდვე ზრუნვა შენი უფალს და გულით იწამე, რომ ვერავინ გიხსნიდა მოწევნილი განსაცდელისაგან, თუ არ ხადილი უფლისა მიმართ, თუ არ ხსენება მისი დიდებული და ძლევამოსილი სახელისა. ამიტომ გამოგიგზავნა უფალმა თავისი ანგელოზი და რომ არ შთაენთქე ურჩხულს, დაუყო მას ანგელოზმა პირი. არ შეგირყია დიდი ურჩხულის ხილვამ სარწმუნოება. სარწმუნოებამან შენმან გიხსნა შენ. ახლა კი წადი და აუწყე ღვთის რჩეულთ საქმენი მისნი დიდებულნი. ისიც უთხარი, რომ ეს ურჩხული სახეა მომავალი დევნა-განსაცდელისა. თუ მოემზადებიან და გულით შეინანებენ ცოდვებს ღვთის წინაშე. თუ იქნა გული მათი სუფთა და უზაკველ, და თუ ცხოვრების დარჩენილ დღეებს ღვთის სამსახურში კეთილად განლევენ, გადაურჩებიან რისხვის მომავალს. იხსენებდით: „მიუტევე უფალსა ზრუნვაი შენი და მან გამოგზარდოს შენ, და არა სცეს შერყევადი უკუნი-სამდე, მართალსა“¹. ორგულნო, ღმერთი იწამეთ, შეიგნეთ

¹ ფს. 54, 23.

ყოველის შემძლეობა მისი, რამეთუ მას ძალუძს მხოლოდ განყენება რისხვისა და მოწვენაც მარადიული სასჯელისა. ვაი, კაცსა მას, რომელსაც ესმას ესე ყოველი და არა გულისხმაჲ ჰყოს. „უმჯობეს იყო მისა, არა თუმცა შობილ იყო კაცი იგი“.

13. მერე იმ ფერების შესახებაც ჩავეკითხე, ურჩხულს რომ თავს გადასდიოდა და მითხრა: „მაინც არ იშლი ცნობის-მოყვარეობას, ისევე განსაკუთრებულს განმარტებებს ითხოვ“.

-- დიახ, დედოფალო, აგრეა. ამიხსენი, რას ნიშნავდა-მეთქი ის ფერები. მისმინეო მითხრა: შავი ფერი — სოფელია ესე წარმავალი, სადაც თქვენ ცხოვრობთ. ცეცხლისა და სისხლის-ფერი — ნიშანია იმისა, რომ სოფელი ესე დაინტქმება სისხლსა და ცეცხლში, ოქროსფერი — ნაწილია იმ ხალხისა, რომელთაც უფლის სახელით მოიძულეს სოფელი ესე, ისინი თქვენა ხართ. ოქრო, მხოლო ცეცხლგამოვლილია ვარგისი, თქვენაც მის მსგავსად იცდებით, დანარჩენთა შორის რომ ცხოვრობთ, ვინც მოიზღუდავს თავს საცდურისაგან — განიწმინდება. ცეცხლგამოვლილი ოქრო ტოვებს უსარგებლო მინარევთ, თქვენაც მის მსგავსად მოგცილდებათ ნაღველი და წუხილი. განწმენდილნი კოშკის შენობისთვისაც ივარგებთ. თეთრი ფერი სოფელია მომავალი და მარადიული, რომელშიაც ღვთის რჩეულნი დაემკვიდრებიან. უზაკველი და უმანკო იქნება თითოეული მათგანის სული, რომელთაც უფალი მარადიული სამყოფელისათვის გამოირჩევს. განუწყვეტლივ უმეორე ეს ყველაფერი წმინდათა გულისყურს. იგონებდეთ სახეს მომავალი რისხვა-განსაცდელისას. თუ ისურვებთ, გადურჩებით მას. ეს მითხრა და გამშორდა, თვალი ველარ შევასწარი, არ ვიცი, საით გაუჩინარდა.

თარგმნა მანანა ჩიჭვანაია

წმ. თეოფილე ანტიოქიელი

წმ. თეოფილე II ს-ის მნიშვნელოვანი საეკლესიო მწერალია. სამწუხაროდ მისი ცხოვრების შესახებ მეტად მცირე რამ ვიცით. ევსები კესარიელი გვაუწყებს: „თეოფილე ცნობილია, როგორც მოციქულთა შემდეგ მეექვსე ეპისკოპოსი ანტიოქიის ეკლესიისა, სადაც მეოთხე ეპისკოპოსად დადგენილი იყო კორნელიუსი (პერონის შემდეგ), ხოლო მეხუთე ეტაპზე, კორნელიუსის მომდევნოდ, ეროსი ფლობდა ეპისკოპატს“ (საეკლესიო ისტორია, IV, 20). იმავე ისტორიკოსის უფრო ადრეულ შრომაში „ქრონიკები“ აღნიშნულია: „ანტიოქიის მეექვსე ეპისკოპოსი თეოფილე — ცამეტი წელი. ამ თეოფილესაგან მოღწეულია (სიტყვ. „არის და ვრცელდება“) მრავალი თხზულება (ევსები კესარიელი, ქრონიკები, წიგნი II, იხ. პგ. XIX, სვ. 566). თეოფილეს ეპისკოპოსობა ევსებინ მიხედვით 169 წ.-ს უკავშირდება. (ეს თარიღი ბევრ მკვლევარს ჰიპოთეტურად ესახება). საგულისხმოა, რომ ანტიოქიის მეექვსე ეპისკოპოსად არის სახელდებული თეოფილე ქვემოთ თხზულების ხელნაწერშიც: წმ. იერონიმე მას პეტრეს შემდეგ მეშვიდე ეპისკოპოსად წარმოგვიდგენს.

წმ. თეოფილე წარმოშობით იყო მდინარე ევფრატის სანაპირო მხარეებიდან. ამის შესახებ თავად გვაუწყებს: „ის, რომ სამოთხე მიწაა და მიწაზე იყო იგი დანერგილი, ამის შესახებ წერილი ამბობს: „და დანერგა ღმერთმა სამოთხე ედემში აღმოსავლეთით და დაადგინა იქ კაცი და აღმოაცენა ღმერთმა კვლავ მიწიდან ყველა ხე, — სახილველად ჰამო და საჭმელად კარგი“ (შეს. II, 8—9). საღვთო წერილი სიტყვებით „კვლავ მიწიდან“ და „აღმოსავლეთით“ ცხადად გვასწავლის, რომ სამოთხე ცისქვეშეთში იყო, სადაც არის, აგრეთვე, მიწა და აღმოსავლეთი. „ედემი“ ებრაულიდან ითარგმნება, როგორც „შვება“. [წერილი] მიგვანიშნებს მდინარეზეც, რომელიც ედემიდან გამოდის და რწყავს სამოთხეს¹ და რომელიც აქედან ოთხ თავად განიყოფება. მათგან ორს ეწოდება ფისო-

¹ შტრ. „ხოლო მდინარე გამოვალს ედემით მორწყვად სამოთხისა“ (შესაქ. 2, 10).

ნი და გეონი, რომლებიც რწყავენ აღმოსავლეთის მხარეებს, განსაკუთრებით გეონი, რომელიც გარეშემოწერს ეთიოპიის მთელ მიწას და რომელიც, ამბობენ, ნილოსად სახელდებული, თავს იჩენს ეგვიპტეში. ორი დანარჩენი მდინარე, სახელად ტიგროსი და ეფრატი კარგადაა ჩვენთვის ცნობილი, რადგანაც ისინი ჩვენს მხარეებთან ახლოს არიან („გეიტნიოსინ ჰეოს ჰემეტერონ კლიმატონ“) (იხ. თეოფილე ანტიოქიელი, ავტოლიკესადმი, წიგნი II, 24; პგ. VI, სვ. 1089 ც).

თეოფილე ანტიოქიელის დაბადების წელი უცნობია¹. უძველეს რომაულ „მარტვიროლოგიონში“ მოხსენებულია მხოლოდ მისი დაბადების დღე ცამეტი ოქტომბერი (იხ. „აქტა სანქტორუმ“, ოქტომბერი, ტ. VI, გვ. 186; შენ. 9). ამ დღეს არის მისი ხსენებაც.

მიჩნეულია, რომ თეოფილეს მშობლები წარმართები იყვნენ. ეს აზრი იმით მტკიცდება, რომ თავად თეოფილე წარმართულ კულტურაზე იყო აღზრდილი და გაქრისტიანდა მხოლოდ გვიან საღვთო წერილის შემეცნების ეამს. როგორც აღნიშნავს პ. მარანი, თეოფილე „დაიბადა და აღიზარდა წარმართთა ცრურწმენების სიბნელეში. მასაც იგივე შეემთხვა, რაც იუსტინეს და ტატიანეს... წერილის კითხვამ ქრისტიანულ რელიგიაზე მოაქცია იგი? (პ. მარანი, წმ. თეოფილე ანტიოქიელი ეპისკოპოსის მოღვაწეობა და შრომები, პგ. VI, სვ. 197). საყურადღებოა თეოფილეს სიტყვები, რითაც იგი მიმართავს წარმართ ავტოლიკეს: „ნუ ხარ ურწმუნო, არამედ ირწმუნე (აღდგომა, ე. ჰ.), რადგანაც არც მე მწამდა ყოველივე ეს, მაგრამ ამჟამად შევიცანი და ვირწმუნე; [ეს მოხდა] მაშინ, როდესაც მივემთხვიე წმიდა წინასწარმეტყველთა საღვთო წერილს, სადაც ღვთის სულის მიერ წინდაწინვეა უწყებული წარსული საქმენი, თუ როგორ მოხდა ყოველივე, აგრეთვე, ამჟამინდელი, რაც კი ხდება და სამომავლო საქმეებიც, თუ რა თანმიმდევრობით უნდა აღსრულდეს ისინი. ცხად საბუთად („აპოლოგიკისის“) ის მაქვს, რომ რაც წინდაწინ ითქვა, აღსრულდა კიდევ; ამიტომაც მწამს“ (ავტოლიკესადმი, 1, 14; პგ. VI, სვ. 1044—1045; შდრ. ი. კვასტენი,

¹ პირობითად მიჩნეულია დაახლ. 100 წ. („აქტა სანქტორუმ“, დასახ. ტომი, გვ. 182, შენ. „ა“).

მიახლება ეკლესიის მამებთან, I, პარიზი, 1955, გვ. 267).

რაც შეეხება წმ. თეოფილეს საეკლესიო და სამწერლობო მოღვაწეობას, ამის შესახებ შედარებით ვრცლად გვაუწყებს ევსები კესარიელი: „ხოლო თეოფილესაგან, რომელიც უკვე წარმოგიდგინეთ, როგორც ანტიოქელთა ეკლესიის ეპისკოპოსი, მოღწეულია (სიტყვ. „მიმოქცევაშია“) პირველსაფუძვლების შემცველი (ბერძნ. „სტოიხეიოდეს“) სამი შრომა „ავტოლიკესადმი“, აგრეთვე, სხვაც, რომელსაც ეწოდება „ჰერმოგენეს წვლების შესახებ“, სადაც თეოფილე იმოწმებს ადგილებს იოანეს „გამოცხადებიდან“. გავრცელებულია, აგრეთვე, მისი სხვა კატეხიზმური წიგნები („კატეხეტიკა ბიბლია“). მწვალებლები, მსგავსად სარეველებისა, მაშინაც არანაკლებ რყენიდნენ სამოციქულო მოძღვრების წმიდა თესლს. ამიტომ, ეკლესიათა მწყემსნი ქრისტეს ცხვართაგან ყველგან უკუაგდებდნენ ასეთ პირებს, როგორც ველურ მხეცებს. განიშორებდნენ მათ ძმათა მიმართ დარიგებებსა და შეგონებების გზით, ზოგჯერ კი აშკარად ებრძოდნენ მათ პირდაპირ ზეპირი კამათითა და დამხობით ან კიდევ წერილობითი შრომების საფუძველზე მათი თვალსაზრისების უმეტესად გამოწვლილვითი მხილებითა და განმართვით („აკრიბესტატოს ელენხოს დიევთიუნონტეს“). თეოფილეს, სხვებთან ერთად, ებრძოდა მწვალებლებს, რასაც ცხადყოფს მის მიერ არალიტონად („უკ აგენნოს“) ნამუშავევი ქადაგება „მარკიონის წინააღმდეგ“¹, რომელმაც სხვა ზემოხსენებულ შრომებთან ერთად დღემდე მოაღწია“ (ევსები კესარიელი, საეკლ. ისტ. IV, XXIV).

ამგვარად, ევსები კესარიელი გვისახელებს თეოფილე ანტიოქიელის სამ თხზულებას: I) „ავტოლიკესადმი“, სამ წიგნად; (II) „ჰერმოგენეს წვლების წინააღმდეგ“ და (III) „მარკიონის წინააღმდეგ“. თეოფილეს კიდევ ბევრი შრომის

¹ როგორც შენიშნავს გ. ბარდი, ევსების პირადად არ უნდა ცოდნოდა აღნიშნული შრომა, რომელიც სამწუხაროდ, ჩვენამდე არ შემონახულა, ფ. ლუფმა სცადა, რომ შეძლებისდაგვარად აღედგინა იგი წმ. ირინეოს ლიონელის სახელგანთქმული შრომის: „მხილება და დამხობა ცრუ ცოდნისა“ მიხედვით, რადგანაც ეს უკანასკნელი მნიშვნელოვანწილად სარგებლობს თეოფილეს ქადაგებით. ბოლო დროს გაირკვა, რომ ამავე ქადაგებით სარგებლობდა ტერტულიანეც თავისი შრომის „მარკიონის წინააღმდეგ“ პირ-

არსებობაზე მიანიშნებს ევსების სიტყვები: „სხვა კატეხიზმური წიგნები“. წმიდა იერონიმე ახსენებს, გარდა აღნიშნულისა, ორ თხზულებას: „განმარტება სახარებისა“ და „სოლომონის იგავთა განმარტება“ (იერონიმე, საეკლესიო მწერალთა შესახებ)¹. სხვაგან იგივე იერონიმე გვაუწყებს, რომ თეოფილეს შეუდგენია სახარებათა კონკორდანსი (ეპისტოლე ალგასიასადმი 6, 15)².

აღნიშნული შრომებიდან ჩვენამდე მოაღწია მხოლოდ პირველმა „ავტოლიკესადმი“. ამ ძეგლში თვით თეოფილე მიგვითითებს თავის კიდევ ერთ შრომაზე სათაურით „ისტორიათა შესახებ“, რომელშიც, როგორც ჩანს, აღწერილი ყოფილა კაცობრიობის ბიბლიური ისტორია. თეოფილე, კერძოდ, გვაუწყებს: „თვით კაენსაც ჰყავდა ძე, სახელად ენოქი და ააშენა მან (კაენმა) ქალაქი, რომელსაც მისი ძის ენოქის სახელი უწოდა. აქედან დაედო სათავე ქალაქთა შენებას. ხოლო ეს მოხდა წარღვნამდე... ენოქს შეეძინა შვილი სახელად გაიდადი, რომელსაც ეყოლა მეელი, მეელს — მათუსალა, მათუსალას — ლამექი. ლამექმა შეირთო ორი ცოლი, ადა და სელა. აქედან დაედო სათავე მრავალცოლიანობას, აგრეთვე, მუსიკას. ლამექს შეეძინა სამი ძე: ობელი, იუბალი და თობელი. ობელი „იყო მამამ მკვდრთა კარებისათა საცხოვართმზრდელთასა“ (შესაქ. IV, 20); იუბალი არის „გამომჩინებელ საფსალმუნისა და ებნისა“ (შესაქ. IV, 21); თობელი გახდა „კუერით ხურომ, მკედელი რვალისა და რკინისა“ (შესაქ. IV, 22). აქამდე მოდის კაენის თესლის აღნუსხვა; მისი შთამომავლობით თესლის მომდევნო ნაწილი დავიწყებას მიეცა, რადგანაც მან მოკლა საკუთარი ძმა. აბელის ნაყ-

ველ გამოცემაში (იხ. გ. ბარდის კომენტარი: ევსები კესარიელი, საეკლესიო ისტორია, წიგნები I—IV, ბერძნული ტექსტი თარგმნა და შენიშვნები დაურთო გ. ბარდმა, პარიზი. 1978, გვ. 206, შენ. 3).

აი, იერონიმეს სიტყვები: „წავიკითხე მისი (თეოფილეს, ე. წ.) ავტორობით სახარებისა და სოლომონის „იგავთა“ კომენტარები, რომლებიც ჩემი აზრით, სინატიფითა და ფრაზეოლოგიით არ თანხელდება ზემორე თხზულებებს (იგულისხმება თეოფილეს სამწიგნური „ავტოლიკესადმი“. ე. წ.) (პლ. VI, სვ. 199).

² იერონიმე გვაუწყებს: „თეოფილე პეტრე მოციქულის შემდეგ მეშვიდე ეპისკოპოსი იყო ანტიოქიის ეკლესიისა და მან ოთხი მახარებლის სიტყვები ერთ შრომად შეადგინა („ინ უნუმ ოპუს კომპიგენს“; პლ VI, სვ. 200).

ვლად ღმერთმა კვლავ ორსულობა მიმადლა ევას და შვა მან ძე სახელად სეთი, რომლისგანაც მომდინარეობს ადამიანთა მოდგმა ვიდრე დღევანდელ დღემდე. ვისაც სურს, რომ ცოდნა შეიძინოს თითოეული ტომის შესახებ, წმიდა წერილის გზით ადვილად გაიცხადებს ყოველივეს. როგორც აღვნიშნეთ ზემოთ¹, სხვა ქადაგებაში („ენ პეტერო ლოგო“), კერძოდ, პირველ წიგნში „ისტორიათა შესახებ“ („ენ ტე პროტე ბიბლო ტე პერი ჰისტორიონ“), ნაწილობრივ („ეკ მერუს“) ჩვენც განვიხილეთ გენეალოგიური ხაზი („ტეს გენეალოგიას ჰე ტაქსის“). ყოველივე ამას გვასწავლის სულიწმიდა მოსესა და სხვა წინასწარმეტყველთა პირით. ასე რომ, ის წერილი, რომელიც ჩვენ, ღვთისმოსავთ, გვაქვს, უძველესია და ამასთან უჭეშმარიტესიც ყველა სხვა მწერლისა და პოეტის თხზულებაზე. მუსიკის შესახებაც იყბედა ზოგმა, თითქოს აპოლონს მოეგონებინოს იგი. სხვები იმას ამბობენ, რომ ორფევსმა ფრინველთა ტყბილხმოვანებაში აღმოაჩინა მუსიკა. ამაოა და ფუჭი მათი სიტყვა, რადგანაც ესენი (აპოლონი და ორფევსი, ე. ჰ.) წარღვნიდან მრავალი წლის შემდეგ იყვნენ, ხოლო ნოეს ამბები, რომელსაც ზოგი დევკალიონს² უწოდებს, ჩვენ გადმოცემული გვაქვს ზემოხსენებულ წიგნში. თუ გსურს, შეგიძლია შენც ნახო იგი (თავი 30; პგ. VI; სვ. 1097—1100).

თეოფილე ანტიოქიელის შრომა „ავტოლიკეს წინააღმდეგ“ მრავალმხრივ საყურადღებო ძეგლია. ჩვენ ამჯერად, ცხადია, საშუალება არა გვაქვს განვიხილოთ იგი, მხოლოდ აღვნიშ-

¹ იგულისხმება 28-ე თავი, სადაც განმარტებულია ადამისა და ევას შესახებ ბიბლიური თხრობა. აღნიშნული თავის ბოლოს ვკითხულობთ: „ეს ევა, რომელიც თავდაპირველად გველმა აცთუნა, გახდა წინამძღვარი (ყოღვიანა); ამიტომ ბოროტმოქმედი ღმონი, იგივე სატანა, რომელიც მაშინ გველის პირით ემეტყველებოდა მას (ევას, ე. ჰ.) და რომელიც დღემდე მოქმედებს მის მიერ შთაგონებული („ენთუსიამონი“) ადამიანებში, იწოდება, როგორც „ევანი“ („ეევანი“ იყო წამოძახილი ბაქანალიის ეამს. ე. ჰ. შდრ. ანკრიპიდე, ტროელეი, 326). ღემონს ვეშაპადაც სახელდებენ... პირველად ეგვიპტეში იყო იგი. ბერი რამ შეიძლება ითქვას მასზე, ამიტომ ამჯერად გვერდს ვუვლი ყოველივე ამის გადმოცემას, რამეთუ სხვაგან უკვე გაუწყეთ მის შესახებ“ (თეოფილე ანტიოქიელი, ავტოლიკესადმი, თ. 28, პგ. VI, სვ. 1007).

² დევკალიონი — ანტიკური მითოლოგიის პერსონაჟი, რომელიც ადამიანთა წარსაწყმედად მოკლენილი წარღვნის ეამს გემს შეათარებს თავს.

ნავთ ორ მნიშვნელოვან სიახლეს, რაც ამ შრომამ შეიტანა ქრისტიანულ ლიტერატურაში: (1) თეოფილე ანტიოქიელი პირველია, რომელმაც გამოიყენა ტერმინი „სამება“ („ტრიას“) ერთარსება და სამპიროვანი ღვთის აღსანიშნავად:

„ამგვარად, ამბობს თეოფილე, სამი ღღე, რაც წინ უსწრებს მნათობთა შექმნას (ბიბლიური უწყებით მნათობები მეოთხე ღღეს იქმნა; შესაქ. I, 14—19, ე. ჳ.), სახეა სამებისა („ტჳპოს ტეს ტრიადოს“) („ავტოლიკესადმი“ 11, 15; ჳგ. VI, სვ. 1077); (II) თეოფილე ანტიოქიელი პირველია ეკლესიის მამათა შორის, რომელიც ეხება „შიგნიმდებარე სიტყვას“ („ლოგოს ენდიათეტოს“) და „გამოვლენილ სიტყვას“ („ლოგოს პროფორიკოს“)¹. ხსენებულ შრომაში ვკითხულობთ: წინასწარმეტყველებმა „უპირველესად, ერთსულოვნად გვასწავლეს, რომ არაარსთაგან დაიბადა ყოველივე, რადგანაც არაფერია თანამოასაქე ღვთისა („ტო თეო სჳნეკმასენ“); თვით არის ადგილი თავისი თავისა და არაფერი ექირვება მას; უპირატესია საუკუნეთა. ინება ღმერთმა ადამიანის შექმნა, რომ შეცნობილიყო მისგან. წინდაწინ განუმზადა მას სამყარო, რადგანაც კაცი ქმნილია და ნაკლულევანი, ხოლო ღმერთი — შეუქმნელი და უნაკლულო. ფლობდა ღმერთი თავის შიგნი თმდებარე სიტყვას საკუთარ წიაღში, რომელიც შვა და გამოავლინა („ექსერევექსამენოს“)² თავის სიბრძნესთან ერთად ყოვლის უწინარეს. ეს სიტყვა მისეულ შესაქმეთა თანაშემწედ ჳყავდა მას და მის მიერვე ქმნა ყოველივე“ („ავტოლიკესადმი“, 11, 10);

სხვა ადგილას ვკითხულობთ: „ღმერთი და მამა ყოველი-

¹ პროტოპრესვიტერი ჳ. პრეობრაჟენსკი აღნიშნავს: „მან (თეოფილემ, ე. ჳ.) პირველმა განასხვავა, აგრეთვე, სიტყვა ფარული და იმანენტური ღმერთში და სიტყვა გაცხადებული“ (პ. პრეობრაჟენსკი, ძველი ქრისტიანი აპოლოგეტების შრომები, სპბ. 1894, გვ. 454). ამასვე აღნიშნავს კვასტენი (იხ. ი. კვასტენი, დსახ. შრომა, გვ. 270). ამ საკითხის შესახებ იხ. ქვემოთ.

² სიტყვა „ექსერევექსამენოს“ მომდინარეობს ჳმნიდან „ექს-ერევეკო-მაჲ“, რომელიც ეტიმოლოგიურად ნიშნავს „ღებინებას, დაბოყინებას“, გადატანით კი — „გამოქმნას“ „გამოცემას“ (ხმისა და მისთ.), „გამოვლენას“. ძველ ქართულ მწერლობაში პირდაპირი აზრით იგი ითარგმნებოდა, როგორც „აღმობოყინება“. გადატანით კი — „გამოცემა“ (გამოსლ. 8, 3), „აღმოთქუმა“ (ფს. 44, 1; 118, 171; 144, 7); „გარდაცემა“ (ფს. 143, 12) და სხვა. სწორედ „გამოცემას“, „აღმოთქუმას“ ნიშნავს იგი ღვთის სიტყვასთან დაკავშირებით.

ვესი შეუცავია და არცერთ ადგილას არ არის იგი, რადგანაც ვერარა ადგილი ვერ განუსვენებს მას; ხოლო მისი სიტყვა, რომლის მიერაც შექმნა მან ყოველივე, რომელიც არის მისი ძალი და სიბრძნე და რომელსაც მიღებული ჰქონდა სახე მამისა, — ეს სიტყვა ღვთის სახით დადიოდა სამოთხეში და ესაუბრებოდა ადამს. თვით წმიდა წერილი გვასწავლის, რომ ადამს, მისივე თქმით, ხმა მოესმა, ხმა კი სხვა არა არის რა, თუ არა სიტყვა ღვთისა, რომელიც არის აგრეთვე, მისი ძე, არა ისე, როგორც ამბობენ პოეტები და მეზღაპრეები, თითქოს ღვთის ძეები თანაყოფის გზით იშვებიან, არამედ, როგორც გვაუწყებს ჭეშმარიტება, ეს არის სიტყვა, რომელიც მარადიულად შიგნი თმდებარეა ღვთის გულში („ენდიათეტოს ენ კარდია თეუ“). რაიმეს შექმნამდე ეს სიტყვა ჰყავდა მამას თანამოთათბირედ („სუმბულოს“), რომელიც არის მისი გონება („ნუს“) და აზრი („ფრონესის“). რაეამს ინება ღმერთმა ქმნა ყოველივე იმისა, რაც სურდა, შვა მან ეს სიტყვა გამოვლენილი, („ჰო ლოგოს პროფორიკოს“), რომელიც პირმშოა მთელი შესაქმნისა; არათუ დაცარიელდა იგი (მამა, ე. ჰ.) სიტყვისაგან, არამედ შვა სიტყვა და თავის სიტყვასთან მარადიულად თანამყოფია („ჰომილონ“. ლათ. „ვერსარეტურ“). ასე გვასწავლის წმიდა წერილი და ყველა ის, ვინც ღვთივსულიერია, მათ შორის იოანეც, რომელიც ამბობს: „პირველითგან იყო სიტყუად და სიტყუად იგი იყო ღმრთისა თანა“ (იოან. I, 1); ამით იოანე ცხადყოფს, რომ თავდაპირველად იყო მარტო ღმერთი და მასში არსებული სიტყვა. შემდეგ მახარებელი ამბობს: „და ღმერთ იყო სიტყუად იგი. ყოველივე მის მიერ შეიქმნა და თვნიერ მისა არც ერთი რამ იქმნა, რაოდენი რამ იქმნა“ (იოანე, 1, 3). ამგვარად, სიტყვა არის ღმერთი და ღვთისაგან შობილი („პეფუკოს“; ლათ. „გენიტუმ“), რომელსაც ყოვლიერების მამა, როდესაც კი ინებებდა, მიავლენს რაიმე ადგილზე, ხოლო ის მიდის და ისმინება კიდევ და იხილვება. [მამისაგან] მივლენილი და ადგილზე მყოფი“ (წიგნი II, თავი 22; პგ. VI, სვ. 1038).

1 მამა ღმერთის წილიდან ლოგოსის ანუ სიტყვის გამოსვლის შესახებ მიაწინებს წმ. ეგნატიც: „ერთი ღმერთი არის, რომელმაც გააცხადა (ანეროსას“) თავისი თავი მისი ძის იესუ ქრისტეს მიერ, რომელიც არის

ქვემოთ წარმოდგენილი თარგმანი, რომელიც თეოფილე ანტიოქიელის ხსენებული შრომის III წიგნის პირველ ცხრა თავს მოიცავს, უმეტესად პოლემიკური ხასიათისაა. მასში განქიქებულია ანტიკური რელიგია და ნაწილობრივ ფილოსოფია. ამგვარი განქიქება, ცხადია, არ ნიშნავს ანტიკურობის მთლიანობაში უარყოფას. საზოგადოდ, უნდა აღინიშნოს, რომ ეკლესიის მამათა დამოკიდებულება ანტიკური აზროვნებისადმი ხშირად მცდარად არის გაგებული. როდესაც ესა თუ ის საეკლესიო პირი უარყოფს, მაგალითად, გარეშე სიბრძნეს, უარყოფს ჩვეულებრივ იმ პირთა წინაშე, რომლებიც ხსენებულ სიბრძნეს საბოლოო ჭეშმარიტებად სახავენ. მართლმადიდებლური ტრადიცია დასაბამიდან დღემდე ყო-

სიტყვა მისი დუმილიდან გამოსული („აპო სიგეს პროკლეთონ“) და რომელიც ყოვლითურთ სათნო-ეყო მის მომავლინებელს“ (ეგნატი ანტიოქიელი, ეპისტოლე მაგნესიელთა მიმართ, 8, 2; იხ. ეგნატის ეპისტოლეთა პ. კამელოს გამოცემა, პარიზი, 1968, გვ. 86). ქრისტიანი ფილოსოფოსი ათენაგორა აღნიშნავს: „არის ძე ღვთისა სიტყვა მამისა სახით და ქმედებით („ენ იღვა კი ენერგია“). მისგან და მის მიერ იქმნა ყოველივე. ერთია მამა და ძე; ძე არის მამაში და მამა — ძეში, ერთობითა და ძალითა სულისა; ძე ღვთისა არის მამის გონება და სიტყვა... პირველი ნაშობია მამისა, არათუ ქმნილება, რადგანაც მამა, რომელიც არის მარადიული გონება და მარადიულად სიტყვიერი, დასაბამიდანვე ფლობდა თავის თავში სიტყვას (ათენაგორა, „შუამდგომლობა ქრისტიანთა გამო, თავი 10; პგ. VI, სვ. 908—909; შდრ. „პატრისტიკული ბერძნული ლექსიკონი“, გამოსცა გ. ლემპა, ოქსფორდი 1961, გვ. 899). წმ. იპოლიტე რომაელის სწავლებით „ღმერთმა... შვა სიტყვა, არა სიტყვა, როგორც ხმა, არამედ [ის სიტყვა], რომელიც შიგნიმდებარეა („ენდიათეტოს“) (იპოლიტე რომაელი, „წყალებითა წინააღმდეგ“, წიგნი X, თავი 33; პგ. XVI, სვ. 3447; შდრ. გ. ლემპის დასახ. გამოც. გვ. 899). მოტანილი ციტატები ცხადყოფს, რომ მსჯელობა ეხება არა თავად ძე ღმერთის ანუ ღვთის სიტყვის მდგომარეობის ცვალებადობას (როგორც ეს შემდეგში მწვალებელთა მიერ იქნა აღიარებული), არამედ სიტყვის მარადიულ და დაუსაბამო მყოფობას მამისეულ წიაღში და ასევე მარადიულ და დაუსაბამო შობას იმავე წიაღიდან (ე. ი. არა იმას, რომ გარკვეულ დროს სიტყვა ღვთისა მამისეულ წიაღში არსებობდა, შემდეგ კი, გარკვეული დროის შემდეგ, იშვა მისგან). ცხადია, წმ. თეოფილესა და წმ. იპოლიტეს მიზანი იყო ადამიანური ენით განეხილათ მამისა და ძის დაუსაბამო არსებობისეული ერთობა და დაუსაბამოდ ჰიპოსტატური განყოფა; მას შემდეგ, რაც ერერტიკოსებმა (პირველ რიგში, ეპლენტინელებმა) ეპიფორი ახსნა მისცეს მამის წიაღში სიტყვის ფარულად მყოფობას და შემდეგ იმავე წიაღიდან მის შობას, მართლმადიდებლობა უარყო აზრი „შიგნიმდებარე“ და „გამოვლენილი“ სიტყვის შესახებ. წმ. გრიგოლ ნოსელი გვაუწყებს: „ნუ ვითიქრებთ, რომ ძე ოდესმე იყო უჩინარი, მამაში დღეობდა, რათა არ წარმოვიდგინოთ სიტყვა შიგნიმდებარედ და გამოვლენილად“ (პგ. 45, 1296 ბ.). ამასვე აღნიშნავს ათანასე ალექსანდრიელი, იოანე ოქროპირი და სხვა (იხ. გ. ლემპი, დასახ. შრომა, გვ. 899).

ველთვის ჰკრეტდა ანტიკურ მწერლობასა და ფილოსოფიაში ჰემმარიტების მარცვალს, რომელიც სასარგებლო იყო ქრისტიანისთვისაც (თუმცა არა აუცილებელი). წმ. იუსტინე მარტილი ამბობს: „ქრისტე არის პირმშო ღვთისა და, როგორც აღვნიშნეთ, სიტყვაც არის ის, რომელსაც კაცთა მთელი მოდგმა ეზიარება. ისინი, ვინც ამ სიტყვის მიხედვით ცხოვრობენ, ქრისტიანები არიან, თუმცა [წარმართები] უღმერთოებად რაცხენ მას, როგორც სოკრატეს, ჰერაკლიტესა და მათ მსგავსებს ელინთა შორის“ (წმ. იუსტინე, აპოლოგია I, თავი 46; პგ. VI, სვ. 396). იგივე წმინდანი სხვა ადგილას წერს: „რაც კი ფილოსოფოსებმა და კანონმდებლებმა კარგად თქვეს და აღმოაჩინეს, ყოველივე ეს სიტყვის (ე. ი. ლოვოსის, ძე ღმერთის, ე. ჰ.) ნაწილობრივი შეცნობითა და განჰკრეტით იქმნა; ხოლო რადგანაც მათ სრულად ვერ შეიძინეს ყოველივე ის, რაც სიტყვისაა, რომელიც არის ქრისტე, ამიტომ ხშირად ურთიერთსაწინააღმდეგოც კი თქვეს (იქვე, სვ. 461). თავად წმ. თეოფილე, რომელიც დაუფარავად ამხილებს ანტიკურობის მრავალ სიბილწეს, ამავე დროს სიბილწურ ტექსტებს ჰემმარიტ წინასწარმეტყველებად დაგვისახავს (იხ. წიგნი II, თავი 31; თავი 36).

დასასრულ, აღვნიშნავთ, რომ ჰემმოთ წარმოდგენილი თარგმანი შესრულებულია ორიგინალის მინისეული გამოცემიდან (იხ. ჟ. მინი, პატროლოგია გრეკა, გამოსცა ჟ. მინმა, ტ. VI, სვ. 1121—1136).

ელიშერ ჰელიძე.

წიგნი III

1. თეოფილე ავტოლიკეს მოგვიტახე! ისევე, როგორც სხვა მწერლები, რომლებიც ფუჭი დიდებისათვის მრავალი წიგნის დაწერას ესწრაფვიან და ხან ღმერთების, ხან ომების, ხან კიდევ ჟამთა შესახებ გვაუწყებენ, ხანაც უსარგებლო თქმულებებსა თუ რაღაც მსგავს სისულელეებს გადმოგვცემენ, დღემდე ამასვე ემუშაები შენც და უყოყმანოდ თავს იღებ ამგვარ შრომას. ჩვენთან შეხვედრის ჟამს კი უგუნურებად რაცხ ჰქმნარიტების სიტყვას და თვლი, რომ ჩვენეული წიგნები ახალია და არა ძველი. სწორედ ამიტომ არ დავაყოვნებ და როგორც ღმერთი მომმადლებს, გაუწყებ ჩვენი წერილის სიძველის შესახებ, გაუწყებ ზოგადი და მოკლე განმარტების სახით, რომ დიდად არ გაგსარჯო, მაგრამ ისე კი მოხდეს, რომ შეიძნო ფუჭსიტყვაობა ყველა სხვა წიგნისა.

2. მართებდათ მწერლებს, ან თვითმხილველნი ყოფილიყვნენ იმისა, რაც გვაუწყეს, ანდა თვითმხილველთაგან ზედმიწევნით გაეგოთ ყოველივე, რადგანაც საექვეო საქმეთა აღმწერნი, შეიძლება ითქვას, წყალს ნაყავენ. რა ირგო თუნდაც ჰომეროსმა ილიონის ომის აღწერით, გარდა იმისა, რომ ცთომილებაში ჩააგდო მრავალნი, ანდა რა ირგო ჰესიოდემ ეგრეთ წოდებულ ღმერთთა შთამომავლობითი ხაზის შექმნით, ან კიდევ ორფევსმა სამას სამოცდახუთი ღმერთის აღიარებით? (თუმცა სიცოცხლის მიწურულს თვითვე უარყო ისინი და თავის „შეგონებებში“³ ერთი ღმერთის არსებობა თქვა)! რა სარ-

¹ ერთ ხელნაწერში აღნიშნული მოკითხვის ნაცვლად წერია: „ანტიოქიის მეექვსე პატრიარქი თეოფილე ავტოლიკე ელინისადმი ქრისტიანთა სარწმუნოების შესახებ, და რომ ჩვენეული საღვთო სიტყვები („ლოგია“) უძველესია და უჭეშმარიტესი ეგვიპტელ, ელინელ და ყველა სხვა მწერალზე“ (პგ. VI, 1121, შგნ. 93).

² ასევე, ლაქტანციუსიც ორფეუსის მიერ შემოტანილ 365 ღმერთს ასახელებს, ხოლო იუსტინე ფილოსოფოსის ავტორობით ცნობილ შრომაში „ერთმთავეობის შესახებ“ მხოლოდ 360 ღმერთთა მოხსენიებული (პგ. VI, 1122, შგნ. 95).

³ „შეგონებები“ — ბერძნ. „ღიათეაი“. სიტყვა „ღიათეაე“, ერთი მხრივ, ნიშნავს მცნებას, განჩინებას, შეგონებას. მეორე მხრივ კი — აღტქმას, დაპირებას. შიიჩნევენ, რომ ხსენებული სიტყვა ზემორე კონტექსტში პირველ მნიშვნელობას შეიცავს.

ვებლობა მოუტანა არატეს ანდა სხვებს, რომლებიც მისებრ მსჯელობდნენ, კოსმიური წრებრუნვის სფერულმა აღწერილობამ გარდა ადამიანური დიდებისა, თუმცა ვერც ეს დიდება მიიღეს მათ ღირსებისამებრ. რა თქვეს მათ ჭეშმარიტი? რა ისარგებლეს ევრიპიდემ, სოფოკლემ და სხვა ტრაგიკოსებმა მათი ტრაგედიებიდან, ანდა მენანდრემ, არისტოფანემ და დანარჩენმა კომედიოგრაფებმა — კომედიებიდან, ან კიდევ ჰეროდოტემ და თუკიდიდემ — მათი ისტორიებიდან? რით არგო პითაგორას თუნდაც ტაძარმა და ჰერაკლესეულმა სვეტებმა¹, ანდა დიოგენეს ცინიკურმა ფილოსოფიამ, ეპიკურეს კი იმის მტკიცებამ, რომ არ არსებობს განგება; რა სარგებლობა მოუტანა ემპედოკლეს უღმერთობის სწავლებამ, ანდა სოკრატეს — ძალის, ბატის, ჭადრის, დამეხილი ასკლეპიოსის ან კიდევ იმ ღვთაებების დაფიცებამ, რომლებსაც თავად მოუხმობდა? რის გამო მოკვდა იგი ნებაყოფლობით, რა და როგორი საზღაურის მიღებას მოელოდა სიკვდილის შემდეგ? რა არგო პლატონს მისეულმა სწავლებამ ანდა სხვა ფილოსოფოსებს მათმა მოძღვრებამ, რომელთა ჩამოთვლა სიმრავლის გამო შორს წაგვიყვანდა? ყოველივე ამას იმიტომ ვამბობთ, რომ საჩინო ვყოთ ზემოხსენებულთა უსარგებლო და უღვთო აზროვნება.

3. ამაო და ფუჭი დიდება შეიყვარა ყველა მათგანმა; ვერც თვით შეიცნეს ჭეშმარიტება, ვერც სხვებს უწინამძღვრეს ჭეშმარიტებისაკენ; მათივე სიტყვები ამხილებს მათ, რადგანაც ურთიერთსაწინააღმდეგოს ამბობდნენ ისინი და თვითვე არღვევდნენ თავიანთ მტკიცებებს, რაც ნიშნავს, არა მხოლოდ ერთიმეორე დაამხეს მათ, არამედ ზოგმა თავისი მოძღვრებაც გააქარწყლა. ასე რომ, მათი დიდება უღირსებად და უგუნურებად გადაიქცა; ამიტომაც გონივრულად მოაზროვნენი

¹ დიოგენე ლაერტის უწყებით, როცა პითაგორა ეგვიპტეში მივიდა, ტაძარში შეიყვანეს იგი და ღმერთების საიდუმლოებებში განსწავლეს. იქვე იხილა მან ზემოხსენებული სვეტები, რომლებსაც თეოფილე ჰერაკლეს ანუ იგივე ჰერაკლესის სვეტებად წარმოგვიდგენს. ზოგი მკვლევარი ხელნაწერისეულ ტექსტს დამახინჯებულად მიიხევის და „ჰერაკლეს“ ნაცვლად „ჰერმესს“ აღადგენს. მართლაც ჰერმესის ანუ იგივე მერკურის სვეტები ცნობილი იყო ანტიკურ სამყაროში (იხ. პგ. VI, სვ. 1123, შენ. 97).

კიცხავენ მათ. მართლაც, ჯერ ღმერთების შესახებ იმსჯელეს მათ, შემდეგ კი უღმერთობა იქადაგეს, ასევე, ჯერ სამყაროს შექმნა აღიარეს, საბოლოოდ კი თავისთავადი არსებობა მიანიჭეს ყოველივეს და თუმცა განგების შესახებ თქვეს სიტყვა, იქვე დაგვმოდღერეს, რომ უგანგებო იყო სამყარო. განა მათ არ გვასწავლეს აღვირახსნილობა, მრუშობა და სიძვა, როდესაც სიწმიდის შესახებ ისურვეს წერა? განა მათვე არ გააფრცელეს ფარული სიბილწენი? თვითვე ამბობენ, რომ პირველებმა სწორედ მათმა ღმერთებმა აღასრულეს ენით უთქმელი აღრევანი და შეწყვილებანი, აგრეთვე, უწესო ჰამა. ვინ არ უმღერის შვილთამჰამელ კრონოსს, აგრეთვე ზევსს, მის ძეს, რომელმაც ჩაყლაპა მეტიისი და ბილწი ნაღიმები გაუმართა ღმერთებს, სადაც, ამბობენ, კოკლი მჭედელი ჰეფესტო მსახურებს მათ? ზევსის დამ ჰერამ არა მხოლოდ ძმაზე იქორწინა, არამედ თავისი ბილწი პირით ენით უთქმელი საქმენიც აღასრულა; თუმცა ყველაფერი ის, რასაც ზევსის შესახებ მღერიან პოეტები, შენც კარგად უწყი. რაც შეეხება პოსეიდონს, აპოლონს, დიონისეს, ჰერაკლეს, ავხორც („ფილოკოლპოს“) ათინას, ანდა ურცხვ აფროდიტეს, მათ შესახებ ამჯერად არაფერს ვიტყვი, რადგანაც სხვა წიგნში უკვე მქონდა საუბარი¹.

4. იქნებ არც გაგვეკიცხა ისინი, ჰემარიტ მოძღვრებაში დაეკვებულნი რომ არ მეხილე. თუმცა ხარ ბრძენი, წადიერად იწყნარებ სულელთ; უგუნურ კაცთაგან აღძრული და ფუჭი სიტყვებით წარტაცებული უღვთო პირთა მიერ გავრცელებულ ხმებს ერწმუნები, რომლებიც სიცრუით ცილსა გვწამებენ ჩვენ, — ღვთისმოსაეებსა და ქრისტიანებად სახელდებულებს. იმას ამბობენ, თითქოს ზიარი ცოლები გვყავდეს, თითქოს აღრეულად თანავეყოფოდეთ ურთიერთს, თითქოს საკუთარ დებსაც ვეწყვილებოდეთ და, რაც განსაკუთრებით უღვთოა და პირუტყვული, თითქოსდა ვჭამდეთ კაცის ხორცსაც. ამასთან, რადგანაც, მათი თქმით, ახლად ჩენილია, რასაც ვასწავლით, ამიტომ თითქოს არაფრით ძალგვიძს დავამტყიცოთ ჩვენი მოძღვრება და ჩვენეული ჰემარიტება. ამბო-

¹ იგულისხმება ამავე შრომის I წიგნი.

ბენ, რომ სისულელეა ჩვენი სიტყვა. უფრო ის მიკვირს, რომ შენ, რომელიც ყველაფერში გულმოდგინე ხარ და ყოველ საქმეს გამოიწვლილავ, უგულისყუროდ ისმენ ჩვენსას, მაშინ როდესაც ღამითაც კი, თუ ამის დრო გაქვს, ბიბლიოთეკებს ეშურები.

5. რადგანაც დიდად ნაკითხი ხარ, გვითხარ, რა წერია ძენონის, დიოგენესა თუ კლევანთოსის წიგნებში. განა კაცი-ჭამიობას არ გვასწავლიან ისინი, განა არ აქეზებენ შვილებს, რომ მათივე მშობლები შეაგბონ და შეთქვლიფონ, განა იმას არ გვაუწყებენ, რომ თუ ვინმე არ ინებებს ამგვარ რამეს ანდა ხსენებული ბილწი კერძის თუნდაც ერთ ნაწილს უკუაგდებს, თვით მას შეჭამენ? უფრო მეტიც, უღვთო ხმა დიოგენისა იმასაც გვასწავლის, რომ შვილებმა მსხვერპლად უნდა შეწირონ მშობლები და შეჭამონ ისინი. განა ჰეროდოტეც არ მოგვითხრობს, რომ კამბიზმა დაკლა ჰარპაგეს შვილები, შეაგბო ისინი და კერძად მიართვა მათსავე მამას? ჰეროდოტე იმასაც გვიყვება, რომ ინდოელთა შორის შვილები ჭამენ საკუთარ მშობლებს. ჰოე, ამგვარ მწერალთა, უფრო კი ამგვარად მსწავლელთა უღვთო მოძღვრებაე! ჰოე, ამგვართა უღვთობაე და ურჯულოებაე! ჰოე, ამგვარად სიბრძნისმეტყველთა და სიბრძნის შესახებ მქადაგებელთა ბრმა-აზროვნებაე! მათ, რომლებმაც გვამცნეს ეს ყოველივე, უღვთობით აღავსეს სამყარო.

6. ურჯულო თანაყოფის შესახებაც ურთიერთთანხმობაშია გზააბნეულ ფილოსოფოსთა თითქმის მთელი გუნდი. პლატონმა, რომელიც სიბრძნისმეტყველთა შორის უმეტესად პატივდებული ჩანს, თავის ერთერთ შრომაში „პოლიტიკის შესახებ“, კერძოდ კი ამ შრომის მეხუთე წიგნში, პირველმა დააკანონა გარკვეულწილად ის, რომ ყველას ზიარი ცოლები უნდა ჰყავდეს. მან ზევსისა და კრეტელთა რჯულმდებლის¹ მაგალითს მოუხმო და თავისი აზრი იმით დაასაბუთა, რომ ამ გზით თითქოს შვილიერებაც გამრავლდებოდა და შრომისაგან დაქანცულებსაც მსგავსი კავშირები თითქოს შეეხება მოგვრიდა. ასევე, ეპიკურეც, გარდა უღმერთოების სწავლე-

¹ იგულისხმება მინოსი.

ბისა, რჩევას იძლევა დედებთან და დებთან შეწყვილების შესახებ, თუმცა კანონები კრძალავენ ამას. სოლონმა ცხადად განაწესა, რომ კანონიერი ქორწინებით უნდა იშვეს შვილები და არა მრუშობის გზით, რათა არ მოხდეს ისე, რომ მამად მიიღონ ის, ვინც არ არის მამა, ხოლო ნამდვილი მამა უმეცრების გამო შეურაცხყონ. რომაელთა და ელინთა დანარჩენი კანონებიც მსგავსადვე კრძალავენ ხსენებულ საქმეებს.

ეპიკურე და სტოელები ზემოთქმულთან ერთად დებთან თანაწოლასა და კაცთა ურთიერთ თანაყოფასაც განაჩინებენ. ამგვარ სწავლათა მიერ ავსებენ ისინი ბიბლიოთეკებს, რომ სიყრმიდანვე შთაუწერგონ ბავშვებს ურჯულოება. თუმცა სხვა რა უნდა ვთქვა მათ შესახებ, როდესაც თვით ისინი მათსავე ღმერთებს ამგვარ საქმეებს განუკუთვნებენ.

7. რომლებსაც თუმცა ღმერთებად სახელდებენ, ამავე დროს არარად რაცხენ. ზოგიერთები ამბობენ, რომ ატომებისაგან შედგებიან ეს ღმერთები, ზოგიერთები კი, პირიქით, ატომებად გარდაქმნიან მათ და იმასაც ცხადყოფენ, რომ არაფერი ძალუძთ ადამიანებზე მეტად. პლატონი ამბობს, რომ არსებობენ ღმერთები, მაგრამ ამავე დროს მოწადინეა იმისა, რომ ნივთიერი იყოს მათი აგებულება. პითაგორამ, რომელიც აგრერიგად დაშვრა ღმერთების გამო და რომელმაც მთელი ქვეყანა მოიარა, საბოლოოდ ის განაჩინა და თქვა, რომ ბუნებრივად და თვითნებურად მოძრაობს ყოველივე, ხოლო ღმერთები არარას ზრუნავენ კაცთათვის. ბევრი რამ უღვთო აზრი შემოიტანა, აგრეთვე, კლიტომაქე აკადემიელმა, ხოლო კრიტიამ ეს თქვა: „თუნდაც რომ არსებობდეს ღმერთები, არ ძალმიძს მათ შესახებ სიტყვის თქმა, არც იმის ცხადყოფა, თუ როგორები არიან ისინი, რადგანაც ბევრი რამ მბრკოლებს მე“. ამასვე ამბობს პროტაგორა აბდერიტელიც. რაც შეეხება უმეტესად უღვთო ევემეროსს, უსარგებლოა მისი ხსენებაც, რადგანაც ბევრი რამ შეჰკადრა მან ღმერთებს, ბოლოს კი სრულიად უარყო მათი არსებობა და მიიჩნია, რომ თვითნებურად განეგება ყოველივე. პლატონმაც თუმცა ამდენი რამ თქვა ღვთის ერთმთავრობისა და ადამიანის სულის შესახებ, რომელიც უკვდავად შერაცხა მან,

შემდეგში თავისი თავის საწინააღმდეგოდ ზოგი სულის სხვა ადამიანებში გადასვლა, ზოგისა კი უტყვე ცხოველებში დამკვიდრება ირწმუნა. განა საშინელებად და ურჯულოებად არ წარმოუჩნდება გონიერ ხალს სწავლება იმისა, რომ ადამიანი შემდეგში მგელი გახდება, ანდა ძაღლი, ან ვირი ან კიდევ სხვა რამ უტყვე ცხოველი? ამგვარ სისულელებს ამბობს, აგრეთვე, პითაგორა, რომელიც იმასაც დასძენს, რომ არ არსებობს განგება. ვისლა ვერწმუნოთ? იქნებ ფილემონ კომიკოსს, რომელიც ამბობს: „თაყვანისმცემელნი ღვთისა გულითადად ელიან გამოხსნას“; ანდა იქნებ ზემოხსენებულ ევემეროსს, ეპიკურეს და პითაგორას მივაპყროთ გულისყური ან სხვა ვინმეს, ვინც უარყოფს ღვთის თაყვანებას და აუქმებს წინაგანგებას. ღვთისა და განგების შესახებ ამბობს არისტონი:

„იმედი გქონდეს, ვინც ღირსია, ყველა მათგანი განსაკუთრებულ შემწობას მიიღებს ღვთისგან! თუ არ მოელის საზღაური ღირსებით მცხოვრებს, ფუჰი ყოფილა ჩვენეული ღვთისმსახურება!“
„ვთქვათ¹, რომ ასეა, მაგრამ თვითვე ხშირად მიხილაჲს გაკირვებაში, ვინც ირჩია საღვთოდ ცხოვრება, ხოლო ისინი, გულმოდგინედ რომ დაეძებენ, რა ისარგებლონ, საკუთარ თავს რა არგონ მხოლოდ, ჩვენზე უმეტეს ღირსებას და პატივს იძიებან!“
„ეს² მხოლოდ ახლა! ჩვენ კი გვმართებს შორით განეკვრიტოთ, და მოველოდეთ, აღსრულდება ეს ყოველივე, არა იმგვარად, როგორც ფიქრობს ზოგი მათგანი, ბოროტგანზრახვით და ურგებად ცხოვრებისათვის, თითქოს არსებობს თვითნებური რამ მოძრაობა თითქოს განაგებს ყოველივეს ოდენ შემთხვევა. მხოლოდ ისინი, უკეთურნი, სჯიან ამგვარად, რომ გაამართლონ მათი ყოფა, ხოლო მართალნი საზღაურს რასმე მიიღებენ, სასჯელს — ბოროტნი, რადგანაც ვიციოთ, უგანგებოდ არარა ხდება!“

ყველაფერი ის, რაც მრავალმა და მრავალმა თქვა ღვთისა და წინაგანგების შესახებ, ადვილად ამხელს მათ შეუთან-

¹ მეორე სტროფი მოპასუხეს ეკუთვნის.

² ამ ტაეპიდან კვლავ პირველი მთქმელი შემოდის.

ხმებლობას. ზოგიერთებმა სრულიად უარყვეს ღმერთი და განგება, ზოგმა კი ღვთის არსებობა დაამტკიცა და ისიც აღიარა, რომ სწორედ განგება წარმართავს ყველაფერს. ამიტომ გონიერ მსმენელსა და მკითხველს მართებს გულისყურით ჩაუყვირდეს თითოეული მათგანის სიტყვებს, როგორც ამბობს სიმელონი:

„ზოროტს თუ კეთილს განუსჯელად ეუწოდებთ პოეტს,
გვმართებს კი განსჯა!“

ამასვე ამბობს ფილემონიც:

„ბრიყვი მსმენელი სიბრიყვის გამო
თავის თავს როდი კიცხავს და ამხელს.“

ამიტომ, გვმართებს გულისყურით ჩაუყვირდეთ ყოველივეს და გამჭირახი გონებით გამოვიწვლილოთ ფილოსოფოსთა და პოეტთა სიტყვები.

8. ღმერთების უარყოფელნი შემდეგში თვითვე აღიარებდნენ იმავე ღმერთებს და ურჯულო საქმეებსაც განუკუთვნებდნენ მათ. პოეტები კეთილხმოვნად უმღერიან ყველაფერ იმას, რასაც უკეთურად იქმოდა ზევსი, ხოლო ქრიზიპე, რომელმაც ბევრი სისულელე თქვა, გარკვევით მიგვანიშნებს, რომ ჰერა ბილწი პირით თანაყოფოდა ზევსს. განა საჭიროა აღვრიცხოთ ყველა სიბილწე, რაც აღასრულა ღმერთების დედამ, ანდა ლათიარის ზევსმა, რომელიც კაცის სისხლს ეწაფებოდა¹, ან თუნდაც ატისმა, რომელმაც თავი დაისაჭურისა, ან კიდევ ზევსმა, ტრაგიკოსად სახელდებულმა, რომელმაც წყალში ჩაძირა თავისი ხელი, რომაელებმა კი იგი ღმერთად შეერაცხეს. დავიდუმებ ანტინოეს ტაძარზე და სხვა ღმერთების სალოცავებზე, რადგანაც მათი ამბები სასაცილოა გონიერთათვის.

ამგვარად, ხსენებულ სიბრძნისმეტყველთა უღვთოება, მათი ურთიერთაღრევები და უკანონო თანაყოფანი თვით მათ სიტყვებში ცნაურდება. ამასთან კაციჰამიობაც ვლინდება მათ ნაწერებში. როგორც თვით აღწერენ, მსგავს საქმეებს უპირველესად ღმერთები იქმან.

¹ ლათიარის ზევსის სისხლისმსმელობას გვაუწყებს ტატიანე სირიელიც: „ვნახე რომაელებთან ლათიარის ზევსი, რომელიც კაცისმკვლელთა მიერ დანთხეული აღამიანთა სისხლით ტკებოდა“ (ტატიანე, სიტყვა ელინთა მიმართ, პგ. VI, სვ. 866).

9. ჩვენ ვაღიარებთ ღმერთს, მაგრამ ერთს, რომელიც არის ყოველივეს შემოქმედი და დამბადებელი. ისიც ვუწყით, რომ განგება წარმართავს ყოველივეს, მაგრამ — მხოლოდ მისეული განგება; წმიდა რჯულიც გვისწავლია, მაგრამ რჯულმდებლად გვყავს ჭეშმარიტი ღმერთი, რომელიც გვასწავლის სამართლიანობას, ღვთისმოსაობას, ქველმოქმედებას. ღვთისმოსაობის შესახებ ასე გვამცნებს იგი: „არა იყვნედ შენდა ღმერთნი უცხონი ჩემსა გარეშე. არა ჰქმნე თავისა შენისა კერპი, არცა ყოვლადვე მსგავსი, რაოდენი არს ცათა შინაზე, და რაოდენი არს ქუეყანასა ზედა-ქუე, და რაოდენი არს წყალთა შინა-ქუეშე ქუეყანისა. არა თაყვანისცე მათ, არცა მსახურებდე მათ, რამეთუ მე ვარ უფალი ღმერთი შენი“ (გამოსლ. XX, 3—9). ქველმოქმედების შესახებ ამას გვაუწყებს: „პატივ-ეც მამასა შენსა და დედასა შენსა; რადთა კეთილი გეყოს შენ და დღეგრძელ იყო ქუეყანასა ზედა, რომელი უფალმან ღმერთმან შენმან მოგცეს შენ“ (გამოსლ. XX, 12). ასევე, სამართლიანობის შესახებ: „არა იმრუშო, არა კლა, არა იპარო, არა ცილი სწამო მოყუასსა შენსა წამებითა ცრუდთა. არა გული გითქუმიდეს ცოლისათვის მოყუასისა შენისა. არა გული გითქუმიდეს სახლისათვის მოყუასისა შენისა, არც ყანისა მისისა, არცა მონისა მისისა, არცა მხევლისა მისისა, არცა ხარისა მისისა, არცა კარაულისა მისისა, არცა ყოვლისა საცხოვარისა მისისა, არცა ყოვლისა მისთვის, რადცა იყოს მოყუასისა შენისა“ (გამოსლ. XX, 13—17); აგრეთვე: „არა გარდაჰგულარძნო სამართალი დავრდომილისა საშჯელსა შინა მისსა. ყოვლისაგან სიტყუსა ცრუდსა განეშორო, უბრალო და მართალი არა მოაკუდინო და უღმრთოდ არა განამართლო ქრთამისათვის და ქრთამი არა მიიღო, რამეთუ ქრთამი დააბრმობს თუალთა მხედველთასა და განაბოროტებს სიტყუათა მართალთა“ (გამოსლ. XXIII, 6—8).

ამგვარი საღვთო სჯული ამსახურა მოსემ, ღვთის მონამ, მთელ ქვეყანას, განსაკუთრებით ებრაელებს, იუდეველებად სახელდებულებს, რომლებიც ძველთაგანვე დაიმონა ეგვიპტელთა მეფემ, თუმცა იყვნენ ისინი „მართალი თესლი“ ღვთისმოსავ და ღირსეულ კაცთა: აბრაამისა, ისააკისა და იაკო-

ბისა. მოიხსენა ისინი ღმერთმა, მოსეს მიერ უჩვეულო სასწაულები და ნიშები აღასრულა, გამოიხსნა ებრაელები, გამოიყვანა ეგვიპტიდან, უწინამძღვრა მათ უდაბნოში და კვლავ დაამკვიდრა ქანანელთა მიწაზე, რომელსაც ამის შემდეგ იუდეა ეწოდა. ბოლოს რჯულიც დაუდო მათ ღმერთმა და ასწავლა ყოველივე ზემოთქმული, რასაც მოიცავს მისი დიადი, საკვირველი და მართალი რჯულის ათი მცნება.

(+258)

დაიბადა დაახლოებით 200 წელს ქალაქ კართაგენში, სადაც მთელი სიცოცხლე გაატარა. კიპრიანე მდიდარი წარმართი სენატორის შვილი იყო, მშვენიერი საერო განათლება მიიღო და ბრწყინვალე ორატორი შეიქნა. იგი კართაგენის სკოლაში ფილოსოფიასა და მჭევრმეტყველებას ასწავლიდა, ხშირად გამოდიოდა სასამართლოზე თანამოქალაქეების დასაცავად. კიპრიანე მოგვიანებით იხსენებდა, რომ დიდხანს „ღამის წყვდიადში იმყოფებოდა ჭეშმარიტების ნათელს მოშორებული“. მშობლებისაგან დანატოვარ მემკვიდრეობასა და თავის შრომით ნაშოვნ ქონებას განთქმული რიტორი ქეიფსა და დროსტარებაში ფლანგავდა; მაგრამ ღრეობამაც ვერ შეძლო ჩაეხშო მისი ლტოლვა ჭეშმარიტებისაკენ. ქრისტიანობით დაინტერესებული აპოლოგეტ პრესვიტერ ტერტილიანეს ნაწარმოებებს გაეცნო. მოგვიანებით მღვდელმთავარი წერდა, რომ იმ დროს იგი ვერ ჩასწვდა უფლის მიერ დაპირებულ აღდგომასა და განახლებას. ამ მდგომარეობიდან იგი გამოიყვანა მისმა მეგობარმა და მასწავლებელმა პრესვიტერმა. 46 წლის ბრძენი წარმართი მიღებულ იქნა ქრისტიანთა საკრებულოში. მანამდე კი კიპრიანემ ქვრივ-ობლებს დაურიგა ქონება და თავად ცეცილიუსის სახლში დასახლდა. წმიდა კიპრიანემ თავის მეგობრის დონატესადმი მიწერილ წერილში აღწერა ის ღვთიური მადლი, რომელმაც განაახლა იგი მონათვლის შემდეგ: „როდესაც განმაახლებელმა ტალღამ გადაწმიდა ჩემი ძველი ცხოვრების ყველა მანკიერება, წყნარი და მშვენიერი, ზეციდან ჩაეშვა ჩემს გულში. როდესაც ზეციურმა სულმა მეორედ დამბადა, ახალ ადამიანად მაქცია, საოცრად განვმტკიცდი ექვების წინაშე, გამეხსნა საიდუმლოებანი, განათდა სიბნელე. მე გავიგე, რომ ცოდვებისათვის დაბადებული ჩემში მცხოვრები მატერია მიწას ეკუთვნოდა და ახლადაიწყო ახალი, სულიწმიდით გასხივოსნებული ცხოვრება. ღმერთშია და ღმერთისაგან არის ჩვენი ძალა, მისგანაა სიმტკიცე. მისგან მოგვდის მომავალი ნეტარების შეგრძნება“.

ერთი წლის შემდეგ კიპრიანე მღვდლად აკურთხეს, ხოლო კართაგენის ეპისკოპოს დონატეს სიკვდილის შემდეგ, დაახლოებით 248 წელს იგი მის კათედრაზე აიყვანეს.

მღვდელმთავარი უპირველეს ყოვლისა ეკლესიების კეთილმოწყობასა და სამღვდლოებასა და სამწყსოში მანკიერების მოსპობას შეუდგა, თავისი ნათელი ცხოვრებით ყველას სიწმიდისა და სიბრძნის მაგალითს აძლევდა. მისი სახელი შორს გავარდა. სხვა კათედრების ეპისკოპოსები ხშირად მიმართავდნენ რჩევისათვის. ეპისკოპოსი გაიხიზნა იმპერატორ დაკიუსის მიერ წამოწყებული დევნის დროს (249—251), რადგან მისი სიცოცხლე სამწყსოს სულიერი სიმტკიცისათვის სჭირდებოდა. გამგზავრების წინ მღვდელმთავარმა ქონება სამღვდლო პირთ დაურიგა, რათა გაჭირვებულებს დახმარებოდნენ.

ეპისკოპოსი მუდმივ კავშირში იმყოფებოდა კართაგენის ქრისტიანებთან: წერდა წერილებს პრესვიტერებს, აღმსარებლებსა და მოწამეებს. ზოგიერთ ქრისტიანს შეეშინდა წამებისა და კერპებს თაყვანი სცესა. ეს შეცდენილი ქრისტიანები აღმსარებლებს მიმართავდნენ, წერილობითი დასტური მოგვეცით, რომ ეკლესიაში დაგვაბრუნონო. კიპრიანემ მისწერა პრესვიტერებს, შეცდენილი ქრისტიანების უკან მიღება შეიძლება მხოლოდ მათი განდგომის მიზეზების ღრმად შესწავლის შემდეგო. მათი მიღება შესაძლებელი იყო, მხოლოდ საეკლესიო მონანიებისა და ეპისკოპოსის თანხმობის შემდეგ. ზოგიერთი განდგომილი ეკლესიაში დაუყოვნებლივ დაბრუნებას ითხოვდა და ამით ღელვა შექჟონდათ საკრებულოში. ეპისკოპოსი კიპრიანე წერილებს სწერდა სხვა ეპარქიების მღვდელმთავრებსაც და მათ გამოცდილებას იყენებდა. ყველა მღვდელმთავარს მოსწონდა მისი გადაწყვეტილებანი.

ეპისკოპოსმა კიპრიანემ წერილობით დაავალა ოთხი ეკლესიის მსახურთ შეემოწმებინათ იმ ადამიანთა ცხოვრება, რომელნიც მღვდლობასა და დიაკვნობას აპირებდნენ. მას წინ აღუდგნენ საერო პირი ფელიქსიმე და ხუცესი ნოვატე, რომლებმაც სამწყსოს ამბოხი გამოიწვიეს. წმ. კიპრიანემ განკვეთა ფელიქსიმე და მისი ორი მიმდევარი. წერილში იგი მიმართავდა სამწყსოს, არ შეებღალათ ეკლესიის ერთიანობა და ეპის-

კობოსის ჩამოსვლას დალოდებოდნენ. მის წერილს კართაგენის ქრისტიანთა უმრავლესობამ დაუჭირა მხარი.

მალე ეპისკოპოსი კართაგენს დაბრუნდა. 251 წლის ადგილობრივმა კრებამ ბოლო მოუღო ფელიქსიმეს ამბოხს. კრებამ შეცდენილი ქრისტიანების უკან დაბრუნების კიპრიანესეული წესები მიიღო და ფელიქსიმეს განკვეთა დაამტკიცა.

იმ დროს ახალი განხეთქილება მწიფდებოდა, რომელიც დაიწყო რომაელმა პრესვიტერმა ნოვაციანემ; მას კართაგენელი პრესვიტერი ნოვატეც, ფელიქსიმეს მომხრე, მიემხრო. ნოვაციანე ამტკიცებდა, რომ არ შეიძლება ეკლესიას დაუბრუნოთ დევნის დროს შეცდენილნი. ამას გარდა, ნოვაციანემ ნოვატეს დახმარებით, დაარწმუნა იტალიელი ეპისკოპოსები, რომ რომის კანონიერ ეპისკოპოს ცელინეს მაგივრად კათედრაზე სხვა ეპისკოპოსი დაედგინათ. ამ უკანონობით აღშფოთებულმა კიპრიანემ აფრიკის ეპისკოპოსებს მთელი წიგნი გაუგზავნა „ეკლესიის ერთიანობის შესახებ“.

როდესაც კართაგენში საეკლესიო განხეთქილება შეწყდა, ქალაქს საშინელი ეპიდემია დაატყდა თავს. ხალხი გარბოდა — ავადმყოფებს მოუვლელად, ხოლო გარდაცვლილებს დაუმარხავად ტოვებდა. წმ. მღვდელმთავარმა თავადვე უხვენა სიმტკიცის მაგალითი — თავად უვლიდა დავრდომილთ და მარხავდა მკვდრებს. ეპიდემიას თან საშინელი გვალვა და შიმშილობა სდევდა. ბარბაროსი ნუმიდიელები ესხმოდნენ ქალაქს და კართაგენელებს ატყვევებდნენ. მღვდელმთავარმა ბევრი მდიდარი დაიყოლია და ავადმყოფთა სამკურნალოდ და ტყვეთა გამოსასყიდად დიდძალი ფული გააღებინა.

როდესაც იმპერატორ ვალერიანეს დროს (253—259) ახალი დევნა დაიწყო, კართაგენის პროკონსულმა პატერნემ მღვდელმთავარს კერპებისათვის მსხვერპლის შეწირვა უბრძანა. კიპრიანემ უარი განაცხადა არა მარტო მსხვერპლშეწირვაზე, არამედ კართაგენის სამღვდლო პირთა სახელების თქმასა და მათი ადგილსამყოფელის მინიშნებაზეც. მღვდელმთავარი კურუბისში გადაასახლეს. გადასახლებაში მღვდელმთავარმა ბევრი წიგნი და წერილი დაწერა. შემდეგ ვნების მიღების მიზნით კართაგენს დაუბრუნდა. იგი გაასამართლეს, მაგრამ ერთი დღით გაათავისუფლეს. თითქმის ყველა კართა-

გენელი მივიდა მასთან კურთხევის მისაღებად და გამოსამშვიდობებლად. სამსჯავროზე კიპრიანემ მშვიდად განაცხადა უარი კერპებისადმი მსხვერპლის შეწირვაზე და მას თავის მოკვეთა მიუსაჯეს. ეს რომ გაიგო კიპრიანემ, თქვა: „მადლობა ღმერთს!“ და ხალხმაც წარმოთქვა: „ჩვენც მასთან ერთად გვსურს სიკვდილი!“ თავის კვეთის ადგილზე რომ მიიყვანეს, მღვდელმთავარმა კიდევ ერთხელ დალოცა ყველა და ბრძანა, ჯალათს ჩემგან 25 ოქრო მიეცითო. მერმე თვითონ შეიკრა თვალები, ხოლო ხელები პრესვიტერსა და დიაკვნს დააბორკინა და მორჩილად დახარა თავი. ქრისტეანები ტირილით აფენდნენ მის წინაშე ცხვირსახოცებსა და მოსაბურავებს, რათა მისი წმიდა სისხლი შეეგროვებინათ. ეს მოხდა 257 წელს. წმიდანის ცხედარი ღამე მოიპარეს და პროკურატორ მაკრობი კანდილიანეს კერძო სასაფლაოზე დაკრძალეს.

მოგვიანებით, კარლოს დიდის დროს (771—814), მისი წმიდა ნაწილები საფრანგეთში გადასვენეს.

მღვდელმთავარმა კიპრიანე კართაგენელმა ეკლესიას დიდი საუნჯე დაუტოვა: მღვდელმთავრის ნაწარმოებები მიჩნეულ იყო მართლმადიდებლური აღმსარებლობის ნიმუშებად და ისინი მსოფლიო კრებებზე იკითხებოდა (ეფესოს III და ქალკედონის IV კრებებზე). მღვდელმთავარ კიპრიანეს ნაწარმოებებში გადმოცემულია მართლმადიდებლური მოძღვრება იესო ქრისტეს მიერ დაარსებული და მოციქულთა მიერ მოწყობილი ეკლესიის შესახებ. მისი შინაგანი ერთიანობა გამოხატულია რწმენისა და სიყვარულის ერთიანობაში, ხოლო გარეგანი ერთიანობა — იერარქიასა და საეკლესიო საიდუმლოებებში. ქრისტეს ეკლესია შეიცავს სიცოცხლისა და გადარჩენის მთელ სისავსეს. ვინც ეკლესიის ერთიანობას განუდგება, იგი თავის თავშივე ისპობს ჭეშმარიტ ცხოვრებას. ეკლესიის შემდუღაბებელი ძალა ქრისტეანული სიყვარულია. „სიყვარული საძირკველია ყოველგვარი სიკეთისა, იგი მუდამ ჩვენთან ერთად იქნება ზეციურ სასუფეველში“¹.

¹ „თენი“. III ტ. 632—637 გვ.

ეკლესიის ერთიანობის შესახებ

საყვარელო ძმებო, უნდა ვუფრთხოდეთ არა მხოლოდ აშკარა და თვალსაჩინო ტყუილს, არამედ ისეთსაც, დახვეწილი ცბიერებითა და მზაკვრობით რომაა შენიღბული. მას მერე, რაც მტერი იძლია ქრისტეს მოსვლით, და მოვიდა ნათელი, განმანათლებელი წარმართთა, აღმობრწყინდა მნათობი მაცხოვრებელი, ბედნიერების მომტანი კაცთათვის, მას მერე, რაც ბოროტმა იხილა კერპები — მიტოვებული, თავისი სახლები და საკერპოები — დაცარიელებული, განა შეიძლება უფრო დახვეწილი მზაკვრობისა და ცბიერების წარმოდგენა, ვიდრე ის ახალი ტყუილია, მტერმა რომ მოიფიქრა — თვით ქრისტეანის სახელით აცთუნოს გაუფრთხილებელნი? მან გამოიგონა წვალებანი და განხეთქილებანი, რათა დაამხოს სარწმუნოება, დაამახინჯოს ჭეშმარიტება, დაარღვიოს ერთიანობა. ვის დაბრმავებას და ძველ გზაზე დაყენებასაც ვერ ასერხებს, ის ახალი გზით შეჰყავს შეცდომაში. თვით ეკლესიიდან იტაცებს ადამიანებს და სწორედ მაშინ, როდესაც ისინი უკვე უახლოვდებოდნენ ნათელს, როცა თავს აღწევდნენ ამა ქვეყნის უკუნეთს, მათთვის შეუცნობლად ახალ ბნელეთში ხვევს. ასე რომ, ისინი სახარების სწავლებით არ ცხოვრობენ და ღამის წყვილიადში დაეხეტებიან, თანაც ჰგონიან. თითქოს ნათელში ვლენან. ასეთია მზაკვრული მანქანება მტრისა, რომელიც, მოციქულის თქმით, გარდაისახება „ანგელოსად ნათლისა“ (2 კორ. 11, 14) და თავის მსახურებს სიმართლის მსახურებად წარმოადგენს, ისინი კი ღღეს ღამედ აცხადებენ, წარწყმედას — ცხონებად, სასოების საფარველ ქვეშ სასოწარკვეთილებას მალავენ, სიმუხთლეს რწმენას უწოდებენ, ანტიქრისტეს ქრისტედ სახელდებენ, ტყუილს სიმართლედ ასაღებენ და დახვეწილი მზაკვრობით განაქარებენ ჭეშმარიტებას. ეს იმიტომ ხდება, საყვარელო ძმებო, რომ არ მიმართავენ ჭეშმარიტების საწყისს, არ ეძიებენ მის სათავეს, არ იმარხავენ ზეციური მოძღვრის სწავლებას. განა შეუძლია მას, ვინც არ

იცავს ეკლესიის ერთიანობას, ჩათვალოს, რომ სარწმუნოებას იცავს?

ან რა იმედი უნდა ჰქონდეს მას, ვინც უპირისპირდება და ეწინააღმდეგება ეკლესიას, რომ ამის მიუხედავად მაინც ეკლესიის წევრია? და ეს მაშინ, როცა პავლე მოციქული ეკლესიის შესახებ ამბობს: „ერთ ხორც და ერთ სულ, ვითარცა-იგი იჩინენით, ერთითა მით სასოებითა ჩინებისა თქვენისათა; ერთ არს უფალი, ერთ სარწმუნოებაჲ, ერთ ნათლისღება, ერთ არს ღმერთი“ (ეფეს. 4, 4—6). მტკიცედ უნდა დავიცვათ და დავიმარხოთ ეს ერთიანობა; ნურავის ტყუილს ნუ აჰყვება ჩვენი ძმობა! ნურავინ დაემუქრება სარწმუნოების ჭეშმარიტებას მუხანათური მზაკვრობით! ერთია ეკლესია, თუმცა მორწმუნეთა გამრავლებისას იგი ნაწილებად იყოფა. ისევე როგორც მზეს მრავალი სხივი აქვს, მაგრამ ნათელი მისი ერთია, ხეს ბევრი ტოტი აქვს, ტანი კი — ერთი, მყარად ფესვგადგმული, მრავალი ნაკადული გამოდის წყაროს სათავიდან, და თუმცა წყლის სიუხვეს ამ ნაკადულთა სიმრავლე ქმნის, სათავე მათი მაინც ერთია. სცადე და მოსწყვიტე მზის სხივი თავის საწყისს — ცალკე ის ვერ იარსებებს, მოტეხილი ტოტი მოკვდება, სათავეს მოშორებული ნაკადული მყისვე დაშრება. ასევე ეკლესია, უფლის ნათლით განბრწყინებული, მთელ ქვეყანას ჰფენს თავის სხივებს, მაგრამ თვით ნათელი, საიდანაც გამოდის ეს სხივები, ერთია და მისი ერთიანობა დაურღვეველი რჩება. მთელ ქვეყანას სწვდება მისი ტოტები, ნაყოფით დახუნძლული, შორს მიედინება მისგან გამოსული მდინარეები, და ამასთან სათავე ერთია, ერთია საწყისი, ერთია დედა, ნაყოფიერებით განმდიდრებული. ჩვენც მისგან ვიშვებით, მისი რძით ვიკვებებით, მისივე სულით განვსულიერდებით. სძალი ქრისტესი შეუძლებელია დამახინჯდეს, იგი სუფთაა და განუხრწნელი, ერთი სახლი აქვს და უბიწოდ ინახავს ერთი სარეცლის სიწმიდეს. იგი ღმერთისათვის გვინახავს — სასუფევლისათვის ამზადებს თავისგან შობილთ. ყოველი, ვინაც განეშორება ეკლესიას, მემრუშე ცოლს ემსგავსება და უცხო ექმნება ეკლესიის აღთქმას. ვინც განუდგება ეკლესიას, ის აკლდება ქრისტეს მიერ დაპირებულ ჯილდოს, იგია უცხო, უხმარი, მტერი ეკლესიისა. ვის-

თვისაც ეკლესია დედა არ არის, იმისთვის ღმერთი მამა ვერ იქნება. ეკლესიის გარეშე მდგომი კაცის ცხოვნება მხოლოდ მაშინ იქნებოდა შესაძლებელი, ვინმე რომ გადარჩენილიყო წარღვნის დროს ისეთი, ვინც ნოეს კიდობანში არ მჯდარა. უფალი ასე გვასწავლის: „რომელი არა არს ჩემ თანა, იგი მტერ ჩემდა არს, და რომელი არა შეჰკრებს ჩემ თანა, იგი განაბნევს“ (მათე, 12, 30). ქრისტესმიერი მშვიდობისა და ერთობის დამარღვეველი ქრისტეს წინააღმდეგია. ვინც სხვაგან შეკრებს, და არა ეკლესიაში, ის წარაგებს ქრისტეს ეკლესიას.

იტყვის უფალი: „მე და მამაჲ ჩემი ერთ ვართ“ (იოანე, 10, 30). სხვა ადგილას მამისა, ძისა და სული წმიდის შესახებ წერია: „ესე სამნი ერთ არიან“ (I იოანე, 5, 7). ვინ იფიქრებს, რომ ეს ერთიანობა, რომელიც ღმრთაებრივ უცვალებლობაზეა დამყარებული და ზეციურ საიდუმლოებებთანაა შეერთებული, განა შეიძლება დაირღვეს და დანაწევრდეს იმის გამო, რომ ეკლესიაში მეტოქე მხარეები ვერ შეთანხმდნენ? არა, ამ ერთიანობის დამარღვეველი არ ინახავს საღმრთო სჯულს, არ იცავს მამისა და ძის რწმენას, არ ადგას ცხოვნების ქეშმარიტ გზას. ეს საიდუმლო ერთიანობისა, ეს განუყოფელი თანხმობა ასახულია სახარებისეულ ამბავში ქრისტეს კვართის შესახებ. კვართი არ გაუყვიათ და არ დაუნაწილებიათ, არამედ წილად სვდა მთლიანად ერთ კაცს, და განუყოფელი და დაუნაწევრებელი დარჩა. ამასთან დაკავშირებით საღმრთო წერილი ამბობს: „სოლო კუართი იგი, რომელი იყო უკერველ, ზეით გამოქსოვილ ყოვლად, თქუეს უკუე ურთიერთას: არა განვხიოთ ესე, არამედ წილ-ვიგდოთ ამას ზედა, ვისიცა იყოს“ (იოანე, 19, 23—24). ამ კვართს მამისაგან ჰქონდა მალლით მიცემული ერთიანობა, და ამიტომ არ შეიძლებოდა დაენაწევრებინათ იმათ, ვისაც ის ერგო, არამედ ერთხელ და სამუდამოდ დარჩა მთლიანი და განუყოფელი. ამიტომ შეუძლებელია ქრისტეს სამოსი ჰქონდეს იმას, ვინც ქრისტეს ეკლესიას არღვევს. თავისი კვართის საიდუმლოთი უფალმა ეკლესიის ერთიანობაზე მიგვანიშნა.

ვინაა იმდენად უსჯულო და ორგული, ვინ შეუპყრია ისე ძალუმად განხეთქილების ჩამოგდების ვნებას, რომ შესაძლებლად მიაჩნია, ანდა კადნიერდება დაარღვიოს ღმრთაებ-

რევი ერთიანობა, უფლის კვართი — ეკლესია ქრისტესი? თვით უფალი შეგვახსენებს და გვმოდღვრავს თავისი სახარებით: „და იყვნენ ერთ სამწყსო და ერთ მწყემს“ (იოანე, 10, 10). ვინ იფიქრებს, რომ ერთ ადგილას მრავალი მწყემსისა და მრავალი სამწყსოს არსებობაა შესაძლებელი? პავლე მოციქული, იმავე ერთიანობას რომ შთაგვაგონებს, გვედღრის და გვარიგებს: „ხოლო გლოცავ თქვენ, ძმანო, სახელითა უფლისა ჩვენისა იესო ქრისტესითა, რაათა მასვე იტყოდით ყოველნი, და ნუ იყოფინ თქუენ შორის წვალებაჲ, არამედ იყვენით განმტკიცებულნი მითვე გონებითა და მითვე მეცნიერებითა“ (I კორინთ. 1, 10). სხვა ადგილასაც იგივეს ამბობს: „ყოვლითა სიმდაბლითა და სიმშვიდითა და სულგრძელებითა, თავს-იდებდით ურთიერთას სიყვარულითა, ისწრაფდით დამარხვად ერთობასა მას სულისასა საკერელითა მით მშვიდობისაჲთა“ (ეფეს. 4, 2—3). შენ კი გგონია, რომ შესაძლებელია ეკლესიის გარეშე დგომა, სხვა სამყოფელის მოწყობა?

ნუვინ იფიქრებს, თითქოს კეთილ კაცებს შეეძლოთ გამოეყონ ეკლესიას. ქარი არ განაბნევს ხორბალს, და ფესვმაგარ ხეს ქარიშხალი ვერას აკლებს. მხოლოდ ბზეს ფანტავს ნიავი, სუსტი ხე წვება გრიგალისაგან. სწორედ მათ შეაჩვენებს იოანე მახარებელი, როდესაც ამბობს: „ჩუენგან განვიდეს, არამედ არა იყვნეს ჩუენგანნი, რამეთუ, უკუეთუმცა ჩუენგანნი იყვნეს, და-მცა-დგრომილ იყვნეს ჩუენ თანა“ (I იოანე, 2, 19). წვალეზანი ხშირად იქიდან ჩნდებოდნენ და ღლესაც ჩნდებიან, რომ თვითრჯულ გონებას არა აქეს მშვიდობა თავის თავში, და განხეთქილების მთესველი ორგულება არ იცავს ერთიანობას. უფალი ჩვენს თავისუფალ ნებას უფროთხილდება და ამიტომ უშვებს, რომ ჩვენი გულისა და გონების გამოცდით, ჭეშმარიტების ძიების გზით, ნათლად გამოჩნდეს ღირსთა წმიდა სარწმუნოება. ამას წინასწარ გვამცნობს სული წმიდა მოციქულის პირით: „რამეთუ წვალეზანიც ყოფად არიან თქუენ შორის, რაათა რჩეულნი იგი თქუენ შორის გამოჩნდნენ“ (I კორ. 11, 19). ასე ხდება ერთგულთა გამოცდა და ორგულთა მხილება, ასე ეყრებიან მართალთა სულელები უსჯულოთა სულებს და ბზე — ხორბალს

ჯერ კიდევ სამსჯავროს დღემდე! განეყენებიან ისინი, რომელნიც ღმრთაებრივი განჩინების გარეშე, თვითნებურად იღებენ საკუთარ თავზე უგნური ბრბოს ბელადობას, კანონიერი კურთხევის გარეშე აცხადებენ თავს წინამძღვრებად, ეპისკოპოსის სახელს ისაკუთრებენ მაშინ, როცა მათთვის ეს წოდება არავის მიუნიჭებია. სული წმიდა ფსალმუნებში მათ უწოდებს „მსხდომთა“ საჯდომელთა უსჯულოთასა“ (ფს. 1, 1), სარწმუნოების სენსა და იარას, ადამიანებს, რომლებიც გველივით აცთუნებენ გულუბრყვილობას, ამახინჯებენ ჭეშმარიტებას, რომელთა ენაც დამლუპველ შხამს ანთხევს „და სიტყუამან მათმან, ვითარცა სრსვილმან, საძოვარი ჰოვოს“ (2 ტიმ. 2, 17), და რომელთა სიტყვები მომაკვდინებელ საწამლავად შედის ადამიანთა გულში. მათ წინააღმდეგ დაღადებს უფალი, მათგან იცავს და მათ არიდებს თავის გზადაკარგულ ერს, როდესაც აფრთხილებს: „ნუ ისმენთ სიტყვათა წინასწარმეტყველთათა, რომელნი გიწინასწარმეტყველებენ თქვენ, რამეთუ გაამოებენ თქვენ იგინი. ხილვასა გულისა მათისასა იტყვიან და არა პირისაგან უფლისა“ (იერემია, 23, 16). მათვე აღწერს უფალი სხვაგან, როდესაც ამბობს: „მე დამიტევეს, წყარომ წყლისა ცხოველისაჲ, და უთხარნეს თავთა მათთა ჯურღმულნი გახურეტილნი, რომელნი ვერ შემძლებელ არიან დაპყრობად წყლისა“ (იერ. 2, 13). ხომ ცნობილია, რომ შესაძლებელია მხოლოდ ერთი ნათლისღება, იმათ კი ჰგონიათ, რომ თვითონაც შეუძლიათ მონათვლა, ცხოვრების წყარო დაუტევებიათ და რაღაც სხვა, მაცოცხლებელ წყალს ჰპირდებიან ადამიანებს. ამ წყლით ადამიანები კი არ განიბანებიან, არამედ უფრო მეტად იბილწებიან, ცოდვები კი არ აღიხოცებიან, უფრო მეტად მძიმდებიან. ასეთი შობით ღმრთის ძენი კი არა ეშმაკის ძენი იშვებიან. ძენი სიცრუისანი აღთქმულ ჭეშმარიტებას ვერ დაიმკვიდრებენ. დალატით შობილნი სარწმუნოების მადლს ღუპავენ. უფლისმიერი მშვიდობის სასტიკი განხეთქილებით დამარღვეველნი მშვიდობის ჯილდოს ვერ მოიპოვებენ.

მავანნი და მავანნი თავს ნუ მოიტყუებთ უფლის ნათქვამი სიტყვებით: „სადაც იყვნენ ორნი გინა სამნი შეკრებულ სახელისა ჩემისათვის, მუნ ვარ მე შორის მათსა“ (მათე, 18, 20).

სახარების გამაყალბებლებს და ცრუ განმმარტებლებს ეს სიტყვები კი მოჰყავთ, მაგრამ რაც მათ წინ უძღვით, იმას ტოვებენ. ერთ ნაწილს გვახსენებენ, მეორეს კი მზაკვრულად ჩქმალავენ. როგორც თვითონ გამოეყვნენ ეკლესიას, ისევე ანაწევრებენ ერთი ადგილის მთლიანობას. უფალი თავის მოწაფეებს ჩააგონებს ერთსულოვნებისა და მშვიდობის შენარჩუნებას და ეუბნება: „ამინ გატყვი თქუენ: უკუეთუ ორნი თქუენგანნი შეითქუნენ ქუეყანასა ზედა ყოვლისათვის-ვე საქმისა, რომელიცა ითხოვონ, ეყოს მათ მამისა ჩემისაგან ზეცათაჲსა. რამეთუ სადაცა იყვნენ ორნი გინა სამნი შეკრებულ სახელისა ჩემისათვის, მუნ ვარ მე შორის მათსა“ (მათე, 18, 19), და ამით გვიჩვენებს, რომ ბევრი რამაა დამოკიდებული მლოცველთა ერთსულოვნებაზე და არა მათ რაოდენობაზე. „უკუეთუ ორნი თქუენგანნი შეითქუნენ ქუეყანასა ზედა“, ამბობს იგი.

ამგვარად, უფალმა გვაძენო პირველ ყოვლისა თანხმობა, ერთსულოვნება, და გვასწავლა მტკიცედ და უყოყმანოდ ვეთანხმებოდეთ ერთმანეთს. მაგრამ როგორ დაეთანხმება ვინმეს ის, ვინც არ ეთანხმება წმ. ეკლესიის სხეულსა და მთელ ძმობას? როგორ უნდა შეიკრიბონ ქრისტეს სახელით ორნი ან სამნი, რომელთა შესახებ ცნობილია, რომ ისინი განუდგებიან ქრისტესა და მის სახარებას? ჩვენ ხომ არ გამოეყოფილვართ ამ ადამიანებს, ისინი გამოგვეყვნენ, მას შემდეგ, რაც სხვადასხვა კრებები მოაწყვეს, წვალეზანი და განხეთქილებანი ჩამოაგდეს და დაუტევეს თავი და საწყისი ქეშმარიტებისა. უფალი კი ამბობს თავისი ეკლესიის შესახებ, ამ ეკლესიის წიაღში მყოფთა შესახებ, რომ თუ ისინი შეთანხმებულნი იქნებიან, თუ უფლის სწავლების თანახმად თუნდაც ორნი ან სამნი შეიკრიბებიან და ერთსულოვნად ილოცებენ, მაშინ, იმის მიუხედავად, რომ მხოლოდ ორნი ან სამნი არიან, მიიღებენ, რასაც ითხოვენ. „სადაცა იყვნენ ორნი გინა სამნი შეკრებულ სახელისა ჩემისათვის, მუნ ვარ მე შორის მათსა“ ანუ უბრალო და მშვიდობიან, ღმრთისმოსიშ და ღმრთის მცნებათა დამმარხველ ადამიანთა შორის. უფალმა აღგვითქვა, რომ ასეთებს შორის იქნებოდა, როგორც სამ ყრმას შორის იყო სახმილსა შინა, და ცვარით განაგრი-

ლებდა მათ, რადგან ისინი ღმერთის ერთგულნი და ერთსულოვანნი იყვნენ (დან. 3, 50). უფალი იყო აგრეთვე საპყრობილეში ჩაგდებულ ორ მოციქულთან, და რაკი ისინი უბრალონი და ერთსულოვანნი იყვნენ, გაულო საპყრობილის კარი და გამოიყვანა, რათა მათ ექადაგათ ხალხისთვის ქეშმარიტება. (საქმე, 9, 19). ამრიგად, როდესაც უფალი თავის მცნებაში გვიდგენს და გვეუბნება: „სადაცა იყვნენ ორნი გინა სამნი შეკრებულ სახელისა ჩემისათვის, მუნ ვარ მე შორის მათსა“, ამით იგი, შემქმნელი და დამაწესებელი ეკლესიისა, კი არ გამოყოფს ადამიანებს ეკლესიისაგან, არამედ ამხილებს სარწმუნოებისაგან განდრეკილთ და მორწმუნეებს მშვიდობის შენარჩუნებას ჩააგონებს. ამ სიტყვებით უფალი გვიჩვენებს, რომ იგი ორ ან სამ ერთსულოვან მლოცველს შორის უფროა, ვიდრე სხვა საქმისთვის თავშეყრილ უამრავ ხალხთან. ამიტომ, როდესაც ლოცვის წესი დაგვიდგინა, უფალმა იქვე დასძინა: „და რაჟამს სდგეთ ლოცვასა შინა, მიუტევეთ, უკუეთუ გაქუნდეს რამე ბოროტი ვისთვისმე, რაჟთა მამამანცა თქუენმან, რომელ არს ცათა შინა, მოგიტევენს შეცოდებანი თქუენნი“ (მარკ. 11, 25): მას, ვინც აპირებს მსხვერპლი შესწიროს ღმერთს, გულში კი ვინმეს მტერობა უდევს, უფალი არ აძლევს საკურთხეველთან მისვლის ნებას, უბრძანებს, ჯერ შეურიგდეს ძმას, და მერე მშვიდობით შესწიროს მსხვერპლი ღმერთს (მათე, 5, 23—24). ღმერთმა არ მიიღო კაენის მსხვერპლი, რამეთუ წყალობის თვალთ ვერ მიხედავდა მას, ვისაც შურისა და სიძულვილის გამო განხეთქილება ჰქონდა ძმასთან.

რა მშვიდობას ჰპირდებიან საკუთარ თავს ძმათა მოძულენი? რა მსხვერპლის შეწირვას ფიქრობენ მღვდლების მოშურნენი? ნუთუ, როდესაც ეკლესიის გარეთ იკრიბებიან, ჰკონიანთ. რომ მათთან არს ქრისტე? ასეთებმა სიკვდილიც რომ დაითმინონ ქრისტეს სახელით, ლაქას სისხლითაც ვერ ჩამორგეცხავენ. მძიმე, აღუხოცველი დანაშაული განხეთქილებისა წამებითაც კი ვერ განიწმიდება. მოწამე ვერ იქნება ის, ვინც ეკლესიის წიაღში არ იმყოფება, ვერ მოიპოვებს სასუფეველს იგი. ვინც დაუტევა ეკლესია, რომელიც დაიმკვიდრებს სასუფეველს. ქრისტემ მშვიდობა მოგვანიჭა, მან გვიბრძანა, ვყოფილიყავით ერთსულოვანნი და შეთანხმებულნი,

გვამცნო მტკიცედ და დაურღვეველად შეგვენახა ერთობა და სიყვარული, და ის, ვინც არ დაიმარხა ძმათა შორის სიყვარული, მოწამე ვერ იქნება. ამასვე გვასწავლის, ამასვე ადასტურებს პავლე მოციქული, როდესაც ამბობს: „მაქუნდეს-ლათუ ყოველივე სარწმუნოებაჲ ვიდრე მათათა ცვალებადმდე და სიყუარული თუ არა მაქუნდეს, არავე რაჲ ვარ. და შე-ლათუ ვაჭამო ყოველი მონაგები ჩემი და მივსცნე ხორცინი ჩემნი დასაწუფელად და სიყუარული არა მაქუნდეს, არარაჲვე სარგებელ არს ჩემდა. სიყუარული სულ-გრძელ არს და ტკბილ; სიყუარულსა არა ჰშურნ, სიყუარული არა მალლოინ, არა განლაღნის, არა სარცხვინელ იქმნის, არა ეძიებნ თავისასა, არა განრისხნის, არად შეჰრაცხის ბოროტი, ყოველსა თავს-იდებნ, ყოველი პრწამნ, ყოველსა ესავნ, ყოველსა მოითმენნ. სიყუარული არასადა დავარდების“ (I კორ. 13; 2, 3, 4, 5, 8, 9). სიყვარულიო, ამბობს მოციქული, არასადა დავარდების, იგი სამუდამოდ დარჩება ზეციურ სასუფეველში, დაუსრულებლად გაგრძელდება იქ ძმათა კავშირის ერთიანობაში.

შფოთისა და უთანხმოების ჩამომგდებნი ვერ ეღირსებიან სასუფეველსა და ჯილდოს ქრისტესგან, რომელმაც თქვა: „ესე არს მცნებაჲ ჩემი, რაჲთა იუჲარებოდეთ ურთიერთას“ (იოანე, 15, 12). ქრისტეს კუთვნილი ვერ იქნება ის, ვინაც მუხანათური განხეთქილებით დაარღვია სიყვარული ქრისტესი, ხოლო ვისაც სიყვარული არა აქვს, იგი ღვთის გარეშეა. ნეტარი მოციქული ამბობს: „ღმერთი სიყვარული არს და რომელი ეგოს სიყუარულსა ზედა, ღმერთი მის თანა ჰვიეს და იგი ღმრთისა თანა“ (I იოანე, 4, 16). ამგვარად, ღმერთთან ვერ დაემკვიდრებიან ისინი, ვინაც არ ისურვა ღმრთის ეკლესიაში ერთსულოვნება შეენარჩუნებინა, თუნდაც ისინი ცეცხლში დაწვან და მხეცებს მიუგდონ შესაჭმელად. ეს მათთვის სარწმუნოების გვირგვინი კი არაა, სასჯელი იქნება ორგულებისათვის, ღმრთისმსახურებრივი ღვაწლის კეთილი დასასრული კი არა, სასოწარკვეთილების დაბოლოება. ასეთი კაცი შეიძლება მოაკედინონ, მაგრამ მოწამის გვირგვინს ის ვერ მიიღებს, და ისევე ამაოდ უწოდებს ქრისტეანს თავის თავს, როგორც თვით ეშმაკი სახელდებს თავის თავს ქრისტედ. მა-

ცხოვარიც ხომ ამის შესახებ ამბობს: „რამეთუ მრავალნი მოვიდოდნან სახელითა ჩემითა და იტყოდნან, ვითარმედ: მე ვარ, და მრავალთა. ატუნებდნან“ (მარკ. 13, 6). როგორც ეშმაკი არაა ქრისტე, თუმცა მისი სახელით ატუნებს ადამიანებს, ისევე ვერ ჩაითვლება ქრისტეანედ ის, ვინც არ ცხოვრობს სახარებითა და ჭეშმარიტი სარწმუნოების მცნებათა მიხედვით. თქმა არ უნდა, დიდი და საკვირველი საქმეა წინასწარმეტყველება, ეშმაკთა განსხმა, დიდ-დიდი სასწაულების ქმნა, მაგრამ ყოველივე ამის მოქმედი ვერ მიაღწევს ზეციურ სასუფეველს, თუ პირდაპირი და ჭეშმარიტი გზით არ ივლის. ამას გულისხმობს უფალი, როდესაც ამბობს: „მრავალთა მრჩუნ მე მას ღღესა შინა: უფალო, უფალო, არა სახელითა შენითა ვწინააღსწარმეტყულებდითა და სახელითა შენითა ეშმაკნი განვასხენით და სახელითა შენითა ძალნი მრავალნი ვქმნენით? მას უამსა ვრჩუა მათ, ვითარმედ: არა გიცნი თქუენ, განმეშორენით ჩემგან ყოველნი მოქმედნი უსჯულოებისანი“ (მათე, 7, 22—23). იმისთვის, რომ მამა ღმერთს სათნო ვეყოთ, საჭიროა სიმართლე, იმისათვის, რომ ჩვენი შრომისათვის საზღაური მივიღოთ, ღმრთის მცნებებსა და სწავლებას უნდა დავემორჩილოთ. სახარებით უფალი გვიჩვენებს სარწმუნოებისა და სასოების გზას და ამბობს: „უფალი ღმერთი შენი უფალი ერთ არს. და შეიყვარო უფალი ღმერთი შენი ყოველ უფალი ერთ არს. და შეიყუარო უფალი ღმერთი შენი ყოველთა გონებითა შენითა და ყოველთა ძალითა შენითა. ესე არს პირველი მცნებაჲ. და მეორე, მსგავსი ამისი: შეიყუარო მოყუასი შენი ვითარცა თავი თვისი. უფროჲს ამათსა სხუაჲ მცნებაჲ არა არს. ამათ ორთა ყოველი სჯული და წინააღსწარმეტყუელნი დამოკიდებულ არიან“ (მარკ. 12, 30—31), (მათე, 22, 37—40). ამ სწავლებით უფალმა გვამცნო ერთიანობა და მასთან ერთად — სიყვარული, ორ მცნებაში მოათავსა სჯული და წინასწარმეტყველები. და რა ერთიანობას იცავს, რა სიყვარულს ინახავს, ან საერთოდ რომელ სიყვარულზე ლაპარაკობს ის, ვინც განხეთქილების ჩამოგდებას ცდილობს და შუაზე ყოფს ეკლესიას, არღვევს სარწმუნოებას, აღაშფოთებს მშვიდობას, აღმოფხვრის სიყვარულს, ბილწავს საიდუმლოებას? დიდი ხანია სათავე დაიდო ამ ბოროტებამ, საყვარელო

ძმებო, მაგრამ დამღუპველი დინების დამანგრეველმა ძალამ ამაჟამად იმატა, მწველებლურ ცთუნებათა და განხეთქილებათა მომწამვლელი ქმედება სულ უფრო მეტად მკლავნდება და ვრცელდება. თუმცა, სული წმიდამ მოციქულის პირით იწინასწარმეტყველა, რომ ქვეყნიერების დასასრულს ასეც მოხდება: „უკუანამსკნელთა ღღეთა მოიწინეს უამნი ბოროტნი და იყვნეს კაცნი თავის მოყუარე, ვეცხლის მოყუარე, ლალ, თავ-მოთნე, ამპარტავან, მგმობარ, მამა-დედისა ურჩ, უმადლო, უღირს, უყუარულ, უწირავ, მასმენელ, უთმინო, დაუმჭირველ, უზავ, უმშვიდებელ, კეთილის მოძულე, შინა-განმცემელ, წარმდებ, აღწუავებულ, გულის თქუმის მოყუარე უფროდეს, ვიდრე ღმრთის მოყუარე, აქუნდეს ხატი ღმრთის მსახურებისაჲ და ძალსა მისსა უარ-ჰყოფდნენ. და ამათგანცა განეშორე. რამეთუ ამათგანნი არიან, რომელნი შევლენან სახლებსა და გამოსტყუენვენ დედათა, შეკრებილთა ცოდვითა, მოიპოვებენ გულის თქუმათა თითო სახეთა, ყოვლადვე ისწავებენ და არასადა მეცნიერებასა ქეშმარიტებისასა შემძლებელ არიან მოსლვად. ვითარცა იგი იანე და იამბრე უხდებოდეს მოსეს, ეგრეთცა ესენი უხდებიან ქეშმარიტებასა, კაცნი გახრწნილნი გონებითა, გამოუცდელნი სარწმუნოებითა. გარნა არა წარემატნენ უფროდეს, რამეთუ უგუნურებაჲ მათი ცხად იყოს ყოველთა, ვითარცა-იგი მათი იყო“ (II ტიმ. 3, 1—9). წინასწარმეტყველება სრულდება: ქვეყნის დასასრულის მოახლოებასთან ერთად უკვე ჩნდებიან ასეთი ადამიანები და ღკება ასეთი უამი. მტერი უფრო და უფრო მძვინვარე ხდება, და ამასთან ერთად შეცთომილება გვატყუებს, სიცოფე განგვალადებს, შური აღგვაგზნებს, გულისთქმა გვაბრმავებს, უსჯულოება გვრყვნის, სიამაყე გვერევა, უთანხმოება გვასასტიკებს და მრისხანება გვლუბავს. მაგრამ დაე ნუ შეგვარყევს და ნუ დაგვაბრკოლებს მოულოდნელი, უკიდურესი მუხანათობა მრავალთა, დაე წინასწარმეტყველების ქეშმარიტებამ განამტკიცოს ჩვენი სარწმუნოება. წინასწარმეტყველების თანახმად მავანნი შეორგულდნენ, მაშ დაე სხვა ძმები უფროთხილდნენ მათ, რამეთუ ესეც წინასწარ გვამცნო უფალმა: „ხოლო თქუენ იხილეთ და ეკრძალენით, აჰა ესერა წინაასწარ გითხარ თქუენ ყოველი“ (მარკ. 13, 13). გვედრით

თქუნენ, გაექეცით ასეთ ადამიანებს და სასიკვდილო შხამივით მოერიდეთ მათ დამღუპველ საუბრებს, როგორც საღმრთო წერილი გვიჩვენებს: „მოზღუდე ყურნი შენნი ეკლითა და ნუ ისმენ სიტყვათა უსჯულოთასა“ (სირ. 28, 28), რამეთუ „განხრწნიან წესთა კეთილთა ზრახვანი ბოროტნი“ (I კორ. 15, 33). თვით უფალი გემოდღვრის და გვამცნებს განვეშოროთ ასეთებს: „ბრმანი არიან და წინამძღუარნი ბრმათანი, ხოლო ბრმაჲ ბრმასა თუ წინა-უძღვინ, ორნივე მთხრებლსა შთაცვივიან“ (მათე, „5, 14). უნდა გავექეცეთ და განვერიდოთ ყველას, ვინც განუდგა ეკლესიას, „რამეთუ გარდაგუარძნილ არს ეგევითარი იგი და სცოდავს და არს იგი თვით დასჯილ“ (ტიტ. 3, 11). განა შეიძლება ვიფიქროთ, რომ ქრისტესთან ერთადაა ის, ვინც ქრისტეს მღვდლებს წინააღმდეგ მოქმედებს, ვინც განეშორება ქრისტეს სამღვდელო დასსა და ერს? ასეთი კაცი ხომ ეკლესიის წინააღმდეგაა ამხედრებული, ღმრთის განგებას უპირისპირდება, მტერია საკურთხევლისა, სარწმუნოებას დალატობს, ღმრთისმსახურების მიმართ მკრეხელობას სჩადის. იგია ურჩი მონა, უსჯულო შვილი, ბოროტი ძმა, ეპისკოპოსთა შეურაცხმყოფელი და მღვდელთაგან განდგომილი, იგი სხვა საკურთხევლის აღმართვას ბედავს, სხვა ლოცვების შედგენას იწყებს უჯერო სიტყვებით, ცრუ მსხვერპლშეწირვით ბილწავს ღმრთისადმი შეწირული მსხვერპლის ჭეშმარიტებას და არც კი უნდა გაიგოს, რომ ღმრთაებრივი განწესების წინააღმდეგ მოქმედი ღმრთაებრივი ნებივრე დაისჯება უგნური კანდიერებისათვის.

ასე დაისაჯნენ კორე, დათანი და აბირონი, რომლებიც მოსესა და მღვდელ აარონის წინააღმდეგ აღდგნენ და მსხვერპლშეწირვის უფლების მისაკუთრება დააპირეს, მიწა გაირღვა, ღრმა უფსკრული გაჩნდა და ცოცხლივ შთანთქა ისინი. მხოლოდ შფოთისთავეებს როდი ეწია ღმრთის რისხვა, ცეცხლმა შემუსრა მათი უგნურების მოზიარე და მიმდევარი 150 კაციც (რიცხვთა, 16), და ამით გვიჩვენა, რომ უსჯულოთა ყველა თვითნებური წამოწყება ღმრთის განგების წინააღმდეგ ღმრთისაგან განდგომას ნიშნავს. ასევე ოზია მეფე: როდესაც ხელში საცეცხლური აიღო და ღმრთის სჯულის საწინააღმდეგოდ მსხვერპლშეწირვის უფლება დაისაკუთრა, არ დაემორჩილა და

არ დაუთმო მღვდელ აზარისას, რომელიც აყენებდა მას ამ საქმისაგან, ღმრთის რისხვა ეწია და შუბლზე კეთრი გამოაჩინდა — შეურაცხყოფილმა ღმერთმა სხეულის სწორედ ის ნაწილი დაუშანთა, რომელზეც ღმრთის სათნო-მყოფელთ წყალობის ნიშანი აღებეჭდებათ ხოლმე (II ნეშტთა. 26). ასევე დაისაჯნენ აარონის ძენი: როდესაც საკურთხეველზე დაანთეს უცხო ცეცხლი, რაც მათ ღმრთისაგან ჰქონდათ აკრძალული, მყისვე ცეცხლით მოისრნენ ღმრთის მიერ (ლევ. 10). მათვე ჰბაძვენ და მათ კვალს მიჰყვებიან ისინი, ვინც ღმრთის მცნებებს შეურაცხყოფენ, უცხო მოძღვრებებს ითვისებენ და კაცთაგან დადგენილ წესებს მისდევენ. უფალი ამხილებს და ყვედრის ასეთ ადამიანებს თავის სახარებაში, როდესაც ამბობს: „და დაგიტევებიეს მცნება ღმრთისაჲ და გიპყრიეს მოძღურებაჲ კაცთაჲ“ (მარკ. 7, 8).

საყვარელო ძმებო, მე მსურს, გირჩევთ და გარწმუნებთ, რომ თუკი ეს შესაძლებელია, არავინ ძმათაგანი წარწყმდეს, რომ დედა ეკლესიამ სიხარულით მიიკრას მკერდზე ერთი სხეული, ერთიანი, ერთსულოვანი ერი თვისი. და თუ ამ რჩევას არ ძალუძს ცხოვნების გზაზე მოაქციოს განხეთქილების მთავარნი და უთანხმოების წამომწყებნი, რომლებიც ბრმა და შეუვალ სიციოფეს შეუპყრია, მაშინ თქვენ მაინც, გულუბრყვილობით მოცთუნებულებმა, ტყუილით მონადირებულებმა, ანდა რაიმე ხრციით მოხიბლულებმა, განხეთქეთ მზაკვრული ბადე, გაათავისუფლეთ ბორკილებისაგან ფერხნი თქვენნი, მერყეობას შეჩვეულნი, შეიცანით მართალი გზა ზეციური სასუფეველისკენ. იტყვის მოციქული: „გამცნებთ თქუნენ, ძმანო, სახელითა უფლისა ჩუენისა იესო ქრისტესითა განშორებად თქუნენდა ყოვლისავე მისგან ძმისა, რომელი უწესოდ ვიდოდის, და არ მოძღურებისა მისებრ, რომელი ისწავა ჩუენგან“ (II თესალონ. 3, 6). და სხვა ადგილას: „ნუცა ვინ გატუნებს თქუნენ ცუდითა სიტყვითა, რამეთუ ამისთვის მოიწევის რისხვაჲ ღმრთისაი ნაშობთა მათ ზედა ურჩებისათა, ნუუკუე იქმნებით მსგავს მათა“ (ეფეს. 5, 5—7). უნდა გავეცალოთ იმათ, ვინც შეგნებულად ცოდავს, ის კი არა, უნდა გავექცეთ კიდეც, რადგან ვაითუ კაცი, რომელიც ცთუნებისა და ბიწიერების

გზაზე მავალს დაუმეგობრდა, თავადაც ასცდეს ქვეშაირი გზას და იგივე ცოდვის მოზიარე გახდეს.

ერთ არს ღმერთი, ერთ არს ქრისტე, ერთ არს მისი ეკლესია, ერთ არს სარწმუნოება და ერთ არს ერი, რომელიც სხეულის მთლიანობაშია შეერთებული თანხმობის კავშირით. ერთიანობა არ უნდა დაირღვეს, ასევე არ უნდა დანაწევრდეს ერთი სხეულიც კავშირების დაშლით, არ უნდა დაქუცმაცდეს პატარ-პატარა ნაწილებად: ყოველივე, რაც მაცოცხლებელ საწყისს მოშორდა, კარგავს სიცოცხლის საწყისს და განცალკევებით ვეღარ განაგრძობს არსებობას. სული წმიდა შეგვაგონებს: „ვინ არს კაც, რომელსა ნებავეს ცხოვრებაი და უყუარან ღღენი კეთილნი? დააცხრვე ენაჲ შენი ბოროტისაგან და ბაგენი შენნი ნუ იტყვიან ზაკუფასა, მოიქეც ბოროტისაგან და ქმენ კეთილი, მოიძიე მშვიდობაჲ და მისდევდი მას“ (ფსალ. 33, 13—15). ძე მშვიდობისა მშვიდობას უნდა ეძიებდეს, სიყვარულის კავშირი ვინც შეიცნო და შეიყვარა, იმან უნდა დააყენოს ენა თვისი სასტიკი განხეთქილების ჩამოგდებისაგან. როდესაც უკვე მოახლოვდა ჟამი ვნებისა, უფალმა თავის სხვა სწავლებებსა და მაცხოვრებელ შეგონებებთან ერთად ესეც გვითხრა: „მშვიდობასა დაგიტევებ თქუენ, მშვიდობასა ჩემსა მიგცემ თქუენ“ (იოანე, 14, 27). ასეთი მემკვიდრეობა დაგვიტოვა ქრისტემ! მშვიდობის შენარჩუნებაში მან იგულისხმა თავის აღთქმათა ყველა ნიჭი და ჯილდო. ამგვარად, თუკი ჩვენ ქრისტეს მემკვიდრენი ვართ, ქრისტეს მშვიდობა უნდა დავიმარხოთ, თუ ვართ ძენი ღმერთისანი, მშვიდობისმყოფელნიც უნდა ვიყოთ. უფალი ამბობს: „ნეტარ იყვენენ მშვიდობისმყოფელნი, რამეთუ იგინი ძედ ღმერთისა იწოდნენ“ (მათე, 5, 9). ძეთა ღმერთისათა შეპფერით იყვენენ მშვიდობისმყოფელნი, მდაბალნი გულითა, უბრალონი სიტყვით, კეთილგანწყობილნი ერთმანეთის მიმართ, ერთსულოვნების კავშირით მტკიცედ შეერთებულნი. ასეთი ერთსულოვნება ჰქონდათ ოდესღაც მოციქულებს. პირველი ქრისტეანები უფლის შეგონებას იმარხავდნენ და ურთიერთის სიყვარულს არ განეშორებოდნენ. ამას გვიმოწმებს საღმრთო წერილი, სადაც ნათქვამია: „ხოლო სიმრავლისა მის მორწმუნე-

თაქსა იყო გული და გონებაჲ ერთ“ (საქმე, 4, 32), და სხვა ადგილას: „ესე ყოველნი იყვნეს განკრძალულ ლოცვასა და ვედრებასა, ერთბაშად დედებითურთ და მარიაჲ დედით იესოჲსით და ძმებითურთ მისით“ (საქმე, 1, 14). ამიტომ იყო მათი ლოცვა ნაყოფიერი, ამიტომ შეეძლოთ ჰქონოდათ იმედი, რომ მიიღებდნენ ყოველივეს, რასაც მოწყალე ღმერთს სთხოვდნენ.

თარგმნა რუსიკო ბუაჩიძემ.

**წმიდა გრიგოლ ღვთისმეტყველი, მთავარ
ეპისკოპოსი კონსტანტინეპოლისა
(+ 389)**

მსოფლიო მამა და მასწავლებელი ეკლესიისა დაიბადა 329 წელს წარჩინებული წარმოშობის ქრისტიანთა ოჯახში, ქალაქ არიანზაში (კაპადოკიის ქალაქ ნაზიანზინის მახლობლად). მისი მამა, აგრეთვე მღვდელმთავარი გრიგოლი, ნაზიანზინის ეპისკოპოსი იყო. დედა წმიდანისა, წმიდა ნონა (1—374) ღმერთს ევედრებოდა ძეს და აღთქმას დებდა, უფალს მივეძღვნე მასო. და როგორც სიზმარში გამოცხადებით ეუწყა მას, ახლადშობილ პირმშოს გრიგოლი უწოდეს. როცა ყრმამ კითხვა შეისწავლა, დედამ მას საღმრთო წერილი აჩუქა. წმიდა გრიგოლმა მეტად სრული და მრავალმხრივი განათლება მიიღო: სახლში ბიძასთან, ამფილოქესთან სწავლის შემდეგ, რომელიც რიტორიკის გამოცდილი მასწავლებელი იყო, იგი სწავლობდა ნაზიანზინის, კაპადოკიის, კესარიისა და ალექსანდრიის სკოლებში. შემდეგ, განათლების დასასრულებლად მომავალი მღვდელმთავარი ათენს გაემგზავრა. გზაში ალექსანდრიიდან ელადისაკენ (352 წ.), ზღვაზე მგზავრობისას, როცა საშინელი, მრავალდღიანი ქარბობალა დალუპვით ემუქრებოდა მგზავრებს, მას მხოლოდ იმის ეშინოდა, რომ „მომაკვდინებელი წყალნი განწმედ წყალთ მოაკლებდნენ მას“; „ოცი დღე და ოცი ღამე ვეგდე მე აბურთებული ხომალდის გემბანზე, — მოგვითხრობს წმიდა გრიგოლი, — და განუწყვეტლივ ვევედრებოდი მოწყალე ღმერთს ხსნას; და ამ დიდ ხიფათში მე აღთქმა მივეცი უფალს, რომ მას მივეძღვნიდი თავს, და აღთქმისამებრ ხსნაც მომენიჭა“.

ექვსი წელი დაჰყო ჭაბუკმა გრიგოლმა ათენში.

წმიდა გრიგოლთან ერთად ამ დროს ათენში სწავლობდა წმიდა ბასილი, კესარია-კაპადოკიის მომავალი მთავარეპისკოპოსი (1—379). ის მეგობრობა მათ შორის, რომელსაც ჯერ კიდევ კესარიის სკოლაში ჩაეყარა საფუძველი, ღრმა სულიერ კავშირში გადაიზარდა. ხოლო ნაცნობობა იულიანესთან, ამ მომავალ ქრისტეს სარწმუნოებისაგან განდგომილ იმპერატორთან (361—363), მალე მასთან შეუტრიგებელი ბრძოლით შეიცვალა.

358 წელს წმიდა გრიგოლმა ფარულად დატოვა ათენი და მშობლებთან დაბრუნდა ნაზიანზინში, და აქ, 30 წლის ასაკში, მან თავისი მამისაგან მიიღო წმიდა ნათელი.

წმიდა ბასილი დიდის მიწვევით იგი უდაბნოში განმარტოვდა, რათა ამ წმიდა მოღვაწესთან ერთად ეცხოვრა მოსაგრე ცხოვრებით.

მამის მოთხოვნით წმიდა გრიგოლი 361 წელს დაბრუნდა ნიზიანზინში და აქ ხუცესად ეკურთხა. მაგრამ იგი გრძნობდა, რომ მისთვის განუზომლად უფრო ახლოა განმარტოება და უსიტყვო ლოცვა, ვიდრე სამღვდლო მოღვაწეობა; ამის გამო იგი კვლავ წმიდა ბასილთან გაეშურა უდაბნოში. აქ, განმარტოებაში ისე განმტკიცდა სულით, რომ მალე შეძლო კვლავ სამწყისოს დაბრუნებოდა და ღირსეულად აღესრულებინა თავისი მოვალეობა. მღვდელმთავარმა ბასილი დიდმა ქალაქ სასიმის ეპისკოპოსად დაადგინა წმიდა გრიგოლი, მაგრამ იმისათვის, რომ დახმარებოდა თავის ხანდაზმულ მამას, მღვდელმთავარი გრიგოლი ნიზიანზინში დარჩა, ხოლო მამა-ს. წმიდა გრიგოლ ნაზიანზელის გარდაცვალების შემდეგ (1—374), ერთხანს ამ ქალაქის მრევლსაც განაგებდა.

როცა გარდაიცვალა კონსტანტინეპოლის პატრიარქი ვალენტი, ანტიოქიის საეკლესიო კრებამ მღვდელმთავარი გრიგოლი მიიწვია (378 წ.) და სთხოვა მას დახმარებოდა კონსტანტინეპოლის ეკლესიას, რომელიც იმ ხანებში, უფრო მეტად, ვიდრე სხვა რომელიმე ეკლესია, მწვალებელთაგან იყო შევიწროებული. მას შემდეგ, რაც მღვდელმთავარ ბასილი დიდისაგან მიიღო თანხმობა, წმიდა გრიგოლი კონსტანტინეპოლში ჩავიდა და საპატრიარქო ტახტი დაიკავა. 379 წელს მან საღმრთო მსახურების აღსრულება და ქადაგებების წარმოთქმა დაიწყო თავის ნათესავთა ერთ მომცრო, საკარო ეკლესიაში, რომელსაც „ანასტასია“ („აღდგომა“) უწოდა, რადგან სწამდა, რომ სწორედ ამ პატარა ტაძარში დაიწყებდა აღდგომას და აღორძინებას მართლმადიდებლობა. მაშინ ყოველგან მწვალებლები იყვნენ გაბატონებული — არიოზისა და აპოლინარის მიმდევრები. და რაც უფრო ხმამაღლა ისმოდა მისი ქადაგება, მით უფრო მრავალრიცხოვანი ხდებოდა მრევლი ეკლესიისა და მით უფრო მძაფრდებოდა წინააღმდეგობა

მწვალებელთა მხრიდან. 379 წლის აღდგომის წინა ღამეს (21 აპრილი), როცა მღვდელმთავარი გრიგოლი ახლადმოქცეულთა ნათლობას აღასრულებდა, შეიარაღებულ მწვალებელთა ბრბო ტაძარში შეიჭრა და ქვები დაუშინა მართლმადიდებლებს. ერთი ეპისკოპოსი ამ თავდასხმის შედეგად ვარდაიცვალა, ხოლო თვით წმიდა გრიგოლი დაიჭრა. მაგრამ მოთმინება და სიმშვიდე წმინდანისა ყველაზე საიმედო ჯავშანი იყო მისთვის, ხოლო სიტყვა მისი მართლმადიდებელთ განამრავლებდა.

განსაკუთრებული ადგილი მღვდელმთავარ გრიგოლ ღვთისმეტყველის ქადაგებებში დათმობილი აქვს პოლემიკას ევრომიანელთა წინააღმდეგ, რომელნიც სულიწმიდას გამობდნენ.

მის კალამს ეკუთვნის: ხუთი სადიდებელი სიტყვა, ცხრა ახსნა-განმარტება სხვადასხვა საეკლესიო დღესასწაულისა, ორი მამხილებელი სიტყვა იმპერატორ იულიანე განდგომილის წინააღმდეგ — ეს არის „ორი ბოძი, რომელზეც წარუშლელადაა დაწერილი შთამომავლობისათვის უკეთურება იულიანესი“; აგრეთვე სხვა ქადაგებანიც სხვადასხვა თემებზე. სულ ჩვენამდე მოაღწია წმიდა გრიგოლ ღვთისმეტყველის 45-მა ქადაგებამ.

დიდება ამ მართლმადიდებელ აღმსარებელზე ყოველგნით ვრცელდებოდა — აღმოსავლეთშიცა და დასავლეთშიც. თვით მღვდელმთავარი კი ისე ცხოვრობდა იმპერიის დედაქალაქში, თითქოსდა უდაბნოში ყოფილიყო განმარტობებული: — „საზრდო მისი — უდაბნოს მწირი საზრდო იყო; სამოსი მისი — გაჭირვებისა; ხოლო ქცევა — უბრალო, რამეთუ სასახლის კარზე მყოფი არაფერს არ ეძიებდა მისგან“.

სწეულების დროს მღვდელმთავარს დიდი დარტყმა მიაყენეს. ვისაც ის თავის მეგობრად თვლიდა, — ფილოსოფოსი მაქსიმე, — ფარულად მღვდელმთავარ გრიგოლის ტახტზე აიყვანეს კონსტანტინეპოლშივე. მაქსიმეს უმადურობით გულმოკლულმა წმიდანმა გადაწყვიტა დაეტოვებინა კათედრა, მაგრამ ერთგულმა სამწყსომ შეაჩერა იგი. ხალხმა ქალაქიდან განდევნა თვითმარქვია პატრიარქი. 380 წლის 24 ნოემბერს დედაქალაქში ახალი იმპერატორი თეოდოსი დიდი ჩამოვიდა, რომელმაც დაადასტურა თავისი ბრძანება მწვალებელთა წინააღმდეგ და კვლავ მართლმადიდებლებს დაუბრუნა უმთავ-

რესი საკათედრო ტაძარი, რომელშიც საზეიმოდ შეიყვანა წმიდა მღვდელმთავარი გრიგოლი. მალე მღვდელმთავრის სი-
ცოცხლეს ხელყოფა დაემუქრა, მაგრამ თვით იგი, ვინც მისი
მკვლელი უნდა გამხდარიყო, საკუთარი ნებით გამოცხადდა
წმიდათან და ცრემლებით მოინანია ბოროტი განზრახვა. 381
წელს, მეორე მსოფლიო საეკლესიო კრებაზე, მღვდელმთავარი
გრიგოლი საბოლოოდ დაამტკიცეს კონსტანტინეპოლის პატრი-
არქად. ანტიოქიის პატრიარქის, მელეტის გარდაცვალების შემ-
დეგ იგი თავმჯდომარეობდა მოწვეულ ადგილობრივ საეკლე-
სიო კრებას და იმ მიზნით, რომ შეერიგებინა დასავლეთისა და
აღმოსავლეთის ეკლესიები, წინადადებას აყენებდა პავლინე
ეცნოთ ანტიოქიის პატრიარქად. როცა კრებაზე ისინი მოვიდ-
ნენ, ვინაც ადრე მის წინააღმდეგ მოქმედებდნენ მაქსიმეს
სასარგებლოდ, ბევრმა მღვდელმთავარმა, განსაკუთრებით კი
ეგვიპტისა და მაკედონიის ეპისკოპოსებმა, არ მოისურვეს წმი-
და გრიგოლის აღიარება კონსტანტინეპოლის პატრიარქად.
მღვდელმთავარმა გადაწყვიტა ეკლესიის მშვიდობისათვის შე-
ეწირა თავი: „დაე იონა წინასწარმეტყველი ვიყო მე — თქვა
წმიდანმა. — ქარიშხალში ბრალი არ მიმიძღვის, გარნა თავს
გაეწირავ ხომალდის ხსნისათვის. ამიღეთ და გადმომავდეთ
მე... მე არ მიხაროდა, როცა ტახტზე ავდიოდი და ეხლა სიხა-
რულით ვტოვებ მას“. და მას შემდეგ, რაც იგი იმპერატორსაც
ეახლა და აუწყა თავისი სურვილი კონსტანტინეპოლიდან წას-
ვლისა, მღვდელმთავარი გრიგოლი უკანასკნელად გამოცხადდა
კრებაზე და გამოსათხოვარ სიტყვაში მშვიდობით განტეგებას
ითხოვდა.

სამშობლოში დაბრუნებული წმიდა გრიგოლ ღვთისმე-
ტყველი დიდ ყურადღებასა და მზრუნველობას იჩენდა ნაზი-
ანზინის სამწყსოსადმი, რომელიც აპოლინარის მწვალებლობის
მიმდევარტ დამონებოდა. ეპისკოპოსად აქ მან კეთილმსახური
ევლალი დაადგინა, თვითონ კი თავის მშობლიურ ქალაქ არი-
ანზაში განმარტოვდა. ამის შემდეგ მას გარდაცვალებამდე
ალარ მიუტოვებია უღაბნოს განმარტოება, თუმცა კვლავაც
განამტკიცებდა თავისი თავდადებათ ქრისტეს ჭეშმარიტები-
სადმი მართლმადიდებლობას.

389 წლის 25 იანვარს გარდაიცვალა ის, ვისაც ეკლესიამ

თავანი სცა ქრისტეს საყვარელი მღწაფის, იოანეს სახელწოდების — ღვთისმეტყველის — მინიჭებით.

„მხნედ და ძლიერად მსურს ვთქვა, რათა უკეთესნი გახდეთ თქვენ და ხორციელისაგან სულიერისაკენ მოიქცეთ, რათა მართლად აღიმადლოთ სული თქვენი“, — ეუბნებოდა მღვდელმთავარი გრიგოლ ღვთისმეტყველი მორწმუნეებს.

სხეული წმიდა გრიგოლისა მის მშობლიურ ქალაქ ნაზიანზინშივე დაკრძალეს, 950 წელს კი მისი წმიდა ნაწილები კონსტანტინეპოლში გადაასვენეს, წმიდა მოციქულთა სახელობის ეკლესიაში. მოგვიანებით მათი ნაწილთაგანი რომშიც გადაასვენეს. გადმოცემამ წმიდანის გარეგნობის აღწერაც შემოგვინახა: „სახე მოკრძალებული, მკრთალი, მოწიღული და ხშირი წარბები: მზერა — მშვიდი, წვერი არც თუ გრძელი, მაგრამ ხშირი და ფართო“. ჭერ კიდევ მის სიცოცხლეშივე უწოდებდნენ თანამედროვენი გრიგოლ ღვთისმეტყველს წმიდანს. მართლმადიდებელი ეკლესია მღვდელმთავარ გრიგოლს მეორე ღვთისმეტყველსა და მესაიდუმლეს უწოდებს, ნათელ აღმწერელს წმიდა სამებისა, და საღვთისმსახურო საჯალობლებში ასე მიმართავს მას: „საღვთისმეტყველო სიტყვით რიტორთა ქარგის დამარღვეველო, დიდებულო მამაო, რომელმა ზეგარდმო მოქსოვილი სამოსით შექმოსე მართლმადიდებელი ეკლესია, გიჯაროდეს, ღვთის სიტყვით აღსავსეო!“.

(„თვენა“ I ტ. 181—191 გვ.)

ფრაგმენტები

კითხვაჲი საკუთარ თავს

სად არის ამაღლებული მკვერმეტყველება? — ჰაერში გაიფანტა.

სად არის ელფერი სიჭაბუკისა? — დაიღუპა.

სად არის დიდება? — განქარაღა.

სად არის სიჯანსაღე სხეულისა? — ავადმყოფობამ შემუსრა იგი.

სად არის სიმდიდრე და ქონება? — ნაწილი ღმრთისადმია შეწირული, ხოლო ნაწილი — ადამიანურმა შურმა მიიტაცა ბოროტმოქმედთა ხელით.

ჩემი მშობლები და ახლობლები საფლავებში განისვენებენ; მხოლოდ სამშობლოდა დამრჩა, მაგრამ ბოროტმა დემონმა ჩემზე სიძულვილის შავი ტალღები აღმართა და იქიდანაც გამაძევა; ახლა მე მარტოხელა მგზავრი ვარ, უცხო მხარეში დავებნეტები, მწუხარებით სავსე ცხოვრებასა და მიხრწნილ სიბერეს მივათრევ; არც ქალაქი გამაჩნია, არც საყდარი და ველარც სულიერ შვილებს ვხედავ, თუმცაღა მათზე ზრუნვით ძლიერ ვარ დამწუხარებული. დღესა და ღამეს მარტოობასა და ხეტიალში ვატარებ.

სად დასცილდება ჩემი სული სხეულს? სად შევხვდები აღსასრულს? რომელი მიწა, რომელი გლახაკთმოყვარე სამარე შემიფარებს? ვინ დამიხუჭავს სიკვდილის წინ მიმქრალ თვალებს? — მართლმორწმუნე და ქრისტეს მეგობარი თუ ვინმე ღმრთისმგმობელი?

ყველაფერი ამაოა და ქარს მიაქვს. მე კი, სულმოკლეს, მაწუხებს აზრი — ჩემს სხეულს კუბოს მიაბარებენ თუ გარეულ მხეცთა შესაქმელი გავხდები; ფერფლად ვიქცევი და ჰაერში გავიფანტები თუ კუბოს გარეშე სადმე უფსკრულში ჩამაგდებენ; მდინარე დამალპობს თუ ხანგრძლივი წვიმები? თუმცა, ასეც რომ მოხდეს, უკვალოდ მაინც არ გავქრები და არც ჩემი გვამის მთლიანობა დაირღვევა, რამეთუ ბოლო ყამს უფალი აღადგენს და შეკრებს ყველას, იმათაც კი, ვინც სიკვდილის შემდეგ ფერფლად იქცა ან ნადირთა საჩიჯნი გახდა.

მხოლოდ შენ აღძრავ ჩემში ცრემლსა და შიშს, უფალო!
ქრისტე, მეუფეო! შენა ხარ ჩემი სამშობლო, ჩემი სიმ-
ტიცე და ჩემი ნეტარება. შენ ყველაფერი ხარ ჩემთვის!
ნეტავ მეღირსოს, ღმერთო, რომ მრავალი ტანჯვისა და
მწუხარების საზღაურად განსვენება ვპოვო შენში!

თარგმნა ი ა ის ა კ ა ძ ე მ

წმ. გრიგოლ ნოსელი

„მოსას სხოვრება“

წინათქმა

წმ. გრიგოლ ნოსელი, ძმა ბასილი დიდისა, ეკლესიის ურჩეულეს მამათა შორის არის შერაცხილი. მას უვალობენ, როგორც „ცხოვრების ხეს“¹, „სამოთხის მდინარეს“², „ჭეშმარიტების დამწერველს“³, „ღვთის ხატს“⁴, „სამკაულს ქრისტეს ეკლესიათა“⁵.

ერთ ძველ ქართულ ხელნაწერში ასეთი მინაწერი გვხვდება: „სანატრელნო მამანო, ვჰხედავ, რომელ ესე წმიდაა გრიგოლ ნოსელი ესეთივე კაცი ყოფილა, ვითა დიდი ბასილი, ვალე ქადაგი სინანულისაჲ... წმიდანო და ყოვლად დიდებულთავისა ძმად, და თუ ვინმე არა იცნობდეს, თქუმელთა მისთადა უკუერეტნეს“⁶ იმავე ხელნაწერის ანდერძში წმ. გრიგოლ ნოსელი სახელდებულია, როგორც „ბრწყინვალე ქადაგი სინანულისაჲ“: „დიდებაჲ ღმერთსა, გასრულდა წმიდაა გრიგოლ ნოსელიცა, თუ უნდეს ღმერთსა, დიდი ესე და ბრწყინნო, დიდთა მათ და მაღალთა საიდუმლოთა ბრწყინვალედ მქადაგებელნო, წმიდანო გრიგოლ ღმრთისმეტყუელო და წმიდაო გრიგოლ ნოსელო, წმიდით და დიდებულით ძმითურთ თქუენით ბასილით, სამნო... სამებისა წმიდისა მქადაგებელნო, ერთმანეთისა სიყუარულსა, მეოხ გუეყვენით წინაშე ღმრთისა“.

¹ იხ. „მიქაელ მორტეკელის ჰიმნები“. წიგნი II. თბ. 1978. გვ. 279: „ხე ცხოვრების იქმენ შენ მორწმუნეთათს“.

² იქვე: „გამოგზინდი ჩუენ მდინარედ სამოთხისა ღმერთშემოსილო“.

³ იქვე: „დამწერველსა ჭეშმარიტებისა ყოველნი ერთობით გრიგოლს შევასხმიდეთ“.

⁴ იქვე: „იქმენ ხატად ღმრთისა გრიგოლი, ყოვლითურთ შეზაეებულ, ვითარცა მიჰრონი“.

⁵ იქვე: „ამისთვის გაქებთ შენ, მწყემსო კეთილო ნოსიამსაო, შენ სამკაულო ქრისტეს ეკლესიათაო, ღმერთშემოსილო გრიგოლი“.

⁶ იხ. „გრიგოლ ნაზიანზელის თხზულებათა შემცველ ქართულ ხელნაწერთა აღწერილობა“, ხელნაწერები აღწერა, შესავალი და საძიებელი დაურთო თ. ბრეგვაძემ, თბ., 1988, გვ. 75).

წმ. გრიგოლ ნოსელის ცხოვრების ზუსტი ქრონოლოგია დადგენილი არ არის. მიჩნეულია, რომ იგი უნდა დაბადებულიყო დაახლ. 331 წ¹. ასევე უცნობია გარდაცვალების ზუსტი წელი. კონსტანტინოპოლის კრების შემდეგ, რომელიც 394 წლის 29 სექტემბერს შედგა, გრიგოლ ნოსელი აღარსად იხსენიება. შესაბამისად, სწორედ ამ წელს ვარაუდობენ მისი გარდაცვალების თარიღად.

გრიგოლ ნოსელისა და მისი ძმის ბასილი დიდის ბებია და ბაბუა დედისა და მამის მხრიდან მკვიდრობდნენ პონტოში, რომლებიც ქრისტიანობისათვის ეწამნენ. თვით გრიგოლ ნოსელი გვამცნობს: „ჩვენი მამის მშობლებს ქრისტეს აღსარებისათვის ქონება ჩამოართვეს, ხოლო დედის პაპა („პროპატორ“) მეფის განრისხების გამო მოაკვდინეს და მთელი მისი ქონება სხვათა მფლობელობაში გადასცეს“².

მამის მშობლებმა დევნულების უამს თავი შეაფარეს პონტოს ტყეს მათ ერთგულ მსახურებთან ერთად. ამის შესახებ გვაუწყებს წმ. გრიგოლ ღვთისმეტყველი: „ისინი შეეფარნენ პონტოს მთების ტყეს („ლოხმე“) მეტად მცირე მხლებლებით“ (გრიგოლ ღვთისმეტყველი, შესხმა ბასილი დიდისა, პგ. 36, სვ. 501 ა). ეს უნდა მომხდარიყო დაახლ. 306 წელს. აქედან მოკიდებული, შვიდი წლის მანძილზე (313 წლამდე) ისინი, როგორც დევნულები, დიდ გაჭირვებას განიცდიდნენ³.

დედის მხრიდან გრიგოლი და ბასილი იყვნენ შთამომავალნი კაპადოკიის ველენიანი ოჯახისა, რომელიც შემომოტანილი

¹ ამ თარიღს გვაწვდის ლენენ დე ტილმონი, რომელიც აღნიშნავს: „რადგანაც წმ. ბასილი დაიბადა დაახლოებით 329 წლის მიწურულს. წმ. გრიგოლი, რომელიც ბასილის შემდეგ დაბადებული ძმის ნაეკრატოსის მომჟეგნოა, ვერ დაიბადებოდა 331 წელზე ადრე“ (იხ. ლენენ დე ტილმონი, მეგუარები პირველი ექვსი საუკუნის საეკლესიო ისტორიისათვის, ტ. IX, პარიზი, 1703, გვ. 561). ზოგი მკვლევარი გრიგოლ ნოსელის დაბადების თარიღად 334 წ.-ს თვლის (შდრ. „თეოლოგიისა და ეკლესიის ლექსიკონი“, ტ. IV, ფრაიბურგი, 1961, გვ. 1211). ე. დანიელუ დაბადების პირობით თარიღად 330 წ.-ს ვარაუდობს (იხ. გრიგოლ ნოსელი, ცხოვრება მოსესი, შესავალი, კრიტიკული ტექსტი და თარგმანი ე. დანიელუსი, III გამოც. პარიზი, 1968, გვ. 8).

² გრიგოლ ნოსელი, წმიდა მაკრინას ცხოვრება, შესავალი, კრიტიკული ტექსტი, თარგმანი, შენიშვნები და ინდექსი პ. მარაჯალისა, პარიზი, 1971, გვ. 206; შდრ. პგ. 46, 980 ც.

³ იხ. გრიგოლ ნოსელი, ქალწულებისათვის, შესავალი, კრიტიკული ტექსტი, თარგმანი და კომენტარები მ. ობინოსი, პარიზი, 1966, გვ. 33.

ციტატის მიხედვით ასევე, დევნულების მსხვერპლი გახდა, თუმცა ამ ოჯახმა მალე აღიდგინა დაკარგული პატივი¹.

გრიგოლ ნოსელისა და ბასილი დიდის მამას, ასევე, ბასილი ერქვა, დედას კი — ემელია. მიიჩნევენ, რომ ბასილი (მამა) რიტორიკას დაეუფლა პონტოში, ალბათ, ნეოკესარიაში და დიდი სახელი მოიხვეჭა, თუმცა წმ. გრიგოლ ნოსელის თქმით მისი სახელი პონტოს არ გასცილებია (გრიგოლ ნოსელი, მაკრინას ცხოვრება, დასახ. გამოც. გვ. 210). ბასილი (მამა) გამოირჩეოდა ადამიანური ღირსებებით, რითაც მან მიიპყრო ობოლი ემელიას ყურადღება. ნოსელი გადმოგვცემს: „დედა ყოვლითურთ საღვთო ნებას ემორჩილებოდა და განსაკუთრებით ეშურებოდა ცხოვრების წმიდა და შეურყვნელ წესს. მაგრამ რადგანაც ობოლი იყო იგი ორივე მხრივ, ამასთან, რადგანაც სხეულის მშვენიერებით ყვოდა იგი, შორს გავარდნილმა მისმა ქმნულკეთილობამ ბევრს აღუძრა მასზე დაქორწინების სურვილი. რადგანაც დიდი იყო საფრთხე... მან აირჩია ცხოვრების სიწმიდით ცნობილი და აღიარებული კაცი, რომ თავისი თავისათვის მფარველი ეპოვა“ (გრიგოლ ნოსელი, მაკრინას ცხოვრება, გვ. 144).

ბასილისა და ემელიას შეეძინათ ათი შვილი. მათგან უფროსი იყო თეკლა, რომელსაც შემდეგში მაკრინა ეწოდა, ხოლო უმცროსი — პეტრე, შემდეგში სებასტიის ეპისკოპოსი; როგორც ჩანს მათ ერთი ბავშვი აღრევე მოუკვდათ, რადგანაც სხვაგან გრიგოლი ასახელებს მხოლოდ ცხრას, ხუთ ქალსა და ოთხ ვაჟს. მაკრინას შემდეგ, დაახლ. 329 წ.-ს დაიბადა ბასილი დიდი, შემდეგ ნავკრათიოსი, გრიგოლი, ბოლოს კი 341 წ.-ს ზემოხსენებული პეტრე (დაახლ. ამ წელს გარდაიც-

¹ იხ. გრიგოლ ნოსელი, წმ. მაკრინას ცხოვრება, დასახ. გამოც. გვ. 206; გრიგოლისა და ბასილის დიდის სახელს გვაუწყებს მხოლოდ გრიგოლ ნაზიანზელი, რომელიც აღნიშნავს: „გინ არ იცის მისი (ბასილი დიდის, ე. კ.) მამა, ბასილი, რომელიც დიდად სახელოვანი იყო ყველა საქმეში... ანდა გინ არ იცნობს ემელიას, რომელსაც აღრევე ეწოდა ის, რაც შემდეგში გახდა იგი ანუ ვახდა ის, რაც ეწოდა („ჰე ემელია“ მომდინარეობს ბერძნული სიტყვიდან „ტო მელოს“ — მელოდია, და ნიშნავს „პარპონიულობას, კეთილშეწყობილებას“, ე. კ.), რადგანაც ქეშმარიტად მოსახლევა იგი „პარმონიისა“ (ბერძნ. „ემელია“) (გრიგოლ ლეთისმეტყველი, შესხმა ბასილი დიდისა, პგ. 36, 505 ც.).

ვალა მათი მამა). დების შესახებ, მაკრინას გარდა, არაფერია ცნობილი.

გრიგოლ ნოსელმა, საოჯახო ტრადიციის მიხედვით, მიიღო როგორც ანტიკური, ისე ქრისტიანული აღზრდა. შვიდი წლისა იგი შევიდა სკოლაში, სადაც ასწავლიდნენ წერასა და თვლას. შემდეგში ჭეშმარიტების მაძიებელ ყრმას ღრმად შეუსწავლია ანტიკური მწერლობა და ფილოსოფია. მის შრომებში თავს იჩენს რემინისცენციები ჰომეროსისა და ტრაგიკოსებისა. მოგვიანებით გრიგოლი ერთ თავის ქადაგებაში იხსენებს პირველდაწყებითი სკოლის მასწავლებლებს, რომლებსაც „გრამატიკოსებად“ („გრამმატიკეს“) სახელდებს და რომლებსაც ეკლესიის მოძღვრებს ადარებს: „ამ ეკლესიის წინამძღვარი („პროედროს“) და უცთომელი ღვთისმსახურებისა და სათნო მოღვაწეობის მოძღვარნი დიდად ემსგავსებიან პირველსაფუძვლების („ტონ პროტონ სტოიხეიონ“) მასწავლებელ გრამატიკოსებს; ისევე, როგორც ისინი მშობლებისაგან ჯერ კიდევ გაუმართავად მეტყველ („ფსელლიძომენუს“) ჩვილ ბავშვებს იღებენ და არათუ პირდაპირ შეიყვანენ მათ უსრულეს სწავლებათა წიაღში, არამედ უპირველესად „აღფას“-ა და დანარჩენ ასობებს გამოუწერენ ცვილზე, ასწავლიან მათ სახელებს, და გამოსახული მოხაზულობების მიხედვით გაუვარჯიშებენ ხელს, შემდეგ კი მარცვლებზე („ტაის სილაბაის“) გადაპყავთ ისინი და მათ გამოთქმას აჩვენენ, — ასევე, ეკლესიის წინამძღვრებიც, უპირველესად, მოძღვრებათა საფუძვლებში განსწავლიან მსმენელებს, შემდეგ კი უსრულეს სწავლათა ცოდნასაც მიანიჭებენ მათ“¹.

პირველდაწყებითი განათლების შემდეგ, როგორც აღვნიშნეთ, გრიგოლი ანტიკური ლიტერატურის ღრმა შესწავლას შეუდგა, კერძოდ კი — ჰომეროსის, ევრიპიდეს, მენანდრესა და დემოსთენეს ტექსტების ანალიზს. მ. ობინოს სა-

¹ გრიგოლ ნოსელი, გლახაკთმოყვარეთათვის, პგ. 46, სვ. 453; შდრ. მ. ობინო, გრიგოლ ნოსელის ბიოგრაფია 371 წლამდე, იხ. გრიგოლ ნოსელი, ქალწულებისათვის, მ. ობინოს დასახ. გამოც. გვ. 42. გრიგოლ ნოსელის ფილოსოფიასთან კავშირზე, აგრეთვე, მისი ფილოსოფიის შესახებ. იხ. საქართველოს ეკლესიის კალენდარი 1989, გვ. 194—198; 250—301.

შართლიანი დაკვირვებით, „ის, რაც განსაკუთრებით სასარგებლო აღმოჩნდა მისთვის მომავალში, ეს იყო სამეტყველო ენის ზუსტი მეცნიერება („ვე ონომასტიკე ტეხნოლოგია“), რაც მან გრამატიკოსთან ყოფნისას შეისწავლა, და რითაც მან დაძლია შემდეგში არიანელი ევნომიუსის მახვილსიტყვაობა“¹. ევნომიუსის წინააღმდეგ მიმართულ შრომაში წმ. გრიგოლი ახსენებს ამ მეცნიერებას: „არიონის სიტყვათა უაზრობას იმით ვამხილებთ, რაც იცის ყოველმა ბავშვმა, ვისაც კი გრამატიკოსის და მასწავლებლის ხელშეწყობით შეუსწავლია „სახელდებითი მეცნიერება“ („ონომასტიკე ტეხნოლოგია“)².

გრიგოლ ნოსელის ცხოვრების მნიშვნელოვანი ნაწილი დაეთმო რიტორიკისა და „გარეშე სწავლულებს“ („თიურათენ ჰაიდენია“) შესწავლას, როგორც ამას გვაუწყებს თეოდორიტე კვირელი³. საგულისხმოა ცნობილი ლექსიკოგრაფის სვიდას ცნობა: „ეპისკოპოსი გრიგოლ ნოსელი, ძმა ბასილი კესარიელისა, იყო, ასევე, ურჩეულესი („ელოგომოტატოს“) და ყოველი სწავლულებით აღსავსე კაცი („ანერ... პასეს ჰაიდენიას ანაპლეოს“), რომელიც განსაკუთრებით ეშურებოდა რიტორიკის სიამეებს („ტაის ტე რეტორიკე ხაირუსი“)⁴. როგორც აღნიშნავს მ. ობინო, „რიტორიკისა და ფილოსოფიისადმი მიძღვნილ წლებში გრიგოლს უნდა შეესწავლა მეცნიერებებიც. იგი დაინტერესებულია მთვარის ფაზებისა და ღრუბელთა წარმოქმნის საკითხებით და ნებისამებრ მიმართავს სწავლულთა ავტორიტეტს. გრიგოლი ფლობდა მედიცინის სა- (მ. ობინო, დასახ. შრ. გვ. 47).

¹ მ. ობინო, დასახ. შრომა, გვ. 43.

² მ. ობინო, დასახ. შრომა, გვ. 43.

³ გრიგოლ ნოსელი, ევნომიუსის წინააღმდეგ, პგ. 45, 425 დ. იგივე მეცნიერება კვლავ არის ხსენებული იმავე შრომაში. იხ. პგ. 45, 865 უ („ტეს ანტონომასტიკეს ტეხნოლოგიას ჰე ეპისტემე“). სიტყვა „ტეხნოლოგია“ ქრისტიანულ ლიტერატურაში ნიშნავს: „სისტემურ სწავლებას, მოძღვრებას“, „გრამატიკულ სისტემას, ტერმინოლოგიას“ და „ლოგიკურ სამეტყველო ენას, დიალექტურ მეთოდს“ (იხ. „პატრისტიკული ბერძნული ლექსიკონი, გამოსცა გ. ლემპა, ოქსფორდი 1961, გვ. 1392).

⁴ იხ. საქართველოს ეკლესიის კალენდარი 1989 წ. გვ. 246; შდრ. პგ. 82, სვ. 1192ა.

⁵ იხ. პგ. 44, სვ. 48. შდრ. აგრეთვე, ფოტი პატრიარქის ცნობა: „წაკითხულ იქნა გრიგოლ ნოსელის შრომა. ასევე, ბასილის დასაცავად და ევნომიუსის წინააღმდეგ (როგორც ცნობილია, ამგვარი შრომა დაწერა ბასილი დიდმა, ე. კ.), რომლის ენა („ფრასის“), როგორც ვინმე რიტორისა (ეი 91

გრიგოლ ნოსელის ცხოვრების საფუძველი, ქრისტესმიერი სარწმუნოება, გარდა საოჯახო ტრადიციისა და ღვთისმოსავი დედისა, განსაკუთრებით მძაფრად მსქველავს მის არსებას უფროსი დის მაკრინას ღვაწლითა და მადლით. წმ. მაკრინას მოქალაქეობა გრიგოლმა საჩინო-ყო სპეციალურ შრომაში „მაკრინას ცხოვრება“. ეს ძეგლი პირველხარისხოვანი წყაროა ქრისტიანული ასკეზისის შემსწავლელთათვის. მაკრინა და-ძმებში ყველაზე უფროსი იყო. თორმეტი წლის ასაკიდან, როდესაც დაწინდული საქმრო მოუკვდა, ქალწულება დაიმარხა მან და სულიერ ცხოვრებას ეზიარა. მოკვიანებით, მამის სიკვდილის შემდეგ, ღვთივ მადლფენილმა ქალწულმა ჯერ თავისი ოთხი და დააქორწინა, შემდეგ კი დედასთან ერთად პონტოში, ანეზის მახლობლად, საოჯახო მამულს მიაშურა და ასკეტის ღვაწლი იტვირთა¹.

ამავე დროს, დაახლ. 352 წ.-ს ასევე, განდევილობა აირჩია გრიგოლის ძმამ ნავკრატოსმა², ამ ფაქტმა გრიგოლზეც დიდი გავლენა მოახდინა³.

355 წ.-ს ბასილი დიდი ბრუნდება ათენიდან. დიანიოსი, კესარიის მხცოვანი ეპისკოპოსი, მონათლავს მას და თავის ეკლესიას შერთავს. მიიჩნევენ, რომ დაახლოებით ამ დროს უნდა დაენიშნათ გრიგოლიც ეკლესიაში მკითხველად, მაგრამ საკმაოდ მალე, დაახლ. 364 წელს, იგი ტოვებს საეკლესიო მოღვაწეობას და რიტორობას უბრუნდება. ამის გამო უსაყვედურებს მას გრიგოლ ნაზიანზელი: „არჩიე რიტორის სახელი ქრისტიანისას“⁴.

ტის ალლოს რეტორონ“), ბრწყინვალეა და სიამეს გვიწვეთებს ყურებში... რადგანაც მასში უხეადაა აზროვნება და სახეობრიობა („პლეონაძეი ენთი-უმემასი კაი ჰვოლდეგმასი“). წაკითხულ იქნა იმავე გრიგოლის სხვა შრომებიც... ხოლო მშვენიერება სიტყვისა („ტო კალლოს ტუ ლოგუ“) და სიტკბოებასთან თანაშეზაყებული ბრწყინვალეა აქაც ღირსეულად იჩენს თავს“ (წმ. ფოტი პატრიარქი, ბიბლიოთეკა, კოდ., VI—VII; პგ. 103, სვ. 52).

¹ შდრ. საქართველოს ეკლესიის კალენდარი, 1989 წ. გვ. 246.

² მ. ობინო, გვ. 53. ამ დროს ბასილი დიდი ჯერ კიდევ ათენში სწავლობს.

³ მ. ობინო, დასახ. შრომა, გვ. 52.

⁴ გრიგოლ ნაზიანზელი, ეპისტოლე გრიგოლ ნოსელისადმი, პგ. 37, სვ. 41 ც.

ფიქრობენ, რომ სწორედ ამ დროს ქორწინდება გრიგოლი¹. შრომაში „ქალწულებისათვის“ ვკითხულობთ: „ნეტარნი არიან ისინი, რომლებსაც ძალუძთ უმჯობესის არჩევა და არ განიზღუდვიან მისგან საზოგადო ყოფას შემსკვალულნი, ისევე, როგორც ჩვენ, რომლებიც თითქოსდა უფსკრულით განვიზღუდეთ ქალწულებისაგან; ხოლო ქალწულებამდე ველარ ამალღდება ისეთი ვინმე, ვინც ერთგზის უკვე ჩაღვა ფეხი ამქვეყნიურ ცხოვრებაში².

გრიგოლის მეუღლეს, როგორც ჩანს ერქვა თეოსებეია. ის გარდაცვლილა 335 წ.-ს, რადგანაც ამ წლით დათარიღებულ ეპისტოლეში წმ. გრიგოლ ღვთისმეტყველი თანაგრძნობას უცხადებს მეგობარს. ზოგი მკვლევარი ფიქრობდა, რომ აქ უნდა იგულისხმებოდეს გრიგოლ ნოსელის რომელიმე და, მაგრამ ღვთისმეტყველის ერთი ფრაზა სწორედ მეუღლეზე მიანიშნებს. ასეთ სიტყვას უძღვნის იგი გარდაცვლილს: „თეოსებეია, სიქადული ეკლესიისა, სამკაული ქრისტესი... თეოსებეია, ჭეშმარიტად წმიდა და თანამეუღლე მღვდლისა (პიერეოს სუძვგოს)“³.

გრიგოლ ნოსელის ცხოვრებაში დიდი მოვლენა იყო ბასილი დიდის კესარიის ეპისკოპოსად დანიშვნა 370 წ.-ს. ორი წლის შემდეგ, 372 წელს, თვით ბასილი დიდი აკურთხებს გრიგოლს ნისის ანუ ძველი ქართული „ნოსიის“ ეპისკოპოსად. ამის შემდეგ წმ. გრიგოლ ნოსელი მთელ თავის რიტორიკულ ნიჭს საეკლესიო მოღვაწეობას უთმობს.

371 წლიდან, როდესაც გრიგოლი წერს თავის სახელგანთქმულ შრომას, „ქალწულებისათვის“, იგი მთლიანად შეემსკვალება ქრისტიანულ ასკეზისს და ამიერიდან მისი ცხოვრება გარდაიქმნება საღვთო მშვენიერებისაკენ დაუსრულებლად მზარდი ძლიერებით აღმასვლისა და უსასრულო სულისმიერი განღმრთობის სარბიელად. თვით უმძიმესი მომენტები ამქვეყნიური მოღვაწეობისა, როგორიც იყო თუნ-

¹ იხ. მ. ობინო, გვ. 55.

² გრიგოლ ნოსელი, ქალწულებისათვის, დასახ. გამოც. გვ. 274.

³ გრიგოლ ნაზიანზელი, ეპისტოლე გრიგოლ ნოსელისადმი, პგ. 37, სკ. 321—324; იხ. ტერმინ „სუძვგოს“-ის შესახებ მ. ობინო, დასახ. გამოც. გვ. 67—69. ზოგი მკვლევარი ფიქრობს, რომ გრიგოლს შეილიც უნდა ჰყოლოდა სახელად კვინევიოსი; იქვე, გვ. 76.

დაც 376 წელი, როდესაც იგი უსამართლოდ ექსორია-ყვეს და ორ სინოდზე (ანკვირიისა და ნისისა) ერთხმად დაგმეს, გახდა მისთვის საფუძველი ჰეშმარიტად დიადი სულიერი აღმაფრენისა და უზენაესი საღვთო ტაძრის იღუმალეებში შეღწევისა, რაც სრულად გამჟღავნდა მის შრომებში: „ცხოვრება მოსესი“ და „ქება ქებათას განმარტება“.

378 წ.-ს ვალენსის სიკვდილის შემდეგ სრულდება გრიგოლის დევნა და იგი უკან ბრუნდება.

379 წლის 1 იანვარს გარდაიცვლება ბასილი დიდი. ეს იყო უმძიმესი დანაკლისი გრიგოლისთვისაც და მთელი საქრისტიანოსთვის. როგორც აღნიშნავს მ. კანევე, ამ დროიდან გრიგოლი გახდება მისი მემკვიდრე; იგი სრულად აცნობიერებს საკუთარ პასუხისმგებლობას და უპირველეს როლს თამაშობს საეკლესიო ცხოვრებაში¹. გრიგოლი მონაწილეობს ანტიოქიის სინოდში, 380 წ.-ს სებასტიის ეპისკოპოსად ირჩევის თავის ძმას პეტრეს, კონსტანტინოპოლში საჯაროდ კითხულობს ზემოხსენებულ შრომას „ევენომიუსის წინააღმდეგ“ (ამის შესახებ ცნობას გვაწვდის წმ. იერონიმე).

სამართლიანად მიიჩნევენ, რომ გრიგოლის საეკლესიო მოღვაწეობის აპოგეა არის 381 წელი, როდესაც იგი კონსტანტინოპოლის მსოფლიო საეკლესიო კრებაზე უდიდესი ავტორიტეტითა და დიდებითაა მოსილი.

382 წ. გრიგოლი მისიონერულ მოგზაურობას ეწევა არაბეთში და იერუსალიმში, კონსტანტინოპოლში ბრუნდება 383 წლის გაზაფხულზე და იქ სინოდის წინაშე წარმოთქვამს ქადაგებას ძისა და სულის ღმერთობის შესახებ².

გრიგოლის ავტორიტეტს ცხადყოფს ისიც, რომ 385 წ.-ს სწორედ მას ხვდება წილად სამგლოვიარო სიტყვის წარმოთქმა პრინცესა პულხერიას, ცოტა ხნის შემდეგ კი თავად დედოფალ ფლავილას გარდაცვალების გამო (იხ. პგ. 46, 864—892)³.

¹ მ. კანევე, გრიგოლ ნოსელი, სულიერების ლექსიკონი, ტ. VI, პარიზი, 1967, გვ. 972—973.

² მ. კანევე, გრიგოლ ნოსელი, სულიერების ლექსიკონი, ტ. VI, პარიზი, 1967, გვ. 973.

³ იქვე.

ბოლო წლები გრიგოლის ცხოვრებისა ბურუსითაა მოცული. ერთი რამ დღეისათვის გარკვეულია. მისი უმეტესად მისტიკური და რჯულდებითი შრომები („სისრულისათვის“, „ალექსანდრე პეტრიტიანი“, „განმარტება ქება ქებათასი“, „მოსეს ცხოვრება“, „ქრისტიანული ინსტიტუტის შესახებ“) სწორედ ამ უკანასკნელ წლებს ეკუთვნის.

„მოსეს ცხოვრება“ გრიგოლ ნოსელის ერთი უმთავრეს შრომათაგანია. საზოგადოდ, ეს თხზულება წარმოადგენს ქრისტიანული მისტიკის, მისტიკური სახისმეტყველების ურჩეულეს ძეგლს. საღვთო წილის უჩვეულო სიდიადით მსკვლავს იგი მკითხველს. ეს თხზულება ძველდაც იყო ქართულად თარგმნილი დიდი მამის ექვთიმე ათონელის მიერ¹.

„მოსეს ცხოვრება“ ორი ნაწილისაგან შედგება. პირველია ბიბლიური უწყების, ბიბლიური ისტორიის პოპულარული გადმოცემა, მეორე კი — ამ ისტორიის ყოველი დეტალის ღრმა მისტიკური განჭვრეტა. ქვემოთ წარმოდგენილია მხოლოდ პირველი ნაწილის თარგმანი, რაც შევასრულეთ ორიგინალის შემდეგი კრიტიკული გამოცემიდან: გრიგოლ ნოსელი, მოსეს ცხოვრება, შესავალი, კრიტიკული ტექსტი და თარგმანი უ. დანიელუსი, მესამე გამოც. პარიზი, 1968. ვისარგებლეთ, აგრეთვე პ. მუზურილოს კრიტიკული გამოცემით².

ე დ ი შ ე რ ჭ ე ლ ი ძ ე

¹ იხ. საქართველოს ეკლესიის კალენდარი 1989 წ. გვ. 252—254.

² გრიგოლ ნოსელი, მოსეს ცხოვრება, გამოსცა პერბერტ მუზურილომ, (გრიგოლ ნოსელი, შრომები, ტ. VII, ნაწ. I) ლეიდენი 1964.

ცხოვრება მოსანი,
ანუ სათნოებისაული სრულქმნილების შესახებ

ისევე, როგორც მარულას მოყვარულები, გამარჯვების წყურვილით ავსილნი, დაუცხრომლად დაჰკიჟინებენ მათგან რჩეულ მოასპარეზეებს (რომლებიც, თავის მხრივ, არანაკლებ ეშურებიან სისწრაფეს), ზემოდან თვალს აღევნებენ ცხენთა რბოლას და, როგორც თვლიან, აგულიანებენ კიდევ მათ უმკვირცხლესი წინსწრაფვისაკენ, თეითვე ცხენებთან ერთად იჩოქებენ, მათრახის ნაცვლად კი ქნევაქნევით აშვერენ ხელებს და თუმცა მსგავსი შეძახილებითა და მიმორხევებით გამარჯვებას არაღერს ჰმატებენ, მოასპარეზეებისადმი კეთილგანწყობასა და მწველ სიყვარულს ცხადად წარმოაჩენენ, — ვფიქრობ, ასევე ვიქცევი მეც, მეგობართა და ძმათა შორის უპატიოსნესო, როდესაც სათნოების სარბიელზე საღვთო რბოლაში შენს ღირსეულ ასპარეზობას აქედან ვეხმიანები და ღვთიეჩენილი საზღაურისაკენ მსუბუჭი და დაუცხრომელი ხლდომით მსწრაფდელს კიდევ უფრო წინ გაქეზებ, თანაც ზომეტებული სისწრაფისაკენ გაჯულიანებ.

როდესაც ამგვარად ვიღწვი, არათუ რაიმე პირუტყვიული წადილით ვარ აღტკინებული, არამედ ვესწრაფვი მხოლოდ, რომ შეგეტკბო, როგორც ჩემს საყვარელ შვილს.

ეპისტოლეში, რომელიც ახლახან გამომიჯავენე, მთხოვდი, რაიმე რჩევა მომეცა სრულქმნილი ცხოვრების შესახებ. ამგვარი სათხოვარი უთუოდ ყურადღების ღირსია.

შესაძლოა, ჩემი სიტყვებიდან არც არაღერი აღმოჩნდეს სასარგებლო შენთვის, მაგრამ წინამღებარე პასუხი, ვფიქრობ, ზორჩილების ნიმუშად მაინც გამოგადგება. თუკი ჩვენ, რომლებიც მამათა წესისამებრ ამდენ სულს ვუწინამძღვრებთ, ვთვლით, რომ მართლაც შეჰფერის ჩვენს ჭაღარას ყურადილოს გონიერი ახალგაზრდობის სათხოვარი, ვაცილებით უფრო საშური უნდა იყოს შენთვის, განმტკიცდე და წარემატო სიმდაბლეში და შენი სიტკბოე ჩვენებრ ნებაყოფლობით მორჩილებაში გამოაწრთო.

ამის შესახებ ეს ვიკმაროთ, ახლა კი დასახულ საქმეს შევუდგეთ და სიტყვის წინამძღვრად ღმერთს ვუხმობთ. ითხო-

ვე ჩვენგან, ძვირფასო გვამო, სახეობრივად წარმოგიდგინოთ, თუ რა არის სრულქმნილი ცხოვრება. თუკი ჩემს სიტყვაში აღმოაჩენ მას, რასაც ესწრაფვი, ცხადია, სურვილიც გაგიჩნდება შენივე ცხოვრებით სრულყო სიტყვაში გაცხადებული მადლი. თვით მე ორივე მხრივ უძლური ვარ, რადგანაც ვერ ძალმიძს ვერც სრულქმნილების სიტყვიერი შემოსაზღვრა, ვერც სიტყვით აღწერილის ცხოვრებაში ასრულება. არა მარტო მე, არამედ ისინიც კი, რომლებიც მამათა შორის დიდებულნი და სათნოებით წარჩინებულნი არიან, მიუწვდომლად აღიარებენ ამგვარ რამეს. მეორე მხრივ, არ მინდა იფიქროს ვინმემ. თითქოს თანახმად მეფსალმუნისა, მაშინ შემიპყრო შიშმა, როცა არ იყო შიში. ამიტომაც შევეცდები უცხადესად წარმოგიდგინო ჩემი საფიქრალი.

სრულქმნილების ყველა ის სახე, რაც კი გრძნობად საგნებში ვლინდება, შესაბამისი საზღვრებით არის შემოზღუნებში ვლინდება, შესაბამისი საზღვრებით არის შემოზღუდული; ასეთია თუნდაც. განგრძობადი და ზღვრული რაოდენობა. მოეპოვება. თუ დაეუკვირდებით, ვნახავთ,, რომ თითოეული წყრთა ანდა რიცხვთა ათეული საღდაც იწყება და საღდაც წყდება; სწორედ ესაა მათი სისრულე. რაც შეეხება სათნოებისეულ სრულქმნილებას, მოციქულის თანახმად, მას მხოლოდ ერთი საზღვარი აქვს: საზღვრის არ ქონა. ხსენებული საღეთო მოციქული, — დიადი და ამაღლებული, რომლის გონებაც სათნოების სარბიელზე რბოდა მარადის, არასოდეს დამცხრალა წინ სწრაფვისაგან (ფილიპ. III, 13), რადგანაც საფრთხედ შეერაცხა მას სრბოლის შეყოვნება. რატომ? იმიტომ, რომ ყოველი კეთილი თავისი ბუნებით უსაზღვროა და მხოლოდ მაშინ იზღუდება, როცა მისთვის უცხოს შეეჩეხება, როგორც, მაგალითად, სიცოცხლე სიკვდილს, ხოლო ნათელი ბნელს. საზოგადოდ, ყოველ კეთილს ის ახშობს, რაც მოწინააღმდეგეა მისი და როგორც სიცოცხლის დასასრული დასაბამი ხდება სიკვდილისა, ასევე სათნოებითი სრბოლის შეყოვნება, თავის მხრივ. ბოროტისაკენ სწრაფვად გარდაიქმნება. აქედან ცხადია, რომ ის, რაც საზღვრებით იზღუდება, სათნოება არ არის. სწორედ ამიტომ, არ ვტყუოდიოთ,

როდესაც ვამბობდით: შეუძლებელია სათნოებისეული სრულქმნილების ამომწურავი განსაზღვრა.

ვფიქრობ, ცხადად უნდა განიმარტოს, აგრეთვე ისიც, თუ რატომ არის სრულქმნილება მიუწვდომელი თვით სათნო ცხოვრების გზაზე.

უპირველესი და ჭეშმარიტი კეთილი, რომლის ბუნებაც სიკეთეა, ე. ი. თავად ღმრთეება, არის ის, რაც მის არსებას შეადგენს, და ასეც იწოდება. ამასთან, რადგანაც სათნოებას, ბოროტების გარდა სხვა საზღვარი არ გააჩნია, ხოლო ღმრთეება თავის მხრივ, არაფერს საწინააღმდეგოს არ შეიწყნარებს, შესაბამისად, საღვთო ბუნება უსაზღვრო და დაუსრულებელი უნდა იყოს. მეორე მხრივ, თუკი ნამდვილი სათნო ცხოვრება იგივეა, რაც ზიარება ღმერთთან (რადგანაც სწორედ ღმერთია სრული სათნოება), და თუკი შეცნობის ყველა მსურველი ჭეშმარიტად კეთილთან ზიარებას ესწრაფვის, ხოლო ამ უკანასკნელს საზღვარი არა აქვს, მაშინ საეჭვო აღარ უნდა იყოს, რომ მზიარებელთა წინსწრაფვაც ასევე უსასრულოდ განვრცობადი იქნება და არც არასოდეს შეფერხდება.

ამგვარად, სისრულე მართლაც, ყველასათვის მიუწვდომელი ჩანს, რადგანაც სრულქმნილება საზღვრებით არ იზღუდება ანუ, როგორც ითქვა, სათნოების საზღვარი მხოლოდ უსაზღვროებაა. ანკი რა გზით მივალწევთ საძიებელ ზღვარს, თუ ეს ზღვარი არსად აღმოჩნდება?

თუმცა ჩვენმა მსჯელობამ სრულიად მიუწვდომლად წარმოსახა სწრაფვის საგანი, მაგრამ ამის გამო უფლის მცნებას ნუ უგულვებლვეყოფთ, რომელიც გვაუწყებს: „იყავით სრულნი, ისევე, როგორც სრულია თქვენი ზეციური მამა“ (მათე, V, 48). მართალია, ბუნებით კეთილს მთელი სისავსით ვერასოდეს ვეზიარებით, მაგრამ მასთან ნაწილობრივი ზიარებაც გონიერთათვის დიდად სასარგებლოა. ყოველმხრივ ვეცადოთ, თვით ამ სრულქმნილების ნაწილსაც არ მოვწყდეთ და იმდენად მოვიხვეჭოთ იგი, რამდენის შეწყნარებაც ძალგვიძს. როგორც ჩანს, ადამიანური ბუნებისათვის სრულქმნილება, — ესაა მარადიულად მეტი და მეტი ზიარება კეთილთან.

ვფიქრობ, კარგი იქნება, თუ რჩევისათვის წმიდა წერილს

მივმართავთ. საღვთო ხმა ესაია წინასწარმეტყველის პირით გვაუწყებს, „შეხედეთ აბრაამს — თქვენს მამას და სარას — თქვენს მშობელს“ (ესაია 51, 2). ეს სიტყვები სათნოებისაგან გარემიქცეულთა გასაგონად ითქვა. ისევე, როგორც მეზღვაურები, რომლებიც ნავსადგურისაკენ მიმავალ სწორ გზას გადაუხვევენ, შემდეგ კი ან მალა ავარდნილ ცეცხლს შეამჩნევენ, ან კიდევ რომელიმე მწვერვალის თავს მოკრავენ თვალს და ასეთი ცხადი სანიშნეების მიერ ცთომილებას თავს დაადწევენ, — მსგავსადვე, ყველა ის, ვინც უწინამძღვრო გონების გამო ცხოვრების ზღვაში დაიკარგა, სარასა და აბრაამის სახეთა გაჭვრეტით კვლავაც შეძლებს საღვთო ნების ნავსადგურისაკენ გზა გაიკვლიოს. ამასთან, რადგანაც ადამიანური ბუნება მამაკაცად და დედაკაცად განიყოფის, ხოლო მათ ორთავეს თანასწორად მოელით ბოროტის ან კეთილის ნებაყოფლობითი არჩევა, ამის გამო საღვთო ხმამ თითოეულ მათგანს სათნოების შესაბამისი ნიმუშიც კანუჩინა. ორივე ნაწილი მისთვის მონათესავეს ემუშრება, მამაკაცი — აბრაამს, დედაკაცი — სარას, და ერთიცა და მეორეც თვისობრივად შესატყვისი სახეების კვალზე სათნოებითი ცხოვრებისაკენ მიმავალ მართალ გზას ადგება.

ამჟერად, ალბათ, საკმარისი იქნება გავიხსენოთ თუნდაც ერთი მათგანი, რომელმაც თავისი ცხოვრებით სახელი გაითქვა. ცეცხლოვან სანიშნედ დავსახოთ იგი, თანაც ვაჩვენოთ, თუ რა გზით ძალგვიძს სათნოების მშვიდი ნავსადგურისაკენ წარემართოთ სული, რომ ვერც ცხოვრების ქარიშხალმა ააღელვოს იგი და ვერც ვნებათა უწყვეტმა ტალღებმა დანთქას ბოროტების უფსკრულში. ვფიქრობ, სწორედ იმიტომ აღიწერა ასე დაწვრილებით ამაღლებულ კაცთა მოღვაწეობა. რომ შთამომავლებმაც მათ მიბაძონ და წარჩინებულთა მსგავსად ისინიც კეთილისაკენ წარემართონ.

იკითხავს ვინმე: „თუკი არც ქალდეველი ვარ, როგორც აბრაამი, არც ეგვიპტის ასულს აღვუზრდივარ, როგორც მოსე, თუკი არც სხვა რამ ცხოვრებისეული ნიშნით ვემსგავსები ჩემს წინაპრებს, როგორღა შევძლებ ჩემი თავი მათსავე მწყობრს შევეუერთო? მათი ყოფა ხომ იმზომამდე უცხოა ჩემთვის, რომ ერთმანეთს არაფრით ვგავართ!“

პასუხად ვიტყვით: ქალდეველობა არც ბოროტებად მიგვაჩნია და არც სიკეთედ; ასევე, ვფიქრობთ, არც ეგვიპტეში მკვიდრობა ანდა ბაბილონში ცხოვრება წაართმევს ვინმეს სათნოებას. არც მხოლოდ იუდეაში შეიცნობენ ღმერთს ღირსეულები; არც სიონია, პირდაპირი აზრით, ღვთის სამყოფელი. უფრო გამჭვირავი გონება და უფრო მახვილი თვალი ისტორიულ თხრობაში იმას განჰქერტს, სინამდვილეში რომელ ქალდეველსა და ეგვიპტელს უნდა განვეერიდოთ ან კიდევ ბაბილონელთა რომელი მონობისაგან უნდა დავიხსნათ თავი, რომ მივალწიოთ ნეტარ ცხოვრებას.

ამგვარი ცხოვრების ნიმუშად მოსეს წარმოგიდგინებ. ჭერ მოკლედ გადმოგცემთ მის ყოფას, როგორც ეს საღვთო წერილისაგან ვისწავლეთ, შემდეგ კი ისტორიული თხრობის შესატყვის სულიერ აზრს გამოვიკვლევთ და ამ გზით სათნოების შესახებაც მოგცემთ რჩევას, აგრეთვე იმის შეცნობასაც ვეცდებით, თუ რას გულისხმობს ადამიანისათვის მისაწვდომი სრულქმნილი ცხოვრება.

* * *

გადმოგვეცემენ, რომ იმ დროს, როდესაც მოსე იშვა, ტირანის ბრძანებით ნაშობი ყრმების ცოცხლად დატოვება აკრძალული იყო. ამბობენ, აგრეთვე, რომ მოსეს დაბადებიდანვე მიემადლა ყველა ის ღირსება, რამაც შემდეგში იჩინა თავი. როდესაც მშობლებმა სახვევები გახსნეს, ისეთი ნატიფი ჩვილი იხილეს, რომ ვეღარ იუფლეს მისი მოკვლა. მართალია, ტირანის შიშით მდინარეს მისცეს მათ ანალშობილი, მაგრამ შიშვლად კი არ გადააგდეს ნილოსის ტალღებში, არამედ ყუთში ჩასვეს, რომლის სამაგრებიც გუდრონითა და ფისით იყო შემტკიცებული (ასე მოგვითხრობენ ისინი, რომლებმაც დაწვრილებით შეისწავლეს მოსეს ცხოვრება).

ყუთი, რომელსაც საღვთო ძალა მართავდა, ნაპირის დამრეც კიდეს შეეყუდრა, შემდეგ კი მდინარის ტალღებით თავისთავად გაირიყა ხმელეთზე. სწორედ ამ დროს სანაპირო ბაღში მეფის ასული იყო მისული, რომელიც იქვე გამორიყულ ყუთს წააწყდა და დაეპატრონა. ყუთიდან ჩვილი მოსე ხმობდა.

როდესაც მეფის ასულმა მადლფენილი ახალშობილი იხილა, მაშინვე შეიყვარა იგი და იშვილა კიდევ, მაგრამ მოსემ არ ითვისა უცხო ძუძუ; ნათესაეების ხელშეწყობით მაინც მშობ-მეფურად აღზრდილი ყრმა გარეშე მოძღვრებაშიც განისწავ-ლა, მაგრამ შემდეგში აღარ ირჩია მან ეს მოძღვრება, რომელსაც ლის რძით გამოიკვება იგი.

ისევ გარეშენი აღიდებენ. განმწვესებულმა მოსემ აღარც დე-დობილი მიიღო ნამდვილ დედად. სისხლით ნათესაეებისაყენ გაეშურა იგი და თავისი ტომის ხალხში გაერია. როდესაც ებ-რაელსა და ეგვიპტელს შორის ბრძოლა გაჩაღდა, მოსე ნათე-სავს მიემხრო და მოკლა უცხოთესლი, მაგრამ როცა ორი ებ-რაელი შეექიდა ერთმანეთს, მათ დაწყნარებას შეეცადა მოსე და ასე ურჩია მოქიშვებებს: უთანხმოების დროს ძმათა შორის ბუნება უნდა იყოს შუამდგომელი და არა გულისწყრომა. ერ-თმა მათგანმა ამის გამო უსამართლოდ განდევნა იგი, მაგრამ განცდილმა წყენამ უმჯობესი სიბრძნისაყენ უწინამძღვრა მო-სეს, რადგანაც ამიერიდან მრავალთა კრებულს განერიდა იგი და განმარტოებით დაემკვიდრა. სწორედ მაშინ დაუმოყვრდა მოსე ვილაც უცხოთესლს, რომელსაც შეეძლო როგორც უკე-თურის განქვრეტა, ასევე გარჩევა ადამიანთა ჩვეულებებისა და მათი ყოფა-ცხოვრებისა. ეს კაცი მხოლოდ ერთი ნამოქ-მედარის გზით ჩაწვდა ჭაბუკის მთელ სათნოებას (ეგულის-ხმობ მწყემსებზე თავდასხმას), მიხვდა, რომ მოსემ თავის სა-სარგებლოდ როდი დაიცვა სიმართლე, თავისთვის როდი შე-ებრძოლა მწყემსებს, რომლებსაც მის წინაშე ბრალი არ მი-უძლოდათ, არამედ ბუნებით იყო იგი სამართლიანი. გაუკვირ-და უცხო კაცს ჭაბუკის ამგვარი მოქმედება, ძვირფას განძზე უპატიოსნესად შერაცხა გარეგნულ სიმწირეში დამალული სათნოება და თავისი ასული მიათხოვა მას, თანაც ნება დარ-თო, მისთვის სასურველსა და საწადელ ცხოვრებას მიჰყო-ლოდა.

ასე ცხოვრობდა მოსე მთაში განმარტოებით, თავყრილო-ბათა მღელვარებას გარიდებული და უდაბურ განდევილობა-ში ცხვარზე მზრუნველი.

ამგვარ ყოფაში გავიდა დრო. ერთხელ, როგორც გვაუწყებს ისტორია, საშინელი ღვთისჩინება იხილა მოსემ. ზუსტად შუა-

დღით მზიურ ნათელზე უბრწყინვალესმა შუქმა გაუელვა თვალებში. უცხო სახილველით გაცბუნებულმა ყრმამ მთას ახედა და თვალი ჰკიდა ცეცხლოვან ბუჩქს, რომლისგანაც ალი გამოკრთებოდა. ბუჩქის რტოები ცეცხლში ისე ყვაოდა, თითქოს ნამით იყო დაცვარული. თავის თავს უთხრა მოსემ: მივალ და ვნახავ ამ დიად სანახაობას! ამის თქმა იყო და, ცეცხლოვანმა სხივებმა არა მარტო ჰაბუჯის თვალები აავსეს საკვირველი შუქით, არამედ, რაც ყველაზე უჩვეულოა, მისი ყურებიც ააქამკამეს. ორივე გრძნობის ორგანოს გაუნაწილდა სინათლის მადლი, — თვალები სხივთა ციმციმმა გააბრწყინა, ყურები კი უხრწნელმა მოძღვრებამ გაანათლა. ხმა გამოსცა სინათლემ და მთაზე ასვლა აუკრძალა მოსეს, რადგანაც ამძიმებდა მას მკვდარი ფენსაცმლები. მოსემაც შეიხსნა ისინი და მხოლოდ შემდეგ შეახო ფეხი იმ მიწას, რომელსაც საღვთო შუქი ანათებდა.

ვფიქრობ, არ არის საჭირო წვრილად მოგითხროთ ყველაფერი, რადგანაც ამით ჩვენს მიერ დასახულ მიზანს ვშორდებით.

საღვთო გამოცხადების გზით მოსეს ებრძანა, რომ ეგვიპტელთა მონობიდან გამოეხსნა მისი ერი. უბრალო ცდამ უზენაესი ბრძანებისადმი რწმენა შესძინა მოსეს და თანაც უკეთ შეაცნობინა თვით მასში ჩანერგილი საღვთო ძალა. ცდა კი ასეთი იყო: როდესაც მოსემ კვერთხი გააგდო ხელიდან, ხეს სული ჩაედგა და ცხოველად გარდაიქმნა (გველი იყო ეს ცხოველი). შემდეგ, როდესაც შეიპყრო მან გველი, ცხოველი კვლავ კვერთხად იქცა. კიდევ, როდესაც სიღრმეში შეყოფილი ხელი გამოიღო მოსემ, კანი თოვლივით გათეთრდა, მაგრამ როცა უკანვე შეიყო, ხელს ისევ დაუბრუნდა პირვანდელი ფერი.

ამის შემდეგ მოსემ თან წაიყვანა უცხო. ტომის ცოლი, მასთან შეძენილი შვილები და ეგვიპტეში ჩავიდა. როგორც გადმოგვცემენ, სწორედ მაშინ შეხვდა მათ ანგელოზი; სიკვდილით ემუქრებოდა იგი მოსეს, მაგრამ მოსეს ცოლმა წინადასცვითა თავის ძეს და ბავშვის სისხლით ანგელოზს გული მოუღბო. შემდეგ აარონს შეხვდა მოსე, რომელსაც, ასევე, ღმერთი უწინამძღვრებდა.

მოსემ და აარონმა ერთად შეკრიბეს ეგვიპტეში მცხოვრები ებრაელები და მძიმე შრომით გატანჯულებს მონობიდან გათავისუფლების შესახებ ამცნეს. ტირანთანაც ისაუბრეს მათ, მაგრამ ამ ამბის გამო ეგვიპტის მეფე ადრინდელზე უფრო განურისხდა ებრაელებსაც და მათი შრომის ზედამხედველებსაც. აგურის სამუშაოები კიდევ უფრო დამძიმდა. გამოიკა გაცილებით მკაცრი კანონი, რომელიც თიხის ზელასთან ერთად ჩალისა და ნამჯის მოპოვებასაც აკისრებდა მათ.

მოსემ და აარონმა ღვთის შემწეობით სასწაულები აღასრულეს, მაგრამ ეგვიპტის ტირანმა, რომელსაც ფარაონს უწოდებდნენ, მსახვრალთა გრძნეულება დაუპირისპირა მათ: როდესაც მოსემ ეგვიპტელების თვალწინ კვერთხი ცხოველად აქცია, მოჩვენებითი გრძნეულების გზით იგივე სასწაული აღსრულდა მოგვთა კვერთხებზეც, მაგრამ მაშინვე გაცხადდა მათი სიყალბე, რადგანაც გველად ქცეულმა მოსეს კვერთხმა გრძნეულთა ხელჯობები (თითქოს გველები) ერთიანად შთანთქა. ამით ნათელი გახდა, რომ მსახვრალთა კვერთხებს არ ჰქონდათ არაერთი თავდაცვითი და სასიცოცხლო ძალა, ვარდა მოჩვენებითობისა, რითაც გრძნეულება მხოლოდ გულუბრყვილოებს თუ აცთუნებდა.

მიხვდა მოსე, რომ უკლებლივ ყველა ქვეშევრდომი თანამზრახველი იყო მათი ბოროტი წინამძღვრისა და ამიტომ ეგვიპტელ ხალხს საერთო ჰირი მოუვლინა; ვერაფერს გაექცა მკაცრ განსაცდელს.

ეგვიპტელების წინააღმდეგ ბრძოლაში, მორჩილი მხედრობის მსგავსად, მოსეს გვერდში ედგა ყველგან ხილული არსთა პირველსაფუძვლები: მიწა, წყალი, ჰაერი და ცეცხლი, რომლებიც კაცთა ნებისამებრ იცვლიდნენ სახეს. საღვთო ძალამ მათი გზით ერთსა და იმავე დროსა და ადგილზე დამნაშავეები დასაჯა, ხოლო უცოდველნი უვნებლად დატოვა.

მოსეს ბრძანებით, მთელ ეგვიპტეში წყალთა ბუნება სისხლად იქცა, ისე რომ, გამკვრივებულ და გასქელებულ წყალში თევზებიც დაწყდა. მხოლოდ ებრაელთაგან მოპოვებული წყალი არ იყო სისხლი, მაგრამ ეგვიპტელმა გრძნეულებმა მარჯვე ყამი ჰპოვეს და ეს წყალიც სისხლის ფერს მიამსგავსეს.

ამის შემდეგ ეგვიპტის მიწას დაუყოვნებლივ მოეფინა ბა-

ყაყები, მაგრამ მათი ჯიშის ასეთი გამრავლება ბუნებრივი წესით არ მომხდარა. ბაყაყთა მოდგმის ახალი სახეობის დაბადება იმავე საღვთო ბრძანებამ აღასრულა. ცხოველებმა მთელი ეგვიპტე სახლებში შეამწყვდიეს და ამოწყვიტეს, ხოლო ებრაელები კვლავ უვნებლად გადაარჩნენ.

ასევე, როდესაც ეგვიპტელებს დღე-ღამის გარჩევა მოესპოთ და ჰაერმა მუდმივი წყვდიადით მოიცვა ისინი, ებრაელებისათვის მაშინაც არაფერი შეცვლილა.

მომდევნო სასწაულებმაც, — სეტყვამ და ცეცხლმა, კოლოებმა და ქინქლებმა, მუმლებმა და კალიებმა მათი ბუნების შესაფერისად ავნეს ეგვიპტელებს; ებრაელები თანამცხოვრებთა უბედურების შესახებ მხოლოდ მითქმა-მოთქმითა და სხვათა გადმოცემით იგებდნენ, თვით მათ კი არაფერი გასჭირვებიათ.

პირმშოთა გაწყვეტამ უფრო აშკარად გამოარჩია ეგვიპტელისაგან ებრაელი. თუ ეგვიპტელები უსაყვარლესი შეილების ამოწყვეტას გლოვობდნენ, ებრაელები ისევ ისე მშვიდად და უშფოთველად ცხოვრობდნენ. სისხლის პკურებამ იხსნა ისინი, რადგანაც მათ სახლებზე კარის წირთხლი და ზემო ზღუდარი სისხლით იყო მონიშნული.

სწორედ იმ დროს, როცა ეგვიპტელებს პირმშოთა უბედურებამ თავზარი დასცა და ყოველი მათგანი განმარტოებით თუ სხვებთან ერთად სიმწრით გოდებდა, მოსე ებრაელების ეგვიპტიდან გამოსვლას წარუძღვა წინ; ადრევე გააფრთხილამან ყველა მათგანი, რომ დროებითი სარგებლობის საბაბით ეგვიპტელთა სიმდიდრეც თან წამოეღოთ.

ისტორია მოგვითხრობს: სამი დღის შემდეგ ფარაონმა იხანა, რომ აღარ ჰყავდა მონობაში ებრაელები. ყველა ქვეშევრდომი საომრად აღჭურვა მან და ცხენოსანთა მხედრონით უკან გამოუდგა ისრაელს. ებრაელებს არც ომი ენახათ და არც ბრძოლებში იყვნენ გამოწრთობილნი. ამიტომ, როცა აღჭურვილი ცხენოსნები იხილეს, თავზარი დაეცათ და მოსეს აუჯანყდნენ. თვით მოსეს შესახებ ისტორია გადმოგვცემს, რომ ასეთ დროს ორმაგი ძალა მოიკრიბა მან. ერთი მხრივ, სიტყვითა და შეძახილებით გაამხნევა ისრაელები და უკეთესის მოლოდინი შთააგონა ერს, მეორე მხრივ კი შინაგანად

ღმერთს მიაპყრო გონების თვალი და სასოწარკვეთილთა შეწყალებას ევედრა მას. ზეციდან ემცნო, თუ რა გზით დაეძლია საფრთხე (როგორც ისტორია ამბობს, თვით ღვთის უხმო ძახილს ისმენდა მოსე). საღვთო ძალამ ისრაელს ღრუბელი მოუვლინა წინამძღვრად, რომელიც ჩვეულებრივი ღრუბელი როდი იყო. ნისლით და ორთქლით არ შექმნილა იგი (თუმცა ღრუბელი სწორედ მაშინ ჩნდება, როცა ნისლის მსგავსად შესქელდება აორთქლებული ჰაერი და ქარები ერთად შეამკვრივებს მას). ადამიანის გონებაზე აღმატებულია და ამაღლებული მისი ბუნება.

საღვთო წერილი სწამებს, რომ საკვირველებას ახდენდა ეს ღრუბელი: როდესაც მზე დააცხუნებდა, ზემოდან ფარავდა იგი ებრაელებს, ჩრდილავდა მათ და წერილი ნამით ჰაერის სიმხურვალეს აგრილებდა; ღამით ცეცხლად იქცეოდა ღრუბელი და მისი სინათლე მწუხრიდან ცისკრამდე ლამპარით¹ უშუქებდა ისრაელს გზას.

სწორედ ამ ღრუბელს ჰკრეტდა მოსე; სხვებსაც მოუწოდებდა, უკან შედგომოდნენ ჩვენებას. როდესაც ისრაელი წითელ ზღვას მიაღგა, ღრუბელი კვლავ წინ გაუძღვა ხალხს. ამ დროს ეგვიპტელების მხედრობა ყოველ მხრივ გარს შემოერთყა ებრაელებს. ხსნა არსად ჩანდა. ზღვასა და საზარელ მებრძოლებს შორის მოექცნენ ისინი. მაშინ ყოვლად დაუჭერებელი რამ აღასრულა ღვთივ ძალცემულმა მოსემ: ნაპირს მიუახლოვდა იგი და ზღვას კვერთხი დასცა; გაირღვა წყალი და როგორც შუშა, რომელსაც თუკი ერთ მხარეს ბზარი გაუჩნდა, მყისვე მეორე კიდემდე გაიბოზა იგი, — ასევე, როცა კვერთხით ერთ მხარეს გაიბოზღვა, მაშინვე მოპირდაპირე ნაპირამდე გაწვდა ნაპრალი. მთელ ხალხთან ერთად ჩავიდა მოსე სიღრმეში, იქ, სადაც ზღვა გაირღვა. მზით გამომხმარი მიწა დახვდათ ქვევით. ფეხით განელეს ზღვის მშრალი ფსკერი

¹ „დაღუბენი“ არის მისტერიების ენის კუთვნილება, სადაც იგი ნიშნავდა მისტერიული მსვლელობის უამს ჩირაღდანით წინ ძლოლას. ქრისტიანულ რელიგიაში ეგვევ ტერმინი მიემართება აღდგომის დღესასწაულის დაშეულ პროცესიას (გრიგოლ ნოსელი, მოსეს ცხოვრება, ე. დანიელუს გამოცეგ. 24).

ებრაელებმა და არ შეუშინდნენ ზღუდეებად გარსმომდგარ ტალღებს; ორივე მხრიდან კედლებივით შემკვრივდა მათზე ზღვის წყალი; ხოლო როდესაც ფარაონი და ეგვიპტელები ჩაყვნენ ახლადგაქრილ ბილიკს, ისევ შეერთდა წყალი; ძველებურად აიტალლა ზღვა, მისი ზედაპირი და საწიერი კვლავ გამთლიანდა. ამ დროს ებრაელები უკვე მეორე ნაპირზე იყვნენ და მძიმე და ხანგრძლივი მგზავრობისაგან ისვენებდნენ.

გამარჯვების სადიდებელი უგალობა ერმა უფალს, რომელმაც სისხლდაუღვრელად მიმადლა მას ძღვევა მტრისა და ეგვიპტელების მთელი მხედრობა ეტლებითა და საქურველით დანთქა წყალში.

მოსემ განაგრძო წინსვლა. სამი დღის უწყლოდ მგზავრობის შემდეგ ძლიერ მოსწყურდათ ებრაელებს; აღარ იცოდა მოსემ, რა ელონა. ამასობაში ტბა ნახეს მათ და ტბასთანვე დაბანაკდნენ; თუმცა ეს იყო იგივე ზღვის წყალი და მასზე უმწარესიც. წყლის სიახლოვეს მეტისმეტად გაუმძაფრდათ ებრაელებს წყურვილი. მაშინ ღვთის ხმა ისმინა მოსემ, იქვე დაგდებულ ჯოხს დაწვდა და ტბაში ჩაჰყო. მყისვე სასმელ წყლად გარდაიქმნა იგი. ასე შეცვალა ხეში ჩანერგილმა ძალამ წყლის სიმწარე სიტკბოებად.

ღრუბელი კვლავ წინ მიიწევდა. ებრაელებიც უკან მიყვებოდნენ მათ მეგზურს. მხოლოდ მაშინ ჩაიმუხლებდნენ, როდესაც ღრუბელი თვით შედგებოდა და ამით შესვენების ნიშანს მისცემდა მათ; შემდეგ კვლავ წამოიშლებოდნენ და საითაც ღრუბელი უწინამძღვრებდა, ისინიც იქით გაემართებოდნენ.

მეგზურს მიდევნებულმა ისრაელმა ისეთ ადგილს მიაღწია, სადაც სასმელი წყალი ამოჩქეფდა: თორმეტი მდინარე უშურველად რწყავდა ამ ადგილს, ხოლო ფინიკების ხეივანი გარშემო ჩრდილს ჰვენდა. თუმცა სულ სამოცდაათი ფინიკი იყო, მაგრამ ეს მცირე რაოდენობაც დიდად აცვიფრებდა მათ მხილველებს, რადგანაც გამოირჩეოდნენ ისინი სიმაღლითა და მშვენიერებით.

შემდეგ მეგზური ღრუბელი კვლავ ამოძრავდა და ახლახნა ადგილისაკენ წარუძღვა ისრაელს. უდაბური იყო ეს მხარე, მშრალი და გამომწვარი ქვიშია საესე. მცირედი სისვე-

ლევ არ ალბობდა მიწას. ისევ შეაწუხა წყურვილმა ებრაელები. იქვე აღმართულ კლდეს კვერთხი დაჰკრა მოსემ და გადმოსკდა სასმელად გემრიელი წყალი, რამაც დაარწყულა ამდენი ხალხი.

ამ დროს საჰმელიც დაელიათ მათ, რაც კი ეგვიპტიდან საგზლად თან წამოეღოთ. როდესაც შიმშილმა გატანჯა ერი, კვლავ აღსრულდა ყოვლად დაუჭერებელი სასწაული: არათუ მიწამ აღმოუცენა მათ საკვები, როგორც ეს საერთოდ ხდება, არამედ ცვარივით გადმოეღვარათ იგი ციდან. განთიადისას გადმოესხურა ცვარი და საზრდოდ ებოძა დამშეულებს. თუმცა ცვარი, ჩვეულებრივ, იგივე წყლის წვეთებია, მაგრამ ის, რაც ამჟამად ცით მოივლინა, სხვა რამ იყო, — გამჟვირვალე, მსხვილი მარცვლები, კორიანდრის თესლივით მრგვალნი, რომლებიც გემოთი თაფლის სიტკბოებას მიაგავდნენ.

ამ სასწაულთან ერთად სხვაც იხილა ისრაელმა. საზრდოს შესაკრებად გასული ებრაელები თუმცა სხვადასხვა ასაკისა და შეძლებისანი იყვნენ, მაგრამ არც არავის ზედმეტი მოუხვეჭია, არც არავინ დარჩენილა ნაკლულად. ყველას წილი, საჭიროების მიხედვით, ზუსტად იყო განსაზღვრული. არც ძლიერი იღებდა მეტს, არც უძლური აკლდებოდა თავის არჩივს.

სხვა სასწაულსაც მოგვითხრობს ისტორია: ებრაელები მხოლოდ დღიურ სარჩოს აგროვებდნენ და არაფერს ინახავდნენ მომდევნო დღისათვის, ხოლო თუკი ვინმე, ზედმეტად ხელმოჰკერილი, შემდეგისთვისაც მოიმარაგებდა საზრდოს ნაწილს, გადადებული სარჩო უთუოდ გაუფუჭდებოდა და მატლებით აევსებოდა.

ზემოთქმულს კიდევ ერთი უჩვეულო ამბავი უნდა დაერთოს: რალაც საიდუმლო განზრახვით, კვირის შეიღვეულიდან ერთი უფალმა უქმე დღედ გამოარჩია, ამასთან, თუმცა უქმობის წინა დღეს იმდენივე საზრდო იღვრებოდა ციდან, რამდენიც დანარჩენ დღეებში, და შემკრებთა გულმოდგინებაც კვლავ იგივე იყო, მოპოვებული სარჩო, მაინც, ჩვეულებრივ რაოდენობას ორჯერ აღემატებოდა; ეს კი იმიტომ ხდებოდა, რომ ებრაელებს სარჩოს ნაკლებობის მიზეზით უქმობის კანონი არ დაერღვიათ. საღვთო ძლიერება სწორედ აქ გამოვლინდა: თუკი სხვა დღეებში ზედმეტი სარჩო აუცილებლად ფუჭ-

დებოდა. უქმობის ანუ, როგორც მას უწოდებენ, შაბათის წინა დღეს დაგროვებული მარაგი კვლავაც უცვლელად ინახებოდა და ოდნავადაც არ კარგავდა პირვანდელ სინედლეს.

შემდეგ, უცხო ერთან ბრძოლაში ჩაება ისრაელი. საღვთო წერილი ამაღეკს უწოდებს ებრაელებთან მორკინალ ტომს. მაშინ პირველად აღიჭურვა საომრად ისრაელი, მაგრამ არა მთელი ხალხი, არამედ — მხოლოდ ღირსეულები. რჩეული მხედრობა მტერს შეეგება და შეებრძოლა. მხედართმთავრობის ახალი სახე აჩვენა მოსემ: როდესაც იესუ¹, მოსეს შემდეგ წინამძღვარი ერისა, თავისი მხედრობით ამაღეკებისაკენ დაიძრა, თავად მოსემ ერთი ბორცვი შეარჩია სამეთვალყურეოდ და ცას მიაპყრო მზერა. ორი ახლობელი აქეთ-იქიდან გვერდში ედგა მას. ისტორიიდან გვსმენია, რომ ასეთი სასწაული ხდებოდა მაშინ: როდესაც მოსე მალლა ასწევდა ხელებს, ძლიერდებოდნენ ებრაელები, ხოლო როდესაც დაბლა დახრინდა, მტერი ჯაბნიდა მათ. მიხვდნენ ამას იქვე მყოფი ახლობლები და ქვეშ შეუდგნენ მოსეს მკლავებს, რომლებიც რალაც ფარული მიზნების გამო დამძიმებულ იყვნენ და საძრაობა წართმეოდათ. ვედარც ახლობლებმა ზიდეს ფეხზე მდგარი მოსე, ამიტომ ქვა დაუდეს მას საჯდომად, მკლავები კვლავ ცისაკენ აუპყრეს და ასე შეამაგრეს. ამის შემდეგ ისრაელმა დასძლია მტერი.

ღრუბელი, რომელიც აქამდე მეგზურობდა ერს, წინ აღარ დაძრულა და რადგანაც ებრაელებს შემდგომი მგზავრობისათვის წინამძღოლი უკვე აღარ ჰყავდათ, ისინიც ღრუბელთან შეჩერდნენ.

ასე მოიპოვა ისრაელმა უშრომელი და უზრუნველი ცხოვრება: ზემოდან ჰაერი მზა პურს უწვიმებდა მას, ქვემოდან კლდე აღმოუცენებდა სასმელს, ხოლო ღრუბელი ღია ცის ქვეშ ისევ ისე ფარავდა მათ, — დღის მხურვალეობას კედლად ეღობებოდა იგი, ღამით კი ცეცხლისებრ ბრწყინავდა და წყვიდიადს უნათებდა ებრაელებს.

ბედნიერად ცხოვრობდა მთის ძირას უდაბნოში დამკვიდ-

¹ გრიგოლ ნოსელი „ისუს“ ნაცვლად ყოველთვის „იესუს“ წერს და ამით ხაზს უსვამს იმას, რომ ისუ ნავე წინასახეა ქრისტესი.

რებული ისრაელი. სწორედ ასეთ დროს უსაიდუმლოესი ზიარებისაკენ უწინამძღვრა მას მოსემ. თავად საღვთო ძალი გაესაიდუმლა ერსაც და ერის წინამძღვარსაც; ენით უთქმელი საკვირველებები აღასრულა მან.

საიდუმლოსთან ზიარება ასეთი სახისა იყო: ემცნო ისრაელს, რომ განსპეტაკებულიყო იგი ყოველგვარი ხორციელი თუ მშვენიერი ბიწისაგან, და დაწესებული დროის მანძილზე ქორწინებისაგან წმიდად დაეცვა თავი; მხოლოდ მას შემდეგ შეძლებდა ერი მთაზე ასვლასა და საიდუმლო განდობის შეწყნარებას, როდესაც ყოველგვარ გრძნობადსა თუ ხორციელ წადილს ჩამოიბანდა და ვნებებისაგან განიწმიდებოდა. ხსენებულ მთას სინას უწოდებდნენ. იმ დროს გონიერთა გარდა არავის პქონდა უფლება ამ მთაზე ასვლისა, თანაც გონიერთაგან მხოლოდ მამაკაცებს, მამაკაცთაგან კი — ყოველად განწმედნილებს. დიდი სიფრთხილით იცავდნენ მთას ყველანაირი უწმინდურისაგან, მაგრამ თუკი ისეთი ვინმე, რომელიც პირუტყვეული ბუნებისა იყო, მაინც შეაბიჯებდა მასზე, ერი ქვით ჩაქოლავდა თავხედს.

საიდუმლო ზიარების ჟამს ჰაეროვანი შუქის სიწმიდე და გამჭვირვალეობა არმურით დაიბურა და გარემომცველ ნისლში სინის მთაც გაუჩინარდა. არმურიდან გამომკრთალმა ცეცხლმა კიდევ უფრო საშინელი გახადა სახილველი. ცეცხლი ყოველმხრივ მოედო მთას; მისმა წრიულმა სრბოლამ ირგვლივ ყველაფერი ააკვამლა და ალით აღაგზნო.

აღმა აუძღვა მოსე ერს, თუმცა თვითონაც ვერ იყო გულმტკიცედ; საშინელი ხილვით ზარდაცემული სულითა და ხორციით ძრწოდა. არ დაემალათ ებრაელებს მოსეს სულიერი მღელვარება, თუმცა თვითვე გაუმხილა მათ, რომ შეძრული იყო სანახაობით და შიშისაგან ტანშიც აზრიალებდა.

საშინელი სახილველი მხოლოდ თვალებს როდი აკრთობდა, სმენასაც მსჭვალავდა იგი. გამგმირავი ხმა ზემოდან აზანზარებდა მთელ ცისქვეშეთს. ხმის პირველი ტალღა, — უმძიმესი და გაუსაძლისი, — თითქოს საყვირთა შეძახილს ჰგავდა, თუმცა სიძლიერითა და გამყივანობით ზეაღმატებოდა ყოველგვარ საყვირს. რაც უფრო ახლოვდებოდა ეს ხმა, მეტად და მეტად ბგერდა იგი, მეტად და მეტად საშინელი და

თავზარდამცემი ხდებოდა მსმენელთათვის. ხორხისმიერი იყო ეს ხმა. საღვთო ძალის შემწეობით, სახმო იოგთა გარეშე ხმობდა ჰაერი, თანაც ფუჟად კი არ მეტყველებდა რამეს, არამედ საღვთო მცნებებს რჯულმდებლობდა. კვლავ და კვლავ ახლოვდებოდა და ძლიერდებოდა ხმა; თავის თავსაც კი ამეტებდა საღვთო საყვირის ხმოვანება; ყოველ წინამორბედ ბეგრას გამუდმებით ცვლიდა მასზე უმძლავრესი.

ერი უძლური იყო აეტანა ხილული და სმენილი. ამიტომ, ყველამ ერთობლივად თხოვა მოსეს, ეშუამდგომლა ღმერთსა და ხალხს შორის, რომ მის მიერ მინიჭებოდა ისრაელს რჯული. აღთქმა დადეს ებრაელებმა, რომ საღვთო სიტყვად ირწმუნებდნენ ყველაფერს იმას, რასაც ღვთივსწავლული მოსე აუწყებდა მათ. შემდეგ ისევ მთის ძირს დაუბრუნდა ყველა, მოსემ კი კვლავ უჩვეულო რამ აღასრულა: განმარტოებით დარჩა იგი მთაზე. თუკი ასეთ დროს სხვები ურთიერთთანადგომით იმხნეებდნენ თავს, ახლობლებისაგან მარტოდ დარჩენილი მოსე მთაზე გაცილებით გულმტკიცე აღმოჩნდა. ცხადი გახდა, რომ მისთვის უცხოა შიშის განცდა, წინანდელი მღელვარება კი სხვა არაფერი უნდა ყოფილიყო, თუ არა თანალმობის სურვილი ზარდაცემული ერისადმი.

როდესაც მოსემ ტვირთივით ჩამოიხსნა სხვათა სამხდალე და თავის თავს დაუბრუნდა, მაშინ არმურსაც შეჰბედა მან, შევიდა უხილავთა შიგნით და გაუჩინარდა. საღვთო იღუმალგანდობის¹ შეუვალ სიწმიდეში შეაღწია მან და თავად უჩინარქმნილი უხილავს ეზიარა იქ. ვფიქრობ, ამით ის გვასწავლა მოსემ, რომ ღმერთთან თანამყოფობის მსურველი უნდა გაშორდეს ყოველგვარ ხილულს, უხილავისა და მიუწვდომელისაკენ, როგორც მთის წვერისაკენ გონებით უნდა აღისწრაფოს და ირწმუნოს, რომ ღმრთეება სწორედ იქ იმყოფება, სადაც ვერ წვდება შემეცნება. ვინც ამას აღასრულებს, საღვთო მცნებებს მიიღებს იგი ანუ, რაც იგივეა, სათნოებაში განიწმენება; უმთავრესი მცნება, ესაა ღვთისადმი თაყვანისცემა და საღვთო ბუნების ჭეროვნად შეცნობა ანუ გაგება იმისა, რომ ღმერთი ზეაღმატება ყოველგვარ შემეცნებელ აზროვ-

¹ „იღუმალგანდობა“ — ბერძნ. „მისტაგოგია“.

ნებასა და სახეს; ცნობადთაგან არაფერი ემსგავსება მას. ღმრთეების განჭვრეტის ქამს უნდა უარყვოთ ყველაფერი, რაც საწვდომია გონების მიერ, რადგანაც შეცნობადი და აზრისმიერი ყოვლად ზეალმატებულ ბუნებას ვერ ემსგავსება.

მხოლოდ ღვთის არსებობის რწმენაა შესაძლებელი, მაგრამ ვერავინ ჩაწვდება, როგორ, რამდენად, საიდან ან რა სახით არსებობს იგი.

საღვთო სიტყვა იმასაც გვასწავლის, რა გზით სრულყოფილ ჩვენი ბუნება. ზოგადი და კერძო მცნებებით გვმოდღვრავს იგი. ზოგადია მცნება იმის შესახებ, რომ გვიყვარდეს ჩვენი მოყვასი, რითაც ისპობა ყოველგვარი უსამართლობა. თუკი ამ მცნებას შევითვისებთ, ცხადია, არასოდეს ცუდს არ შევამთხვევთ ჩვენს ახლობელს. რაც შეეხება კერძო მცნებებს, მათგან ერთი მშობლების სიყვარულს გვიბრძანებს, სხვები კი აკრძალულ ცოდვებს ჩამოგვითვლის.

ვინც ამ მცნებათა მიხედვით განიწმედს გონებას, უფრო სრული იღუმალგანდობისაგან წარმატება იგი. საღვთო ძალი მთლიანი სახით გამოუცხადებს მას ზეციურ კარავს.

სწორედ ეს კარავი იხილა მოსემ, რომელიც იგივე ტაძარი იყო. ენით უთქმელი მრავალფეროვნება ამკობდა მას: წინაბჭებები, სვეტები, ფარდები, ტრაპეზი, სასანთლე, საგუნდრუკე, საკურთხეველი, განსაწმედელი¹, აგრეთვე სიწმიდეთა შიგა ნაწილი, რაც შეუვალა და შეუღწეველი. იმისათვის, რომ დაეიწყებას არ მისცემოდა კარვის ნაწილთა ურთიერთშეწყობილი მშვენიერება და რომ სხვებსაც გაცხადებოდათ ღვთივჩენილი საკვირველება, ამის გამო მოსეს ემცნო, რომ გარდა წერილობითი აღწერისა, ნივთიერადაც აეგო უნივთო ქმნილების მსგავსი კარავი და საშენ მასალად ყველაზე უფრო ნათელი და მბრწყინავი საგნები შეერჩია. ცხადებულ ნიმუშში ჰკარბობდა ოქრო, რომელიც წრიულად გარს ევლებოდა სვეტებს, თუმცა ამავე სვეტების თავებსა და საძირკვლებს ვერცხლი ამკობდა (ფერში სხვაობას, საფიქრელია, უკეთ უნდა წარმოეჩინა ოქროს ელვარება). საკუთრივ ვერცხლის სვეტები თავში და ბოლოში სპილენძით იყო მოხვეწილი.

¹ „განსაწმედელი“ — ბერძნ. „პილასტერიონ“.

რაც შეეხება ფარდებსა და საფარველებს, აგრეთვე, ტაძრის გარსამოსსა და სვეტებზე გადაფენილ კრეტსაბმელს, თითოეული მათგანი მისთვის შესაფერისი მასალიდან იყო ხელოვნებით მოქსოვილი. ზოგან ქარბობდა იაკინთისა და პორფირის ფერი, სინგურისებრი და ცეცხლოვანი სიწითლე, ბისონის თვითნაბადი ბუნებრივი ელვარება, ზოგან სელი მოჩანდა, ზოგან კი — ბალნის ქსოვილი. აქაიქ მეწამული ფერის ტყაეებიც ამშვენებდა კარავს.

ცხადჩენილი ნიმუშის მიხედვით მხოლოდ მთიდან ჩამოსვლის შემდეგ ააგებინა მოსემ ხუროებს კარავი, მაშინ კი, ხელთუქმნელ ტაძარში მყოფი იმის შესახებ იღებდა რჯულებას, რა სამკაულებით უნდა მორთულიყო მღვდელი, როდესაც იგი შეუვალთა შიგნით შევიდოდა. საღვთო სიტყვამ დაწვრილებით ამცნო მას შიგა და გარე სამოსის შესახებ.

შესამოსელთა რიგი იწყებოდა არა შიგნიდან, არამედ გარედან. ნაირგვარი და მრავალფეროვანი სამხრეები იმავე ძაფებით იყო ნაქსოვი, რითაც ფარდები, თუმცა ამჯერად ქსოვილში ოქროს ძაფი ქარბობდა. კარშიკები¹ ორივე მხარეს კრავდნენ სამხრეებზე მოთავსებულ სმარაგდებს² და წრიულად იყვნენ ჩასმულნი. ქვებს სამკაულად ჰქონდათ ბუნებრივი ელვარება: მწვანე სხივებს აბრწყინებდნენ ისინი. ხელოვნებას, თავის მხრივ, საკვირველად მოეჩუქურთმებინა ქვები, თუმცა ეს ჩუქურთმები არაფრით ჰგავდა ამოკვეთილ გამოსახულებებს. სამკაული, რომელიც ხელოვნებას მიეცა მათთვის, ექვისი პატრიარქის სახელი იყო (თითო ქვაზე თითო სახელი იყო ამოტვიფრული). ქვების ბუდეები სამხრეებს წინ ჰქონდა მოკილი, ბუდეებიდან კი, კარშიკების ორივე მხარეს, ქვევით ეშვებოდნენ ურთიერთშეთხზული ძეწკვები, რომლებიც ქსელი-სებრ შეწყობილი მონაცვლეობით ჩამოწნულიყვნენ. ვფიქრობ, ქვემო ნაწილთა ნათებას უფრო მეტად უნდა გაებრწყინებინა დაწნულ ძეწკვთა შემკულობა.

ოქროთხზული მშვენიერება, რომელიც მკერდს ეფინებოდა, შედგებოდა სხვადასხვა ქვისაგან. მათი რაოდენობა

¹ კარშიკი — შესაკრავი ღილი, ბალთა.

² სმარაგდი — ღია მწვანე ფერის ძვირფასი ქვა.

პატრიარქთა რიცხვს თანხვდებოდა ეს ქვეები ოთხ მწკრივად იყო გაწყობილი. თითო მწკრივი სამ ქვას შეიცავდა. მათზე ამოტვიფრული იყო ტომთა მამამთავრების სახელები.

სამხრეების შიგა პერანგი, რომელიც კისრიდან ფეხის წვერებამდე წვდებოდა, ჩამოშვებულ ფოჩებს დაემშვენებინა. ქვედა არშია მრავალფერად იყო მოქსოვილი და მორთული. ოქროვანი ნაკიდურებიც ამკობდა მას. ეს იყო ოქროს ეყვანები და ბროწეულები, რომლებიც გვერდიგვერდ გასდევდნენ ქვედა ქობას. თავსაბური მიტრა¹ მთლიანად იაკინთოვანი² იყო, ხოლო პეტალი³, რომელზეც საიდუმლო გამოსახულება ამოეკვეთათ, მხოლოდ წმიდა ოქროს შეიცავდა. ჩამოშლილ სამოსს სარტყელი კრავდა.

სამოსელის ყველა ეს სახე, დაფარულ ნაწილთა შემკულობასთან ერთად, იგავურად გვაუწყებდა სამღვდლო სათნოების შესახებ.

ასე განაბრძნო საღვთო იღუმალგანდობამ წყვდიადით გარემოცული მოსე. საიდუმლო სწავლათა შეძენით საკუთარ თავს წარემატა იგი⁴.

როდესაც მოსემ არმურიდან გამოაღწია, კვლავ თავის ხალხთან ჩამოვიდა იგი, რომ სხვებიც ეზიარებინა ღვთისჩინების უამს მისთვის ცხადჩენილ სასწაულებთან, თანაც რჯული განეჩინა ისრაელისათვის და მთაზე ჩვენებული ნიმუშის მიხედვით ერის სათაყვანო ტაძარი და სიწმიდე აეგო. წმიდა ფიცრები მოჰქონდა მას ხელით. ღვთივშექმნილი იყო ეს ფიცრები და ღვთივბოძებული. ადამიანს არ უშრომია მათთვის. ღმერთს შეენივებებინა ისინი და სიტყვებიც მასვე ამოეტვიფრა. ეს სიტყვები თავად რჯული იყო. მაგრამ ერმა დააბრკოლა მადლი. რჯულმდებლის არყოფნაში მეკერპეობას შეუდგა იგი.

როდესაც მოსე საღვთო მესაიდუმლოების უამს ხან-

¹ მიტრა — ბერძნულში შეესატყვისება „ტაინია“. თვით სიტყვა „მიტრა“ ბერძნულია და ნიშნავს თავსახვევს (იხ. მცხეთური ბიბლია, 1. გამოსლვ. XXVIII, 37).

² იაკინთე — ძვირფასი ქვა, იისფერი; ბერძნ. „ჰაკინთოს“.

³ პეტალი — (იხ. მცხეთური ბიბლია, 1, გამოსლვ. XXVIII, 36) — ბერძნ. „პრომეტოპიდონ“. საშუალებ თხელი ფირფიტა, რომელსაც დამკველობითი დანიშნულება ჰქონდა.

⁴ სიტყვ. „საკუთარ თავზე უკეთესი გახდა“.

გრძლივად ემეტყველებოდა ღმერთს და ორმოცი დღე-ღამე წყვილიადით მოცული უკვდავ ცხოვრებას ეზიარებოდა (ბუნების¹ გარეთაც გავიდა იგი, რადგანაც ამ ღროის მანძილზე მისი სხეული აღარ ითხოვდა საზრდოს), სწორედ მაშინ ისრაელი, მსგავსად იმ ბავშვისა, რომელსაც აღმზრდელის თვალი მოაკლდა, დაუოკებელი ჟინით მიეცა უწესრიგობას; აარონის ირგვლივ შემოკრბენ ებრაელები და აიძულეს მღვდელი, კერპთაყვანისმცემლობისაკენ ეწინამძღვრა მათთვის, შემდეგ ოქროსაგან კერპიც შეიქმნა (ხბო იყო ეს კერპი) და ისრაელებმაც განიხარეს უღვთოებაში. როდესაც მოსემ ამ ყოფაში იხილა ისინი, მყისვე დაამსხვრია ღვთიებოდებული ფიცრები, რითაც ზეციური მადლი მოაკლო ებრაელებს და შეცოდების წილ ჭეროვანი სასჯელი მიაგო მათ.

ლევიტელთა შემწეობით კრის ცოდვები ერის სისხლითვე განწმიდა მოსემ, მოსპო კერპი და ამ გზით ცოდვილთა მიმართ ღვთის მრისხანებაც დააცხრო. შემდეგ, ისევ ორმოცი დღე დაჰყო მან მთაზე და ახლად მოიგო ღვთივდაწერილი ფიცრები, თუმცა ფიცრები ამჯერად მოსეს ხელს შეექმნა. ამჯერადაც, ორმოცი დღის მანძილზე, კვლავ გაშორებოდა იგი ადამიანურ ბუნებას, რაღაც უცხო და უჩვეულო წესით ცხოვრობდა და მისი სხეული საზრდოდ არაფერს იღებდა ისეთს, რაც საზოგადოდ ჩვენი ბუნების უძლურებას სიმტკიცეს აძლევს.

შემდეგ კარავიც აღმართა მოსემ, კანონებიც განაჩინა ერისათვის და ღვთიებოდებული მოძღვრების მიხედვით სიწმიდეც დაუწესა მას. სწორედ საღვთო სწავლების კვალზე ააგო მან ნივთიერი კარავი, მისი წინკარი და შიგა ნაწილები: საგუნდრუკე, საკურთხეველი, სასანთლე, ფარდები, აგრეთვე, შეუვალთა შიგნით მდებარე განსაწმედელი. მანვე ჭეროვნად განაწესა სიწმიდის მთელი შემკულობა, მირონი, შესაწირავ მსხვერპლთა ნაირგვარობა: მსხვერპლი განწმენდისა, სამად-

¹ ამ შემთხვევაში „ბუნება“ ნიშნავს კონკრეტულად ადამიანის ბორცვი-ელ აგებულებას. ამგვარი შინაარსით „ბუნება“ წმ. გრიგოლის შრომებში, როგორც შენიშნავს ჟ. დანიელუ, მეტად იშვიათია. გაცილებით ხშირად ეგვევ ტერმინი ნოსელთან აღნიშნავს ადამიანის იდეალურ სახეს, ე. ი. მადლთ სხეცვლილ სხეულს (იხ. დასახ. გამოც. გვ. 25).

ლობელისა, ბოროტთა განშორებისა, ცოდვათა მიტევებისა. როდესაც ყოველივე ეს აღასრულა მოსემ, შური აღძვრათ მის ახლობლებს. ეს სენი იმდენად ძირეულია ადამიანური ბუნებისათვის, რომ თვით აარონმა, სიწმიდის ღირსებათა მიერ პატივდებულმა, აგრეთვე, მარიამმა, მისმა დამ, რომელსაც წმინდა ქალური შურით შურდა ძმაზე ღვთითგადმოსული დიდება, — სწორედ ღვარძლიანი სიტყვები აკადრეს მოსეს, რის გამოც ღმერთმა დასაჯა ისინი. ასეთ დროს უფრო მეტი საკვირველების ღირსად გამოჩნდა მოსე: სულგრძელებით დაიოკა მან მრისხანება და ბუნებრივი გრძნობით აღძრულმა თავისი და შეავედრა ღმერთს, თუმცა თავად ღმერთი მოშურნე ქალის დასჯას განიზრახავდა.

ერის სიმრავლე შემდეგში კვლავ გადაცდა უწესრიგობისაკენ. ახალი შეცოდების მიზეზად იქცა მუტლის სიამოვნებათა უზომო მოთხოვნილება, რასაც ვერ აკმაყოფილებდა ვერც ცითმოვლენილი საზრდო, ვერც მისგან მონიჭებული სიმრთელე და უზრუნველობა. ხორცისადმი გულისთქმამ, მისი ჭამის სურვილმა თვით ეგვიპტის მონური ცხოვრებაც კი ამჟამინდელ კეთილდღეობაზე უმჯობესად წარმოუსახა მათ. ახლად თავდატეხილი ჭირის შესახებ მოსე ღმერთს ევედრა რჩევას. ღმერთმა დამოდღვრა, რომ საფრთხის დასაძლევად ერის წადილის აღსრულება იყო საჭირო. ამის შემდეგ ღრუბლებივით მოედო ბანაკს ურიცხვ ფრინველთა გუნდები, რომლებიც მიწასთან ახლოს დაფრინავდნენ და ამის გამო აღვილად ინადირებდა მათ კაცი. მოყირკებამდე ჭამეს ებრაელებმა ხორცი, მაგრამ უზომო სიხარბემ მათი სხეულების შერთულობა გახრწნა და გაათხევადა. გაუმაძღრობამ ბევრს მოუტანა ავადმყოფობა და სიკვდილი. ამგვარმა შემთხვევამ მათაც ასწავლა ჭკუა და მათი უბედურების მხილველებსაც.

ყო, მაგრამ ყველა მსტოვარმა სიმართლე როდი აუწყა ხალხს, პირიქით, ზოგმა ცრუ და სამწუხარო ამბავიც მოიტანა და ერი კვლავ აუშხედრა მოსეს; ღმერთმა მკაცრად ხალხს, პირიქით, ზოგი რამ ცრუ და სამწუხარო ამბავიც მოიტანეს და ერი კვლავ აუშხედრეს მოსეს; ღმერთმა მკაცრად უსაჯა ყველას, რომლებსაც არ სწამდათ საღვთო თანადგომისა. აღთქმული ქვეყანა ვერ იხილეს მათ.

როდესაც ერი უდაბნოში მიდიოდა, კვლავ შემოაკლდათ ებრაელებს წყალი. მესხიერებაც მოაკლდათ მათ და ამიტომაც არ ირწმუნეს, რომ საღვთო ძალი, რომელმაც ცოტა ხნის წინათ სასწაული მოახდინა კლდეზე, ამჯერადაც არ გაუწყვეტდა მათ ცხოვრების სახსარს. კვლავ განუდგნენ ისინი მაცოცხლებელ სასოებას და ყვედრებით აავსეს ღმერთიცა და მოსეც. ერის ურწმუნობამ თითქოს მოსეც დაიმორჩილა, მაგრამ კვლავ სასწაულმოქმედად გამოჩნდა იგი და ცაში აპრილი კლდიდან აღრინდელივით გაღმობინა წყალი.

მუცლის სიამოვნებათა მონობამ იმდენად გააცხოველა ებრაელთა სიხარბე, რომ თუმცა ცხოვრებისათვის არავის არაფერი აკლდა, მაინც ეგვიპტის მაძლარი ყოფა ეზმანებოდა ყველას, მათ შორის, თავაწყვეტილ ახალგაზრდებსაც. ასეთი უმადურები უმკაცრესად განისწავლნენ, რადგანაც შხამიანმა გველებმა სასიკვდილოდ დაკბინეს ისინი. როდესაც ზედიზედ მოკვდა ბევრი, ღვთის რჩევა ისმინა მოსემ, გველი ჩამოასხა სპილენძისაგან და ისე აამალა იგი, რომ ყველას შეძლებოდა მისი დანახვა. ამ გზით შეაჩერა მოსემ ერის სიკვდილიანობა, ამ გზით იხსნა მან ერი წარწყმედისაგან. ვინც სპილენძის გველს შეხედავდა, მისთვის საშიში აღარ იყო ნამდვილი გველის ნაკბენი, რადგანაც ეს შეხედვა რაღაც ფარული უკუქმედებით¹ უვნებელყოფდა შხამს.

ასევე, როდესაც ძალაუფლების მოსაპოვებლად აუმხედრდა ერი თავის წინამძღვარს და ზოგიერთებმა სიწმიდის მიტაცებაც იძალეს, მოსემ კვლავ ღმერთს შეავედრა შეცოდებულნი. მაგრამ ამჯერად ღვთის მიერ განჩინებულმა სამართალმა დათრგუნა მისი თანალმობა ერისადმი. საღვთო განზრახვით გაიპო მიწა და კვლავ შეერთდა იგი, ნაპრაღმა კი თან ჩაიტანა მოსეს გამგებლობის მოქიშპენი. რაც შეეხება მათ, რომლებიც სიწმიდის მოპოვებისათვის დრტვინავდნენ, ცე-

¹ სიტყვ. — „რაღაც ფარული ანტიპათიით“; ტერმინი „ანტიპათია“ ნიშნავდა „საწინააღმდეგო თვისებებს“, „საწინააღმდეგო ქმედებას“. იგი სპეციალური ტერმინი იყო ოკულტურ მოძღვრებებში (იხ. დასახ. გამოც. გვ. 28).

ცხლში გამოიწვენენ ისინი (სულ ორას ორმოცდაათი კაცი) და საკუთარი უბედურებით სხვებს ჭკუა ასწავლეს.

მოსეს სურვილი იყო, უფრო მეტად დაერწმუნებინა ერი, რომ სიწმიდის მაღლი თავად ღვთისაგან ენიჭებოდათ ღირსეულებს. ამ მიზნით თითოეული ტომის რჩეულს კვერთხი მოატანინა მან, ზედ ყველას თავისი სახელი ამოაკვეთინა და შეგროვილი ჯოხები ერთად დააწყო ტაძარში (მათ შორის იღო აარონის კვერთხიც). ამ გზით მოსემ მთელი ერისათვის ცხადი გახადა, თუ ვისი ხვედრი იყო ღვთის სიწმიდე. თორმეტიდან მხოლოდ აარონის კვერთხი გაიყლორტა; ნიგვზის ნაყოფი აღმოცენდა მისგან და დამწიფდა. ამ სასწაულმა ურწმუნოებიც კი დიდად განაცვიფრა, რადგანაც გამხმარი, გათლილი და უფესვო ჯოხი უეცრად ძირგადგმულ მცენარესავით განელდა. საღვთო ძალი იყო მისი მიწაც, ქერქიც, სითხეც და ყამიც.

როდესაც უცხო ტომთა შორის მიდიოდნენ ებრაელები, დამხვდურებს ფიცით აღუთქვა მოსემ, რომ სამეუფო გზას¹ გაყვებოდა მისი ხალხი და არავინ გადაუხვევდა არც მარჯვნივ, არც მარცხნივ ყანებისა და ვენახებისაკენ. შფოთისმოყვარე ტომი მაინც არ დაცხრა და წინ გადაუდგა ისრაელს. მაშინ ბრძოლაში ჩაებნენ ებრაელები; მტერიც დაამარცხეს მათ და გასასვლელ გზასაც თავად ეუფლნენ.

ისრაელის გამარჯვებამ თავზარი დასცა ბალაკს, რომელსაც უფრო დიდი ტომის წინამძღვრობა ეპყრა (მადიანელებს უწოდებდნენ მათ). ამ ტომსაც სულ მალე იგივე მოელოდა ებრაელებისაგან, ამიტომ ბალაკმა საჭურველისა და მხედრების ნაცვლად დასახმარებლად მიმართა მაგიაში გაწაფულ ბალაამს, რომელიც ფრინველთგრძნეულების დემონურ ხელოვნებას ფლობდა. ფუჭი მაგიის გზით ყველას აშინებდა ბალაამი. ყველასათვის უბედურება მოჰქონდა მას.

როდესაც წარგზავნილებს ბალაამი მეფესთან მიჰყავდათ, ვირის ხმა ავად ენიშნა გრძნეულს. შემდეგ ჩვენებაც იხილა მან და ისიც ემცნო, თუ რა უნდა მოემოქმედა. დარწმუნდა

¹ გამოთქმა „სამეუფო გზა“ („ზე ბასილიყე კოდოს“) მომდინარეობს „რიცხვთა“ წიგნიდან: „არა განვიდეთ ყანობირსა შენსა, არცა ვენახებსა შენსა... გზამ სამეუფომ განვლოთ“ (რიცხვ. 20, 17).

ზალაამი, რომ მისი ბოროტი გრძნეულება ღვთივდაცულ ერს ვერას ავნებდა. დემონთა ზემოქმედების ნაცვლად საღვთო მობერვამ განაღვთო იგი და ამიტომაც მისმა ბაგემ ჭეშმარიტად იწინასწარმეტყველა სამომავლოდ აღსრულებადი. როდესაც მსახვრალობის უკეთური ხელოვნება დაბრკოლდა და უქმი აღმოჩნდა, მაშინ შეიგრძნო ზალაამმა საღვთო ძალი, საბოლოოდ გაშორდა იგი გრძნეულებას და საღვთო განზრახვის ქადაგად იქცა.

ამის შემდეგ ისრაელმა დაჯაბნა უცხოთესლი და გაანადგურა იგი, მაგრამ ებრაელები დამონებულთა შორის აღვირახსნილებას მიეცნენ და დაუძღურდნენ. ღმერთი განურისხდა უწმინდურებს, ხოლო ფინეზმა ერთი დარტყმით შემუსრა უკანონო აღრევის გზით შებილწულები და დააცხრო ღვთის წყრომა. სწორედ მაშინ ისრაელის რჯულმდებელი მაღალ შთაზე ავიდა და შორიდან განჰკრიტა ის ქვეყანა, რომელიც, მამამთავრებისადმი მიცემული აღთქმის მიხედვით, ღმერთს უბრაელებისათვის დაეწინდა. შემდეგ ადამიანური ცხოვრებისაგანაც გარდაიცვალა იგი, თუმცა მიცვალებულს არც საშარე დაუტოვებია ჩვენთვის, არც სხვა რამ ნიშანი თუ მოსახსენებელი.

ღრომ ვერ შეცვალა მოსეს ნაკვთკეთილობა. არც თვალეში დაშრეტია მას შუქი, არც მაღლფენილი და გაბრწყინებული პირისახე დაჰკნობია. როგორიც იყო, ისეთივე დარჩა ბოლომდე. ბუნების მიმოქცევაში შეუცვლელად დაიცვა მან პირვანდელი მშვენიერება.

ყოველივე ეს, რაც მოსეს შესახებ ტრადიციული გაღმოცემისაგან გვისწავლია, მოკლედ გაუწყეთ შენ (თუმცა ზოგჯერ, საჭიროებისამებრ, რამდენადმე განვავრცეთ კიდევ ჩვენი თხრობა). ამჯერად, ღროა, ჩვენს დასახულ მიზანს შეეუთანხმოთ ზემოხსენებული ცხოვრება და სათნოებისეული მოღვაწეობის შესახებაც შევიძინოთ ცოტა რამ.

ამგვარად, ისევ მოსეს ცხოვრების დასაბამს მივუბრუნდეთ¹.

¹ აქედან იწყება ხსენებული თხზულების მეორე ნაწილი, რომელიც ზემოწარმოღვენილი ისტორიული თხრობის მისტიკურ ჰერეტას გვაწვდის.

ბასილი დიდთან და გრიგოლ ღვთისმეტყველთან ერთად განეკუთვნება მსოფლიოს უმთავრეს მღვდელმთავართა რიცხვს. იგი დაიბადა დაახლოებით 347 წელს, ქალაქ ანტიოქიაში, მხედართმთავრის ოჯახში. მისი მამა, სეკუნდი, გარდაიცვალა სულ მალე ძის შობიდან. დედამ წმიდანისა, ანთუსამ, რომელიც ჭერ მხოლოდ ოცი წლისა იყო, როცა დაქვრივდა, აღარ მოისურვა მეორედ გათხოვება და მთელი თავისი ძალები იოანეს ქრისტიანული ღვთისმომშიშებით აღზრდას მოახმარა. ჰაბუკი იოანე თავისი დროის საუკეთესო ფილოსოფოსებთან და რიტორებთან სწავლობდა. მაგრამ მომავალმა მღვდელმთავარმა თავიდანვე უგულვებელყო წარმართთა ამაო მეცნიერებანი და აღრევე ჩაულრმავდა საღმრთო წერილის შესწავლასა და ლოცვით განმჭვრეტელებას. მღვდელმთავარმა მელეტიმ, ანტიოქიის ეპისკოპოსმა, რომელსაც ღვიძლი შვილივით შეუყვარდა იოანე, ქეშმარიტი რწმენით დამოძღვრა იგი და 367 წელს მონათლა კიდევც. სამი წლის შემდეგ წმიდა იოანე მკითხველად (მედავითნედ) იქნა დადგინებული ეკლესიაში. მას შემდეგ, რაც 372 წელს იმპერატორმა ვალენტმა ექსორია-ჰყო მღვდელმთავარი მელეტი, იოანე თეოდორესთან ერთად (შემდეგში იგი მოპსუეტის ეპისკოპოსი იყო), გამოცდილ მოძღვრებთან — ფლაბიანე და დიოდორე ტარისელებთან სწავლობდა მოსაგრე ცხოვრებას. განსაკუთრებით დიდი გავლენა მომავალი დიდი ღვთისმეტყველის სულიერ ჩამოყალიბებაზე იქონია დიდად განათლებულმა ხუცესმა დიოდორემ.

როცა წმიდა იოანეს დედაც გარდაეცვალა, მან მონაზვნობა მიიღო, რომელსაც იგი „ქეშმარიტ ფილოსოფიას“ უწოდებდა.

ოთხი წელიწადი გაატარა წმიდანმა მეუღაბნოე ცხოვრების მძიმე ყოფაში. შემდეგ კი ხორციელად დაუძლურებული იოანე იძულებული გახდა ანტიოქიაში დაბრუნებულიყო, რათა ჯანმრთელობა აღედგინა. 381 წელს წმიდა მღვდელმთავარმა მელეტი ანტიოქიელმა დიაკვნად აკურთხა იგი. ამის

შემდგომი წლები მიეძღვნა ახალი საღვთისმეტყველო ქმნი-
ლებების შექმნას, რომელთაგანაც აღსანიშნავია: „ღვთის გან-
გებულების შესახებ“ („მოსაგრე სტაგირიოსს“), „წიგნი ქალ-
წულების შესახებ“, „ქაბუჯ ქვრივ დედაკაცს“ (ორი სიტყვა)
და „წიგნი შესახებ ბაბილასი და წინააღმდეგ იულიანესი და
წარმართთა“.

386 წელს წმიდა იოანეს ხუცესად დაასხა ხელი ანტიოქიის
ეპისკოპოსმა ფლავიანემ და ღვთის სიტყვის ქადაგება დაავა-
ლა ეკლესიაში. წმიდა იოანე მდებლად შეუდგა ამ მორჩილე-
ბის აღსრულებას და ბრწყინვალე მქადაგებელი აღმოჩნდა.
იშვიათი, ღვთივსულიერი მადლისათვის სიტყვისა მრევლმა
მას „ოქროპირი“ უწოდა. 12 წლის განმავლობაში ქადაგებდა
წმიდა იოანე ოქროპირი ეკლესიაში მრავალრიცხოვანი მორ-
წმუნეების წინაშე, ჩვეულებრივ კვირაში ორჯერ, ხოლო ხში-
რად ყოველდღიურადაც კი მისი ქადაგებანი დიდ ზეგავლე-
ნას ახდენდა მორწმუნეებზე და ღრმად შესძრავდა მათს გუ-
ლებს.

წმიდა იოანე ოქროპირის დიდება დღითიდღე სულ უფრო
იზრდებოდა, და 397 წელს კონსტანტინოპოლის მთავარეპის-
კოპოსის, ნექტარის გარდაცვალების შემდეგ, რომელიც ამ კა-
თედრაზე მემკვიდრე იყო წმიდა გრიგოლ ღვთისმეტყველისა,
იგი ანტიოქიიდან კონსტანტინოპოლში გამოიძახეს, რათა ამ
სამღვდელომთავრო ტახტზე დაედგინათ. დედაქალაქში წმიდა
მღვდელომთავარს არ შეეძლო ისევე ხშირად ექადაგა, რო-
გორც ამას ანტიოქიაში, ხუცესად ყოფნის უამს. აკეთებდა.
მრავალი საქმე მოელოდა მღვდელომთავრის ხელს, და მან უმ-
თავრესით — სამღვდელოთა სრულყოფილებით დაიწყო. და
აქაც საუკეთესო მაგალითს თვითონ წარმოადგენდა. მთელი ის
სახსრები, რაც მისთვის, როგორც მწყემსმთავრისათვის იყო
განკუთვნილი, წმიდა იოანე ოქროპირმა რამდენიმე სასწრაფო
სახლისა და მლოცველთა ორი სასტუმრო სახლის მშენებ-
ლობასა და შენახვას მოახმარა. თვითონ კი სულ მცირედით
კმაყოფილდებოდა, იქამდეც კი, რომ სადილებზე მიწვევებზეც
უარს ამბობდა.

ბევრი იზრომა მღვდელომთავარმა იმისთვის, რომ ჯეროვ-
ნად მოეწყო საღმრთო ლიტურგია: შეადგინა წესი ლიტურ-

გვისა, შემოიტანა ანტიფონური გალობა ღამისთევის ლოცვის დროს, დაწერა რამდენიმე ლოცვა ზეთისკურთხევის წესისათვის. დედაქალაქის ზნე-ჩვეულებათა აშვებულობამ, განსაკუთრებით კი — იმპერატორის სასახლის კარისა, შეურიგებელი მამხილებელი ჰპოვა წმიდა მღვდელმთავრის სახით. როცა დედოფალმა ევდოქსიამ ბრძანა უკანასკნელი ქონება ჩამოერთმიათ შერისხული დიდებულის ქვრივისა და შვილებისათვის, წმიდანი მათ დასაცავად აღდგა. ამაყმა დედოფალმა არ დაუთმო მღვდელმთავარს და განურისხდა მას. მისმა რისხვამ ახალი ძალით იფეთქა, როცა არაკეთილის მდომებმა ენა მიუტანეს მას, თითქოს იოანე ოქროპირს დედოფალი ჰყავდა მხედველობაში, როცა ამათ დედაკაცებზე წარმოთქვა ქადაგება. წმიდანის მიერ ადრე სამართლიანად მხილებულ მღვდელმთავართაგან (თეოფილე ალექსანდრიელი, სევერიანე, გველის ეპისკოპოსი, რომელიც დედაქალაქში შფოთის გამოწვევისათვის სულ მცირე ხნის წინ იყო გაძევებული, და სხვები) შემდგარმა სამსჯავრომ გადაწყვიტა დაემხო წმიდა იოანე და დედოფალ ევდოქსიას შეურაცხყოფისათვის სიკვდილით დაესაჯა, მაგრამ იმპერატორმა სასიკვდილო განაჩენი წმიდანს გადასახლებით შეუცვალა. ამ დროს ტაძართან აღზევებული ხალხის ბრბო ირეოდა, რომელსაც თავისი მღვდელმთავრის დაცვა გადაეწყვიტა. იმისათვის, რომ თავიდან აეცილებინა მღვდლვარება და შფოთი, მღვდელმთავარი თვითონვე ჩაბარდა ხელისუფალთ. იმავე ღამეს კონსტანტინოპოლში დიდი მიწისძვრა მოხდა. იმპერატორის სასახლე შეირყა. შეშინებულმა ევდოქსიამ სთხოვა სასწრაფოდ დაებრუნებინა წმიდანი და თვითონაც დაუყოვნებლივ წერილი გაუგზავნა ექსორიაქმნილ მღვდელმთავარს, რომელშიც უკან დაბრუნებას ევედრებოდა. და აი, კვლავაც დედაქალაქის ტაძარში იდგა მღვდელმთავარი და მოკლედ სიტყვით მადლს შესწირავდა უფალს „ყოველთა გზათათვის მისთა“. წმიდანის შემასმენელნი ალექსანდრიაში გაიქცნენ. მაგრამ ორიოდ თვის შემდეგ ახალმა შესმენამ ხელახალი ძალით გაადვიდა ევდოქსიას რისხვა. 404 წლის მარტში შედგა უკანონო საეკლესიო კრება, რომელმაც გადაწყვიტა გაეძევებინა იოანე ოქროპირი. დედაქალაქიდან მისი გაძვევის შემდეგ ცეცხლმა ფერფლად აქცია წმიდა სოფიოს ტაძარ-

რი და სენატის შენობა, ხოლო მალე ბარბაროსთა ამოხრებელი შემოსევებიც დაიწყო; 404 წლის ოქტომბერში კი დედოფალი ევდოქსია გარდაიცვალა. თვით წარმართებიც კი ამ მოვლენებში ზეციურ ძალას ხედავდნენ, რომელიც სასჯელს უგზავნიდა ღვთის ამ სათნომყოფელის უსამართლოდ განმკითხველთ.

გადასახლებაში წმიდა მღვდელმთავარი კიდევ უფრო ზრუნავდა თავის სულიერ შვილთა რწმენაში განმტკიცებისათვის. მრავალრიცხოვან წერილებში (ჩვენამდე მათგან მოღწეულია 245) აზიის, აფრიკის და ევროპის ეპისკოპოსებისადმი, განსაკუთრებით კი თავისი კონსტანტინეპოლელი მეგობრებისადმი, წმიდა იოანე ოქროპირი ანუგეშებდა შეუზღებულთ, მოძღვრავდა და შეეწეოდა თავის ერთგულ მიმდევართ, მაგრამ მისი მტრები არ ცხრებოდნენ. დედაქალაქიდან ბრძანება მოვიდა — მიყრუებულ პიტიუსში (აფხაზეთში) გადაეყვანათ წმიდანი. დაუძლურებული მღვდელმთავარი მცველთა თანხლებით სამი თვის განმავლობაში მიდიოდა ქარსა და წვიმაში გადასახლების ადგილისაკენ. ქალაქ კომანში მას სრულიად წაერთვა ხორციელი ძალები. წმიდა ვასილისკოს, წმიდა დიდმოწამე გიორგის ძმისწულის, საფლავთან მას ეს წმიდა მოწამე გამოეცხადა და ანუგეშა: „სასოს ნუ წარიკვეთ, ძმაო იოანე! ხეალიდან ჩვენ ერთად ვიქნებით!“ მსოფლიო მღვდელმთავარი უფლის წმიდა საიდუმლოთ ეზიარა და სიტყვებით: „ღიდება ღმერთს ყველაფრისათვის!“ — უფალს მიაბარა სული (+407 წლის 14 სექტემბერი). მღვდელმთავარ იოანეს წმიდა ნაწილები ზეიმით გადაასვენეს კონსტანტინოპოლში 438 წელს. მისი მოწაფე, ღირსი ისიდორე პელუსიოტელი წერდა: „როგორც ხედავ, სახლი დავითისა განმტკიცდება, ხოლო სახლი საულისა სუსტდება: მან დაამარცხა ცხოვრების ქარიშხალი და ზეციურ სიმშვიდეში გადასახლდა“.

(„თვენი“ III 475—488 გვ.)

ფრაგმენტები.

როდესაც თქვენს მცირერიცხოვნებას შეეყუარებ და ეხედავ, რომ ჩვენი სამწყსო ყოველი შეკრების შემდეგ სულ უფრო მცირდება, ერთდროულად ვწუხვარ და მიხარია. მიხარია თქვენს გამო, ვინც ახლა აქ ხართ; ვწუხვარ მათზედ, ვინც თქვენთან არ არის. ქების ღირსი ხართ, რადგან მიუხედავად სიმცირისა, არ გახდით გულგრილნი; ისინი კი განკიცხვას იმსახურებენ იმის გამო, რომ თქვენებრ მოშურნენი არ არიან. ამიტომაც გიწოდებთ ბედნიერებსა და ნეტარებს, რამეთუ მათმა უზარუნველობამ გავლენა არ მოახდინა თქვენზე; ხოლო მათ, რადგან თქვენი მოშურნეობით ვერ ისარგებლეს, შევრაცხავ ვითარცა საბრალოთ და ვსტირი. ნუთუ არ სმენიათ წინასწარმეტყველის სიტყვა: „ვირჩიე მე მივრდომა სახლსა ღმრთისა ჩემისასა, უფროს ვიდრეღა დამკვიდრებად ჩემდა საყოფელსა ცოდვილთასა (ფს. 83, 11). არ უთქვამს „ვირჩიე ცხოვრება სახლსა ღმრთისა ჩემისასა“, არც „დამკვიდრება“ და „ყოფნა“ იხმარა, არამედ ბრძანა: „ვირჩიე მე მივრდომა“. მოხარული ვარ, ვიყო უკანასკნელთა შორის, — გვაუწყებს წინასწარმეტყველი — იმაზედაც თანახმა ვარ, თუკი კარიბჭესთან მოხვედრის ღირსი გავხდები. უდიდეს წყალობად ჩავთვლი, თუ სულ უკანასკნელთა შორის დამაყენებენ „სახლსა ღმრთისა ჩემისასა“. ყველასათვის საერთოს — ღმერთს, სიყვარული ითავისებს, ამგვარია მისი თვისება. ამიტომაც ამბობს დავით მეფე: „სახლსა ღმრთისა ჩემისასა“. შეყვარებულს არა მარტო სატრფოს, არამედ მისი სახლის, კარიბჭისა და ქუჩის დანახვაც კი ენატრება. ხოლო თუ მის სამოსელს მოჰკრავს თვალს, ჰგონია, რომ მის წინაშე თავად იგი იმყოფება. ასევე წინასწარმეტყველნი — თუმცა ვერ ხედავდნენ ღმერთს, ტაძარს შეჰყურებდნენ და მასში ჰყავდათ იგი წარმოდგენილი. „ვირჩიე მე მივრდომა სახლსა ღმრთისა ჩემისასა, უფროს ვიდრეღა დამკვიდრებად ჩემდა საყოფელსა ცოდვილთასა“. ყოველი ადგილი, ყოველი სახლი — იქნება ის სასამართლო, სენაკი თუ ბინა — ღვთის სახლთან შედარებით არის „საყო-

ფელი ცოდვილთა“. თუმცა იქაც ისმის ლოცვა-ვედრება, მაგრამ ამასთანავე თან ახლავს განხეთქილება, დავა, ჩხუბი და თათბირები ამქვეყნიურ საქმეებზე. ღვთის სახლი კი ყოველივე ამისაგან დაცულია. ამიტომაც არის ეს ადგილები „საყოფელი ცოდვილთა“, ხოლო ტაძარი — სახლი ღვთისა. ისევე, როგორც ქარებისა და ღელვისაგან დაცული ნავსაყუდელი ჰპირდება უსაფრთხოებას მასში შემავალ გემებს, ასევე აღმოიყვანებს ეკლესია მასში შემსვლელთ ამქვეყნიურ საქმეთა მორვეიდან, სიმშვიდითა და ღვთის სიტყვით დააპურებს მათ და დაიცავს ყოველგვარი განსაცდელისაგან. ამ ადგილს სათნოებათა სკოლა და სიბრძნისმოყვარების სასწავლებელი ჰქვია. მოდი, არა მარტო ისეთი შეკრების უამს, როცა წმიდა წერილი და მამათა სწავლებანი იკითხება, არამედ ნებისმიერ დროს, მხოლოდ შემოდი წინაკარში და იმწუთშივე გადასდებ ყოველნაირ ამაო საზრუნავს. დადექი კარიბჭესთან და შენს სულში რაღაც სულიერი ნიავი დაბერავს. ეს სიჩუმე შიშს ჩაგაკონებს და სიბრძნისმოყვარებას გასწავლის, გონებას გაგინათებს, ღღევანდელობას მიგავიწყებს, მიწიდან ზეცაზე აგიყვანს.

თუკი ეკლესიაში მხოლოდ შემოსვლაც კი ასე სასარგებლოა, მაშ რაოდენ უფრო მეტი სარგებლობის მოტანა შეუძლია ღვთისმსახურებაზე დასწრებას, როდესაც წინასწარმეტყველნი ღაღადებენ, მოციქულნი გვახარებენ, როდესაც ქრისტე ჩვენს შორის დგას და მამისაგან ყოველივე ეს კურთხეულია, როდესაც სულიწმიდა გვაუწყებს თავის სიხარულს? ხოლო რამდენს კარგავენ ისინი, ვინც ყოველივე ამას არ ესწრება! მინდა ვიცოდე, სად არიან ახლა, რამ დააბრკოლა ისინი და განარიდა საღვთო ტრაპეზს? რაზედ საუბრობენ ახლა? თუმცა, მე კარგად ვიცი ეს: ან უგვან და სასაცილო თემებზე ბაასობენ, ან ამქვეყნიურ საზრუნავს მისცემიან. ერთიცა და მეორეც მიუტევებელია და მკაცრ სასჯელს იმსახურებს. ამაოდ მოლაყებებზე საუბარიც არ არის საჭირო, არამედ ისინიც კი ვერ გამართლდებიან, ვინც ჩვენთან თავს იმართლებენ და ამბობენ, რომ მათ ხელს უშლის აუცილებელი საჭიროება ოჯახურ საქმეთა მოგვარებისა, რადგან ეკლესიაში მოსვლა კვირაში ერთხელ ვეალებათ და მაშინაც არ სურთ მიწიერ საზრუნავს მოსწყდნენ. ეს სახარებიდანაც ნათლად ჩანს: საქორწინე

ლხინზე მიწვეულებმა უარი სთქვეს პატივზე ამგვარი მიზეზების გამო: ერთმა ხარები იყიდა, მეორემ — აგარაკი, მესამემ ცოლი შეირთო და ამის გამო ვერ მოიცალეს, მაგრამ ამისდა მიუხედავად ისინი დაისაჯნენ (ლუკა 14, 18—24). ყველა ეს საქმე აუცილებელია, მაგრამ მათით ვერ გავმართლებით, რადგან ისინი ამოინი არიან ღვთის წინაშე. უპირველესად ღმერთს მიაგე პატივი, ხოლო შემდეგ იზრუნე სხვა დანარჩენ საქმეებზე. რომელი მსახური იზრუნებს უწინ საკუთარ სახლზე, სანამ ბატონის ბრძანებას არ შეასრულებს? უცნაურია, რომ ასეთ მოწიწებასა და მორჩილებას ვიჩინო იმის მიმართ, ვინც მხოლოდ სახელით იწოდება ბატონად, ხოლო ჭეშმარიტ მეუფეს, რომელიც არა მარტო ჩვენი, არამედ ზეციურ ძალთა მბრძანებელიცაა, იმ პატივს არ მივაგებთ, როგორსაც ვიჩინო ჩვენისთანა მონების მიმართ? რომ შეგვეძლოს იმ ადამიანთა სინდისში ჩახედვა, ვინც ეკლესიაში არ დადის, დავინახავთ, თუ რამდენი ჭრილობა და ეკალია მათ სულში. როგორც დაუმუშავებელი მიწა უხეშდება და ბუჩქნარით იფარება, ასევე საღმრთო სწავლებას მოკლებულ სულშიც აღმოცენდება ეკლები და მანკიერი სურვილები. თუკი ჩვენ, ვინც ყოველდღიურად ვუსმენთ წინასწარმეტყველებსა და მოციქულებს, ძლივს ვახერხებთ შურის, გესლის ამოგლეჯას გულიდან და საღმრთო წერილიდან განუწყვეტლივ ვუგალობთ ჩვენს ვნებებს, — მძვინვარე მხეცებს, რათა როგორმე დავაცხროთ ისინი, მაშინ განა შესაძლებელია ხსნის რაიმე იმედი ჰქონდეთ მათ, ვინც არასოდეს არ უსმენს ღვთაებრივ სიბრძნეს და ამგვარი მკურნალობით არ სარგებლობს? ნეტავი შემეძლოს მეჩვენებინა მათი სულები თქვენთვის. დაინახავდით, თუ რარიგ ბინძური, შეგინებული, მოშლილი, დამცირებული და უიმედონი არიან ისინი! როგორც მტვერითა და ჭუჭყით იფარება კაცის სხეული, თუ იგი აბანოთი არ სარგებლობს, ასევე საშინელი ცოდვის სიბინძურეში ეხვევა სულიც, თუკი უგულვებელსყოფს სულიერ სწავლებას. სულიერი განბანა ხდება ეკლესიაში, სადაც სულიწმიდის სითბოთი არა მარტო განიწმინდება, არამედ ფერსაც კი იცვლის იგი. «უკეთუ იყვნენ ცოდვანი თქვენნი ვითარცა ღებილნი, ვითარცა თოვლი განვასპეტაკო» (ესაია 1, 18) — ბრძანებს უფალი...

...რაოდენ დიდი იქნებოდა ჩვენი სულიერი სიხარული, რამდენ სარგებელს მიიღებდა სული და იდიდებოდა ღმერთი, თუ ყოველი შეკრების ჟამს ეკლესიას ხალხით სავსეს ვიხილავდით! მეზღვაურები ყველაფერს აკეთებენ, რათა გადაცურონ ზღვა და მსწრაფლ მიაღწიონ ნავსადგურს, ჩვენ კი — განუწყვეტლივ ზღვას მიცემულნი — ცხოვრებისეულ ტალღათა მორევაში გამუდმებით ვიძირებით, ხოლო ეკლესიაში წელიწადში ერთი-ორჯერ თუ მივალთ. იქნებ თქვენ არ იცით, რომ ღმერთმა ისევე დააფუძნა ქალაქებში ეკლესიები, როგორც ზღვის ნაპირას — ნავსაყუდელნი, რათა ცხოვრების ქარიშხალს გამორიდებულნი მოვიდეთ აქ და იღუმალნი სიჩუმითა და სიმშვიდით დავტკბეთ. ჭეშმარიტად, აქ არც მძვინვარე ტალღების გვეშინია და არც ავაზაკთა თავდასხმისა, არც ქარიშხლისა და საზარელი. მხეცებისა, რამეთუ ეს ნავსაყუდელი ყოველივე ამისგან დაცულია. იგი მყუდრო სავანეა სულისა. ამაში თავადაც შეგიძლიათ დარწმუნდეთ: თუკი ამ დროს რომელიმე თქვენგანი საკუთარ სინდისში ჩაიხედავს, იგი უდიდეს სიმშვიდეს დაინახავს მასში. მას არც მრისხანება ეუფლება, არც ავხორცობა აღაგზნებს, არც შური იპყრობს, არც სიამაყით ზვაობს, არც ამპარტავნება ჭამს, რადგან ყველა ეს მხეცი მოთვინიერებულია; საღმრთო წერილი თითოეულის სულში აღწევს, როგორც ღვთაებრივი გამოცხადება და ამ უგუნურ ვნებებს აძინებს. რა საბრალონი არიან ისინი, ვისაც ამგვარი სიბრძნის შეძენის შესაძლებლობა აქვთ და ამისდა მიუხედავად იშვიათად მოდიან ეკლესიაში — რომელიც დედაა ყოველთა. სხვა რა საქმე შეგიძლია დამისახელო ამაზე აუცილებელი? რომელი შეკრებაა ამაზე მეტად სასარგებლო? რა გაბრკოლებს, რომ აქ მოხვიდე? ამ მშვენიერ საკრებულოში არყოფნას შენ ალბათ სიღარიბეს დააბრალებ, მაგრამ ეს უსაფუძვლო მიზეზია. კვირაში შვიდი დღეა; ეს შვიდი დღე ღმერთმა ჩვენთან გაიყო ისე, რომ თავისთვის ბევრი არ აიღო და არც ჩვენ მოგვცა ცოტა. თანაბრადაც კი არ გაყო, არამედ შენ ექვსი დღე დაგიტმო, თვითონ ერთი დაიტოვა. შენ კი ამ დღესაც არ გსურს თავი შეიკავო ამსოფლიური საზრუნავისაგან. მკრებელურად იქცევი, რადგან ეს დღე საღვთო წერილის მოსამშენად არის კურთხეული და დადგინებული, ხოლო შენ მას

ცხოვრებისეულ საქმეებისათვის იყენებ! აღარაფერს ვამბობ მთელი დღის შესახებ. ამ დღეს ისე მოიქეცი, როგორც მოიქეცა სახარებისეული ქვრივი მოწყალეების გაღების დროს: მან ორი გროში გაიღო და უდიდესი წყალობა მიიღო ღვთისაგან. ასევე შენც, ღმერთს ორი საათი მაინც დაუთმე და ღლეგრძელობას შეიძენ. ხოლო თუკი ესოდენ მცირე მსხვერპლის გაღებაც არ გინდა და მაინც მიწიერ საზრუნავს მისცემიხარ, მაშინ მრავალი წლის ნაშრომიც წყალში ჩაგეყრება. უფალი განრისხდება და გაგვიქარწყლებს მთელი ცხოვრების მანძილზე დაგროვებულ სიმდიდრეს, თუკი მას უგულებელს-ვყოფთ. „მიიხილეთ მრავალთა ზედა და იქმნეს მცირედნი და შეხმულ იქმნეს სახილმი და მიჰვებრე მათ, ამისთვის მათ იტყვის უფალი, ყოვლისა მპყრობელი: მათ წილ, რომელ სახლი ჩემი არს ოხერ, ხოლო თქვენ სდევთ თითოეული სახლისადმი თვისისა“ (ანგია. 1, 9) — ასე დაემუქრა ღმერთი იუდეველებს, როდესაც მათ ტაძარზე ზრუნვა შეწყვიტეს. თუ წელიწადში მხოლოდ ერთი-ორჯერ მოდიხართ ჩვენთან, მაშინ რის შესწავლას მოასწრებთ? რაზე გესაუბროთ — სულზე, სხეულზე, უკვდავებაზე, ცათა სასუფეველზე, საშინელ სამსჯავროზე, გენიაზე, ღვთის მრავალმოწყალებაზე, სინანულზე, ნათლობაზე, ცოდვათა შენდობაზე, შეწყალებაზე, ზეციერსა თუ მიწიერ არსებებზე, ადამიანურ ბუნებაზე, ანგელოსებზე, დემონთა სივერაგეზე, ეშმაკის მანქანებზე, ზნეობაზე, ღოგმატებზე, მართალ სარწმუნოებაზე თუ უწმინდურ მწვეალებლობებზე? ქრისტეანმა ყოველივე ეს და უფრო მეტიც უნდა იცოდეს და შეეძლოს ყველა ამ კითხვაზე პასუხის გაცემა. ხოლო თქვენ აქედან მცირედიც კი არ გეცოდინებათ, თუ წელიწადში ერთხელ გავლით ან ჩვეულებისამებრ დღესასწაულის გამო შეიკრიბებით და არა კეთილგონიერი განწყობით. თქვენ არა თუ უბრალო ხელოვნების შესწავლა გსურთ, არამედ ყველა მეცნიერებათა შორის უმნიშვნელოვანესისა — თუ როგორ შეიძლება სათნოვეყოთ ღმერთს და ზეციური მადლი მოვიპოვოთ. ნუთუ თქვენ გგონიათ, რომ ეს ასე იოლია და ამის მიღწევა მხოლოდ ერთი ან ორი მოსვლით შეიძლება? ეს ხომ უგუნურებაა! თავად მაცხოვარი ბრძანებს, რომ ეს მეცნიერება უდიდეს ყურადღებას მოითხოვს: „ისწავეთ ჩემგან, რამეთუ მშვიდ ვარ და მდა-

ბალ გულითა“ (მათე, 11, 29). ასევე გვაუწყებს წინასწარმეტყველი: „მოვედით შვილნო, ისმინეთ ჩემი, შიში უფლისაი გასწავო თქვენ“ (ფს. 33, 12). და კიდევ — „მოიცალეთ და გულისხმა-ყავთ, რამეთუ მე ვარ ღმერთი“ (ფს. 45, 10). როგორც ხედავთ, ამ სიბრძნის მოსაპოვებლად მრავალი მეცადინეობაა საჭირო.

თარგმნა გ ე ლ ა ა რ ო შ ვ ი ლ მ ა

გ ა ვ შ ვ თ ა ა ლ ზ რ დ ის შ ე ს ა ხ ე ბ ა

მამა ხშირად ყველაფერს აკეთებს და ყოველ ღონეს ხმარობს იმისათვის, რომ შვილს ჰყავდეს კარგი ცხენი, ჰქონდეს შესანიშნავი სახლი ან ძვირფასი ადგილ-მამული, მაგრამ სულაც არ ზრუნავს იმაზე, რომ ის ღვთის მოშიშად და კეთილმსახურად აღზარდოს. სწორედ ეს არღვევს ამქვეყნიურ წესრიგს, — ის, რომ ჩვენ დაუღვევარნი ვართ ჩვენი ბავშვების მიმართ, სიმდიდრეზე ვზრუნავთ, მათ სულელებს კი არ ვუფრთხილდებით, რაც უკიდურესად უგუნური საქციელია. როგორი უხვი და ძვირფასიც არ უნდა იყოს სიმდიდრე, თუ ადამიანს არ ძალუძს მისი სათნოდ გამოყენება, გაქრება და დაიღუპება მასთან ერთად, და მის მფლობელს უდიდეს ზიანს მიაყენებს, ხოლო თუ კაცი კეთილმსახური და სიბრძნისმოყვარე იქნება, მიუხედავად იმისა, რომ არაფერი შეაგროვა, ღმერთი მას ყოველივეს სათნოდ მოახმარს. ამრიგად, იმას კი არ უნდა მივსდით, რომ შვილები ოქრო-ვერცხლითა და სხვა მათი მსგავსი საგნებით გავამდიდროთ, არამედ უნდა ვეცადოთ, ისინი კეთილშობილებით, სიბრძნისმოყვარეებითა და სხვა სათნოებებით იყვნენ უმდიდრესნი, რათა ზედმეტს არაფერს საჭიროებდნენ და ამქვეყნიური საგნებითა და სურვილებით არ მოიხიბლონ. საჭიროა გულმოდგინედ ვადევნოთ თვალი მათ საქციელს, მათ მოქმედებასა და ნაცნობთა წრეს, — იმ რწმენით, რომ ამ საქმეში დაუღვევრობას ღმერთი არ გვაპატიებს. თუ

ჩვენ მოყვასზე ზრუნვისათვის ვაგებთ პასუხს, — „ნუ ვინ თავისასა ხოლო ეძიებნ, არამედ მოყუასისაცა თვითოეული“ (1 კორ. 10, 24), — უფრო მეტად არ ვაგებთ პასუხს ბავშვთა აღზრდაზე? განა შენი შვილი თავიდანვე შენთან არ დავამკვიდრე? — გკითხავს უფალი; არ დაგადგინე მის მოძღვრად, მზრუნველად და პატრონად? განა სრული ძალაუფლება არ მოგეცი მასზე: ჩვილ ასაკში გიბრძანე მისი ჩამოყალიბება და წარმართვა! რა გამართლება შეიძლება ექონდეს შენ, თუკი არ შეისმინე უფლის ბრძანება? რას იტყვი შენ? — იმას, რომ იგი აულავმაღვი და ჭიუტია? ეს დასაწყისში უნდა გავეთვალისწინებინა, როდესაც იგი ნორჩი იყო და აღსაზრდელად ადვილი. უნდა აველაგმა, გულმოდგინედ გესწავლებინა თუ რა ევალებოდა, გამოგესწორობინა და დაგესაჯა სულიერი მანკიერებების გამო. ყოველგვარი ეკალი ბავშვს ხელსაყრელ დროს უნდა ამოვადროთ, სათუთ ასაკში ის უფრო ადვილი მოსაცილებელი და მოსაშუშებელია, რათა უყურადღებოდ დატოვებული ვნებები არ გაძლიერდნენ და არ გახდნენ ძნელად გამოსასწორებელნი. ამიტომ ამბობს ბრძენი: „არიან თუ შენდა შვილნი, სწავლენ იგინი და მოუდრიკენ სიყრმითგან ქედნი მათი“ (ისუ ზირაჰი. 7, 25). უფალი არა მხოლოდ გიბრძანებს, არამედ თავდაცვ გესმარება ამ საქმეში. როგორ და რანაირად? — „ბოროტის მეტყველი მამისა ანუ დედისა თვისისაჲ სიკვდილით მოკუდეს“ (გამ. 21, 17). ხედავ, რა შიში ჩააგონა მან ბავშვებს? რა საფრთხეს აგარიდა? რა ძლიერი გახადა შენი ძალაუფლება? როგორი გამართლება შეიძლება მოვუძებნოთ თავს, თუკი თვით უფალი არ ზოგავს ბავშვების სიცოცხლეს, როცა ისინი ჩვენ შეურაცხვეყოფენ, ხოლო ჩვენ ისიც არ გვინდა, რომ ვუსაყვედუროთ მათ, როცა ისინი ღმერთს გმობენ. მე, ამბობს უფალი, შენი შეურაცხმყოფელის სიკვდილს არ ვერიდები, შენ კი ისიც არ გინდა, რომ სიტყვით ამხილო ჩემი მცნებების დამრღვევნი! როგორ შეიძლება ეს გეპატიოს? ხედავ, რომ იგი გმობს შემოქმედს, მაგრამ არ უწყრები, არც აშინებ და არც სჯი ამის გამო. თანაც იცი, რომ ღმერთმა იმეტომ კი არ აკრძალა ეს, რომ შეურაცხყოფა მას რაიმეს ვნებს, (რამეთუ შეუძლებელია ზიანის მიყენება ღვთისადმი), არამედ აკრძალა მისივე ხსნისათვის. ვინც უმადური და უვილის-

ხმოა უფლისა მიმართ, ის უფრო მეტად უღმობელი იქნება მშობლებისა და თვით საკუთარი თავის მიმართაც.

ასე რომ, ნუ ვიქნებით უზრუნველნი, რადგან ვიცით, რომ ღვთისადმი კეთილგანწყობილი ბავშვები ამ ცხოვრებაშიც მართლები და გამორჩეულნი იქნებიან. სათნოდ და მოკრძალებულად მცხოვრებ ადამიანს, თუნდაც ყველაზე ღარიბს, პატივს სცემენ და აღიარებენ, ხოლო უზნეო და გარყვნილი კაცი ეზიზღებათ, რა სიმდიდრის პატრონიც არ უნდა იყოს იგი. კარგი შვილი არა მარტო სხვებისაგან დაიმსახურებს პატივისცემას, არამედ შენთვისაც — მშობლისთვისაც კარგი და თავაზიანი იქნება, რადგან გარდა მშობლის მიმართ ბუნებრივი გრძნობისა, მას გაუჩინდება არანაკლები სიყვარული, რომლის წყაროც იქნება სიკეთე. ის არა მარტო თავაზიანი, არამედ უფრო სასარგებლოც გექმნება შენ, რამეთუ პატივს მოგაგებს, მოგემსახურება და თანადგომას გაგიწევს სიბერეში. ურწმუნო შვილები მშობლებსაც უდიერად ექცევიან, ხოლო მოკრძალებულნი ღვთის მიმართ — მოწიწებით ეპყრობიან მათ. იმისათვის, რათა განმართლდე ღვთისა და ხალხის წინაშე, სასიამოვნო გახადო შენი ცხოვრება და სასჯელს თავი აარიდო, ყოველნაირად იზრუნე შენს შვილზე. ამ საქმეში დაუდევარნი, სხვა ყველაფერში წესიერები და ზომიერებიც რომ იყვნენ, მაინც საშინლად დაისჯებიან. ამის დასამტკიცებლად მოგიყვებით ერთ უძველეს ამბავს: იუდეველებს ჰყავდათ ერთი მღვდელი, ყოვლითურთ წესიერი და ზომიერი კაცი, სახელად ელი. მას ჰყავდა ორი ვაჟი, რომლებიც მეტად უზნეონი იყვნენ. იგი არ აკავებდა და არ თოკავდა მათ, უფრო სწორედ, მართალია ამას ცდილობდა, მაგრამ არა სათანადო გულისხმიერებითა და ძალით. მაშინ, როცა მათი გამოსწორებისათვის გაწყებვლა, სახლიდან გაგდება და ყველა ზომის მიღება იყო საჭირო, ელი მხოლოდ ასე ურჩევდა და არიგებდა: „ნუ ეგრე შვილნო! არა კეთილ არს ამბავი ესე, რომელი მესმის თქვენთვის“ (I მეფ. 2,24). რას ამბობ შენ? მათ ღმერთი შეურაცხყვეს, ხოლო შენ შვილებს უწოდებ? ისინი შემოქმედს არ სცნობენ? შენ კი ნათესაობას აღიარებ მათთან? ამიტომაცაა ნათქვამი, რომ ელიმ შვილები სათანადოდ არ დაარწმუნა. დარწმუნება კი იმას ნიშნავს, თუ ჩვენ არა მხოლოდ ეუბრჩევთ,

არამედ გადამწყვეტ, ძლიერ კრილობასაც მივაყენებთ ავად-
მყოფის დაჩირქებულ ადგილს, რათა იგი სრულიად განიკურ-
ნოს. მხოლოდ დარჩება არაა საკმარისი, საჭიროა ბავშვს უდი-
დესი შიში ჩაუნერგო, რათა მისი ყმაწვილური უზრუნველობა
აილაგმოს. ასე რომ, რადგანაც ელი შვილებს მხოლოდ რჩევას
აძლევდა და სათანადოდ არ არწმუნებდა, ამიტომ უფალმა მტერს
მათზე ძლევა მისცა და ისინი ბრძოლის ველზე დაიხოცნენ. ელიმ
ამის გადატანა ვერ შეძლო და თვითონაც გარდაიცვალა, ხედავ,
რა სამართლიანად ვთქვი, რომ მამები შვილთა მკვლელნი
ხდებიან, რადგან უმკაცრეს ზომებს არ მიმართავენ დაუ-
ღვეარი ბავშვების მიმართ და ღვთისადმი კეთილმოშიშე-
ბას არ ითხოვენ მათგან. ასე გახდა ელი საკუთარი შვილების
მკვლელი. მართალია, მისი შვილები მტრებმა დახოცეს, მაგ-
რამ დანაშაული მას მიუძღვის, რადგან თავისი დაუღვერობით
მათ ღვთის შეწევნა მოაკლო და დაუცველნი და უსუსურნი
დატოვა ისინი. შვილებთან ერთად მან თავიც დაიღუპა.

ღღვეანდელი მშობელიც იგივე მდგომარეობაშია: არ სურს
უზნეოდ მცხოვრები შვილების მხილება, არც გაწკეპვლა და
სიტყვიერი დასჯა. მამები ხშირად ხედავენ შვილების მძიმე
დანაშაულს. ამის გამო მათ ასამართლებენ და სიკვდილით
სჯიან. როდესაც შენ არ მოძღვრავ და არ სჯი მათ, ისინი უზ-
ნეო და გარყვნილ ადამიანებს ეკედლებიან და მათ უპატიოს-
ნო საქმეში მონაწილეობას იღებენ, რისთვისაც საერთო კანო-
ნებით განიკითხებიან და ყველას თვალწინ ისჯებიან. როდე-
საც შვილის სიკვდილში დამნაშავე მამა ყველასათვის ფრთით
საჩვენებელი ხდება და საკრებულოში შესვლა ეკრძალება,
მხოლოდ მაშინ უჩნდება სირცხვილის გრძნობა. როგორ უნდა
გაუსწოროს მან თვალი შემხვედრთ შვილის ამგვარი უწესო
და უპატიოსნო საქციელის შემდეგ? ამიტომ გთხოვთ და გე-
მუდარებით, უდიდესი მზრუნველობით მოეპყროთ ბავშვებს
და გამუდმებით იღვაწით მათი სულის გადარჩენისათვის. შენ
ხარ მოძღვარი მთელი ოჯახისა და შენ ჩაგაბარა უფალმა ცო-
ლიცა და შვილებიც. პავლე მოციქული ცოლზე იტყვის: „ხო-
ლო უკეთუ სწავლის რაიმე უნდეს, სახლსა შინა თვისთა ქმარ-
თა პკითხვედ მათ“ (I კორ. 14, 35); ხოლო შვილებზე კი
ბრძანებს: „განზარდენით იგინი სწავლითა და მოძღვრებითა უფ-

ლისათა“ (ეფეს. 6, 4). წარმოიდგინე, რომ სახლში გაქვს ოქროს ქანდაკებები — შვილები. ყოველდღე გულდასმით შეამოწმე და მოაწესრიგე ისინი, ყოველნაირად შეამკე მათი სულები. მიბაძე ნეტარ იობს, რომელიც იმ შიშით, რომ მის შვილებს ფიქრშიდაც კი არ შეეცოდათ, ღმერთს მსხვერპლს სწირავდა და უდიდეს მზრუნველობას იჩენდა მათდამი; მიბაძე აბრაამს, რომელიც საღმრთო მცნებებისათვის იღვწოდა და არა სიმდიდრის შეძენისათვის, რათა შთამომავლობაში უფლის სიტყვის ზედმიწევნითი შესრულების სურვილი ჩაენერგა. უფალი ამ სათნოებაზე მიუთითებს, როდესაც ამბობს: „ვითარმსჯავრისა (დაბ. 18), ასევე დაჯითმაც, სიკვდილის ჟამს მოიხმო მედ ამცნოს ძეთა მისთა და სახლსა მისსა მის თანა და იცნან გზანი უფლისანი, რამეთუ ძეთა მისთა ქმნად სიმართლისა და თვისი ვაჟი და მემკვიდრეობის დატოვების მაგიერ ასე შეაგონებდა და მოუკლებლად ეუბნებოდა: თუ შენ, შვილო ჩემო, უფლის მცნებებით ცხოვრებას მოისურვებ, არანაირი განსაცდელი არ შეგემთხვევა, რადგან ყველა შენი საქმე ღვთისაგან კურთხეული იქნება და უდიდესი სიმშვიდით ინეტარებ, ხოლო თუ მოიკლებ ამ შეწევნას, შენი მეფობიდან და ძალაუფლებიდან არავითარი სარგებელი არ გექნება.

იგივე უნდა ვუთხრათ ჩვენს შვილებს სიცოცხლეშიც და სიკვდილის წინაც და ჩავაგონოთ, რომ უდიდესი სიმდიდრე, უხრწნელი მემკვიდრეობა და მარადიული საგანძური არის შიში ღვთისა. უნდა ვეცადოთ, რომ მათ დაეუტოვოთ არა წარმავალი ქონება, არამედ ღვთისმოსაობა მტკიცე და შეურყეველი. სასიფათო და სამარცხვინოა სიკვდილი მდიდარი კაცი-სა, თუ იგი ღვთისმომშიში არ იყო, ხოლო სადაც შიშია ღვთისა, იქ გლახაკი და არაფრის მქონეც ცხონდება. თუ შენ შვილს კარგად აღზრდი, ისიც ასევე კარგი მშობელი იქნება და მისი აღზრდილიც ამასვე გააგრძელებს. ამგვარად წარმოიქმნება ჯაჭვი მშვენიერი ცხოვრებისა და გაგრძელება მარად, რომელსაც სწორედ შენმა შთამომავლობაზე მზრუნველობამ ჩაუყარა საფუძველი. მამები რომ გულისხმიერებით ეკიდებოდნენ აღზრდის საქმეს, მაშინ საჭირო არ იქნებოდა კანონები, სასამართლოები, სასჯელები, არც წამებანი და სახალხოდ სიკვდილით დასჯანი, „მართალსა სჯულ არა უას“ — ამბობს მოცი-

ქული (I ტომ. 1), მაგრამ რადგანაც ჩვენ მათთვის სათანადოდ არ ვიღვწით, ამიტომაც უდიდეს განსაცდელში ვაგდებთ, ჯალათებს ვაძლევთ ხელში და ხშირად უფსკრულისავენ ვუბიძგებთ. „სათნო მყოფელი ძისა შეაკრავს წყალობასა მისსა“ (ისუ ზირაქი, 30, 7). რას ნიშნავს „სათნომყოფელი?“ — მოსიყვარულეს, მიმტყეველს, ზედმეტად მზრუნველს. ის კი საჭიროებს მკაცრ მოპყრობას, ყურადღებასა და მშობლისადმი შიშს. ამას იმისთვის არ ვამბობთ, რომ უღმობელნი ვიყოთ შვილების მიმართ, არამედ მისთვის, რომ მათ აბუჩად არ აგვიგდონ. თუკი ცოლს უნდა ეშინოდეს ქმრისა, შვილს — მითუმეტეს. არ მითხრა, რომ შეუძლებელია ყმაწვილური ვნებების დაოკება! თუ პავლე მოციქული ამ ღვაწლს ქვრივი ქალისაგან მოითხოვს, მამისაგან — უფრო მეტად. ეს რომ შეუძლებელი იყოს, იგი ამას არ გვიბრძანებდა. ყოველი მანკიერება ჩვენივე უზრუნველობის გამო იბადება, რადგან თავიდანვე, პირველი წლებიდანვე შვილებს ღვთისმოშიშებას არ ვაჩვენებთ. ვზრუნავთ და ვიღვწით, რომ მათ გარეგნული განათლება მივაღებინოთ, ვგზავნით სამხედრო სკოლაში სასწავლებლად, მაგრამ არ ვფიქრობთ იმაზე, რომ ისინი ანგელოზთა მეუფისათვის იყვნენ სასარგებლონი. სანახაობებზე წასვლის უფლებას ხშირად ვაძლევთ, ხოლო ეკლესიაში სიარულს არასოდეს არ ვაძლევთ. ბავშვი ტაძარში ერთი-ორჯერ კიდევ რომ მივიდეს, მაინც ამაო და უსარგებლოა მისი იქ ყოფნა, რადგან იგი ამით მხოლოდ ერთობა. არა, ასე არ უნდა იყოს, არამედ როგორც სასწავლებელში მოსიარულე ბავშვს ვთხოვთ ნასწავლის ანგარიშს, ასევე უნდა მოვიქცეთ, როცა მათ ეკლესიაში ვგზავნით. უმჯობესი იქნება, თუკი ჩვენ მივიყვანთ მათ ტაძარში, რადგან სხვებს კი არ უნდა ვანდოთ ისინი, თვითონვე უნდა მოვთხოვოთ დაიმახსოვრონ მოსმენილი და ნაქადაგები. ბავშვების გამოსწორება ამგვარად ადვილი და მოსახერხებელი იქნება, რადგან თუ ისინი ჩვენგან სახლშიც მოისმენენ კეთილგონიერ რჩევებს, მაშინ ეკლესიაში და სახლში მიღებული მოძღვრება ერთმანეთს შეავსებს და უმაღ გამოიღებს კეთილ ნაყოფს. ჩვენ კი ასე არ ვიქცევით, ამ მეტად საჭირო საქმეს ზერეულედ ვეკიდებით და საქმარისია, ვინმემ ამაზე მიგვითითოს, რომ გვეცინება. ამიტომაც

დაკნინდა ყველაფერი და ვისაც მშობლები არ სჯიან, მათ სა-
ერო კანონები ასამართლებენ.

მითხარი, ნუთუ შენ არ წითლდები და არ გრცხვენია, რო-
ცა შენს შვილს არიგებს და სჯის მოსამართლე და სხვისი გა-
მოსასწორებელი ხდება ის, ვინც თავიდანვე შენთან ცხოვრობ-
და? როგორ არ იმალები? როგორ ბედავ შენს თავს უწოდო
მამა, როცა არ აიძულე უკეთესად მოქცეულიყო და ამით
უღალატე კიდევ, რადგან მის გამოსასწორებლად ყოველგვარ
საშუალებას არ მიმართე და უყურადღებოდ დატოვე, როცა
იგი ყოველგვარი ბიწიერებით იხრწნებოდა? თუ დაინახე,
რომ ვილაც გამოქცეული მონა შენს შვილს ცემს, განა არ გან-
რისხდები ან არ აღშფოთდები და მძვინვარე მხეცივით არ და-
აცხრები მას? ხოლო იმის შემყურეს, თუ სატანა დღითი-დღე
როგორ სძლევს მას, როგორ ითრევენ ეშმაკები ცოდვებში,
შენ გძინავს, არ განიცდი და არ ცდილობ შვილი მძვინვარე
მხეცს გამოსტაცო. ასევე, თუ იგი ავი ზნითაა შეპყრობილი,
შენ წმიდანებთან მიიჩქარი, რომლებიც მიუვალ ადგილებში
ცხოვრობენ და ითხოვ შვილის განკურნებას. ხოლო თანდა-
თანობით რომ იპყრობს მას ცოდვა, ყოველგვარ ცოფზე უარე-
სი, ამაზე სულაც არ სწუხარ? ამასთანავე, სიშმაგე იმდენად
მავნებელი არ არის, რადგანაც ეშმაკს არ შეუძლია ჩაგაგდოს
გენიაში. თუ ჩვენ ფხიზლად ვიქნებით, მადლობით მივიღებთ
და გადავიტანთ ბოროტის ამგვარ თავდასხმას, მაშინ ეს გან-
საცდელი დიდების გვირგვინით შეგვამკობს. ხოლო ვინც
ცოდვებში ცხოვრობს, იგი აქაც შეგინებული იქნება და იმ-
ქვეყნადაც მარადიულ სატანჯველს დაიმკვიდრებს. მიუხე-
დავად იმისა, რომ ეს ყველაფერი ვიცით, უმნიშვნელო რა-
მეზე უფრო მეტად ვზრუნავთ, ვიდრე მთავარზე. ეშმაკეუ-
ლის შემყურენი ვწუხვართ, ხოლო ცოდვილს არ თანაუგ-
რძნობთ. უკეთესი იქნებოდა, თუ არა მარტო ვიტყვებთ, არა-
მედ შევაკავებთ: ავლაგმავთ, ვურჩევთ, დავარწმუნებთ, შევა-
შინებთ, ვუსაყვედურებთ, და განვდევნით ამ სენს მკურნალო-
ბის ყოველგვარი ხერხებით და მივბაძავთ იმ ქვრივს, რომელ-
ზედაც მოციქული პავლე ამბობს: „საქმეთა შინა კეთილთა

წამებულ, უკეთუ შეილნი განზარდნა“ (I ტიმ. 5, 10), რადგან იგი მხოლოდ მას კი არ მიმართავს ამ სიტყვებით, არამედ ყველას შეაგონებს: „განზარდენით იგინი სწავლითა და მოძღურებითა უფლისათა“ (ეფეს. 6, 4) — ეს არის უპირველესი და უმაღლესი სათნოება.

თარგმნა გელა აროშვილმა

მარხვისათვის

მარხვისას, შენ, ჰოი, კაცო, თუ განიმზადო საზრდელი დღისა, მისი ნაწილი გლახაკთ უწილადე და ისე იმარხულე, რომ გლახაკიც დააპურო და შეიწყალო იმავე საზრდელით, შენ რომ იკვებები. თუ გლახაკი არ შეიწყალო და ისე ილოცო და იმარხულო, შენაც გეწიოს ის სიტყვები, უფალმა რომ უთხრა ისაია წინასწარმეტყველს: „უკუეთუ ძაძაძ შეიმოსო და ნაცარი დაიფარო და განჰკაფო გუამი შენი მარხვისა სიმრავლითა და გლახაკი არ შეიწყალო, არა შეიწირავს ლოცვასა შენსა და მარხვასა“.

თუკი გაუწოდო პური მშვიერს, უცხო შენს ჰერქვეშ შეიყვანო და უკეთურება შენი ალაგმო შენგან, მაშინ შეგიწყნაროს უფალმან და შეიწიროს ლოცვა შენი. რას გარგებს მარხვა, თუკი გლახაკი და მშვიერი ნახე და არ შეიწყალებ? არ იცი განა, რა შეემთხვავთ იმ ქალწულთ, დღენიადგ მარხვითა და ზეწოლით რომ განიწმიდნეს გვამნი თვისნი? არ შეიწყალებს რადგან გლახაკნი, მათთვისაც ჩაირაზა კარი წყალობისა. ამიტომ თქვა ღმერთმა: მარხვისას გლახაკს უწილადე საზრდელი შენი, რათა მან ჰამოს, დანაყრდეს და დაგლოცოს შენ. და თუ შეიწყალო გლახაკი, შენიც შეისმინოს უფალმან და შეგიწყალოს.

მონოზონთ კი, რომელთაც დაუტევეს უფლისათვის სოფელი, არარა აქვთ ნივთიერი, გამხმარია გვამი მათი მარხვით და ლოცვა მათი წმიდა არს და უბიწო.

სხვებს, თუ კი ისინი მარხულობენ და თავისი საზრდელით აპურებენ მშიერთ და გლახაკთ, ამ წყალობისათვის შეიწირავს ღმერთი მარხვასა მათსა.

არა გსმენია, რა სიკეთეები ელით მმარხველთა? და არ შეგეფერის უძღებება საზრდელში, უზომობა სასმელში, რათა არ დაეკარგოთ თავი, არ აგვერიოს ფეხი, არ ჩაგვიწითლდეს თვალნი, არ დაბორძიკდეს ენა და სვლა ჩვენი რომ არ ემსგავსოს ბარბაცს მთვრალისას; და ისე არ წაგვეერთვას გონება, რომ უჯეროდ გვაგეტყველოს, ქცევითა და ხედვით ემმაკეულოს მიგვაგმსგავსოს... და სამარცხვინო და სასაცილო რომ არ იყოს ყველა ჩვენი საქციელი იმ დროს.

ფრიად პატიოსან არს, საყვარელნო, მარხვა, რადგან იგი ანგელოსს მიამსგავსებს კაცს. მარხვამ განწმიდა და უბიწოება მიანიჭა წმინდანთ. მარხვამ აიყვანა კეთილისმოქმედნი ზეცად. მაგრამ მხოლოდ საქმელისა და სასმელის მარხვას როდი ვამბობ, არამედ დაიცევ თავი შენი ყოვლისაგან ბორტისა, სიხარბისა და მტერობისა, ძვირისხსენებისა და სიძულვილისაგან და შფოთისა და ტყუილისაგან. მარტო მარხვა როდი გვემცნა უფლისაგან, არამედ განშორებაც ყოვლისაგან ბორტისა, რომელიც სძულს მას და ქმნა სათნოებათა კეთილთა, რომლებიც უყვარს მას. ლოცვა და მარხვა, მღვიძარება და განკითხვა გლახაკთა, სიწმიდე და ძვირუხსენებლობა, სიყვარული და სიმდაბლე, მოთმინება და სულგრძელობა, ამათი შეძენა გვიბრძანა უფალმა; და ოდეს დაუნერგავთ ამ საქმეებს ჩვენში, მაშინ შეიწიროს ლოცვა და მარხვა ჩვენი და ღირს გვყოს თავის სასუფეველსა, რათა ვადიდებდეთ მის წმიდა სახელს, რომლისა არს დიდება უკუნიითი უკუნისამდე, ამენ.

წმიდა მამის ეს სიტყვა მხოლოდ ძველ ქართულ ენაზე შემოგვენახა, რომელიც ჩვენ გადმოვიღეთ თანამედროვე ქართულ ენაზე. ძველი ტექსტი გადმოცემულია ხახე — ძაძათა სწავლანი X და XI ს.-თა ხელნაწერების მიხედვით. გამოსცა ილია აბულაძემ. თბ. 1955, გვ. 25 --26

თარგმნა მ ა ნ ა ნ ა ჩ ი ქ ვ ა ნ ა ი ა მ .

ავსტატი მახათაის მოთხინება და მარტვილოვა

ხვასროს მეფობის და არეანდ გუშნასპის მარზაპანობის მე-10 წელს, სპარსეთიდან, არშაკეთის ქვეყნიდან, ქართლს ერთი კაცი მოვიდა, მოგვის ძე, წარმართი იყო იგი. სახელად მას გვირობანდაკი ერქვა, ყრმა იყო, ასე 30 წლის.

მოვიდა იგი ქალაქ მცხეთას და მექლანის ხელობის შესწავლა დაიწყო. და ხედავდა იგი რჯულს ქრისტიანეთას, ქრისტეს მსახურებასა და ძალას წმიდა ჯვრისას, შეიყვარა მან რჯული ქრისტესი და იწამა ქრისტე და როცა განასრულა მეხამლეობის შესწავლა, ცოლად ქრისტეანე ითხოვა. თავადაც ქრისტეანედ მოიქცა, ნათელი იღო. ნათლისცემისას მას ევსტათი უწოდეს და აღასრულებდა წმ. ევსტათი მცნებებს ქრისტეანულს და ცხოვრობდა ქრისტეანულად.

იმ დროს მცხეთას მყოფი სპარსი მეჯადაგენი და მეხამლენი შეიკრიბნენ, ტოზიკი ჰქონდათ და ნეტარ ევსტათის კაცი გაუგზავნეს, შეუთვალეს:

— მოდი, შემოუერთდით სიხარულს ჩვენსას.

ხოლო ნეტარმა ევსტათიმ გაიცინა და უთხრა:

— ბნელია თქვენი ტოზიკი და თქვენაც, მეტოზიკენი ბნელები ხართ. მე კი ქრისტეს ბეჭედი მივიღე, ქრისტეს ტოზიკსა ვტოზიკობ და რადგან ქრისტეს ბეჭდით აღვიბეჭდე, მაგ ბნელსაც განვეშორე.

გაღიხადეს თავისი ტოზიკი იმ მეჯადაგეებმა და მეხამლეებმა და უსტამთან, მცხეთის ციხისთავთან მივიდნენ, უთხრეს:

— აქა ერთი ჩვენი რჯულის კაცია და ჩვენს ტოზიკზე არ მოდის, ჩვენს რჯულს გმობს, ჩვენაცა გვაგინებსა და ამბობს, რომ ქრისტეანე ვარო. ხოდა, ახლა, რადგანაც ხელმწიფე ხარ ამ ქალაქისა, დაიბარე და დანარჩენი შენ გამოჰკითხე. და უსტამმა, მცხეთის ციხისთავმა, მოისმინა ევსტათიზე ნამბობი და ერთი მხედართაგანი გაგზავნა ნეტარი ევსტათის მოსაყვანად. მისულმა მხედარმა მრისხანედ უთხრა:

— გიხმობსო შენ ციხისთავი.

ხოლო წმიდა ევსტათი ოდნავ შეყოვნდა, გარიდება განიზრა-

ხა. მერე დაფიქრდა და თქვა: ისინი ხომ ჩემიანები, ჩემი მოყვასები არიან, მათი თუ შემეშინდა, დიდთა მთავართა წინაშე როგორღა წარვდგებიო? — პირიქით, დაუფარავად უნდა ვალიარო ქრისტე, მსმენია რადგან წმიდა სახარებაში ნათქვამი: „რომელმან აღმიაროს მე წინაშე კაცთა, აღვიარო მეცა იგი წინაშე მამისა ზეცათათისა, და რომელმან უვარ-მყოს მე წინაშე კაცთა, უვარ-ვყო იგი მეცა წინაშე მამისა ჩემისა, რომელ არს ცათა შინა“. გამოისახა ჯვარი გულსა და შუბლზე და თქვა: „უფალი ჩემ თანა“.

და მივიდა ნეტარი ევსტათი და წარსდგა მცხეთელი ციხის-თავის წინაშე. და მხედარმა უთხრა უსტამს:

— ესააო ჩვენი რჯულის მაგინებელი.

შეხედა უსტამმა ნეტარსა ევსტათის და უთხრა:

— შენ გეუბნები, კაცო, მითხარი, რომელი ქვეყნიდან, ან რომელი ქალაქიდან ხარ ან რა რჯულს მისდევ?

ხოლო წმიდა ევსტათიმ უპასუხა მას:

— სპარსეთის ქვეყნიდან, არშაკეთის ხევში, ქალაქსა გან-ძაკს ვცხოვრობდი. მამა მოგვი მყავდა და მოგვობას მასწავ-ლიდა. არ ვინდომე მოგვობა, ქალაქ განძაკში ქრისტეანე მღვდლები და ეპისკოპოსები მრავლად არიან და მათკენ გამი-წია გულმა, რადგან ქრისტეანობა აღემატება ყველა რჯულსა და უღმრთოებას. ახლა ქრისტე მწამს და მას ვემსახურები.

ხოლო უსტამ ციხისთავმა უთხრა მას:

— არავინ მოგცემს ქრისტეს მსახურების უფლებას და თუ მშვიდობიანად არ ჩამოცილებიხარ მაგ სიგიჟეს, დიდი ტან-ჯვა მოგელისო.

ხოლო წმიდა ევსტათიმ უპასუხა:

— ქრისტეს სიყვარულის გამო, არა მარტო წამებისათ-ვის, არამედ სიკვდილისთვისაც არ მებრალებათ თავი.

და როცა ნახა უსტამმა გულწრფელი სიმტკიცე ევსტათი-სი, იფიქრა და თქვა: ამ კაცის დასჯის არანაირი უფლება არა მაქვს: არც ძელზე ვაკვრის, არც დატუსაღების, თბილისს ქალაქს, არვანდ გუშნასპს, ქართლის მარზაპანს გაეუგზავნი და რასაც იმსახურებს, მან მიაგოს, რადგან ქართლში ყოველი კა-ცის სიკვდილი და სიცოცხლე მის ხელთაა.

და უბრძანა უსტამ მცხეთის ციხისთავმა ორ მხედარს ნე-

ტარი ევსტათის თბილისს წაყვანა. შეიკრიბნენ ისევ ის მეჭა-
დაგენნი და მეხამლენნი და მივიდნენ უსტამთან და უთხრეს:

— აქა სხვებიც გახლავან ჩვენი რჯულისანი და ისინიც
ქრისტეანები არიან. ბრძანე მათი მოყვანებაც და ისინიც
თბილისს მიავლინეო.

ხოლო უსტამმა ჰკითხა მათ:

— ვინ არიან?

მათ დაუსახელეს იმათი სახელები და უთხრეს:

— ერთსა გუშნაკ ჰქვია და ერთსა ბახლიად, ერთსა ბურ-
ზო და ერთსა პანაგუშნასპ, ერთსა პეროზაკ, ერთსა ზარმილ,
ერთსა სტეფანე.

და ბრძანა უსტამმა მათი მოყვანა, ოღონდ გასამართლება
მათი არ იტვირთა, არამედ რვავეს შეეკრა და ქართლის მარ-
ზპანისათვის, გუშნასპისათვის მათი წარგზავნა ბრძანა და თა-
ნაც შეუთვალა: „ეს კაცები ჩვენი რჯულისანი არიან და ქრის-
ტეს რჯულს კი მისდევენ. მე ისინი შევიპყარ და შენ, უფალს,
გამოგიგზავნე, რადგან განკითხვა მათი შენს ხელთააო“.

და წარავლინეს რვანივე მარზპანის წინაშე. ხოლო მან
ჰკითხა მათ:

— ვინა ხართ, ან რა რჯულს მისდევთ?

და მათ, თითოეულმა ცალ-ცალკე, დაუსახელეს თავისი ქვეყა-
ნა, დაბა და ყველამ ერთიდაიგივე უთხრა:

— სანამ სამშობლოში ვცხოვრობდით, სპარსთა რჯულს
ვცნობდით, მაგრამ როცა ქართლს მოვაწიეთ და ქრისტეს
რჯულს გავეცანით, ქრისტეანები გავხდით და ახლა ქრისტეა-
ნები ვართ, რადგან რჯული ქრისტესი ფრიად კეთილია, მშვე-
ნიერი, წმიდა და სურნელოვანი და სხვა რჯული, რჯულსა ქრის-
ტეანულს ვერ გაუტოლდება.

სიტყვისმომგებელი მსაჯულისა მათ შორის ნეტარი ევსტა-
თი იყო და როცა უსტამმა ასეთი სიტყვები გაიგონა, მათგან,
გაწყრა და უბრძანა თავის მსახურთ, მათი გარეთ გაყვანა და
პირ-სახეში ცემა და ბრძანა:

— გადაპარსეთ მაგათ თავზე თმა, მოპარსეთ წვერი, გა-
ნუხვრიტეთ ცხვირნი, ქედზე ჯაჭვი, ფეხებზე ბორკილები შე-
ასხით და საპყრობილეში დაამწყვდიეთ და თუ რომელიმე მათ-
განში აღიაროს რჯული მშობლიური, გაათავისუფლეთ და

მომგვარეთ, რათა დიდი საბოძვართი განვამდიდრო იგი. ხოლო რომელმაც არ აღიაროს რჯული მამა-პაპათა, იგი საპყრობილეში მოკვდეს!

და როცა გაიგონეს სიტყვები მარზაპანისა — რომელმან აღიაროს იგი ვაცოცხლო და რომელმან არ აღიაროს მამისეული რჯული, იგი საპყრობილეში ჩავკლავ, იმ წამს, გულს ბახდიადისას და პანაგუშნასპისას ეშმაკი დაეუფლა, მათ უარყევს ქრისტე და უღმრთოება აღიარეს და ამით ჯვრის უარყოფელთა ნაწილი მიიღეს. ხოლო ნეტარი ევსტათი და გუშნაკ, ბურზო და პეროზაკ და ზარმილი და სტეფანე, გულმოდგინედ და მტკიცედ იდგნენ ქრისტეს სარწმუნოებაზე. და როცა უთხრეს მარზაპანს, რომ ორმა მათგანმა აღიარაო რჯული მამა-პაპათა, გაიხარა მარზაპანმა და მათი მოყვანა ბრძანა. თავის გვერდით, ინახით დაისახა ისინი და ქონება და თავისი კეთილგანწყობა აღუთქვა. ხოლო ევსტათისა და მისი მოყვასეებისათვის კი, წვერისა და თმის გადაპარსვა, ქედზე ჯაჭვისა და ბორკილების შესხმა და საპყრობილეში ჩასმა ბრძანა. მსახურთ აღასრულეს ბრძანება მარზაპანისა, მოპარსეს თმა და წვერი და ჯაჭვდამბორკილებშესხმულნი საპყრობილეში ჩასვეს. ხოლო ბახდიადსა და პანაგუნასპს ნუგეში სცა და გაათავისუფლა. მაგრამ შეპირებული ქონებიდან და სიკეთიდან, გოდორი რაა, ისიც კი არ მიუცია მათთვის.

და წმიდა ევსტათი და მოყვასნი მისნი ექვსი თვე იყვნენ დატუსაღებულნი. ექვსი თვის მერე სპარსთა მეფის შიკრიკი ეახლა არვანდ გუშნასპს და როცა გაემზადა მარზაპანი სპარსთა მეფესთან წასასვლელად, შეიკრიბნენ ქართლის მთავარნი და მის გასაცილებლად მივიდნენ.

და როცა ამხედრდა მარზაპანი, მიეახლნენ მთავარნი ქართლისანი და სამოელ კათალიკოსი და გრიგოლ ქართლისმამასახლისი და არშუშა ქართლის პიტიახში და სხვანი მეფეწულნი (მთავართა ძენი) და მარზაპანს უთხრეს:

— ვევედრებით შენს უფლებამოსილებას და სათხოვარსა ერთსა გთხოვთ.

ხოლო მან უთხრა მათ:

— თქვით, რა გნებავთ, ისეთი რა უნდა იყოს, რომ თქვენთვის არ გავაკეთოო. და მათ, ყველამ ერთხმად უთხრეს:

— გვედრებით შენ, უფალო, იმ მცხეთელ კაცთა განთავისუფლებას, რომელნიც ქრისტიანობის გამო იმყოფებიანო საპყრობილეში.

უპასუხა მათ მარზაპანმა:

— ის კაცები სიკვდილს იმსახურებენ, მაგრამ თქვენი შუამდგომლობის გამო გავათავისუფლებო მათ.

ხოლო მათ მადლობა მოუხადეს მას და ბრძანა მან (მარზაპანმა) განთავისუფლება მათი და გამოიყვანეს ისინი საპყრობილედან და დაბრუნდნენ ისინი საკუთარი სახლში და ისინი, ნეტარნიც ქრისტიანენი, ღმრთივსასურველი ცხოვრებით ცხოვრობდნენ. დროთა განმავლობაში ზოგიერთი მათგანი გარდაიცვალა, ზოგი კი ცოცხალია.

ხოლო იმათაგან, რომელთაც უარყვეს ქრისტე, ერთი, ბახდიადი ეშმაკისაგან იგვემებოდა და საშინელი სიკვდილით მოკვდა, ხოლო უბადრუკმა პანაგუშნასპმა სილატაკეში გალია თავისი ღღენი, პური არ ეძიებოდა საქმელად და სამოსელი არ გააჩნდა სხეულის დასათარავად და სანამ ცოცხალი იყო, კირითა და მწუხარებით იყო აღსავსე ღღენი მისი.

და სამი წლის შემდეგ ვეჟან ბუზმირი შემოვიდა ქართლში მარზაპანად და წავიდნენ მცხეთიდან სპარსელები, ნეტარი ევსტათის შემსამენელნი, თბილისს, წარსდგნენ ვეჟან ბუზმირ მარზაპანის წინაშე და უთხრეს:

— კაცნი არიან მცხეთას ჩვენი რჯულისანი და განგვიდგნენ ჩვენ და ქრისტიანობას იჩემებენ. ახლა მისი გასამართლება თქვენს ხელთააო.

და უბრძანა ვეჟან ბუზმირმა ორ მხედარს წასვლა და წმიდა ევსტათისა და სტეფანეს მოყვანა და როცა მოვიდნენ მხედარნი, უთხრეს ევსტათისა და სტეფანეს:

— გიბარებთო თქვენ მარზაპანი.

და მათ უპასუხეს:

— მოვალთ თქვენთან, არც რა გვაწუხებსა და არც რისი გვეშინიაო.

და როცა თბილისს წასასვლელად გაემზადდნენ ევსტათი და სტეფანე, უთხრა ევსტათიმ სიდედრს, ცოლს, შვილებს და მონა-მხევალთ თავისას.

— გემშვიდობებით, რადვან აქ აღარ მოვბრუნდები

და ქრისტეს მე არ ვუარყოფ და ისინი მე ცოცხალს აღარ გამიშვებენ. თბილისში მოვეკვდები, საპყრობილეში, თავს მომკვეთენ და გვამი ჩემი, ღმრთისავე ნებით, აქ დაბრუნდება ისევ.

ეს თქვა და გამოემშვიდობა ყველას და მათ, ყველამ, ჯვარი გამოსახეს და ის და სტეფანე, მხედრების თანხლებით გაემართნენ თბილისს.

ხოლო სახლეულნი და ნათესავნი მათნი მისტიროდნენ მათ უკან და როცა გადაიარეს ველი, მცხეთის ჯვარს მიაღწიეს, აღაპყრო ხელები წმიდა ევსტათიმ და თქვა:

— უფალო ღმერთო, იესო ქრისტე, თუკი შენი სახელისათვის სიკვდილს მადირსებ, ნუ ინებებ ჩემი ხორცის დაგდებას ძალღთა და ცის ფრინველთა შესაქმელად, არამედ ბრძანე ჩემი გვამის აქ დაბრუნება, სადაც ნათელი მიმიღია.

და როცა თქვა ეს სიტყვები ნეტარმა ევსტათიმ, თაყვანი სცა ჯვარს, გამოემშვიდობა კრებულს და თბილისს გაემართნენ.

და როს დაბრუნდნენ მხედრები, წარუდგინეს მარზაპანს, ვეჟან ბუზმირს, ევსტათი და სტეფანე და უთხრეს:

— ესენი არიან ახლადმოქცეულნი მცხეთელი ქრისტიანნი.

ხოლო ვეჟან ბუზმირმა ჰკითხა ევსტათისა და სტეფანეს:

— ვინ ხართ? ან რა რჯულისანი ხართ?

და წამოდგნენ ასურნი მთავარნი სტეფანეს დასაცავად და უთხრეს:

— ამ კაცს ვიცნობთ, ჩვენი დაბელია, მამა და დედა და ძმანი და დანი მაგისნი ქრისტიანენი არიან და ეგაც ქრისტიანე არისო.

სტეფანე მათი ნათქვამის გამო გაათავისუფლეს, ხოლო წმიდასა ევსტათის ჰკითხა:

— შენ ვინ ხარ, ან რომელი რჯულის მიხედვით ცხოვრობ? წმიდა ევსტათიმ უპასუხა:

— რაკი მეკითხები, გულისყურით მისმინე და ყველაფერს გეტყვიო. სპარსეთის ქვეყანაში არშაკეთის ხევს, ქალაქ განძაკს ეცხოვრობდი და მამა მოგვი იყო, და ძმანი ჩემნი მოგ-

ვები იყვნენ და მეც მოგვობას მასწავლიდა მამაჩემი. არ მიყვარდა მამა-პაპეული რჩული და ჩემთვის, გონებაში ვამბობდი: არ მომწონს ეს რჩული. წავალ ებრაელებისა და ქრისტიანების რჩულს გავეცნობი, რომელიც უკეთესი იქნება, იმას შევიყვარებ-მეთქი და დღისით, მამა რომ მოგვობას მასწავლიდა, მწუხრს, ქრისტიანულ ეკლესიაში რომ ზარს ჩამორეკავდნენ, ეკლესიად მივდიოდი, ლოცვას ვისმენდი და ქრისტიანეთა მსახურებას ვსედავდი, რომელსაც ისინი ღმერთს აღუვლენდნენ. ურიათა სინაგოგაშიაც შევდიოდი, მათ მსახურებასაც ვსედავდი. მაგრამ ქრისტიანთა გალობის ხმა, თითქოს ანგელოზის ხმააო, ისე მესმოდა, საამოა და მეტად სურნელოვანი ლოცვა მათი. ხოლო ღამით, სინაგოგაშიაც შევდიოდი და არ მესმოდა, რას ამბობდნენ.

მერე, ერთხელაც რომ შევედი, მომიახლოვდა სამოელ არქედიაკვანი, რჩულისმეცნიერი და მითხრა:

— რას დადიხარ ეკლესიაში ასე გულმოდგინედ?

მე ვუპასუხე მას:

— ბატონო, იცი შენ, მე ვინც ვარ, მაგრამ არ მიყვარს რჩული მამა-პაპათა და მინდა ვინმემ გამარკვიოს ებრაელთა და ქრისტიანეთა რჩულში და რომელი რჩულიც უწმინდესი იქნება, იმას შევიყვარებ.

ამაზე სამოელ არქედიაკვანმა მიპასუხა:

— თუ ნამდვილად გსურს მაგის ცოდნა, ორივე რჩულს გაგაცნობ კეთილად. არჩევანი კი შენზე როდია, ისე იქნება, როგორაც უფალი ინებებს.

ხოლო მე ძლიერ შევევედრე:

— რომელი რჩულიც ღმრთის წინაშე სათნოდ გამომაჩენს, იმ რჩულის მიღება მსურს, მასზე მიახმე.

ხოლო სამოელ არქედიაკვანმა დაიწყო თხრობა და მითხრა:

— გულისყურით მისმინე, ძმაო! ადრე, შენაც იცი, სპარსთა რჩული იყო. მაგრამ ღმერთს სძაგდა რჩული სპარსთა და არა სთნდა. მერე ებრაელნი გამოირჩია ღმერთმა და სათნო-ყო და მისცა მათ რჩული და მცნება დასაცავად. მერე კი ქრისტიანენი უფრო სათნო ეყვნენ ღმერთს, ვიდრე ებრაელნი.

მერე კვლავ შევევედრე სამოელ არქედიაკვანსა და ვუთხარი:

— ბატონო, ნუ დამზარდები, კარგად გამაგებინე-მეთქი და

ვკითხე: ბატონო, ვინ იყვნენ ებრაელები, საიდან მოვიდნენ და რატომ შეიყვარა ღმერთმა ისინი?

მაშინ მითხრა სამოელ არქედიაკვანმა:

— ჰურიათა ამბავი, ძმაო, მოსაყოლად დიდია, მაგრამ თუ მომაპყრობ სასმენელს და გულისყურით მომისმენ, მეც დაუზარებლად გიამბობ და გაგაგებინებ ყოველივეს.

ერთი უბიწო და ღმრთისმოყვარე კაცი იყო სპარსთა ქვეყანაში, ბაბილონელთა ქალაქში, სახელად მას აბრაჰამი ერქვა. იხილა მან ღამით ჩვენებაში ღმერთი, რომელმაც უთხრა აბრაჰამს:

— გამოდი მაგ ქვეყნიდან და წაგიყვან სხვა ქვეყანაში და გაგამრავლებ და აღგალორძინებ შენ მეტად. და დაგადგენ მამად ნათესავთა და ერთა ურიცხვთა.

ხოლო აბრაჰამმა იწამა უფლის ეს სიტყვები და მიუგო აბრაჰამმა:

— აღსრულდეს, უფალო, ჩემზე ეგ შენი სიტყვები.

და გამოვიდა აბრაჰამი ქალდეელთა ქვეყნიდან და მოვიდა შუამდინარეთის ქვეყანას, ქალაქ ქანანს, ევფრატის მახლობლად. მოვიდა ანგელოზის წინამძღოლობით და დამკვიდრდა ქანანს. შემდეგ იქიდანაც, ქანანის ქვეყნიდანაც გამოიყვანი იგი უფალმა და დაამკვიდრა ქებრონს.

და ჰყავდა აბრაჰამს ძე, ისააკი და ისააკს — იაკობი და იაკობს ჰყავდა თორმეტი ძე. და უბრძანა აბრაჰამს ღმერთმა და უთხრა:

— წინადასცვითე ისააკს და იაკობს და ყოველთა ძეთა იაკობისათა. ეს წესი იყოს აწი რჯული თქვენი საუკუნო.

და აბრაჰამი ისე მოიქცა, როგორც ღმერთმა უბრძანა. და აღორძინდა და განძლიერდა ნათესავი აბრაჰამისა ძლიერზე ძლიერ. ესენი არიან ებრაელები. და უყვარდა ღმერთს ებრაელები ძალუმად, როგორაც უყვარს მამას შვილი საყვარელი და უწოდა ებრაელებს სახელად — ისრაელ, ხოლო ეს ასე ითარგმნება: ერი ღმრთისა. და გაიზარდა და გავრცელდა ისრაელი, ერი ღმრთისა.

და გარდამოხდა ღმერთი ზეცით ქვეყანას ამას, მოვიდა სინას მთის თხემს. და ფიცარზე დაწერა ღმერთმა თავისი ხელით რჯული და მცნება ესე:

პირველი მცნება ასეთია: შეიყვარეთ უფალი ღმერთი თქვენი, ყოვლითა გულითა თქვენითა, და ყოვლითა სულითა თქვენითა და ყოვლითა გონებითა თქვენითა. და შემდეგ ესენი: კაცი არ მოკლა, არ მოიპარო, არ იმრუშო, ნუ შეგშურდება ცოლი შენი მოყვასისა, ცილი არავის დასწამო, ცილის წამებაზე არ დაიფიცო, ბევრი არ ილაპარაკო. პატივი ეცი მამას და დედას შენსას.

შეიყვარე მოყვასი შენი, როგორაც შენი საკუთარი თავი.

შაბათი დაიცავით, დღესასწაულნი, შესაწირავნი და უქმეები აღასრულოთ. ეს რჩული და მცნებები დაწერა ღმერთმა და მისცა მონას თვისას, მოსეს. და მოსემ აიღო ეს ფიცრები და წაუკითხა მთელს ისრაელს. და გაიხარა მთელმა ისრაელმა და თქვა:

-- ყოველივე, რაც გვიბრძანა უფალმა, გავაკეთოთ და აღვასრულოთ, ოღონდ უფალი იყოს ჩვენთან.

და ამდღა უფალი ზეცას და როცა ისმინეს ეს რჩული ებრაელთ, შესწირავდნენ შესაწირავს და საკმეველს და მსხვერპლს და იცავდნენ შაბათს და ღმერთი მათთან იყო.

და იმ ხანებში უცხო თესლტომნი შეიკრიბნენ და დაესხნენ ისრაელთ. ხოლო ღმერთმა ერთი კაცის ხელით განდევნა ისინი, მათი ნაწილი მოკლეს, ნაწილი ტყვედ წამოიყვანეს და ნაწილიც გააქციეს და არ ჰქონდათ მათ შიში მტრისა, რადგან ღმერთი მათთან იყო.

რამოდენიმე ხნის შემდეგ, მთელმა ისრაელმა მეფე ითხოვა ღმრთისაგან, რომ იგი მტერს შებრძოლებოდა და მოუვლინა ღმერთმა მათ მეფე და განაგო უფალმა წესი გვირგვინოსნობისა (მეფობისა). და რამდენიმე დღეში მოკლეს ის მეფე ბრძოლაში, რადგან აღიმალა მან თავის თავი და ეიმედებოდა მხოლოდ ძალა საკუთარი და არა ღმერთი.

შემდეგ დავითი მეფობდა. ხოლო დავით იყო საყვარელი ღმრთისა და ღმერთი უყვარდა დავითს და დავითმა შესწირა მსხვერპლი ყოვლადდასაწველი და შესაწირავი, დღესასწაულნი და შაბათნი კეთილად დაიცვა.

შემდეგ ძე მისი, სოლომონი მეფობდა და განდგა თვითონაც და ერიც ღმრთისაგან და ემსახურებოდნენ ყრუ კერპებს, ხელით ქმნულს და ქვებს უსულოთ, ხეებს, მალალ ტყეებსა და

ხეთა მწვერვალებს და უარყვეს ღმერთი. ხოლო წინასწარმეტყველნი კი უქადაგებდნენ და ეუბნებოდნენ მათ:

— უჯეროა ცოცხალი ღმერთის უარყოფა ქვათა და თუნდაც სხვა რამეთა მსახურება. ახლა, აგერ მოაველენს ღმერთი თქვენზე შიმშილსა და სიკვდილს და მახვილსა და ტყვეობას და ასე წარიხოცებით თქვენ.

და მათ არ ისურვეს იმ წინასწარმეტყველთა ხმის მოსმენა, რადგან გაგიჟდა ერი ისრაელისა და ბრძანეს იმ წინასწარმეტყველთა მოკვლა, ნაწილისა მახვილით, ნაწილისა ცეცხლით, ზოგი გადახერხეს, ზოგი მხეცებს მიუგდეს, ნაწილი მღვიმეებში ჩაყარეს, ნაწილი ქვებით ჩაქოლეს. ხოლო ღმერთი ტკიბილია და კაცთმოყვარე, არ უნდოდა მას წარწყმედა ისრაელისა და უნდოდა მოქცევა მისი. მოაველინა ღმერთმან ძე თვისი ქრისტე სოფლად და შევიდა წმიდა ქალწულის მუცელში და ხორცი შეისხნა და განკაცდა წმიდა მარიამისაგან და გამოვიდა წმიდა საშოდან და ღმრთაებრივობა ხორციით დაიფარა. რადგან ღმრთაებრივობა ხორციით რომ არ დაეფარა, ვერ მიეახლებოდა მას კაცი, რადგანაც მზე ქმნილია ღმრთისა და თვალი ვერავის შეუვლია მზისთვის და დისკოს მისას ვერავინ გაუხსწორა თვალი. ღმრთაებასაც ვერ მიეახლება კაცი. იმიტომ შეისხა ხორცი, რომ ისრაელი მოექცია ცოცხალი ღმრთისაქენ.

და განკაცებულმა ნათელი იღო მდ. იორდანეს იოანეს ხელით და როცა ამოდიოდა წყლიდან, აჰა, გაიხსნა ცა და სული წმიდა, მტრედის სახით, სპეტაკი გადმოვიდა ციდან და დაადგა მას თავზე და მოისმა ხმა ზეცით:

— „ესე არს ძეი ჩემი საყვარელი, რომელი მე სათნო ვიყავ, მაგისი ისმინეთ და ცხოვნდეთ“.

და როცა შევიდა იერუსალიმს, ნიშნებად სასწაული საქმეების მოხდენა და კურნება დაიწყო. 38 წლის სნეული იყო სარეცელზე, ნახა და სიტყვით უბრძანა.

— „აღდეგ და აღიდე ცხედარი შენი და ვიდოდე! — და მაშინვე აღსდგა და გაიარა ვანკურნებულმა და მადლობდა ღმერთს.

მერე დაბადებიდანვე ბრმა იპოვა და ნერწყვით მოზეილი

თიხა წაუსვა თვალებზე და უბრძანა მისი წყლით მობანა და აეხილა იმ ბრძანს თვალები.

და მკვდარნი აღადგინა და საპყარნი გაატარა და კეთროვანნი განკურნა და მრავალნი კურნებანი ჰყო ქრისტემ მათ შორის, რათა ეწამებინათ ებრაელებს და დაბრუნებოდნენ ცოცხალ ღმერთს. და სურდა, რომ არ გაყოდნენ ისინი ღმერთს!

ხოლო ებრაელები კიდევ უფრო გაგიჟდნენ და დიდი შურით აღივსნენ ქრისტეს მიმართ და უნდოდათ მოკვლა მისი. ხოლო ქრისტე განეშორა მათ და იქ, გარე სოფლებსა და დაბებში დადიოდა. და რომელთაც იწამეს ქრისტესი, უკან დაედევნენ მას. და მივიდა ერი ერთ დაბას. მოჰყავდათ ქერივისა იამავარი¹ მკვდარი და როცა ნახა ეს, ბრძანა და დადგეს ცხედარი. შეახო ხელი ყრმას და მისცა დედამისს იამავარი იგი გაცოცხლებული.

მერე ერთ დაბაში მიდიოდა. უკან უამრავი ხალხი მისდევდა ერის სიმრავლის გამო ვერ შეძლეს კეთროვანის მიყვანა და სახლს ახადეს სახურავი და სნეული ისე ჩაუშვეს მასთან და აღადგინა იგი და ის თავის ფეხით წავიდა სახლში.

და მრავალი ერი მისდევდა მას და აღიღებდა ღმერთს. ხოლო იმ ხალხთაგან თორმეტი გამოირჩია და მოწათფები უწოდა მათ და რასაც უბრძანებდა მათ, იმას იქმოდნენ.

და ერთ დაბაში შევიდა, იქ ქორწილი იყო და შევიდა იესუ იმ საქორწინე დარბაზში და ღვინო არ იყო იქ, რადგან გათავებულიყო და ცარიელი იდგა კოკები. მაშინ იესომ ბრძანა წყლის მოტანა და ავსება კოკებისა წყლით. და აკურთხა ის წყალი ქრისტემ და აქცია ღვინოდ, იმაზე უფრო საამოდ, ვიდრე იგი თავიდან იყო. და გაუკვირდათ მრავალთ, იწამეს მისი და დაედევნენ მას.

და მერე დედაკაცი, 12 წელი სისხლმდინარე რომ იყო, ფარულად, უკნიდან მიუახლოვდა იესოს და შეახო ხელი ბოლოს მისი სამოსელისას და განიკურნა.

მერე ერთ ადგილას მივიდა ქრისტე და იქ ველი იყო მშვე-

¹ იამავარი — ღედისერთა.

წიერი, გადახედა ერს, რომელიც უკან დაედევნა მას და უთხრა თავის მოწაფეებს:

— ეს ხალხი რა ხანია უკმელია და მეცოდება. წადით ქალაქში და იყიდეთ პური და მიეცით ამ ხალხს... — და ქრისტემ უთხრა მოწაფეებს: — თქვენს შორის აქ პური არავის აქვს?

უთხრა ერთმა მოწაფეთაგანმა.

— მე მაქვს ხუთი პური და ორი თევზი.

უთხრა ქრისტემ:

— მომართვი ისინი აქ!

და როცა მოიტანეს ის ხუთი პური და ორი თევზი, ბრძანა ქრისტემ იმ ხალხის მიწაზე დასხმა და მალლა, ცისაკენ ასწია ის ხუთი პური და ორი თევზი, აკურთხა, გატეხა და მისცა თავის მოწაფეებს, მოწაფეები ურიგებდნენ ხალხს. და ქამა ერმა და დანაყრდა და თორმეტი გოდორი გაავსეს ნასუფრალით. ხოლო ის ხალხი, რომელიც ქამდა, 5000 იყო, ბავშვებისა და ქალების გარდა.

მაშინ უბრძანა ქრისტემ ხალხს ხმელეთზე სიარული, ხოლო ქრისტე და მოწაფენი მისნი, წყალზე, როგორაც მშრალზე ისე მიაბიჯებდნენ და ფეხი მათ არ დასველებიათ და როცა ხმელეთზე გავიდა, შემოხვდა ერთი კაცი, ეშმაკთა გუნდი იყო მასში, ხმამალა შეჰლაღადა:

— ქრისტე, შემეწიე, რამეთუ საშინლად ვიტანჯები!

ხოლო ქრისტემ შეერისხა გუნდს ეშმაკისას და ეშმაკი განვიდა მისგან და აღიდებდა (ის კაცი) ღმერთს. ხოლო ის ეშმაკი აყვირდა და თქვა:

— ქრისტე, ვიცი ვინცა ხარ, წმიდაი ეგე ღმრთისაი, ჩემდა ხოლო მოხვედ წარწყმედად.

ხოლო ქრისტემ უბრძანა მიწას და გაიხსნა (მიწა) და დაინთქა ის ეშმაკი, ჩავარდა ჯოჯოხეთის ქვესკნელში.

და მერე მივიდა იგი ერთ დაბას, რომელსაც სახელად ბეთანია ერქვა, სადაც ოთხი დღით ადრე მის მისვლამდე ლაზარე მომკვდარიყო და სამარეში იღო იგი. და მივიდა ქრისტე სამარის კართან და თქვა:

— ლაზარე, გამოდი!

ქრისტეს იმ ერთი დაძახებით გამოვიდა იგი სამარიდან; მხიარული და გაკვირვებული იყო ხალხი და უფრო გაძლიერდა ის ერი დიდი სარწმუნოებით.

ამის მერე მიაღწია ქრისტემ იერუსალიმს და შევიდა ღმრთის ტაძარში და იხილა იქ დაგებული სავაჭრო დახლები, სადაც ვაჭრობდნენ და აიღო ქრისტემ შოლტი და გამოყარა ის კაცები და მოუფანტა სავაჭრო, დამხო ის დახლები და თქვა:

წერია ასე: „სახლსა მამისა ჩემისასა სახლ სალოცველ ეწოდოს, ხოლო თქვენ, ვითარცა ქვაბ ავაზაეთა გიყოფიეს“.

და შემდეგ უთხრა:

— „დავარღვიო ტაძარი ესე და მესამე დღეს ავაშენო ეგე“.

და როცა გაიგონეს ურიებმა, მეტად განრისხდნენ და თქვეს:

— ჩვენ ვიცნობთ მამას მისას იოსებს და დედას მარიამს და ძმანიცა ჰყავს. მაგრამ თავი ღმრთის ძედ მოაქვს და ღმრთის ტაძარსაც მამეულად იჩემებს, — და მერე თქვეს: — სოლომონმა ორმოც წელიწადში აღაშენა და ეს კი ამბობს დარღვევას და სამ დღეში აშენებას!

ამ სიტყვებზე განაწყენდნენ ებრაელები, შური ჩაიდეს გულში და განიზრახეს მისი შეპყრობა და მოკვლა.

და შეიპყრეს ქრისტე და წარადგინეს მღვდელმთავართა და მოხუცებულთა წინაშე და ჰკითხეს ქრისტეს, მოხუცებულთა და მღვდელმთავართა:

— შენ როგორ მოგაქვს თავი ღმრთის ძედ, ღმრთის ძე ხარ შენა? ხოლო ქრისტემ უპასუხა:

— მაგას თქვენ თვითონ ამბობთ.

და მერე ჰკითხეს ქრისტეს:

— სოლომონმა ორმოც წელიწადში აღაშენა ეს ტაძარი და შენ ამბობ — დავარღვევ მაგას და სამ დღეში ავაშენებო!

მაშინ მიუგო ქრისტემ:

— მე ძალმიძს დარღვევა და სამ დღეში აშენება.

მაშინ კი განრისხდნენ ებრაელები, აიყოლეს და აღაშფოთეს მთელი ებრაელი ხალხი და თქვეს:

— მოსაკლავია ეგ კაცი!

და მივარდნენ ქრისტეს და დაიწყეს მისი ცემა და კიცხვა. და ზოგი მუშტით სცემდა თავში და ზოგიც ლერწამს ურტყამდა მის წმიდა თავს, ზოგიც სახეში სცემდა და ზოგიც აფურთხებდა ნათელს მის პირს და აღმართეს ბოძი და ჯვარს აცვეს

ქრისტე და მას, ჯვარცმულს, ნაღველში განზავებული ძმარი ასვეს.

მაშინ აღაპყრო თვალები ზეცად, თავისი მამის მიმართ და თქვა:

— მამაო ჩემო, აღვასრულე ყველაფერი, მაგრამ ისრაელმა არ შეისმინა ჩემი და ასეთ ტანჯვას მწია მე.

და ჩაჰკიდა თავი და სული განუტევა და უმალ გადმოხსნეს იგი ჯვრიდან, მაგრამ იყო კაცი ერთი შეძლებული და ქრისტეს ყოფილი მოწაფე. მან აიღო გვაში ქრისტესი და ახალ სამარეში დადო და დიდი ლოდი მიაგორა სამარის კარს. და მესამე დღეს, ადრე ცისკარზე, ანგელოზი გარდამოხდა ზეცით და გადააგორა ის ქვა საფლავიდან და აღდგა ქრისტე და გამოვიდა სამარიდან და ეჩვენა ორ მოწაფესა და მარიამ მაგდალინელის და სხვა დედებს და უთხრა მათ ქრისტემ:

— უთხარით მოწაფეებს ჩემსას: წადით გალილეას, თაბორის მთას და იქ მიხილავთ მე.

და თორმეტი მოწაფე დიდი სიხარულით წავიდა თაბორის მთაზე და იხილეს ქრისტე და თავყვანი სცეს და ეამბორენ მის წმიდა ფეხებს, ხოლო ქრისტემ უთხრა თავის მოწაფეებს:

— ამიერიდან აღარ იწოდებით თქვენ მოწაფეებად, არამედ მოციქულები გერქმევათ. და მე ახლა მივალ ჩემსა და თქვენს მამასთან, ჩემს ღმერთთანა და თქვენს ღმერთთან.

და მოციქულთ შთაბერა სული მაცოცხლებელი და უთხრა მათ:

— მიიღეთ თქვენ სული მაცოცხლებელი და იარეთ ქალაქებსა და სოფლებში და დაბებში, ქვეყნის კიდიდან, ქვეყნის კიდემდე და ნიშნებად მოახდინეთ სასწაულები, განკურნეთ და მოაქციეთ წარმართნი და ნათელი ეცით მათ სახელითა მამისა და ძისა და სულისა წმიდისა და ასწავლეთ მათ ყველაფერი, რაც გამცნეთ მე თქვენ. და მე, აგერ, თქვენთან ვარ, „ყოველთა დღეთა ცხოვრებისა თქვენისათა და ვიდრე აღსასრულამდე სოფლისა“. უსასყიდლოდ გაქვთ მიღებული და უსასყიდლოდ მიეცით მათ.

და ამადღა ქრისტე ზეცად ანგელოზებთან ერთად და თორმეტი მოციქული წავიდა და შემოიარეს სოფლები, ქალაქები და დაბები და ახარებდნენ და ქადაგებდნენ ქრისტეს აღდგომილს მკვდრეთით და ნიშნებად ახდენდნენ სასწაუ-

ლებს და მკურნალობდნენ. და მოიქცა ერი და ნათელს იღებდა სახელითა მამისა და ძისა და სულისა წმიდისა.

და ასე განმრავლდა და მოეფინა და გავრცელდა ქრისტიანობა ქვეყნის კილიდან, ვიდრე ქვეყნის კიდემდე. და ეპისკოპოსნი და მღვდელნი განაწესეს და ეკლესიები ააშენეს და შიგაღმართეს ჯვარი და მთელმა ქვეყანამ იწამა ქრისტე და გაივსო მთელი ქვეყანა ქრისტიანებით და მთელს ქვეყანაზე იქადაგა ქრისტიე.

ხოლო ებრაელებს, რასაც წინასწარმეტყველები ეუბნებოდნენ, ის დაემართათ: ვინ მახვილით, ვინაც შიმშილით, ვინ სიკვდილით დაიღუპა და დაიღია და სხვები ტყვეობაში დაიფანტნენ, რადგან არ დაიმარხეს რჯული ცოცხალი ღმრთისა.

და ახლა ქრისტიანებს უწოდა ღმერთმა ისრაელი,, რადგან ისრაელი ნიშნავს ღმრთის ერს, ქრისტეს მონას, რომლისა არს ღიღება, უკუნითი უკუნისამდე, ამენ.

მაშინ, როდესაც ყოველივე გულისხმაყვავ და შევიცანი სამოელ არქედიაკვნისგან, დასაბამიდან ვიდრე აქამომდე, ჩავწვი ყოველივეს ებრაელთა და ქრისტიანეთა რჯულში და ვიწამე ღმერთი დაუსაბამო და ძე მისი, იესო ქრისტე და სული წმიდა და ამიტომ ნათელი ვიღე მე ქრისტესგან, და ვიდრე ჩემი სულის ამოსვლამდე, ვერავინ განმაშოროს მას. და ჩემს მამა-პაპეულ რჯულზე ლაპარაკი მზარავსა და მრცხვენია კიდეც. რადგან ღმერთმა შექმნა ცა და ქვეყანა, მზე და მთვარე და ვარსკვლავნი, ზღვა და ხმელი, მდინარენი და სათავენი წყალთა, მთანი და ბორცენი, ველნი და ტყენი, შეშა და ცეცხლი, ოთხფეხი პირუტყვი და მხეცნი, ქვეწარმავალნი და ფრინველნი ცისა. და მერე ადამიანი შექმნა ღმერთმა და ყოველივე ამის მეუფედ დაადგინა, ყველაფერი ეს, მას აღამიანს დაუმორჩილა. და ჩვენ ყოველივე ამის შემოქმედი ღმერთი მივატოვოთ და იმავ ღმრთის დაბადებულს ვუწოდოთ ღმერთი?

ეგ არ იქნება! მზე და მთვარე და ვარსკვლავები არაა ღმერთი, არამედ ღმერთმა მზეს დღის განათება უბრძანა, და მთვარესა და ვარსკვლავებს ღამის განათება დაავალა. და ღმერთები ისინი არ არიან. ღმერთმა რომ ღრუბელს უბრძანოს, ცას გადაეკვრება და ბრწყინვალებას მზისას და მთვარისას და-

აბნელებს. ამიტომ არაა მზე და მთვარე ღმერთი. მერე კიდევ ცეცხლიც არაა ღმერთი. იმიტომ რომ, ცეცხლს კაცი ანთებს და კაცივე აქრობს, რადგან კაცი უფალია ცეცხლისა. ამიტომ არაა ცეცხლი ღმერთი, ხოლო ვინმეს რომ უყურადღებოდ დარჩეს ცეცხლი, რასაც მიაღგება, გინდა ტყე იყოს, გინდა ველი, გინდა სახლი, კაციც რომ დაუხვდეს წინ — დაწვავს. მაგრამ ცეცხლს წყალი თუ მოხვდა, ესოდენი ძალა ცეცხლისა დაიშრიტება და გაქრება ცეცხლი. ამიტომაც არ არის (ცეცხლი) ღმერთი, ჩვენ კი ღმერთად გვიწამებია.

და ღმერთმა ჩვენ ცეცხლი მოსახმარებლად მოგვცა, სიცივეში გასათბობად და ყველანაირი სანოვავის მოსამზადებლად. როცა მოგვესურვება ავანთებთ და როცა მოგვესურვება — ჩავაქრობთ. ასე რომ, ცეცხლი ღმერთი არ არის.

მერე, ღმრთის შექმნილნი კაცნი პირუტყვ საქონელს მივმსგავსენით. და ისე, როგორაც, მამრმა და მდედრმა პირუტყვმა არ იცის არც მშობელი, არც შობილი მათგან და ასე აღრეულად გადადის მათი მამრობა და მდედრობა, ჩვენაც კაცნი, მეტყველნი, იმ პირუტყვებს მივმსგავსენით და არ ვიცით, არც მშობელი ჩვენი, არც შობილი და აღვრიეთ და დავარღვიეთ ის ჩვენი მცნება. და ახლა კი, ღმრთის მადლით, რადგან არსებობს ნათლისღება და რჯული ქრისტიანობისა, იციან ეს კაცთა; იქიდან მოყოლებული დაირღვა და გაქრა ის უწესო საქმე.

ხოლო მე ამას გვედრები, უფალო, იესო ქრისტე, რომ ჩემი გვამი მცხეთას დაიმარხოს, სადაც ნათელი მივიღე სამოელ კათალიკოსის ხელით და ღირსი გავხდი ქრისტიანთა რჯული-სა. ამიერითგან ველარავინ განმამშოროს სიყვარულს შენსას და სარწმუნოებას და სურვილსა, როგორაც წერილ არს „არცა ტანჯვათა, არცა გვემათა, არც სიყმილმან საპყრობილესა შინა, არცა მახვილმან, არცა სიკვდილმან ამათ ხორცთა ჩემთამან შემიძლოს მე განყენებად შენდა, უფალო იესო ქრისტე“.

მაშინ უთხრა ბუზმირ მარზაპანმა:

— შვილო ჩემო, ევსტათი, გაიგონე ჩემი და ქრისტიანობისათვის ნუ შეიმოკლებ შენი ცხოვრების ღღეებს და ნუ დააქვრივებ ცოლს შენსას, ნუ დააობლებ შვილებს შენსას და ნუ დააკლდები ამ ცხოვრებაში მოყვასთა შენთა.

უპასუხა მას წმიდა ევსტათიმ.

— უწინარეს შენსა, სხვა მთავრებმა ძლიერ მტანჯეს და მგვემეს და არ დავემორჩილე მათ. ახლა შენი ვირწმუნო? ეგ არ იქნება!

მაშინ, როცა ნახა ბუზმირ მარზაპანმა მტკიცე და უძვრელი გული და გონება ნეტარი ევსტათისი და ვერც დაშინებით და ტანჯვით და ვერც კეთილი ლაპარაკით, რომ ვერ არწმუნა მამა-პაპეული რჯულისაკენ მოქცევა, უბრძანა მსახურთ:

— საპყრობილეში წაიყვანეთ ეგ და ღამით ჩუმად მოჰკვეთეთ თავი, რომ ქრისტიანებმა არ გაიგონ და პატივი არ დასდონ მის გვამს და წაიღეთ მისი ხორცი, ქალაქ-გარეთ მოაბნოეთ მხეცთა და ფრინველთა საჯიჯგნად.

და მსახურთ წაიყვანეს ნეტარი ევსტათი საპყრობილეში, რათა აღასრულონ, მისი, მარზაპანის ბრძანება.

უთხრა მათ. წმ. ევსტათიმ:

— ცოტა მაცაღეთ, მე, ძმებო, რადგან თქვენს ხელთა ვარ, რომ ვილოცო ჩემი ღმერთის წინაშე.

და ისინი ცოტათი შეყოვნდნენ, აცალეს და თქვეს:

— ეგრე ვქნათ.

და მოიდრიკა მუხლი და აღაპყრო თვალები ზეცად და თქვა:

— უფალო ღმერთო, ყოვლისა მპყრობელო, რომელსაც ყოველთა კაცთა ცხოვრება გსურს, რომელთაც სარწმუნოებით ეიმედებათ სახელი შენი წმიდა, რომელმაც ისმინე ლოცვა იმ პირველ მოწამეთა, რომელნიც მოწყდნენ მახვილის პირით, ზოგი ტბაში სიცივით, ზოგიც ზღვაში ჩაყრით რომ მოწყდა, ზოგიც ცეცხლით და ზოგიც მხეცთა, რომ შეჭამეს შენი სახელისათვის და მიიღეს ის, შენგანვე აღთქმული, რომელიც არ უხილავს თვალს და არ სმენია ყურს და არ უგრძენია გულს კაცისას. და რაც განუმზადე იმ წმიდა მოწამეებს, მეც, უფალო, მომანიჭე ნაწილი მათი, ნაწილი მათი სამკვიდრებელისა, მათი სიხარულისა, მათი უსასრულო შევებისა, ნაწილი ყველაზე უვარგის მოწამეთა სამარადისო ჟამისა, როგორაც იტყვის პავლე მოციქული:

— მე ვარო უცუდესი მოციქულთა შორის. შენ იცი, უფალო ჩემო, იესო ქრისტე, რომ არავინ ვარჩიე, არც მამა, არც

დედა, არც ძმა, არც ნათესავი და მარტო შენ, უფალი შეგიყვარე და შენი სახელისათვის, აგერ, თავს მომკვეთენ დღეს და იმას ვლოცულობ და გევედრები და ვითხოვ შენგან, სახიერი-საგან, რომ არ დატოვო ჩემი გვამი აქ, თილისში, არამედ მცხეთას რომ დაიმარხოს იგი, სადაც შენ გამომიჩნდი და როგორაც მათ პირველთა, ჩემს ძვლებსაც მიეცეს მადლი და კურნება.

და ესმა ხმა, რომელიც ეუბნებოდა ევსტათის და უთხრა:

— არაფრით იქნება ნაკლები მადლი შენი კურნებისა იმ პირველ მოწამეებთან შედარებით, რომელთაც მე მიწამეს. და შენი გვამის გამო, ნუ იზრუნებ, ისე იქნება, როგორაც შენ გსურს, რომ იყოს.

და გამხიარულდა ნეტარი ევსტათი და მადლობდა ღმერთს. და წმიდა ევსტათის თავიდანვე უთქვამს ნეტარი სტეფანესათვის, რომ, როცა ჩემ სიკვდილს შეიტყობ, უმალ წაიღეთ ჩემი გვამი მცხეთას და დამმარხეთ, სადაც ნათელი მივიღეო. და როცა დაასრულა ლოცვა და ვედრება და თხოვნა უფლის მიმართ, უთხრა მარზაპანის მსახურთ:

— ახლა აღასრულეთ ჩემზედ ის განწესებული ბრძანება.

მაგრამ მათ არ უნდოდათ მისი მოკვლა, ხოლო ერთმა მათგანმა თქვა:

— ჩვენ მოგვკლავენ, ეგ რომ ცოცხალი დარჩეს.

მაშინ მიჰყვეს ხელი და მახვილი ჩასცეს მის ქედს პატიოსანს და მოჰკვეთეს თავი და შეავედრა სული თავისი ქრისტეს მეუფესა.

და გვამი მისი წაიღეს გარეთ და იქ დააგდეს, მაგრამ გაიგეს ეს ვიღაც ქრისტიანებმა და წაიღეს იგი მცხეთას, რადგან სტეფანეს ჰქონია ეს ნათქვამი იქ მყოფი ქრისტიანებისათვის და როცა მიაღწიეს მცხეთას, უთხრეს სტეფანეს და სტეფანემ სამოელ კათალიკოსს აუწყა. და მან ძლიერ განიხარა და დაკრძალა დიდი დიდებითა და პატივით წმიდა ეკლესიაში მცხეთას. და აქამომდე გრძელდება კურნება სნეულთა მადლითა უფლისა ჩვენისა იესო ქრისტესითა, რომლისა არ სუფევა და ძლიერება, პატივი და სიმტკიცე და დიდება მოუკლებელი სული წმიდითურთ აწ და მარადის და უკუნითი უკუნისამდე, ამენ.

I იყო სოფელი ერთი დიდი, დიდი მდინარის თავზე, რომელსაც ჰქვია მტკვარი, ხევში, რომელსაც კოლა ჰქვია და იყო უმეტესი ნაწილი ამ სოფლის ერიდან წარმართი — კერპთმსახური და უმცირესი ერი ქრისტიანე-ღმრთისმსახური. შეიკრიბებოდნენ ქრისტიანე და წარმართი ბავშვები ერთად სასიმღეროდ, როგორაც სჩვევიათ ბავშვებს და ყოველ დღე მღეროდნენ. მწუხრის ჟამს ჩამორეკავდა ხუცესი და მიდიოდნენ ქრისტიანე ბავშვები ეკლესიაში სალოცავად, როგორაც წესია ქრისტიანებისა და წარმართი ბავშვებიც რიცხვით ცხრანი, დაედევნებოდნენ უკან, რადგან გონებას ჰკარგავდნენ იმ ქრისტიან ბავშვებზე და უყვარდათ მათ რჯული ქრისტიანული და როცა მოვიდოდნენ ეკლესიის კართან, არ უშვებდნენ მათ ქრისტიანები ეკლესიაში, არამედ ასე პასუხობდნენ მათ, რომ „თქვენ შვილნი ხართ კერპთმსახურთა არ იქნება შემოსვლა თქვენი ღმრთის სახლში“ და ისინი მიდიოდნენ გულდაწყვეტილნი და დარცხვენნი. მრავალგზის ასე მოქცევიან იმ ბავშვებს.

და ამის მერე მივიდნენ ის წარმართი ბავშვები ქრისტიანთა ეკლესიაში და ძალით მოისურვეს მათთან შესვლა. მაშინ უთხრეს: „თუკი გნებავთ შემოსვლა ჩვენთან ეკლესიაში, იწამეთ უფალი ჩვენი იესო ქრისტე და ნათელი იღეთ მისი სახელით და ეზიარებით საიდუმლოთა მისთა და შემოგვეერთდით ქრისტიანებს“. და მათ მყისვე მიიღეს სწავლა ქრისტიანული და შეპირდნენ ამის გაკეთებას.

და ისინი სწრაფად მივიდნენ მღვდელთან, რომელიც იყო ხუცესი იმ სოფლისა, კაცი წმიდა, ღირსი და პატიოსანი და აუწყეს საქმე იმ ბავშვებისა და მან გაიხსენა ის სიტყვები სახარებისა, რომელიც თქვა უფალმან ჩვენმან იესო ქრისტემ: „რომელმან არა დაუტეოს მამაი თვისი და დედაი თვისი, დანი და ძმანი, ცოლი და შვილნი, და არა აღიღოს ჯუარი თვისი და შემომიდგეს მე, იგი არ არს ჩემდა ღირს“.

მაშინვე წავიდა ის მღვდელი იმ დიდი მდინარის შესართავს

და მასთან ერთად მრავალი ქრისტიანეც და ის წარმართი ბავშვებიც იმ დროს მათთან იყვნენ. იყო ჟამი ზამთრისა და ღამე გამთოშავი, რადგან დღისით ვერ ბედავდნენ მათ ნათლისცემას წარმართთა შიშით და უფალმან ჩვენმან იესო ქრისტემაც ღამით იღო ნათელი მდ. იორდანეს იოვანესგან. იმ დროს წყალი გამოსცემდა საშინელ სიცივეს და როცა ჩავიდნენ ის ბავშვები იმ მდინარეში და ნათელი სცა იმ ხუცესმა სახელითა მამისა და ძისა და სულისა წმიდისა და ამბობდა ამ გალობას: „სული წმიდაი გარდამოსდა ვითარცა ტრედი ზედა იორდანესა, რაჟამს ქრისტე ნათელს იღებდა, ანგელოზნი თანა უდგეს, ამას გალობასა იტყოდენ: „ალილუიანი, ალილუიანი“. მაშინ გამოსცა იმ წყალმა ძლიერი სითბო, როგორაც აბანობ და ღმრთის ბრძანებით სპეტაკი სამოსელი მოიტანეს ანგელოზებმა და შემოსეს მათ ყრმანი, ახლად ნათელ-ღებულნი, კაცთა უხილავად.

და აღარ დაბრუნდნენ ნათელღებულნი ბავშვები მშობლებთან, არამედ ქრისტიანებთან დარჩნენ და იმყოფებოდნენ მათთან.

II რამოდენიმე ხნის შემდეგ შეიტყვეს მშობლებმა ეს საქმე და ბავშვები ქრისტიანთა სახლებიდან ძალით გამოიძევეს დიდი შეურაცხყოფითა და რისხვით, გულისწყრომით და გინებით და მოიყვანეს თავიანთ სახლებში და დაუხეთქეს თავები და დააღბეს სხეული მათი სპეტაკი ცემით. და მათ მხოლოდ ეს უთხრეს თავის მშობელთ: „ჩვენ ქრისტიანები ვართ და არ შეგვეფერება, რომ ვჰამოთ და ვსვათ ძღვენი კერპებისა“ და გაატარეს იმ ბავშვებმა შვიდი დღე უსმელ-უჭმელად და გემო არ უხილავთ არაფრისა. ხოლო იზრდებოდნენ სულისა წმიდისა მიერ, რომელიც ნათლისღებისას შეიმოსეს, მაშინ შეპირდნენ მათ მშობელნი ყოველივე კეთილს, სამოსელსა კრელსა და ყველას ერთნაირს და ისინი იგივე სიტყვებს ამბობდნენ, რომ: „ჩვენ ქრისტიანები ვართ და არაარა გვინდა თქვენგან, ოღონდ გაგვიშვით და წავალთ ქრისტიანებთან“. ვერ სძლიეს მათ მტკიცე სარწმუნოებას, მივიდნენ იმჟამინდელი მთავრის წინაშე, რადგანაც იგიც წარმართი იყო და აუწყეს ყველაფერი: მათი ბავშვების მიერ ჩადენილი საქმე. და იმ მთავარმა უთხრა მათ: „თქვენი შვილები არიან, უფლება გაქვთ, ის უყავით,

რაც გენებოთ“. და მათ უთხრეს: „ბრძანე და მოდი ჩვენთან და ქვევით ჩავქოლავთ მათ, რათა სხვებმაც არ მიბაძონ და ქრისტეანები არ გახდნენ“. და იმ ხუცესს მცირედი ჰირი როდი შეამთხვიეს, დაიტაცეს მთელი მისი ნაშრომი და გაიყვეს მისი ქონება. ისეთი ძლიერი ნაჭრილობევი დაადეს თავს, რომ ცოტაც და მოკვდებოდა და გააძევეს თავისი მამულიდან.

111. მერე დაადგინეს დღე წმიდა მოწამეთა ღვაწლისა და გამოვიდა ის მთავარი, მასთან ერთად ურიცხვი სიმრავლე ერისა და მოვიდნენ ისინი იმ წყაროს თავს, სადაც ნათელი იღეს იმ ყრმებმა და ჩაყარეს ორმოში. ისინი იყვნენ ზოგი ცხრა წლისა, ზოგი შვიდისა, უფროსებიცა და პატარებიც. სხვა არაფერი იცოდნენ, რომ ეთქვათ და ამას ამბობდნენ: „ჩვენ ქრისტეანები ვართ და მისთვის მოვწყდებითა და მოკვდებით, ვისი ნათელიც ვიღეთ“. და მათმა უღმრთო მშობლებმა გაუხეთქეს მათ თავები, ჩაქოლეს ისინი. გველთა და იქედნეთა, ასპიტთა და მხეცთა იციან წყალობა შვილთა, მაგრამ ამ ურჯულოებმა არ ჰყვეს წყალობა საკუთარ შვილთათვის. და უამრავმა ხალხმა დააყარა ქვევით, ვიდრე არ აღავსეს ის ორმო და არ დაფარეს ქვით მათი წმიდა გვამები და ამონათხარი მიწაც ზედვე მოაბნიეს. იმ დროს აღესრულა სახარების ეს სიტყვები: „მისცეს ძმამან ძმა სიკუდილ და მამამან შვილი, და აღდგენ მამადედანი შვილთა მათთა ზედა და მოჰკვლიდნენ მათ“. და დასრულდა წამება მათი და შეირაცხნენ იგინი პირველ მოწამეთათანა და იხარებენ გვირგვინოსანნი ზეციურ სასუფეველში ჩვენი უფლის, იესო ქრისტეს წინაშე, რომელსა შვენის დიდება და პატივი და თაყვანის-ცემა, თანა მამით და სული წმიდითურთ, აწ და მარადის უკუნითი უკუნისამდე, ამინ!.

ძველი ქართულიდან გადმოიღო

მ ა ნ ა ნ ა ჩ ი ქ ვ ა ნ ა ი ა მ

წმ. სვიმეონ ახალი ღვთისმეტყველი

(+1021)

დაიბადა 944 წელს ქალაქ გალატში (პათელაგონია), ხოლო საფუძვლიანი საერო განათლება კონსტანტინოპოლში მიიღო. მამა მას სასახლის კარის კარიერისთვის ამზადებდა, და გარკვეულ ხანს სვიმეონს, ჯერ კიდევ ჭაბუკს, მაღალი მდგომარეობა ეკავა საიმპერატორო კარზე. 25 წლისაც არ იყო იგი, რომ დაუძლეველმა სწრაფვამ შეიპყრო ბერული ცხოვრებისადმი, და მალე გაიქცა კიდევ სახლიდან მონასტერში, სადაც მორჩილად დაუდგა იმ ხანებში სახელგანთქმულ ბერს სვიმეონ ღვთისმომშიშს. ძირითადი საქმე ღირსი სვიმეონისა გახდა განუწყვეტელი ლოცვა იესო ქრისტესადმი მისი მოკლე სახით: „უფალო, შეგვიწყალე!“ იგი ყოველთვის განმარტოებას ეძიებდა, რათა უფრო გულმოდგინედ ელოცა, საღმრთო ლიტურგიის აღსრულების ჟამსაც კი ძმათაგან განცალკავებულად იდგა ხოლმე, ხშირად კი ეკლესიაში მთელი დამითაც რჩებოდა მარტო: იმ მიზნით, რომ შესჩვეოდა ფიქრს სიკვდილზე და არასდროს არ დავიწყნოდა იგი, სასაფლაოზეც ატარებდა ხოლმე ღამეებს. მისმა გულმოდგინე შრომამ თავისი ნაყოფი გამოიღო! მას ხშირად აღტაცების უჩვეულო მდგომარეობა ეუფლებოდა ხოლმე: ამ საათებში სულიწმიდა მანათობელი ღრუბელის სახით ეშვებოდა მასზე და მის თვალთაგან ყოველივე გარშემომყოფს ჰფარავდა. დროთა განმავლობაში მან მიაღწია ისეთ მდგომარეობას, როცა სული მისი ყოველთვის განწმენდილი და განათლებული იყო. ეს განსაკუთრებით მაშინ მკლავდებოდა, როცა ღირსი სვიმეონი საღმრთო ლიტურგიას აღასრულებდა.

დაახლოებით 980 წელს ღირსი სვიმეონი წმიდა მამანტის სახელობის მონასტრის წინამძღვრად აკურთხეს, სადაც მან ამ ხარისხში 25 წელი დაჰყო.

წმიდა მამანტის მონასტერში ცოდვას ინანიებდა ერთი რომელი ეპისკოპოსი, რომელსაც უნებლიედ საკუთარი ჭაბუკიდისწული შემოჰკვდომოდა, და ღირსი სვიმეონი ყოველთვის დიდ გულკეთილობას და ყურადღებას იჩენდა ამ უბედური-სადმი.

მკაცრმა სამონასტრო დისციპლინამ, რომლის დამყარებასაც ყოველთვის ცდილობდა ღირსი სვიმეონი, დიდი უკმაყოფილება გამოიწვია სამონასტრო ძმობაში. ერთხელ ისიც მოხდა, რომ საღმრთო ლიტურგიის დასრულების შემდეგ განსაკუთრებით გაღიზიანებული ძმები თავს დაესხნენ მას და ცოტაც უკლდათ და არ მოკლეს. როცა კონსტანტინეპოლის პატრიარქმა განდევნა მონასტრიდან ეს უღირსი ძმები და სურდა სამოქალაქო ხელისუფლებისათვის გადაეცა ისინი დასასჯელად, ღირსმა სვიმეონმა პატიება გამოითხოვა მათთვის და მერეც, მათს საერო ცხოვრებაშიც ყოველთვის შეეწეოდა მათ.

დაახლოებით 1005 წელს ღირსმა სვიმეონმა მონასტრის წინამძღვრობა თავის მოწაფეს არსენს გადააბარა, თვით კი იქვე დასახლდა, როგორც რიგითი ბერი. ამ დროს შექმნა მან თავისი საღვთისმეტყველო შრომები, რომელთაგანაც ნაწყვეტები „სიკეთისმოყვარეობის“ V ტომშია შეტანილი. მის შრომათა მთავარი თემაა: საიდუმლო საქმენი კაცისა ქრისტესთვის. ღირსი სვიმეონი გვასწავლის შინაგან ბრძოლას, სულიერი სრულყოფის გზებს გულისწადილთა და ცოდვიან განზრახვათა წინააღმდეგ ბრძოლაში. მან დაწერა სწავლა-მოდვრებანი ბერებისა: „ქმედითი საღვთისმეტყველო თავნი“, „სიტყვა ლოცვის სამი სახეობის შესახებ“, „სიტყვა სარწმუნოების შესახებ“ და სხვა. გარდა ამისა, ღირსი სვიმეონი გამოჩენილი საეკლესიო პოეტიც (ჰიმნოგრაფიც) იყო. მის კალამს ეკუთვნის „ღვთაებრივი სიყვარულის ჰიმნები“ — სამოცდაათამდე.

წმიდანი მშვიდობით წარუდგა ღმერთს 1021 წელს. ჯერ კიდევ სიცოცხლის უამს მიიღო მან დიდი ღვთიური წყალობა — ნიჭი საკვირველმოქმედებისა. მრავალრიცხოვანი სასწაულები გამოცხადდა მისი სიკვდილის შემდეგაც: ერთ-ერთი მათგანია წმიდანის ხატის სასწაულებრივი მოპოვება. ღირსი სვიმეონის ცხოვრება აღწერა მისმა მსახურმა და მოწაფემ, ღირსმა ნიკიტა სტიფატემ.

(„თვენი“ I ტ. 445—448 გვ.)

ფრაგმენტები.

წმ. სვიმეონ ახალი ღვთისმეტყველი

სინანულისა და ლოცვის შესახებ

ს ი ტ ყ ვ ა 67.

ნუთუ ქვეყანაზე არის ისეთი კაცი, რომ სასიკვდილო შხამით მოწამლული და საშინელი ტკივილებით გაწამებული, კანზე უმნიშვნელო კრილობას აქცევდეს ყურადღებას? ცხადია, შინაგანი ტკივილი და მოსალოდნელი სიკვდილის შიში მას იმ მცირე განაკაწრს სრულიად დაავიწყებს. ხშირად აუტანელი ტკივილით გატანჯული კაცი ტანსაცმელს იხვეს, ყველა ახლობელს ივიწყებს და თავის გარეგან კრილობას ფრჩხილებით კიდევ უფრო მეტად აღრმავებს. ამ დროს, მას რაგინდ დიდი შეურაცხყოფაც არ უნდა მიაყენონ, ყურადღებას არ მი-აქცევს. იგი აღარც მამულზე ზრუნავს, არც სიმდიდრეზე, პურსაც კი არ სჭამს უზომო ტკივილების გამო, ყველა იქ მყოფს ასე ეუბნება: მომცილდით, სიკვდილი იმარჯვებს ჩემზე, ცოტაც და სულს ამომართმევს! ან კი რად მინდა ასეთი სიცოცხლე, სიკვდილი მიჯობს ამ საშინელ წამებას!

მომაკვდავი მოუსვენრად ბორგავს სარეცელზე, ან ყვირილითა და გოდებით იატაკს ენარცხება; არაფრად აგდებს გარშემო მყოფთა გაკიცხვას. მისი თვალები უამრავი ცრემლის-მღვრელი ორი ნაკადულია. ასეთი კაცი ყველას შენატრის — ცოცხლებსაც, მიცვალებულებსაც, შენატრის იმათ, ვინც ჭერ არ დაბადებულა, შენატრის ყველა პირუტყვსა და ქვეწარმავალს და ამბობს: ქეშმარიტად კურთხეულია ყოველი ქმნილება ღმრთისა, რადგან ისინი ჩემებრ კი არ იტანჯებიან, არამედ ცხოვრებას სიხარულსა და სიმრთელეში ატარებენ. მხოლოდ მე მამძიმებს უზარმაზარი ტვირთი ცოდვისა, რომლის-თვისაც მიწაზევე აუტანელ ტანჯვას განვიციდი და მარადიული ცეცხლიც არ ამცდება. ამ დროს მას ყველა კეთილგონიერი ჰგონია, თავად კი ერიდება მათ, როგორც უწმინდური. იგი მართალსა და მტყუანს არ განასხვავებს, არამედ ღირსეულსაცა და უღირსსაც წმინდანად რაცხავს. მხოლოდ საკუთარ თავს სცნობს ცოდვილად. ასე ზის საკუთარ უსჯულოებათა სანაგვეზე, მწუხარებისა და სევდის სიბნელეში, რომელსაც თით-

ქოს დასასრული არ უჩანს და დაჩირქებულ წყლულებს იობის მსგავსად ქოთნის ნატეხით კი არ ისუფთავენს, არამედ ფრჩხილებით, რადგან დიდია მისი გულისტივილი. იობი თუმცა სხეულით დასნეულდა, მაგრამ მისი სული ღმრთის მფარველობის ქვეშ იმყოფებოდა, მას კი სხეულთან ერთად სულიც ცოდვითა აქვს მოწამლული. ამიტომ, ასეთი კრილობები ბევრად უფრო საშიშია, ვიდრე იობისა. ამის შემდეგ მომაკვდავს ტოვებენ ნათესავები, მეგობრები და ახლობლები, ამქვეყნად რომ ჰყავდა. ისინი მცირე ხნით ჩამოჭდებიან მის სასთუმალთან, ზოგიერთი ცრემლსაც გადმოაგდებს, შემდეგ კი ყველა თავიანთ სახლებში გასწევს. მაშინ, საკუთარ თავთან დარჩენილი, იგი საშინელ მარტოობას იგრძნობს და უფრო მეტად დამწუხრებული, გულდაწყვეტილი და სასოწარკვეთილი შექალაქდება უფალს: „შენ ყოველივე იცი, უფალო, და ყოველივეს ჰხედავ. თუმცა შენგან ქმნილი ვარ, მაგრამ შენს მცნებებს არ ვასრულებდი და ჩემი უგუნურების გამო ყოველგვარი ბოროტება მაქვს ჩადენილი. არასოდეს მიფიქრია შემოქმედო ჩემო, რომ შენ, თუმცა სახიერი და კაცთმოყვარე ხარ, მაგრამ ამავე დროს ხარ მართლმსაჯულიც. მხოლოდ ახლა ვხვდები აძას! შეძრწუნებული ვარ, მაგრამ არ ვიცი, როგორ მოვიქცე! ვგრძნობ, უფალო, შენს განკიცხვას და არაფრით შემიძლია თავი ვიმართლო. არანაირი სათნოება არ გამაჩნია და არც სინანული მქონია ოდესმე, ამიტომ ვერ ვხედავ შენგან შეწყნარება ვითხოვო. იმასაც ვხედავ, რომ შენი შეწყალების გარეშე კაცი თავის ცოდვებს ვერ გამოისყიდის, რაგინდ სათნოებებით არ უნდა იყოს იგი შემკული და მრავალ კეთილ საქმეს აღასრულებდეს. ცოდვა — სიკვდილია, და ვის ძალუძს საკუთარი ძალისხმევით მკვდრეთით აღდგომა? ჭეშმარიტად, არავის. მხოლოდ შენ მოკვდი, და აღსდგე, რამეთუ ცოდვა არ გქონდა და არც ზაკვა გამოსულა შენი ბაგიდან. მეუფეო, ყოვლისმპყრობელო, მრავალი ცოდვით დამძიმებული — ვინანიებ ჩემს დანაშაულს, მაგრამ ვიცი, მხოლოდ სინანულით ვერ გავმართლდები. სინანული საკუთარ ცოდვათა შეცნობაა, მათი განბანვა კი მხოლოდ შენს მოწყალებას შეუძლია. ჰხედავ, უფალო, რომ გარდა სხეულისა, აღარაფერი გამაჩნია. ახლა მე მხოლოდ წყლული ვარ. ჩემში გადარჩენის ყოველგვარი იმედი გაქრა და ჯოჯობე-

თი მზად არის ცოცხლად შთანთქმას. მხოლოდ შენ ერთს ძალ-
გის ჩემი ხსნა და განკურნება. ჯოჯოხეთის უფსკრულებსაც
კი სწვდება ყოვლად ძლიერი მარჯვენა შენი და ყოველივე მას
ემორჩილება. ვერ ვბედავ ვთქვა: მიწყალე მე, ღმერთო! რამე-
თუ პატიებას არ ვიმსახურებ, არამედ „სამართლად ღირსი,
რომელი ვჰქმენ, მომეგების!“ შენ ყოველივე უწყი, უფალო,
და როგორც შენი კაცთმოყვარეობა ინებებს, ჩემგვარი უღირ-
სი მონა ისე განსაჯე“.

სახიერი უფალი მსწრაფლ შეისმენს მონანულის ამგვარ
ვედრებას, დაუყოვნებლივ ნუგეშინისცემას გაუგზავნის მას და
იხსნის მწუხარებისაგან, ვინაიდან ღმერთი კაცთმოყვარეა და არ
სურს, რომ მისი ქმნილება ამგვარ შექირვებასა და აუტანელ
ურვაში იმყოფებოდეს. ადამიანს, რომელიც ყოველივე ზე-
მოთქმულს მოუკლებლივ აკეთებს, და აგრეთვე მათაც, ვინც
მას ამ სინანულში მიბაძავს, ღმერთი დიდსა და გამოუთქმელ
წყალობას უბოძებს, ავადმყოფობას სიხარულით შეუცვლის,
მწუხარებას კი ღვინით, და საბოლოოდ განათავისუფლებს სა-
შინელი ურჩხულის შხამისაგან, მის შიგნეულობას რომ სწვა-
და. ამ წუთიდან მონანული კაცი უწინდელ გაქირვებასა და
ავადმყოფობას ივიწყებს; იგი აღარასოდეს გაიხსენებს გადა-
ტანილ მწუხარებას, არ შეუდგება ავადმყოფობის უამს დაკარ-
გული ფულისა და ნივთების ძებნას, არც სხვა რამ დანაკლის-
ზე დასწყდება გული. უფალი მას მისცემს სიმრთელეს, რომე-
ლიც ყოველგვარ მიწიერ საუნჯეს აღემატება. ეს სიმრთელე
ადამიანს გამოუთქმელ სიხარულს ანიჭებს და მისი გულიდან
ყველა სნეულებას განაგდებს. ამ დროს მონანული ხედავს, რომ
ვერანაირი გარეგანი მწუხარება ვერ მიუახლოვდება იმ დიდ
სიხარულს, რომელსაც მის გულში დაუდვია ბინა. მისი ახლობ-
ლები და მეგობრები კი ამას ვერ ამჩნევენ და ამბობენ: „ეს
კაცი არასოდეს გვინახავს მხიარული. მისი ცხოვრება მწუხა-
რებითა და ნაღველითაა სავსე. ხვედრი მისი — არაფრით გან-
სხვავდება კატორღელთა ხვედრისაგან, რომლებიც ბოროტი
საქმეების გამო ისჯებიან“. მხოლოდ მან იცის, რომ მისი ცხოვ-
რება სიხარულით აღივსო. ეს სიხარული სიკვდილს დასცილის
და მას ჯოჯოხეთი ვერ მოერევა, რადგან ამგვარი ცხოვრება
მარადიული და უსასრულოა. ეს შინაგანი ღვინა ბევრად უფრო

ძლიერია, ვიდრე ყოვლისმპყრობელ მეფეთა, პორფირითა და ბისონით შემოსილ მდიდართა და ამ სოფლისაგან განდიდებულთა განცხრომა, რამეთუ მან უწყის, რომ მისი სიღარიბე ყოველ ამქვეყნიურ სიმდიდრეს აღემატება. ქვეყნად ყოველივე წარმავალია, მიწით იფარება და სიკვდილისაგან იმუხრება. ღვთივბოძებულ ნუგეშისცემას კაცი არ დასთმობს, რადგან ის არაამქვეყნიურია. მასში ღვთიური სიხარული არც მიწიერი დიდებისა და უხვი სიმდიდრის გამო ჩასახულა, არც სოროცის სილამაზისა და ჯანმრთელობის გამო, არამედ იგი მისი სულის ხანგრძლივი მწუხარებისა და საღმრთო სულის მოქმედების ურთიერთმირქმის ნაყოფია. რატომ ვერ სძლევს მას სიკვდილი? იმიტომ რომ იგი მის სულში განსაკითხს ვერაფერს ჰპოვებს. ის დაწმენდილი და მზის შუქზე გამქვირვალე ღვინის სადარი იქნება, და თუკი ვინმე მის შესმას მოისურვებს, გულსაც გაუხარებს და სასმელის ათინათი სახესაც გაუცისკროვნებს.

ასეა, ვინც სინანულის ამ სასარგებლო სამსჯავროს გაივლის, არანაირი სხვა სასჯელის, სატანჯველისა და განსაცდელის შიში აღარ ექნება, რამეთუ ამგვარი სინანულის სულიერი წყურვილი არასოდეს განქარდება და ეს ტკილი, კამკამა და ბრწყინვალე სასმელი არასოდეს დაიშრიტება. მისი სიტკბოება და სიხარულისმომგვრელი ციური ბრწყინვალეობა კაცის სულიდან ყოველგვარ სევდას განაგდებს და მას მოზეიმედ აქცევს, ამიტომ ამ გადარჩენის წყაროს მას ვერავინ მოსწყვეტს და ვერც წინ აღუდგება. „თავადი ამის სოფლისა“ და მეუფე წყვდიადისა, მზაკვარი ეშმაკი, რომლის ბოროტებაც გაბატონებულია წყალსა და ხმელეთზეც, და რომელსაც პატარა ჩიტივით უპყრია ხელთ ეს სოფელი და მისით ერთობა, მთელი თავისი ლეგიონებითაც კი ვერ გაბედავს მიუახლოვდეს ან თუნდაც ოდნავ შეეხოს მას. ამ სულიერი ღვინის ელვარება ციალებს კაცის სახეზე, გადაეცემა ხელ-ფეხს, მთელ სხეულს მოედება და ძლიერ ცეცხლად აქცევს, რათა დასწვას მასთან მებრძოლი მტერი. იგი გახდება პირმშო სინათლისა, მეგობარი მზისა და საყვარელი შვილი ღმრთისა. ამგვარი ზეციური ღვინით საზრდოობა განსწმენდს მისი სულიერი წყლულების სიბილწეს და მას სრულ სიჯანსაღეს მიანიჭებს. ეს სიმრთე-

ლე კი მას სხვა მავნე საზრდელის მიღების ნებას არ მისცემს, არამედ მხოლოდ ამ ღვინის, ანუ სინანულის შესმის უსაზღვროდ .ძლიერ წადილს აღძრავს, რათა უფრო და უფრო მეტად განიწმინდოს და განამტკიცოს თავისი ჯანმრთელობა. ამგვარი სულიერი სიჯანსაღის მშვენიერებითა და კეთილსახოვნების მადლით შეუძლებელია კაცის განძლიერება.

საყვარელო შვილო! საბოლოოდ ასეთი გახდება ის, ვინც ყოვლისმპყრობელის წინაშე შესცოდა, ხოლო შემდეგ დაეუფლა შიში ღმრთისა, ანუ ვინც ძრწის საზარელი სამსჯავროსა და უფლის პირისაგან განგდების მოლოდინში. ისევე როგორც მანქანა, რომელიც დაწურულ ყურძენს აწვება და სრესს, (ჩვეულებრივ ყურძენს ჯერ ფეხებით წურავენ, ხოლო შემდეგ მძიმე ქვით ჭყლეტენ, რათა მას მთელი წვენი გამოადინონ), ასევე ღმრთის შიში და მისი მართლმსაჯულების შეგონება ქვის ლოდივით შემუსრავს კაცის ხორცსა და ძვლებს, დათრგუნავს მას და დაამდაბლებს ყველას წინაშე. ხოლო როდესაც მისი სიამაყე და პატივმოყვარეობა საბოლოოდ მოტყდება, მაშინ მას ზეგარდამო მიეცემა მსუბუქი და უტკბილესი გრძნობა სიმდაბლისა, ლოდივით დააწვება, გამოსწურავს მისგან ხორციელ ვნებებს და მას კეთილმსახურად აქცევს. ამგვარად დამდაბლებულსა და სულით შემუსვრილს უფალი ცრემლთა ნაკადულებით გაანაყოფიერებს. ეს ცრემლები კი ის მალამოა, რომელიც კაცს ყოველგვარი ცოდვისაგან განკურნავს, ბინძურ წყლულებს განბანს და თოვლივით განასპეტაკებს.

ნეტარ არს კაცი, რომელიც ისმენს ამ სიტყვებს, რწმენით მიიღებს მას და საქმედ აქცევს. იგი უდიდეს საუნჯეს შეიძენს, რომელიც ყოველგვარ სიბრძნეს, სიტყვასა და აზრს აღემატება. ის დააფასებს ამ წერილის ცოდვილსა და გლახაკ დამწერს და განადიდებს მრავლისმოწყალე ღმერთს, რომელმაც ჩემი ბილწი ენისა და არაწმიდა ბაგეთა მეშვეობით გვაუწყა ყოველივე ეს სინანულის მაგალითად და ჭეშმარიტი გზის მაჩვენებლად მათთვის, ვისაც მთელი გულით სურს ხსნა და ცათა სასუფეველის დამკვიდრება ღმერთში და მაცხოვარში ჩვენში, რომელსაც შვენის დიდება უკუნისამდე, ამინ!

**წმიდა გრიგოლ კალაშა,
მთავარაპისკოპოსი თესალონიკისა
(+1360)**

დაიბადა მცირე აზიაში, 1296 წელს. თურქების შემოსევის დროს მისი ოჯახი კონსტანტინეპოლში გაიქცა და იქ ანდრონიკე II პალეოლოგის (1282—1328) სასახლის კარზე კპოვა თავშესაფარი. გრიგოლი შესანიშნავი მონაცემებით იყო დაჯილდოებული და დიდი სიბეჯითითაც გამოირჩეოდა; ამიტომ მან ადვილად შეითვისა ყველა ის საგანი, რომლებიც შუა საუკუნეების უმაღლესი განათლების სრულ კურსს შეადგენდნენ. იმპერატორს უნდოდა, რომ ჭაბუკს სახელმწიფო მოღვაწეობისათვის მიეძღვნა თავი, მაგრამ გრიგოლმა, რომელიც ამ დროს ჯერ ოცი წლისაც არ იყო, ათონის წმიდა მთას მიაშურა და აქ ვატოპედის მონასტერში შედგა მორჩილად. ეს უნდა მომხდარიყო დაახლოებით 1316 წელს (სხვა ცნობებით, 1318 წელს). აქ იგი ღირსი მამის, ნიკოდიმოს ვატოპედის ხელმძღვანელობით დაადგა სულის მხსნელ ღვაწლთ და მის მიერვე აღიკვეცა ბერად. ერთი წლის შემდეგ მას წმიდა მახარებელი იოანე ღვთისმეტყველი გამოეცხადა ჩვენებით და თავისი სულიერი მფარველობა აღუთქვა. გრიგოლის დედამ და დებმა აგრეთვე მიიღეს მონაზვნობა.

ხუცესის მოვალეობას წმიდა გრიგოლი მეუღაბნოე ბერის ცხოვრებას უხამებდა. ხუთ დღეს კვირაში იგი განმარტოებულ მღუმარებასა და ლოცვით ღვაწლში ატარებდა, და მხოლოდ შაბათსა და კვირა დღეებში გამოდიოდა მრევლთან — საღმრთო ლიტურგიას აღასრულებდა ეკლესიაში და ქადაგებით მიმართავდა სამწყსოს. მისი ღვთივსულიერი სიტყვა და სწავლა-მოდღერება ღრმა ზეგავლენას ახდენდა ტაძარში მყოფ მორწმუნეებზე და ხშირად ცრემლებსაც კი იწვევდა მათში. მაგრამ

სრული განდგომა საზოგადოებრივი ცხოვრებისაგან უცხო იყო მღვდელმთავრისათვის. ზოგჯერ იგი ქალაქის განათლებული ახალგაზრდობის საღვთისმეტყველო შეკრებულობებსაც ესწრებოდა, რომელთაც მომავალი პატრიარქი ისიღორე თავმჯდომარეობდა.

ამასობაში კი, XIV საუკუნის 30-იანი წლებისათვის, აღმოსავლეთის ეკლესიის ცხოვრებაში მწიფდებოდა მოვლენები, რომელთაც მღვდელმთავარი გრიგოლი მართლმადიდებლობის მსოფლიო აპოლოგეტთა უდიდეს წარმომადგენელთა რიცხვში დააყენეს და ისიქაზმის ცნობილი მოძღვრის სახელი მოუპოვეს მას.

დაახლოებით 1330 წელს კონსტანტინოპოლში კალაბრიიდან ჩამოვიდა მეცნიერი ბერი ვარლამი, ავტორი ტრაქტატებისა ლოგიკასა და ასტრონომიაში. ამ გონებამახვილმა მეცნიერმა კათედრა მიიღო დედაქალაქის უნივერსიტეტში და ახსნა-განმარტება დაიწყო დიონისე არეოპაგელის თხზულებებისა. მალე ვარლამი ათონის წმიდა მთაზეც მოვიდა, სადაც ისიქასტთა სულიერი ცხოვრების წესს გაეცნო და ღმერთის არსებობის მიუწვთომელობის საფუძველზე მწვალებლურ შეცთომილებად გამოაცხადა მათი გონებისმიერი ქმედება. თავისი ხშირი მიმოსვლის დროს ათონიდან თესალონიკში, იქიდან კი კონსტანტინოპოლში და შემდეგ კვლავ თესალონიკში, ვარლამი მრავალ ისიქატ ბერს ეკამათებოდა და ცდილობდა დაესაბუთებინა მათთვის, რომ თაბორის ნათელი ქმნილი მოვლენა იყო; ამასთან იგი იმასაც კი არ ერიდებოდა, რომ სასაცილოდ აეგდო მონაზონთა მონათხრობი ლოცვით საშუალებებსა და სულიერ განცისკროვანებათა შესახებ.

ათონელ ბერთა თხოვნით მღვდელმთავარმა გრიგოლმა თავდაპირველად სიტყვიერ შეგონებებს მიმართა და ამ გზით სცადა ვარლამის დარწმუნება. მაგრამ, როცა ამან ჯეროვანი ნაყოფი ვერ გამოიღო, მან წერილობით გადმოსცა თავისი საღვთისმეტყველო დასაბუთებანი. ასე შეიქმნა ცნობილი „ტრიადები წმიდა ისიქატთა დასაცავად“ (1338). 1340 წელს ათონელმა მოღვაწეებმა, წმიდა გრიგოლის ქმედითი მონაწილეობით, შეადგინეს საერთო პასუხი ვარლამის თავდასხმებზე —

ეგრეთ წოდებული „წმიდა მთის ტომოსი“. კონსტანტინოპოლის საეკლესიო კრებაზე 1341 წელს, წმიდა სოფიოს ტაძარში, მღვდელმთავარი გრიგოლ პალამა ვარლამს შეეჯახა სიტყვიერ პაექრობაში, რომელიც ძირითადად თაბორის ნათლის გარშემო სწარმოებდა. ვარლამის მოძღვრება დაგმეს, როგორც მწვალებლობა, თვით იგი კი შეაჩვენეს.

მაგრამ ცილობა პალამიტელთა და ვარლამიტელთ შორის კიდევ დიდხანს გაგრძელდა. ამ უკანასკნელთა რიცხვში იყვნენ: მოწაფე ვარლამისა, ბულგარელი მონაზონი აკვინდინე და პატრიარქი იოანე XIV ხეიბარი (1341—1347); აგრეთვე იმპერატორი ანდრონიკე III პალეოლოგი (1328—1341). აკვინდინემ რამდენიმე ტრაქტატი დაწერა, რომლებშიც საეკლესიო შფოთში მღვდელმთავარ გრიგოლსა და ათონელ ბერებს ადანაშაულებდა. წმიდა გრიგოლმა მწვალებელს საკადრისი პასუხი გასცა და დამაჯერებლად უარპყო მისი ბრალდება. მაშინ პატრიარქმა ეკლესიიდან განკვეთა წმიდა გრიგოლ მღვდელმთავარი (1344) და საპყრობილეში ჩააგდებინა, სადაც იგი 3 წლის განმავლობაში ჰყავდათ დამწყვდეული. 1347 წელს, როცა მწვალებელი იოანე XIV საპატრიარქო ტახტზე ისიდორემ შესცვალა (1347—1349) წმიდა გრიგოლ პალამა გაათავისუფლეს და თესალონიკის მთავარეპისკოპოსად დაადგინეს. 1351 წელს ვლაქერნის საეკლესიო კრებამ საზეიმოდ დაადასტურა მისი მოძღვრების მართლმადიდებელი არსი. მაგრამ თესალონიკელებს მაშინვე არ მიუღიათ თავიანთი ახალი მღვდელმთავარი, და მასაც პირველ ხანებში სხვადასხვა ადგილებში უხდებოდა ცხოვრება. მისი ერთ-ერთი მგზავრობის დროს ზღვაზე კონსტანტინეპოლისკენ, ბიზანტიელთა ხომალდი თურქებს ჩაუვარდათ ხელში. ერთი წლის განმავლობაში მღვდელმთავარ გრიგოლს ტყვესავით ჰყიდდნენ სხვადასხვა ქალაქებში, მაგრამ მაშინაც იგი დაუღალავად განაგრძობდა ქრისტიანული სარწმუნოების ქადაგებას.

მხოლოდ 3 წლით ადრე თავის გარდაცვალებამდე დაბრუნდა იგი თესალონიკში. გარდაცვალების წინ ჩვენებაში მას წმიდა მღვდელმთავარი იოანე ოქროპირი გამოეცხადა. წმიდა

გრიგოლ პალამა მშვიდობით ჩაბარდა უფალს 1359 წლის 14 ნოემბერს. იგი წმიდანად შერაცხეს 1368 წელს, პატრიარქ ფილოთეოსის დროს (1354—1355, 1362—1376), რომელმაც მისი ცხოვრებაც აღწერა და მოსახსენებელი კანონიც შეუდგინა.

(„თენი“ III ტ. 489—495 გვ.)

ფრაგმენტები.

ქალაგება თჳშული სასიკჳდილო ეპიდემიის
მკვინჳარების შაჳს

საყვარელი მოწაფე ქრისტესი იოანე ღვთისმეტყველი ამბობს: „საყუარელნო! უკუეთუ გული ჩუენი არა გუგმობდეს ჩვენ, განცხადებულებაჲ გუაქუს ღმრთისა მიმართ. და რადუაიგი ვითხოვოთ, მოვილოთ მისგან, რამეთუ მცნებათა მისთა ვიმარხავთ და სათნობასა წინაშე მისსა ვჳყოფთ“. (I იოანე 3, 21—22). ჩვენ კი, მხილებულნი სინდისისაგან, მანკიერ ჩვევათ დამონებულნი, ძვირისმომქმედნი წინაშე ღვთისა, მუღამქამ მომთვრალენი, ღღისით ქეიფის საბაბის მძებნელნი, ღამით კი ხორციელსა და სულიერ უწმინდურებაში ჩაფლულნი, სიცრუესა და მომხვეჭელობაში მცხოვრებნი, ჩვენივე ნამოქმედარი ნაპარავ-ნაძარკით გახარებულნი, ურთიერთას მოშურენი, ბოროტის-მსიტყველნი, ცილისმწამებელნი, სიკეთისა და მოკრძალების მოძულენი და ყოველგვარი ცოდვის თანამდებნი — ნუთუ ისე გავკადნიერდებით, რომ ლოცვისა და ფსალმუნების ჟამს რაიმეს ვითხოვოთ ღვთისაგან? ნუთუ უფლის მცნებების უარყოფელნი შეგვიძლია ვიმედოვნებდეთ, რომ ღმერთი ნათხოვნს აგვისრულებს?! ცოდვილს ხომ ასე მიმართავს ღმერთი: „რადსთვის-მე მიუთხრობ შენ სამართალთა ჩემთა და აღიღებ აღთქმასა ჩემსა პირითა შენითა? შენ ეგერა მოიძულე სწავლებანი და განიშორენ და განსთხიენ სიტყუანი ჩემნი, იხილითუ მპარავი თანაურბიოდი მას და მეძავსა თანა დასდვა ნაწილი შენი; პირმან შენმან განამრავლა უკეთურებაჲ და ენაჲ შენი თხზვიდა ზაკვასა. შჯდი რაჲ, ძმისა შენისათვის ბოროტსა იტყოდი და ძისათვის დედისა შენისა დასდვი საცთური; ესე ყოველი ჰყავ და დავიდუმე; ჰგონე უსჯულოებაჲ, ვითარმედ მეცა შენ გემსგავსო; გამხილო და წარმოვადგინნე ცოდვანნი შენნი წინაშე პირსა შენსა. გულისხმა-ყავთ ესე ყოველთა, რომელთა დაგივიწყებდეს ღმრთისა, ნუუკუე წარგიტაცენს და არავინ იყოს მხსნელ თქუენდა“ (ფს. 49, 16—22). სწორედ ასე წარგიტაცებს სიკვდილი და არავინ იქნება ჩვენი მხსნელი, ჩვენი შემწე! მართალია ყოველი ჩვენგანი ყველა აქ ჩამოთ-

ვლილ ცოდვათა თანამდები არ გამხდარა, მაგრამ ერთი ან რამოდენიმე ყველას ჩაუდენია და უხმარ-ქმნილა. თუმცა უფლის წყალობის წარსახოცად და მისი რისხვის თავსდასატყდომად ამ ცოდვათაგან ერთიც კი საკმარისია.

რის გამო ვერ გახდნენ ისრაიტელნი საღმრთო სჯულის ფიცართა მიღების ღირსნი? განა მთვრალობამ არ შეუშალა მათ ხელი? მოსემ ორმოცი დღე იმარხულა სინას მთაზე და ღმერთს თავის ხალხზე ესაუბრა. მან იქვე მიიღო უფლისაგან უდიდესი წყალობა — ხელთუქმნელი სჯულის ფიცარნი, რომელიც ისრაელისათვის უნდა წამოეღო. როდესაც უკან დაბრუნებულს შორიდანვე მოესმა უწესო ხმაური და ღრიანცელი, იგი მიხვდა, რომ ისინი მთვრალეები იყვნენ. „ხმაჲ განცხრომისა“ მესმის“ — სთქვა მან (გამოსვლ. 32, 18), უღირსად სცნო ისრაელი ამ წყალობისა და ღვთისაგან ბოძებული სჯულის ფიცარნი შემუსრა. ამის შემდეგ, მან თავისი ერთგული ხალხი — ისინი, ვინც არ მიეცნენ მთვრალობას და თაყვანი არ სცეს ოქროს კერპს — უწესოთა წინააღმდეგ აამხედრა, მრავალი ათასი მოსწყვიტა მათგან და ამით სათნო ეყო ღმერთს. შემდგომ კვლავ ავიდა მთაზე და თავისივე ხელით გამოთლილი სხვა ფიცარნი წამოიღო, რომლებზედაც ღმერთმა სჯული ხელმეორედ გამოსახა.

ხედავთ, რომ სიმთვრალე უძველესი დროიდან სიკვდილს იმკის. ვინც ამ საშინელ ვნებას მიეცემა, იგი ამქვეყნადაც შეიმოკლებს სიცოცხლეს, და ცათა სასუფეველსაც ვერ დაიმკვიდრებს. მთვრალობა ეს თვით ხორცშესხმული დემონია. იგი გადაგვარებაა გონებისა, დაუძლურება სხეულისა; სიცოცხლე, სიკვდილზე უარესი. იგი მიხეზნია ღვთისაგან ადამიანის დაშორებისა, რამეთუ სიმთვრალით უცხო ვექმნებით ღვთისაგან აღთქმულ ცხოვრებას. „მომთვრალეთა“, — ბრძანებს მოციქული, — „სასუფეველი ღმრთისა ვერ დაიმკვიდრონ“ (I კორ. 6; 10). რაღა უნდა ვთქვათ სიძვაზე? — ისრაელი ეგვიპტიდან უიარაღოდ გამოვიდა, ხოლო უკან კარგად შეიარაღებული ეგვიპტელთა ჯარი დაედევნა. როდესაც მათ მეწამულ ზღვამდე მიაღწიეს, ღვთის განგებით მოსეს კვერთხმა წყალი განაპო, გზა გაკვალა და ისრაელმა განვლო ზღვა, ხოლო მდევარი ტალღებმა შთანთქა და მათი გვამები ნაპირზე გამორიყა. უიარაღო

ისრაიტელთ ამგვარად სულ მალე მიეცათ საჭურველი. მათ ის დახოცილ ეგვიპტელებს აართვეს, ამის შემდგომად ისინი გზად ყველა წინააღმდეგომს ამარცხებდნენ. ისრაელმა მრავალი დასახლებული თუ უკაცრიელი ადგილი განვლო. ისეთებიც კი, სადაც ადამიანს ჯერ ფეხი არ დაედგა, მაგრამ როდესაც სიძვას მიეცნენ, იმდენად დაუძლურდნენ, რომ მორიგ ბრძოლაში ერთბაშად ოცდასამი ათასი კაცი დაკარგეს. ამიტომაც გვეუბნება პავლე მოციქული. „ნუცა ვისიძავთ, ვითარცა იგი ვიეთმე მათგანთა ისიძვეს, და დაეცნეს ერთსა შინა ღღესა ოცდა-სამი-ათასი“ (1 კორ. 10, 8). რომ არა ფინეზი, რომელმაც თავისი მოშურნეობით ერთი დარტყმით მოუღო ბოლო ამ გარყვნილებას, — ყველანი დაისოცებოდნენ, რადგან ამის გამო აუცილებლად ღვთის რისხვა დაატყდებოდათ თავს. ვინ არ იცის, რომ ღვთისათვის საძაგელი ქმედება ჩვენს შორისაც ხდება, მაგრამ არავინ ცდილობს ამის ალაგმვას. მამები შვილებს არ არიგებენ, ძმა — ძმას, მეგობარი — მეგობარს. პირიქით, ხშირად ამ საქმეში ხელსაც უწყობენ ერთმანეთს. მოციქული კი ასე გვაფრთხილებს: „ესე ვითარისა მის-თანა არცალა ჰამად“ (1 კორ. 5; 11). აი, ამიტომ ვართ სიკვდილისა და წარწყმედის ღირსნი! თუკი სიძვა ესოდენ დიდ სასჯელს იმსახურებს, მაშ რაოდენ უფრო მეტად განსაკიცხია მრუშება, რომელიც ოჯახებს ანგრევს, მრავალი უკეთურებითა და გარყვნილებით ალავსებს მათ, ხოლო შთამომავლობას გაქრობით ემუქრება. ასეთივე მსჯავრი დაედება შურსაც — კაცისკვლის მშობელს. სწორედ შურმა აქცია კაენი ძმის მკვლელად და იგი გახდა მიზეზი პირველი ადამიანის სიკვდილისა. რაც შეეხება ქურდობას, ცნობილია, თუ რარიგ განარისხებს ეს ცოდვა ღმერთს. ძველ აღთქმაში მოთხრობილია აქარის ამბავი, რომელიც ერთადერთი ქურდი იყო ისრაიტელთა ჯარში. ეს უკანასკნელნი მარცხს მარცხზე მანამდე განიცდიდნენ, სანამ არ გამოიძიეს ამის მიზეზი და ქურდი არ ჩაქოლეს.

ყოველივე ეს ჩვენთვის დაიწერა, რათა რომელიმე ამ ცოდვაში ჩავარდნილებს საშინელი სასჯელი არ მოგვეზღოს. არც ის უნდა დავივიწყოთ, რომ ჩვენ ბევრად მეტი პატივი გვხვდა წილად, რადგან ქრისტიანებად ვიწოდებით და ამდენად, ცოდ-

ვებისთვის პასუხსაც მეტს მოგვთხოვენ. „რმეთუ უკუეთუ რომელი-იგი ანგელოზთა მიერ ითქუა სიტყუამ იქმნა მტკიცე, და ყოველმან სჯულსა გარდამავალმან და ურჩმან მიიღო სასჯელი კუალად-გებისამ: ვითარმე ჩუენ განვერნეთ, უკუეთუ ესოდენი-იესე უღებვყოთ ცხოვრებად, რომელი მან — იგი დასაბამი მიიღო სიტყუად უფლისა მიერ, მსმენელთა მათგან ჩუენდა მომართ დაამტკიცნა, თანამოწამებითა ღმრთისადათა სასწაულებითა და ნიშებითა, და ფერად-ფერადითა ძალითა, და სულისა წმიდისა განყოფითა ნებისაებრ მისისა?“ (ებრ. 2; 2—4) — გვეუბნება მოციქული. ამიტომაც მოაკვდინა ღმერთმა პეტრეს მიერ ანანია და საფირა, საკუთარი ქონების ქურდობისა და სიცრუისათვის. ტყუილი ყოველთვის ქურდობასთანა დაკავშირებული. „წარსწყმიდე შენ ყოველნი, რომელნი იტყვიან სიცრუევსა“ (ფს. 5; 6). — იტყვის დავით წინასწარმეტყველი უფლისა მიმართ. პავლემ ეშმაკს გადასცა სიძვით შეცოდებული კორინთელი, ხოლო თავად კორინთელთ დაუკანონა: „ესე ვითარისა მის-თანა არცაღა ჭამად“ (1 კორ. 5; 11). მოციქულმა მანამ არ უჩვენა შეცოდებულს მოსიყვარულე ვული, ვიდრე მან ეს ბოროტი საქმე არ მიატოვა და არ შეინანა. ახლა გავიხსენოთ, თუ რას ეუბნება სახარებაში უფალი ძუნწს, რომელსაც დიდი მოსავეალი ჰქონდა და მოწყალების გალების მაგიერ მხოლოდ თავის საგანძურის შევსებაზე ფიქრობდა. „უგუნურო! ამას ღამესა მიგიღონ სული შენი შენგან; ეგე, რომელ მოიმზადე, ვისა იყოს?!“ (ლუკა 12; 20). ეს რომ ყოველი ადამიანის მიმართაც არის ნათქვამი, შემდეგი სიტყვებიდან სჩანს: „ეგრეცა, რომელი იუნჯებდეს თავისა თვისისა და არა ღმრთისა მიერ განმდიდრებოდეს“ (ლუკა 12; 21). მიუხედავად იმისა, რომ ამ კაცს სიმდიდრე უპატიოსნო გზით არ მოუხვეჭია, არამედ უხვი მოსაველით განმდიდრდა, მაინც სიკვდილით დაისაჯა, რადგან ბოროტად გამოიყენა უფლის წყალობა. ხოლო ჩვენს შორის მრავლად მოიძებნებიან ისეთები, რომლებიც არა თუ კანონიერ სიმდიდრეს, არამედ ღარიბ-ღატაკთა ძარცვით დაგროვილ ქონებას ინახავენ შინ. ამგვარი მომხვეჭელობის სენი და ანგარებისმოყვარება კი, როგორც პავლე მოციქული ამბობს, იგივე კერპთაყვანისცემაა. ეს სიტყვები არა მარტო დიდებულებს ეხებათ, არამედ ვაჭრებსაც,

ისინი ხომ დიდ ზიანს აყენებენ მყიდველს, როცა მათ ზომი-
წონაში ატყულებენ.

ყველა ზუსტით ჩამოთვლილ უკეთურებათა გამო ვისჯებით და კვლავაც დავისჯებით, ვინაიდან ამ განსაცდელისაგან თავის დაღწევას არ ვცდილობთ და ამით არსებულ დანაშაულს კიდევ სხვას ვუმატებთ. ვნებათ იცოდეთ, თუ რაოდენ დიდი ბოროტებაა ანგარების მოყვარება? ეს ამჟამინდელი ეპიდემიის მაგალითებიდანაც სჩანს. სისხლი ჩვეულებრივ მთელი სხეულის ერთ-ერთი შემადგენელი და აუცილებელი ნაწილია, მაგრამ მისი მოჭარბებისას ავადმყოფი იღუპება. ასე რომ, ისევე როგორც სხვებს ვნებს ყველაფერი ზედმეტი, ასევე ვნებს და მოაკვდინებს სულს ანგარება და განდევნის მისგან ღვთიურ მადლს. ეს სულიერი სიკვდილი ყოველთვის წინ უსწრებს ხორციელს, რომლის წარმოშობის მიზეზი ღვთისაგან ადამიანის დატყუებაა. ღვთის მცნებათაგან განდგომის შედეგად სამყაროში დასაბამი მიეცა სიკვდილს, მაგრამ ადამიანი ცოდვით დაცემისთანავე არ მომკვდარა, რადგან ღმერთმა მას დრო მისცა სინანულისათვის. შემოქმედმა არაფრისაგან შექმნა მთელი სამყარო ისევე, როგორც შექმნა ანგელოსნი, მთავარანგელოზნი, მთავრობანი, ძალნი, ხელმწიფებანი, უფლებანი, ქერუბიმნი, სერაბიმნი და საყდარნი. მან მხოლოდ გაიფიქრა და ეს აზრი იმწამსვე საქმედ იქცა. ასე მიეცა დასაბამი ზეციურ ძალთა არსებობას. მთელი ადამის მოდგმის მეყსეულად შემქმნელ უფალს მისი განადგურებაც ძალ-ეღვა; ასე მოიქცა იგი წარღვნის დროს, მაგრამ უსაზღვრო კაცთმოყვარეობის გამო მან ადამიანთა ხელახალი გამრავლების მიზნით მაინც გადაარჩინა მართალი ნოე და მისი შვილები და ისე მოაწყო, რომ ყოველ ადამიანს დაენახა სიკვდილის გარდუვალობა მისი ახლობლებისა და ნათესავების გარდაცვალების მაგალითზე, რათა სინანული და იმქვეყნიურ ცხოვრებაზე ზრუნვის სურვილი აღძროდა. მაგრამ ვინაიდან ჩვენ არც სინანული გვაქვს და არც მომავალ ცხოვრებაზე ვზრუნავთ, ამიტომაც სამართლიანად ვისჯებით ამ ეპიდემიით, რადგან ღმერთს არ სურს, რომ ბოროტებასა და უსჯულოებაში ვცხოვრობდეთ. სიკვდილი ცოდვითათვის უკიდურეს სასჯელად გვევლინება, ამის მაგალითია ჩვენთვის ცნობილი ეგვიპტელთა მოწყვეტის ამბავიც.

ადამიანები ერთმანეთის გასამართლებიას ხშირად სცდებიან, რადგან უმნიშვნელო დანაშაული შეიძლება ზედმეტი სიმკაცრით იყოს განსჯილი. მაგრამ უფლის უდიდესი კაცთმოყვარება იმის ფიქრის საფუძველს არ გვაძლევს, თითქოსდა უსამართლოდ ვიმსახურებდეთ სასტიკ სასიკვდილო განაჩენს. მაშასადამე, თუ ჩვენ ამგვარი სასჯელით ვისჯებით, უნდა დავასკვნათ, რომ მართლაც ძლიერ ვცოდავთ ღვთის წინაშე და არ ვცდილობთ, რომ თავს სინანულით ვუმკურნალოთ. რადგან ვხედავთ, თუ რაოდენ დიდია ჩვენი ცოდვების სიმძიმე, დაე ყოველმა ჩვენგანმა ზურგი აქციოს სორციელ მიდრეკილებებს და შეუდგეს ღმერთს. შევინანოთ გულით, შევიწიწლოთ ბოროტი ჩვევები და ცოდვის მოყვარე აზრები, რათა ღვთის რისხვა ავიცილოთ და მისი წყალობა დავიმსახუროთ. განვკურნოთ ჩვენში ყოველგვარი ბოროტება, ნუ გავხდებით მისი მსხვერპლნი. მივბაძოთ ნინევიელებს, რომლებიც სინანულმა გადაარჩინა და არა მათ, ვინც წარღვნის დროს დაიღუპა. მიუხედავად იმისა, რომ ნინევიელთ წარმოდგენა არ ჰქონდათ ღმერთის მრავალმოწყალებაზე, მაინც მხურვალედ შეჰლაღადეს უფალს და დაუტევეს ყოველგვარი ბოროტი საქმე და ძალადობა. „ვინ უწყის, მო-თუ-აქციოს უფალმან და ვედრებულ იქმნეს და მოიქცეს რისხვისაგან გულისწყრომისა მისისა და არ წარვწყმდეთ?“ — ასე ამბობდნენ ისინი. (იონა, 3; 9). ჩვენ ხომ ღმერთის კაცთმოყვარებას მრავალი მაგალითის საფუძველზე ვხედავთ. უფლის მრავალმოწყალება ნინევიელთა ამბავიდანაც კარგად ჩანს, რამეთუ „და იხილნა ღმერთმან საქმენი მათნი, რამეთუ მოაქციეს გზათაგან მათთა ბოროტთა და შეინანა ღმერთმან სიბოროტესა ზედა, რომელი თქუა ყოფად მათდა და არა უყო“ (იონა 3; 10). მართალია ნინევიელებთან იონა წინასწარმეტყველი იმყოფებოდა, მაგრამ მას არც სინანულისაკენ მოუწოდებია მათთვის და არც ღვთის მოწყალებას შეჰპირებია, მხოლოდ გააფრთხილა მოსალოდნელი უბედურების შესახებ. იონა იუდეიდან იოპიაში მივიდა, იქიდან კი ნავით ნინევიელებთან გაემგზავრა. შემდგომ იგი ნავიდან გადმოაგდეს და ღვთის განგებით ვეშაპმა გადაყლაპა. მან სამი დღე დაჰყო ცხოველის მუცელში, ხოლო იქიდან ისევ უფლის ნებით ნინევიაში აღმოჩნდა და ხალხს ქალაქის მოსალოდნელი

დაღუპვის შესახებ უქადაგა. ნინევიელებმა შეინანეს, ღმრთი-სადმი სასოება გამოიჩინეს და ამით გადაურჩნენ შემოქმედის რისხვას, მაგრამ იონაზე რაოდენ აღმატებულია ის, ვინც თავადაა ღვთის სიტყვა, ვინც ჩვენთვის ზეცით გარდამოხდა, ისევე როგორც იონა იობიაში; უფალმა თავი თვისი მწუხარებასა და განსაცდელს მისცა, ისე როგორც იონამ ტალღებს; მაცხოვარი სიკვდილის შემდეგ ჯოჯოხეთში ჩავიდა, ისევე როგორც იონა — ვეშაპის მუცელში; და აღსდგა მესამესა ღღესა, მონანულთ ცათა სასუფეველს შეჰპირდა და ყველას ასწავლა, თუ როგორ უნდა აღასრულებდნენ სინანულის საქმეთ, რომელთა უარყოფითაც სამართლიანად დავისჯებით სიკვდილით.

სასტიკი და დაუნდობელია სიკვდილი, საზარელია მისი მოახლოვება, მაგრამ გაცილებით უფრო საშინელია ამ ქვეყნიდან ცოდვების მოუნანიებლად წასვლა. ამის გამო საბოლოო ვანაჩენი ბევრად უფრო მკაცრი იქნება და დაუსრულებელი ტანჯვა მოგვეგება ჯოჯოხეთში. დაე, ნურავინ ნუ განდება ამის ღირსი! თუ ამქვეყნიური მწუხარებანი ჩვენთვის აუტანელია. მიუხედავად იმისა, რომ ისინი წარმავალნი არიან და მხოლოდ ხორციელ ტკივილს იწვევენ, — რაოდენ უფრო მძიმე იქნება სიკვდილის შემდგომი ტანჯვა, რომელიც ხორციან ერთად სულსაც შეაპირვებს და მისგან თავის დახსნის იმედიც არ იქნება?! მაშ, შევინანოთ, ძმანო! განუუდგეთ ბოროტებას სიტყვითა და საქმით, შემუსვრილი გულით შეუვერდეთ უფალს და ღალატყობით: „უფალო, ნუ გულისწყრომითა შენითა მამხილებ მე, ნუცა რისხვითა შენითა მსწავლი მე“ (ფს. 6; 2); არამედ — „იყავ მონისა შენისა თანა წყალობისაებრ შენისა“ (ფს. 118; 124). უფალი არ მიატოვებს მათ, ვინც ერთითა პირითა და ერთითა გულითა უხმობს მას და ცხოვრების წესითაც მისი ერთგული რჩება. „მოიქეცით ჩემდამი, და მე მოვიქცე თქვენდა — იტყვის უფალი ძალთა“. (ზაქარია 1, 3); და „მე ვარ იგივე აღმზოციელი უშჯულოებათა შენთა და ცოდვათა შენთა, და არა მოვიხსენიე“, (ესაია 43; 25). თუ ჩვენ ყოველთვის განვერიდებით ცოდვას, ანდა სინანულსა და აღსარების გზით ღმობიერგვყოფთ ღმერთს, მაშინ მის რისხვას ამქვეყნიდანაც გადავურჩებით, რომელიც ამ საშინელი ეპიდემიის სახით დაგვატყდა თავს, ხოლო სიკვდილის შემდეგ კი საუკუნო ცხოვრებას და-

ვიმკვიდრებთ, სადიდებლად მხოლოისა ცხოვრების მომცემლისა ჩვენისა იესო ქრისტესი, რომელსაც შეენის დიდება, პატივი, სიმტკიცე და თაყვანისცემა თანდაუსაბამოით მამით თვისით და ცხოველსყოფელით სულითურთ, აწ და მარადის და უკუნითი უკუნისამდე, ამინ!

თარგმნა გელა აროშვილმა

მღვდელმთავარი კერნიკისა და კალაპრიტისა
ილია მინიატისი
1669—1714)

ეპისკოპოსი ილია მინიატისი იყო სახელგანთქმული მართლმადიდებელი მქადაგებელი და ღვთისმეტყველი. წარმოშობით კეფალონიელმა განათლება ფლანგიანეს კოლეგიაში მიიღო, რომლის დამთავრების შემდეგ თავადვე მასწავლებლობდა აქ. მალე ახალგაზრდა იეროდიაკვანი წმ. გიორგის ეკლესიაში დაადგინეს მქადაგებლად. 1689 წლიდან იგი კეფალონიაში გადაყავთ, სადაც თავის მქადაგებლურ მოღვაწეობას აგრძელებს. აქ იგი შთამბეჭდავ ჰომილიებს წარმოსთქვამდა ბერძნულსა და იტალიურ ენებზე. ილია მინიატისი ცდილობდა საზარებისეული სიტყვის ძალით ემკურნალა საზოგადოებრივი წყლულებისათვის. ამ მიმართებით მეტად მნიშვნელოვანია მისი სიტყვა „სიყვარულის შესახებ“, რომელიც ქალაქ ლიკსურის წმ. ნიკოლოზის ეკლესიაში წარმოთქვა.

ვენეციელმა დიდებულმა ანტონი მოლინამ ილია ქალაქ კორტაში მიიწვია და თავისი ორი ახალგაზრდა ნათესავის აღზრდა მიანდო. მალე იგი ერთ-ერთი მდიდარი მონასტრის იღუმენად დაადგინეს. რამდენიმე წლის შემდეგ კონსტანტინოპოლის პატრიარქმა გაბრიელმა იღუმენი ილია დელაქალაქის საკათედრო ტაძარში დანიშნა მქადაგებლად. ამავე დროს იგი საპატრიარქო სკოლაშიც მასწავლებლობდა. 1711 წელს მას ეპისკოპოსად დაასხეს ხელი და კერნიკის კათედრა ჩააბარეს.

კონსტანტინოპოლში ყოფნის დროს ილია მინიატისმა დაწერა წიგნი — „ლოდი საცთურისა ანუ აღმოსავლეთისაგან დასავლეთის ეკლესიის გამოყოფის დასაწყისის მიზეზებისა და მათ შორის უთანხმოებათა შესახებ“, რომელიც მის ერთერთ უმნიშვნელოვანეს თხზულებას წარმოადგენს.

ლოდი სასტურისა

ანუ

აღმოსავლეთისაგან დასავლეთის ეკლესიის
გამოყოფის დასაწყისის მიზეზებისა და
მათ შორის უთანხმოებათა შესახებ

წიგნი პირველი.

კონსტანტინოპოლის პატრიარქთა — ეგნატესა და
ფოტის დროის მოვლენების შესახებ.

§ 1. სახელოვანო და კეთილმორწმუნე მბრძანებლო¹ გსურდა, დაწვრილებით შეგეტყო ჩემგან, თუ სახელდობრ რა ჰყოფს აღმოსავლეთის და დასავლეთის ორ ეკლესიას, ანუ გაგეგო ამ განყოფილების მიზეზი და მათ დოგმატებს შორის არსებული სხვაობა. სიამოვნებით მინდა რაიმეში გამოგადგე, ამიტომ ვეცდები, შენი ცნობისმოყვარეობა შეძლებისდაგვარად დაეაკმაყოფილო. იმისათვის, რომ ამ ავბედითი განსეთქილების წარმოშობა გასაგები გახდეს, საჭიროა, დაწვრილებით გადმოგცე, რა ხდებოდა კონსტანტინოპოლის პატრიარქებს — ეგნატესა და ფოტის შორის, რამ განაპირობა მაშინ ღვთის ეკლესიაში ესოდენ დიდძალი არეულობა, რამ მიაყენა საკმაოდ დიდი გულისტკივილი მათ და მათს შემკვიდრეებს და საბაბი გახდა დღემდე არსებული არაერთი უთანხმოებისა. იმ დროისათვის მთელი სამღვდლო დასი და ერი ორ ნაწილად იყოფოდა, რომელთაგან ერთნი ეგნატეს ემხრობოდნენ, ხოლო მეორენი — ფოტის; საერთოდ ყველაფერი მეტ-ნაკლები მიკერძოებით მიმდინარეობდა. აქედან გამომდინარე, საკუთარ გრძნობებს აყოლილნი, მაშინდელი მოვლენების აღმწერნიც ძირითადად იმ

¹ მბრძანებლად უნდა ვიგულისხმოდ ვლახეთის მთავარი, თავადი კონსტანტინე ბრიანკოვიანუ, რომელიც ძალზედ კეთილგანწყობილი იყო ილია მინიატისის მიმართ. ეს უკანასკნელი ხანგრძლივი დროის მანძილზე იმყოფებოდა მის სამეფო კარზე და მისი არაერთი მნიშვნელოვანი დავალების აღმსრულებელი იყო.

მხარეს ამართლებდნენ, რომელსაც თვითონ ეკუთვნოდნენ. იმავე სენითაა შეპყრობილი ყოველი მათი მომდევნო მწერალიც; ხან ერთ, ხან მეორე ისტორიკოსს მინდობილნი, ისინი ამ სურათს თავისებურად გვიხატავენ, და მოვლენებს ნამდვილი სახით არ წარმოადგენენ, არამედ თავისი სურვილისამებრ. ამიტომ იოლი არაა, მათგან ჭეშმარიტი სინამდვილე შეიტყო; მიუხედავად ამისა, ეს უკანასკნელი თავისთავად წარმოუდგება და გამოეცხადება ყველა იმათაგანის აზრობრივ ხედვას, ვინც დაბრმავებული არაა მიკერძობით, ვისაც სწორი ხედვა და საღად მსჯელობის უნარი გააჩნია. ახლა წარმოგიდგენ ყველაზე მეტად უტყუარ ფაქტებს, რაც კი ამ საკითხს შეეხება; ისინი სხვადასხვა ისტორიკოსების მონათხრობთაგან შეძლებისდაგვარად ამოვარჩიე.

§ 2. ეგნატე იყო კეთილშობილი და ფრიად სახელგანთქმული ოჯახის შვილი. იგი ეკუთვნოდა სამეფო გვარს როგორც მამის, ასევე დედის მხრივაც. იყო ძე მიხეილ კუროპალატისა, კონსტანტინოპოლის იმპერატორისა, და პროკოფიასი, იმპერატორ ნიკიფორე ჰენიკის ქალიშვილისა. ლევ სომეხმა, რომელმაც იმპერატორი მიხეილი ტახტიდან ჩამოაგდო და ძალმომრეობით გამეფდა², განიზრახა სრულიად ჩამოერთმია მემკვიდრეობა ეგნატესათვის, და მისი დასაჭურისება ბრძანა. ამის შემდეგ ბერად აღკვეცილი ეგნატე განმარტოვდა სატირის მონასტერში.

§ 3. არც ფოტის მშობლები ყოფილან უბრალო და ნაკლებად ცნობილი ხალხი. ისინი კეთილშობილი და დიდგვაროვანი ოჯახის შთამომავალნი იყვნენ, როგორც ამას აღნიშნავს ნიკიტა დავით პაფლაგონელი „ეგნატეს ცხოვრებაში“³, თვით ფოტის მოწმობით⁴, მათ მოწამეობრივი გვირგვინიც კი დაიდგეს; ხოლო რომის პაპის, ნიკოლოზ პირველისადმი წერილში⁵ ფოტი თავის ბიძად ასახელებს იმ დიდ ტარასის, რომელიც კონსტან-

¹ ეს ხდებოდა ქრისტეს შობიდან 813 წელს.

² Collect. concil. ah Harluino. Paris. 1713. Tom. V. col. 960.

³ Epist. 234. pag. 349. Edit. Londin. an. 1651.

⁴ Annal. Baron. ann. DCCCLXI numer. LII.

ტინესა და ირინეს დროს კონსტანტინოპოლის პატრიარქი იყო და რომლის დროსაც შედგა ნიკეის მე-2, მე-7 მსოფლიო კრება ხატმებრძოლთა წინააღმდეგ.

§ 4. ფოტის სამართლიანად შეიძლება ვუწოდოთ სწავლულობის მწვერვალი. მის მიერ შექმნილი აურაცხელი ცოდნის გამო თანამედროვეთაგან მას ტოლი არ ჰყოლია, და დიდი ხნის მანძილზე არც მის შემდეგ გამოჩენილა ვინმე მისი მსგავსი. მან არამარტო ერთი რომელიმე მეცნიერება იცოდა სრულყოფილად, არამედ თითქმის ყველა. ფოტი ფილოსოფიის, მედიცინის, ასტრონომიისა და ღვთისმეტყველების შესანიშნავი მასწავლებელი იყო. მისი დანატოვარი ბიბლიოთეკა, რომელიც უამრავ აღწერილ და განხილულ წიგნს მოიცავს, საკმარისი მოწმობაა როგორც მისი ფართო მეცნიერული ცოდნისა და მწერლობის სწორი შეფასებისა, ასევე მისი დაუღალავი მუყაითობისაც, რომლის წყალობითაც მან ესოდენ ბევრი თხზულება წაიკითხა. ფოტი პოლიტიკაშიც არანაკლებ გამოირჩეოდა, არამარტო როგორც მისი თეორიული მცოდნე, არამედ როგორც პოლიტიკური მოღვაწეც; ამის გამო მან დიდ პატივს მიაღწია სახელმწიფოში და მაღალ თანამდებობებს აღასრულებდა, სახელდობრ: პროტოსპათარისა და პირველი მრჩეველისა იმპერატორ თეოფილეს დროს, შემდეგ სენატორისა; ამასთან, იოანე დიაკვნის სიტყვებით⁶, სენატში მას პირველი ადგილიც კი სჭერია. გარდა ამისა, სენატის გამწესებისა და იმპერატორის მითითების თანახმად, ფოტი ელჩად ყოფილა წარგზავნილი ასურელებთან, რასაც იგი თავად მოწმობს თავისი ძმის, ტარასისადმი გაგზავნილ წერილში. ასეთები იყვნენ ეგნატე და ფოტი, სანამ პატრიარქები გახდებოდნენ.

§ 5. მიხეილის მეფობის მეექვსე წელს, რომელიც თავისი მამის, თეოფილეს სიკვდილის შემდეგ დედამის თეოდორასთან ერთად მართავდა სახელმწიფოს, გარდაიცვალა კონსტანტინოპოლის პატრიარქი უწმინდესი მეთოდე. ტანტზე აიყვანეს ეგ-

⁶ იხ. იოსებ. ჰიმნოგრაფის ცხოვრება,

in Act. SS. April.

ნატე⁷. ამ არჩევანს ყველა ეპისკოპოსი და კრებულის წევრი როდი ემხრობოდა. ბევრი იყვნენ წინააღმდეგნი, მათ შორის კი პირველ რიგში — სირაკუზელი მთავარეპისკოპოსი გრიგოლი. აღნიშნულის გამო ეგნატე მასზე იმდენად განაწყენდა, რომ თავის პატრიარქად აღსაყდრების დღეს არ მოისურვა, მასთან ერთად აღესრულებინა წირვა; მან ბრძანა, რომ გრიგოლი მღვდელთმოქმედებას არ დასწრებოდა. ბევრს არ მოეწონა ეგნატეს ეს საქციელი, რითაც მან თავისი პატრიარქობის დასაწყისშივე გამოამჟღავნა გრიგოლისადმი უსიყვარულო დამოკიდებულება. მალე ეგნატემ მოიწვია კრება, რომელზედაც სამღვდელო ხარისხი აპყარა გრიგოლს და ელჩობასთან ერთად წერილი გაუგზავნა რომის პაპებს, ჯერ ლევ IV-ს, შემდეგ ბენედიქტე III-ს იმ მიზნით, რომ მათაც იგივე განაჩენი გამოეტანათ მისთვის, და აღმოსავლეთისა და დასავლეთის ეკლესიათა ამ ერთობლივი განჩინებით თავისი გადაწყვეტილება კიდევ უფრო განემტკიცებინა. მაგრამ არც ლევის, არც ბენედიქტეს არ სურდათ, მონაწილეობა მიეღოთ გრიგოლის დამხობაში. ამას მოწმობს ლევისა და ბენედიქტეს მომდევნო რომის პაპის ნიკოლოზ I-ის წერილი იმპერატორ მიხეილისადმი⁸. თუმცა, საწინააღმდეგოს ამტკიცებს სტილიან ნეოკესარიელი⁹, რომელსაც ბარონიცი¹⁰ ეთანხმება.

§ 6. შეუტაცხოფილმა გრიგოლმა თავისი მღვწევის წინააღმდეგ იწყო ქმედება. მას ხელს უწყობდნენ როგორც მღვდელმთავრები და სამღვდლო წევრნი, ასევე არაერთი საერო დიდებულიც, რომელთა რიცხვში ფოტიც იყო. იგი ამას ადასტურებს თავის III წერილში გრიგოლის მიმართ. დადგა ის დროც, როდესაც ეგნატეს ბრალმდებლებმა საერთო ძალისხმევით შეძლეს მისი საბოლოო განადგურება. აი, როგორ მოხდა ეს:

§ 7. ეგნატეს საპატრიარქო ტახტზე ასვლიდან თერთმეტი წლის შემდეგ პატრიცი და სასწავლებლების მთავარი ზედამ-

⁷ ეს ხდებოდა ქრისტეს შობიდან 847 წელს.

⁸ In collect. Concil. Narduin. T. V. Epist. IX. column. 164.

⁹ Ibidem. Epist. ad Stephan. VI. Pontific. Ram. col. 1121.

¹⁰ Ad. ann. DCCCLVI. num. VII. Tom. X.

ხედველი ბარდა ცოლს გაეყარა (როგორც ამბობენ, უმიზეზოდ), და საკუთარ რძალთან უკანონო კავშირი დაამყარა¹¹. სარწმუნოებისათვის თავდადებულმა ეგნატემ ამგვარი აშკარა საცთურის მოთმენა ვერ შეძლო; იგი მრავალგზის შეაგონებდა და ამხილებდა საეკლესიო კანონების დამრღვევს, მაგრამ ამოდ. ამის გამო ერთ ღღესაც, სახელდობრ უფლის განცხადების ღღესასწაულზე, როდესაც ბარდას სურდა იმპერატორთან ერთად ზიარებულიყო, პატრიარქმა იგი ზიარებიდან განაყენა, როგორც ცოდვილი. ბარდა თავდაპირველად ცდილობდა პირმოთნეობით მოეპოვებინა პატრიარქის კეთილგანწყობა; მაგრამ როდესაც თავისი დანაშაულის შეწყყნარებას ვერ ეღირსა, უღიღესი სიძულვილით აღივსო ეგნატეს მიმართ; მან გადაწყვიტა, ყოველი ღონე ეხმარა მისი ტახტიდან ჩამოსაგდებად. როგორც იმპერატორ მიხეილის ბიძა და თეოდორას ძმა (რომელიც მართალია არ ამართლებდა ძმის საქციელს), ბარდა იმ დროს დიდი უფლებებით და ძალით სარგებლობდა, და თავისი სურვილისამებრ მართავდა იმპერატორსა და სამეფო კარს. საკუთარი განზრახვის განსახორციელებლად, ყოველგვარი დებრკოლების თავიდან აცილების მიზნით, მან იმპერატორს ურჩია, სახელმწიფო საქმეებს ჩამოეშორებინა დედამისი თეოდორა და და თეკლა, რომლებიც იმპერატორის ხელისუფლებას იყოფდნენ და პატრიარქ ეგნატესათვის მათი მონაზვნად აღკვეცა ებრძანებინა. მიზეზად ბარდა ასახელებდა იმას, რომ იმპერატორი ბავშვობის ასაკიდან გამოსულია, და უმართებულოა, დედას ემორჩილებოდეს, რომელიც გათხოვებას აპირებს და იმპერატორის ხელისუფლებაც თავის მომავალ მეუღლეს უნდა რომ გადასცეს; რაშიც მას მხარს უჭერს და ეხმარება პატრიარქი ეგნატე. ახალგაზრდა იმპერატორმა ირწმუნა ბიძის სიტყვები და პატრიარქს მაშინვე უბრძანა დედისა და დის აღკვეცა. პატრიარქი არ თანხმდებოდა და პასუხობდა, რომ სამეფო პირთა აღკვეცა მათი ნება-სურვილის წინააღმდეგ ყოველგვარ კანონს ეწინააღმდეგება, რომ მას არ შეუძლია, ძალდატანებით აიძულოს ისინი,

¹¹ Leo Grammat. in Chronographia, edit. Paris. 1655. pag. 462. Johan. Zonal. Tom. II. pag. 161. edit. Paris. 1687. Noan. Seyt. Collect. Concil. Hard. Tom. V. col. 1148.

იტვირთონ ბერმონაზვნური ცხოვრება, რომელსაც საკუთარი ნებით არ ირჩევენ; რომ მან ფიცი დადო და ვალდებულია, არასოდეს მათი საწინააღმდეგო ბოროტი განზრახვები არ იქონიოს. მაგრამ ამ პასუხმა იმპერატორს კიდევ უფრო განუმტკიდა ეგნატეს შეეხებოდა; ამის გამო მან დედამისი თეოდორა და თავისი და სასწრაფოდ ჩამოაცილა სახელმწიფო საქმეებს და ბრძანა, დაუყოვნებლივ აღეკვეცათ ისინი კარიანის მონასტერში. ამის შემდეგ მალე პატრიარქიც ჩამოავდო ტახტიდან¹².

§ 8. თუ ეგნატეს მომხრე ისტორიკოსებს დავუჯერებთ¹³, მაშინ იმპერატორმა მიხეილმა, ბარდამ და მათმა თანამოაზრეებმა გაითვალისწინეს, რომ იმ შემთხვევაში, თუ ეგნატე ნებაყოფლობით არ უარყოფდა პატრიარქის ტახტს, მაშინ სამღვდელო დასის დიდი ნაწილი ახალ პატრიარქს უხალისოდ შეხვდებოდა; პატრიარქის არჩევას კი ისინი სამ დღეში აპირებდნენ. მათ ორგზის წარგზავნეს ეპისკოპოსები და რჩეული დიდებულები, რათა მათ დაპირებებით თუ მუქარით დაეყოლიებინათ ეგნატე, საკუთარი ნებით განეცხადებინა წერილობითი უარი ტახტზე. მაგრამ ეგნატე არავეითარ შემთხვევაში არ თანხმდებოდა, თუმცა, იმპერატორის წერილში პაპი ნიკოლოზის მიმართ ნათქვამია, რომ ეგნატემ თვითონ თქვა უარი საეკლესიო საქმეების მართვაზე მოხუცებულობისა და ხორციელი უძლურების გამო.

§ 9. ყოველივე ამის შემდეგ დიდხანს მსჯელობდნენ და ბჭობდნენ, თუ ვინ აეყვანათ საპატრიარქო ტახტზე. ამ მაღალი წოდების ღირსად მიიჩნიეს ფოტი, ვინაიდან იგი ამ დროისათვის განთქმული იყო არამართო სიბრძნით, არამედ კეთილმსახურებითაც; და ეპისკოპოსებისა და დასის წვერთა კრებაზე, რომელსაც თვით იმპერატორი და მისი ბიძა ბარდა ესწრებოდნენ, იგი სამეფო ქალაქის პატრიარქად გამოაცხადეს. „ერთმანეთში მრავალი სჯისა და თათბირის შემდეგ პროტოსპა-

¹² Nicet. Dav. Hist. col 956.

¹³ Irem col. 957 et 980.

თარი და პირველი მრჩეველი ფოტი აირჩიეს დედაქალაქის მთავარეპისკოპოსად“ — ამბობს ნიკიტა დავით პაფლაგონელი¹⁴. ფოტი არჩევანზე არ თანხმდებოდა, სთხოვდა, ევედრებოდა, ტიროდა და უარს აცხადებდა მისთვის შემოთავაზებულ პატრიარქის წოდებაზე¹⁵. მაგრამ იმპერატორი დაეინებით მოითხოვდა თავისას, შეიტყო თუ არა, რომ ფოტი ნებით არ თანხმდებოდა, მან ძალას მიმართა. ბრძანა, დაეპატიმრებინათ იგი, ვიდრე იმპერატორის ნებას არ აღასრულებდა. ვინაიდან ფოტი ერისკაცი იყო, ამიტომ სირაკუზელმა მთავარეპისკოპოსმა გრიგოლმა ის პირველ დღეს ბერად აღკვეცა, მეორე დღეს ხელი დაასხა მედავითნედ, მესამე დღეს იპოდიაკვნად, მეოთხე დღეს დიაკვნად, მეხუთე დღეს მღვდლად, ხოლო მეექვსე დღეს, 25 დეკემბერს, ანუ ქრისტეს შობას, პატრიარქად¹⁶. მაგრამ ეს ყოველივე ერთ დღეში არ მომხდარა, როგორც ამას სტეფანე VI-ს სტილიან ნეოკასარიელი წერს¹⁷. თავდაპირველი წინააღმდეგობის მიუხედავად, ფოტის არჩევას დასთანხმდნენ ეგნატეს მომხრე ეპისკოპოსებიც, ასე რომ, იგი საერთო მოთაბირებითა და მთელი კრებულის თანხმობით აირჩიეს, თუ არ ჩავთვლით ხუთიოდე კაცს, რომელთა შესახებ ფოტის აშკარა მოწინააღმდეგენი — მიტროფანე სმირნელი, სტილიან ნეოკესარიელი, ნიკიტა და თეოგნოსტე მოგვეთხრობენ. მაგრამ ამაშიც ძნელია მათ ერწმუნო, ვინაიდან ისინი მრავალ ფაქტს მიკერძობებულად აღწერენ, ხოლო ფოტის უაზროდ სწამებენ ცილს, ბრალს სდებენ იმაში, რაშიც მას არავითარი მონაწილეობა არ მიუღია და რის შესახებაც არაფერი სცოდნია. მაგალითად, თითქოს ფოტის თავად სურდა, რადაც არ უნდა დასჯდომოდა, პატრიარქი გამხდარიყო, თითქოს ის ყოფილიყოს ეგნატეს დამხობისა და ყველა მისი უბედურების მიზეზი. მაგრამ ჭერ ერთი, როგორც ზემოთ აღვნიშნეთ, ეგნატე იმპერატორმა და ბარდამ დაამხვეს. მეორეც, ფოტი ყოველგვარად

¹⁴ Nicet. Dav. col. 960.

¹⁵ Epist. Phot. ad Pontif. Nicol. et. Epist. VI. od Bardam, pag 69.

¹⁹ Nicet. Dav. col. 961.

¹⁷ Epist ad steph. VI. Pontif. Rom. in Sollect. Concil. Harduin. Tom. V. col. 1121.

ცდილობდა, თავი აერიდებინა პატრიარქიის წოდებისათვის, რომელიც მან თავისი სურვილის წინააღმდეგ მიიღო. ამის უტყუარი მოწმე თვით ფოტის წერილებია პაპი ნიკოლოზისა და ბარდას მიმართ¹⁶. ბარდას ფოტი სიცრუის მიწერას ვერ გაუბედავდა, ვინაიდან ბარდა თვითონ გახლდათ ამ საქმის მონაწილე და ყოველივე ზედმიწევნით უწყოდა. ხოლო ფოტის მტრები ნდობას არ იმსახურებენ, როგორც მისი მოწინააღმდეგენი, მითუმეტეს, რომ ისინი ზოგჯერ თვითონვე ეწინააღმდეგებიან ერთმანეთს.

§ 10. გაძევებული ეგნატეს მომხრეები თითქოს შეურიგდნენ ფოტის და იგი კანონიერ პატრიარქად აღიარეს; მაგრამ მისი აღსაყდრებიდან ორი თვეც არ გასულა, რომ კვლავ დაუპირისპირდნენ მას და თავისივე თანხმობა უარყვეს. ისინი განუდგნენ ფოტის და წმ. ირინეს ტაძარში შეკრებილებმა მისი დამხობა გადაწყვიტეს, ანათემას გადასცეს და ერთხმად მოითხოვდნენ საპატრიარქო ტახტზე ეგნატეს დაბრუნებას, რომელსაც კონსტანტინოპოლის ეკლესიის ერთადერთ კანონიერ მთავარეპისკოპოსად და მწყემსად მიიჩნევდნენ. ამგვარმა საქციელმა დიდი არეულობა გამოიწვია, ბევრი განუდგა ფოტის და ეგნატეს მიემხრო. ყოველივე ეს აშკარად შეურაცხმყოფელი იყო ფოტის თავგამოდებული დამცველებისათვის — იმპერატორ მიხეილისა და კეისარ ბარდასათვის. ორივენი ძლიერ განრისხდნენ, და, როგორც ნიკიტა წერს¹⁹, გაძევებულ ეგნატეს მრავალი შეურაცხყოფა მიაყენეს, ყვრიმალს სცეს, ბორკილი აასხეს, დაატუსაღეს და ბოლოს კუნძულ ტერევეინტიდან მიტილენაში გადაასახლეს, რადგან ეგონათ, რომ არეულობა თვით ეგნატემ წარმოშვა ტახტის დაბრუნების მიზნით. ასევე მოექცნენ ეგნატეს ერთგულ ეპისკოპოსებსა და კრებულის წევრებს: ერთნი გადაასახლეს, მეორენი დააპატიმრეს, ხოლო ვინმე ვლასი — ქარტოფილაქსს ქადაგებისას გადაჭარბებული გამბედაობისათვის ენა ამოჰკვეთეს. შემდეგ წმ. მოციქულთა ტაძარში შედგა ეპისკოპოსთა და დასის წევრთა კრება, რო-

¹⁶ Epist. III. pag. 67. et Ep. VI. pag. 69. 70.

¹⁹ Nicet. Dav. col. 964.

შელსაც იმპერატორი და ბარდაც ესწრებოდნენ. კრებაზე ეგნატე მღვდელმთავრობის უღირსად გამოცხადდა, იგი ეკლესიიდან განკვეთეს და შეაჩვენეს.

§ 11. ამგვარ დევნას ეგნატე ნამდვილად არ იმსახურებდა; იგი უსამართლოდ შეიპყრეს და განკვეთეს ეკლესიიდან; პირიქით, ის, როგორც პატრიარქი პატივისცემას იმსახურებდა და როგორც მოხუცი, თანაგრძნობის ღირსი იყო. კაცთა რისხვამ კი ხშირად არც კანონი იცის და არც ზღვარი. მაშინდელ ვითარებაში ამ კეთილი მოძღვრის მომხრეებს სხვაგვარად უნდა ემოქმედათ; მაგრამ მათ სძულდათ ფოტი. თვითონ სასულიერო წოდებისანი იყვნენ და საპატრიარქო ტახტზე ერისკაცს გულგრილად ვერ უცქერდნენ. შესაძლოა, მათ ერთგულება ამოძრავებდათ, მაგრამ ეს ერთგულება გონიერებას მოკლებული იყო. ფოტისადმი სიძულვილი იმდენად ძლიერი იყო, რომ მას ეგნატესა და ეგნატეს თანამდგომთა ყველა უბედურებაში ადანაშაულებდნენ, ცდილობდნენ, იგი ყველასათვის საძულველი გამხდარიყო. მაგრამ ფოტი არათუ ხელს უწყობდა იმ უბედურებებს, არამედ (როგორც ის ბარდა კეისარს სწერს²⁰), თანაუგრძნობდა, წუხდა და გული შესტკიოდა ეგნატეზე. ფოტი შუამდგომლობდა ზემოთხსენებულ ვლასის, რომელსაც ენა ამოჰკვეთეს; საყვედურობდა ბარდას, როგორც ყოველივეს მიზეზს; ჩიოდა, რომ თავისი ნების წინააღმდეგ აკურთხეს პატრიარქად; ამბობდა, რომ მოსალოდნელ უბედურებათა შესახებ მან წინასწარ იცოდა და ამიტომაც არ თანხმდებოდა, და რომ იგი ყოველთვის მზადაა, პატრიარქის წოდებაზე უარი განაცხადოს. ფოტი ამას ვინმე შორს მცხოვრებ, ანდა მომხდარ მოვლენებში გაუთვითცნობიერებელ ადამიანს კი არ სწერდა, არამედ სწორედ იმ ბარდას, რომელმაც ყოველივე უწყობდა და ყველაფრის მიზეზიც იყო. ამასთანავე, საკმაოდ აშკარად ჩანს ამ წერილებიდან, რომ ფოტი არ თვალთმაქცობდა, არამედ გულწრფელად წერდა სინამდვილეს.

§ 12. თუმცა, ყოველივე ამან არათუ არ შეწყვიტა, არამედ

²⁰ Epist. III. pag. 63 et sequ te Ep. VI. pag. 69.

კიდევ უფრო გაამძაფრა მოწინააღმდეგე მხარეთა ბრძოლა და ეკლესიის მღელვარება, რომელსაც იმ დროისათვის ეკლავ გაძლიერებული ხატმებრძოლთა მწველებლობაც თან დაერთო. ამიტომ იმპერატორმა, ბარდას რჩევით, გადაწყვიტა წერილობით მიემართა რომის პაპი ნიკოლოზისათვის, რათა მას ეკლესიაში საცთურის შეწყვეტის მიზნით კონსტანტინოპოლის კრებაზე ელჩები გამოეგზავნა. თავის მხრივ მან წარავლინა ეპისკოპოსი მეთოდე, სამუელ, ზაქარია და თეოფილე, აგრეთვე პროტოსპათარიც, ძვირფასი ძღვენითურთ. ამ მართლაც რომ მეფურ საეკლესიო ჭურჭელს და შესამოსელს დაწვრილებით აღწერს ანასტასი ბიბლიოთეკარი ნიკოლოზის ცხოვრებაში²¹. იმპერატორი ხედავდა, რომ გადამტერებულთა შერიგება აღმოსავლეთის ეპისკოპოსთა მეშვეობით შეუძლებელია, მას მიაჩნდა, რომ თუ მოსაწვევ კრებაზე ეგნატეს დამხობასა და ფოტის არჩევას პაპი ნიკოლოზიც დაამოწმებდა, მაშინ სხვებიც იგივეს დაადასტურებდნენ, და ამგვარად აღმოსავლეთის ეკლესიაც დასცხრებოდა. მაგრამ ნიკოლოზისათვის ამ საქმის თაობაზე არავითარი ელჩობა არ წარუგზავნია ფოტის, როგორც მას ცილს სწამებენ ნიკიტა, მიტროფანე და სტილიანი, მისი აშკარა მტრები. ისინი წერილობით გვარწმუნებენ, რომ თითქოს ფოტის ნიკოლოზისათვის ელჩები ეთხოვოს ტახტის დასამტკიცებლად. სრულიად საწინააღმდეგოზე მეტყველებს ფრანცისკო კომბეფიზის მიერ ქრ. შ.-დან 1672 წელს პარიზში გამოქვეყნებული „წმიდა მამების ბიბლიოთეკის“ დანართში მოთავსებული ფოტის წერილი პაპი ნიკოლოზის მიმართ, რომელიც ასე იწყება: „ძველი რომის პაპს, ყოვლადუწმიდეს ძმასა და თანამსახურ ნიკოლოზს“, ამასვე მოწმობს იქვე მოთავსებული პაპი ნიკოლოზის საპასუხო წერილიც ფოტისადმი: არცერთ ამ წერილში არაფერია ნათქვამი ელჩებზე, აღნიშნული ისტორიკოსები რომ ამბობენ, ფოტი მათი გამოგზავნის თხოვნით მიმართავდაო ნიკოლოზს. ცნობილია, რომ უწინ ქრისტესმიერი ურთიერთსიყვარულისა და ეკლესიათა შორის ურთიერთკავშირის დაცვისათვის, განსაკუთრებით კი მნიშვნელოვანი საეკლესიო მოვლენების დროს, ეკლესიები ერთმანეთს ეპის-

²¹ T. I, pag. 409. Edit. Pom. 1718.

ტოლეებს უგზავნიდნენ. ამ ეპისტოლეებს ეწოდებოდათ სა-
უწყებონი. მათი მეშვეობით ახლად არჩეული ეპისკოპოსები
დანარჩენ ძმებს თავის აღსაყდრებას ატყობინებდნენ, და თანა-
მოაზრობის დასტურად თავიანთ მრწამსს უგზავნიდნენ. ამ
ძველ ჩვეულებას არც ფოტი ღალატობს და ნიკოლოზს ამ-
ცნობს თავის აღსაყდრებას, რომელიც მისი ნების წინააღმდეგ
მოხდა. უგზავნის მას მრწამსს, რადგანაც, როგორც იგი ამ-
ბობს, „ყველაფერს აღემატება რწმენით ერთობა და ყველაზე
წმიდაა ქეშმარიტი სიყვარული“...

§ 13. როგორც არ უნდა ყოფილიყო იმპერატორის გან-
ზრახვა, ის კარგად არ მოიქცა, როდესაც პაპს ელჩები გაუგ-
ზავნა. მისმა მოქმედებამ ის დამლუბველი უთანხმოება გააღვი-
ვა, მომავალში აღმოსავლეთისა და დასავლეთის ეკლესიათა
განყოფით ეკლესიას დიდი ზიანი რომ მიაყენა. პაპი ნიკოლო-
ზი ძალაუფლების მოყვარე იყო, ამასთან მას თავის წინამორ-
ბედებთან შედარებით, ყველაზე მეტად სურდა, ძალაუფლება
უკვე თითქმის სრულიად დამონებული დასავლეთიდან აღმო-
სავლეთამდე გაეცრელებინა, რათა, როგორც ბასილი დიდი
ამბობს²², ის მსოფლიო საეკლესიო მონარქია შეექმნა, რომელ-
ზედაც დასავლეთური ამპარტავნება ოცნებობდა. პაპი დიდი
სიხარულით შეეგება იმპერატორის ელჩებს, ძღვენსა და წე-
რილს; მან ბრძანა თხოვნის დაუყოვნებლივ აღსრულება, რად-
განაც იმედოვნებდა, რომ ამ ყველაზე უფრო ხელსაყრელი
შემთხვევით იგი თავის მიზანს განახორციელებდა და აღმო-
სავლეთის ეკლესიას დასავლეთისას დაუმორჩილებდა. შემდეგ
მან ელჩებად წარგზავნა ეპისკოპოსები როდოლდი და ზაქა-
რია, დაავალა, თვითონ გაერკვიათ და კეთილმსახურებისა და
სამართლიანობის კანონების დაცვით გადაეჭრათ წმ. ხატების
საკითხი, ხოლო ფოტისა და ეგნატეს საქმე არ გადაეწყვიტათ,
არამედ საფუძვლიანად გამოეკვლიათ, რომში დაბრუნებულიყ-
ვნენ და ყოველივე მისთვის მოეხსენებინათ, რათა მას, რო-
გორც უზენაეს მოსამართლეს, მსჯავრი და განაჩენი გამოე-

²² Oper. S. Bas. T. III. pag. 368. edit Paris 1730 an.

ტანა²³. როდესაც პაპის ელჩები კონსტანტინოპოლში ჩავიდნენ, წმ. მოციქულთა ტაძარში მოწვეულ იქნა კრება, რომელსაც 318 ეპისკოპოსი დაესწრო, ანუ იმდენივე, რამდენიც პირველ ნიკეის წმ. კრებას. ამ კრებაზე ფოტი კანონიერ პატრიარქად აღიარეს, რაც პაპის საპირისპირო ბრძანების მიუხედავად, ნიკოლოზის ელჩებმაც დაადასტურეს. იმპერატორსა და პატრიარქს ნიკოლოზის მიერ წარმოგზავნილი ელჩები ამ საქმის გამომძიებლად და მსაჯულად კი არ სჭირდებოდათ, არამედ საერთო სიმშვიდის ხელისშემწყობად და შემწედ. ისინი არაფრით არ თანხმდებოდნენ პაპი ნიკოლოზის სურვილს, რომ საქმე, რომელიც კონსტანტინოპოლის ეკლესიას ეხებოდა, განსახილველად და გადასაწყვეტად გადასცემოდა რომს — გარეშე სამსჯავროს. კრების დახურვის შემდეგ (რომელიც მეორე — პირველად იწოდება, რადგანაც მასზე დამსწრე მამები ორჯერ შეიკრიბნენ²⁴), იმპერატორმა კრების აქტი პაპ ნიკოლოზს გაუგზავნა და სთხოვა, საგანგებო წერილით დაედასტურებინა ყოველივე, რაც კრებამ დაადგინა. პატრიარქმა ფოტიმაც გაუგზავნა კრებამდე მიღებული ეპისტოლეს საპასუხო წერილი პაპ ნიკოლოზს. ამ წერილში იგი ნიკოლოზის ყველა ფრიად უხეშსა და შეურაცხმყოფ გამოთქმას სიყვარულისა და ერთგულების ნიშნად მიიჩნევს, და გარკვევით ამბობს, რომ იგი იძულებული იყო, პატრიარქის ტიტული ნების წინააღმდეგ მიეღო. და წერს, რომ როცა უწინდელ მშვიდ მდგომარეობას ახლანდელ პატრიარქის ტახტზე ყოფნას ადარებს, თავს ძალზე უბედურად თვლის, ამიტომაც სიბრაალულს უფრო იმსახურებს, ვიდრე გაკიცხვას. ამასთან დასძენს, რომ თუმცა იგი პატრიარქად ერისკაცთაგან აკურთხეს, მაგრამ მას საეკლესიო კანონები არ დაურღვევია, რადგანაც ის კანონები, რომელიც ამას კრძალავს, მხოლოდ ლათინთა ეკლესიაშია მიღებული, და არა აღმოსავლეთისაში. შესაბამისად, აღმოსავლეთში ვინც ამ კანონებს არ იცავს, იგი არც მათი დამრღვევი არაა. ყველასათვის სავალდებულოა მხოლოდ მსოფლიო, საყოველთაოდ

²³ An' Bibliothec in vita Nic. T. I, p. 409 et 414. edit. 1649. Paris.

²⁴ Balsam. schol. ad, hanc. Synod in Synod. Beveteg. T. I, p. 331, edit. Oxon 1672.

დადგენილი კანონების დაცვა; კერძო კანონებიდან კი ლათინთა ეკლესიის მიერ მიღებული ზოგიერთი კანონი აღმოსავლეთისას არ ეთანხმება; მაგალითად, აღმოსავლეთის ეკლესიაში მღვდლებს უფლება აქვთ, მეუღლე ჰყავდეთ, ლათინთა ეკლესია კი ამას კრძალავს. აღმოსავლეთის ეკლესიაში ერისკაცობიდან საპატრიარქო ტახტზე აიყვანეს ნექტარი, ტარასი და ნიკიფორე; ლათინი ამბროსი მედიოლანელიც მონათვლისთანავე მთავარეპისკოპოსად აკურთხეს. შემდეგ ფოტი წერს, რომ დასავლეთისა და აღმოსავლეთის ორ ეკლესიას შორის მეტი ერთობისა და თანხმობის მიზნით, ყოველგვარი საცთურის ლოდის თავიდან ასაცილებლად მან კრებაზე ისიც დაადგინა, რომ ამიერთგან ეპისკოპოსად ერისკაცთაგან აღარავინ აერჩიათ. შემდეგ ფოტი ნიკოლოზს არწმუნებს, წმ. მამების დადგენილებებს არ გადააბიჯოს და წერილობითი მოწმობების გარეშე არ მიიღოს კონსტანტინოპოლიდან რომში ლტოლვილნი²⁵, უმალ არ ირწმუნოს მათი, ვინაიდან ეს ხალხი უმეტესწილად თვითონაა საცთურის მიზეზი და დანაშაულის ჩამდენი, ისინი რომში იმისათვის გარბიან, რომ დამსახურებულ სასჯელს გადაურჩნენ, თავისი ეპისკოპოსების შესახებ ცილისწამებებს ავრცელებენ და ეკლესიის წინამძღვართა შორის მშვიდობას და თანხმობას არღვევენ. ბოლოს, ფოტი პირდაპირ აცხადებს, რომ იგი უხალისოდ ავიდა საპატრიარქო ტახტზე, ასევე უხალისოდ რჩება მასზე და ყოველთვის მზადაა, იგი დატოვოს.

§ 14. ადვილი წარმოსადგენია, როგორ შეხვდებოდა ნიკოლოზი აღნიშნული კრების გადაწყვეტილებას. იგი განაწყენდა, რომ კონსტანტინოპოლის საქმე მისი იმედისა და სურვილის შესაბამისად არ დაგვირგვინდა; გადაწყვიტა, შური ეძია თავისი უზომო ძალაუფლებისმოყვარეობის შეურაცხყოფისათვის და ფოტის დაუფარავ მტრად და ეგნატეს ქომაგად იქცა. პაპი ეკლესიაში უზენაესი ძალაუფლების მიღწევას ესწრაფვოდა, ამიტომაც თავდაპირველად მან იმპერატორ მიხეილს ეპისტოლე გაუგზავნა, რომელშიც ხატთმებრძოლთა თაო-

²⁵ Canon. Apostol. XIV et XXXII.

ბაზე მიღებულ გადაწყვეტილებას ადასტურებდა, ხოლო ეგნატეს დამხობასა და ფოტის არჩევას არ ეთანხმებოდა. გარდა ამისა, ყოველგვარი საცთურისა და ეპისკოპოსებისა და სამღვდელთა დასის წევრების აზრთა სხვადასხვაობის საბოლოოდ შეწყვეტის მიზნით ურჩევდა, მიემართა რომის ეკლესიის სამსჯავროსა და გადაწყვეტილებისათვის. იმპერატორისადმი ეპისტოლეს ტონი ზომიერია, სამაგიეროდ პაპი მკაცრად სწერს პატრიარქ ფოტის, რომ რომის ეკლესია ყველა დანარჩენ ეკლესიათა თანია იმ უპირატესობის გამო, რომელიც პეტრე მოციქულს იესო ქრისტემ მიანიჭა, და რომ აქედან გამომდინარე, რის დადგენასაც იგი მოისურვებს, დანარჩენებმა უცვლელად უნდა შეასრულონ, თუნდაც ეს ტრადიციებს ეწინააღმდეგებოდეს. რომ ის (ფოტი) ერისკაცობიდან გახდა პატრიარქი, რითაც მიუტევებელი დანაშაული ჩაიდინა, რადგან დასავლეთის ეკლესიის კანონები ამას კრძალავს, ფოტი კი ვალდებულია მის დადგენილებებს სცნობდეს და იცავდეს; რომ ნექტარი მართლაც ერისკაცი იყო, როდესაც იგი ამ უწმინდეს ხარისხში აიყვანეს, მაგრამ მაშინ კრებულში მასზე ღირსეული არავინ აღმოჩნდა. ტრასიც იმიტომ გახადეს საპატრიარქო ტახტის ღირსი, რომ იგი ხატის თაყვანისცემისათვის იბრძოდა, ხოლო ამბროსი პატრიარქად სასწაულთმოქმედების გამო აკურთხეს; ფოტი კი აღესაყდრა ერისკაცობიდან, თანაც ჭერ კიდევ ეგნატეს სიცოცხლეში და მისი სურვილის წინააღმდეგ, ამიტომ რომის პაპი მას პატრიარქად არ აღიარებს, და ამ წოდების ღირსად მაინც ეგნატეს მიიჩნევს. ასეთია ფოტის მიმართ ნიკოლოზის საპასუხო ეპისტოლეს შინაარსი! მაგრამ პაპი ორ პუნქტს არ პასუხობს: ნიკიფორეს თაობაზე, რომელიც კონსტანტინოპოლის ეკლესიამ პატრიარქად ყოველგვარი განსაკუთრებული საჭიროების გამო აირჩია და დაამტკიცა; და საცთურის დანაშაულებრივ წარმომშობთა შესახებ, რომლებიც კონსტანტინოპოლიდან რომში გარბოდნენ და რომლებსაც ნიკოლოზი ღებულობდა. გარდა ამისა, პაპმა მეორე ეპისტოლე გაუგზავნა აღმოსავლეთის პატრიარქებსა და მთავარეპისკოპოსებს, რომელშიც მათ ატყობინებს, რომ რომის ეკლესია ფოტის არჩევას არ ეთანხმება, და მბრძანებლური კილოთი მოციქულეობრივი უფ-

ლებით (როგორც თვითონვე ამბობს) მოითხოვს, რომ ისინიც ასევე მოიქცნენ და დანარჩენებსაც ამცნონ ყოველივე.

§ 15. ამგვარად წერდა პაპი ნიკოლოზი აღმოსავლეთს²⁶. დასავლეთში კი მან ყველა ეპისკოპოსი რომში შეკრიბა, მოიწვია კრება, რომელზედაც კონსტანტინოპოლის აქტის წაკითხვა ბრძანა და საზეიმოდ განაცხადა, რომ იგი აღანაშაულებს ფოტის, როგორც ერისკაცობიდან ასულს საპატრიარქო ტახტზე და შეპრაცხავს მას, ვითარცა მპარავსა და ავაზაკს. რომ ფოტი ფიცის გამტეხია, ვინაიდან მან წერილობით დადო აღთქმა, გაძევებული ეგნატე და მისი მეგობრები არ შეევიწროვებინა, შემდეგ კი მათ არაერთი ბოროტება მიაგო და ბოლოს კრებაზე ანათემასაც გადასცა; რომ მან კრება უკანონოდ მოიწვია; რომის ეკლესიის გასაწბილებლად კი ელჩები (პაპის) მოატყუა და პაპის ბრძანების მიუხედავად თავის მხარეს გადაიბირა; რომ იგი უსამართლოდ მოიქცა, როცა ღირსება აპყარა მის წინააღმდეგომ ეპისკოპოსებს და მათ ნაცვლად თავისი თანამოაზრეები დაადგინა. ამ მიზეზთა გამო პაპმა დაგმო ფოტის პატრიარქობა და მღვდლობა, იგივე განაჩენი გამოუტანა მის მიერ ხელდასხმულებს და ისინი ერისკაცებად გამოაცხადა; რაც შეეხება ეგნატეს, პაპმა ბრძანა მისი კანონიერ და ჭეშმარიტ პატრიარქად აღიარება და მის გამო წამებულ ეპისკოპოსთა უწინდელ ადგილებზე დაბრუნება; ამასთან ყოველ ერისკაცსა თუ სამღვდლო დასის წევრს, რომელიც ამ კრებაზე მიღებულ დადგენილებას დაარღვევდა, იგი ანათემით, შეჩვენებით, განუსხნელი განკვეთით და მარადიული სატანჯველით ემუქრებოდა. პაპმა ნიკოლოზმა ყოველივე ამის შესახებ აცნობა აღმოსავლეთს, ხოლო ფოტის, ბარდა კეისარსა და ეგნატეს საგანგებო ასლები გაუგზავნა. აქედან ნათლად ჩანს, რომ ნიკოლოზმა დაუჯერა რომში ლტოლვილ ფოტის მტრებს, რადგანაც იგი ფოტის იმაში აღანაშაულებს, რაც ეგნატესა და მის მომხრეებს შესახებ წინასწარ იცოდა, ამიტომაც მიმართავდა პაპს, ეს იმპერატორმა და ბარდამ გაუკეთეს. თითქოს ფოტიმ ამის ხალხი არ მიეღო და მათთვის არ დაეჯერებინა. ალბათ, რომში

²⁶ Epist. Nicol. VII. ad Mich. Imper., et X ad Cler, Constantin., XI ad Phot., XII ad Bard., et XIII. ad Ignal. Patriarch., apud Harduin. Tom V.

მართლაც იყვნენ ასეთები, რომლებიც (როგორც ფოტი ნიკოლოზს სწერს) მძიმე დანაშაულისათვის დამსახურებული სასჯელის თავიდან აცილების მიზნით კონსტანტინოპოლიდან გარბოდნენ, და როგორც მსგავს დამნაშავეებს სჩვევიათ ხოლმე, ავად იხსენიებდნენ იმ მსაჯულებს, რომელთაგან სამართლიან სასჯელს მოელოდნენ. ნიკოლოზმა სწორედ მათი ცილისმწასწორედ დასავლეთის ეკლესიის კანონები დაარღვია, რომესტანტინე ლარისელი, მიტროფანე სმირნელი, პავლე პონტოსლიც კრძალავს წერილობით მოწმობათა გარეშე ასეთი ლტოლვილების მიღებას და მათი ჩვენებების სარწმუნოდ მიჩნევას, როდესაც ისინი ვინმეს ადანაშაულებენ. აი, ერთი ასეთი კანონი: „წმიდა მამებზე და ეპისკოპოსებზე ცილის მწიმებელი და მათი სიძულვილით მგმობელი არ შეიწყნარებოდეს“²⁷. თუმცა, სადაც ვნება ბობოქრობს, იქ კანონებს ადვილად ივიწყებენ.

§ 16. ნიკოლოზის მიერ დასავლეთიდან აღმოსავლეთისაკენ მიმართული ყოველგვარი განკვეთა თუ შეჩვენება მიჩნეულ იქნა, როგორც გარეშე სამსჯავროდან დამიზნებული უსუსური საბავშვო ისრები. ნიკოლოზს პროტოსპათარ მიხეილის მეშვეობით თვით იმპერატორმა გაუგზავნა პასუხი, რომელშიც იგი უარყოფს იმ უზენაეს ძალაუფლებას, რომლითაც პაპი ყველა ეკლესიაზე გაბატონებას ლამობს, უხსნის მას, რომ მან რომის ელჩები პატივის ნიშნად მოიწვია (რაც უწინ არცერთ იმპერატორს არ გაუკეთებია), და არა იმიტომ, რომ აღმოსავლეთის ეკლესია დასავლეთისას დაუმორჩილოს, ანდა ფოტისა და ეგნატეს საქმე მხოლოდ რომის პაპმა განსაჯოს, არამედ რათა პაპის ელჩთა თანდასწრებით უკვე დამხობილი ეგნატეს დამხოზა და უკვე არჩეული ფოტის არჩევა განამტკიცოს, და ამგვარად სრულიად აღკვეცოს უთანხმოება ორ საწინააღმდეგო მხარეს შორის. ამასთან იმპერატორი აღნიშნავს, რომ ნიკოლო-

²⁷ Ecclesiae African. canon. VIII et IX apud Harduin. Tom II. column. 869. conf. can. XXIII col. 876.

ზის წინააღმდეგობა ვერავითარ დაბრკოლებას ვერ შექმნის, ვინაიდან ამაზე აღმოსავლეთის ყველა პატრიარქი თანახმაა²⁸.

§ 17. მაგრამ პაპი ნიკოლოზი თავის აზრს ჭიუტად არ თმობდა, პირიქით, თავისი მიზნის განხორციელებას კიდევ უფრო ესწრაფვოდა. იგი საღმრთო წერილით შეიარაღდა და ყოველმხრივ შეეცადა აღმოსავლეთის ეს საწინააღმდეგო აზრი უკუეგდო. იმპერატორ მიხეილისადმი წერილში ნიკოლოზი მას უმტკიცებს, რომ ვინაიდან მოციქულმა პეტრემ მთელს ეკლესიაზე მეუფების უპირატესობა მიიღო არა კაცთაგან, არამედ ღვთისაგან, ანუ არა კრებების, არამედ თვით მაცხოვრის მიერ, ასევე მისი მემკვიდრენიც — რომის მღვდელმთავრები ყოველგვარი საეკლესიო საქმის უზენაესი მსაჯულები არიან. ამიტომ იგი მოითხოვს, თვით ეგნატე და ფოტი წარუდგენენ რომის სამსჯავროს; თუ ისინი ვერ გამოცხადდებიან, მაშინ არგამოცხადების მიზეზი წერილობით დაადასტურონ, შემდეგ კი მათი საქმის საფუძვლიანი განხილვისათვის თავისი რწმუნებულები გამოაგზავნონ, სახელდობრ: პატრიარქ ფოტის მხრიდან ყველა, ვინც კი გრიგორი სირაკუზელთან ერთად მოქმედებდა, ეგნატეს მხრივ — ანტონ კიზიკელი, ბასილი თესალონიკელი, კონსტანტინე ლარისელი, მიტროფანე სმირნელი, პავლე პონტოს ირაკლიიდან, აგრეთვე ილუმენები ნიკიტა ქრიზოპოლელი და ნიკოლოზ სტოდიელი და სხვები. განსახილველ საქმეზე დასასწრებად იმპერატორის მხრიდან იგი რომელიმე სამეფო კარის მოხელეს მოითხოვდა. მაგრამ ყოველივე ამით ნიკოლოზმა აღმოსავლეთს საბაბი მისცა, კიდევ უფრო უკუეგდო ის ძალაუფლება და უპირატესობანი, რომელსაც იგი საღმრთო წერილით ამტკიცებდა. აღმოსავლეთმა უპასუხა, რომ იესო ქრისტეს რომის ეკლესიისათვის არ მიუნიჭებია უპირატესობა მთელს ეკლესიაზე მეუფებისა, რომ უწინ რომს მხოლოდ იმიტომ გააჩნდა უპირატესობა, რომ იგი იმპერატორთა სატახტო ქალაქი იყო, ხოლო საიმპერატორო ტახტის რომიდან კონსტანტინოპოლში გადატანის შემდეგ იმპერატორის ხელისუფ-

²⁸ Collect. Concil. Harduin. Tom. V. col. 144-147.

ლებასთან ერთად პატრიარქობის უპირატესობამაც იქ გადაინაცვლა. ამ დროიდან მოყოლებული კონსტანტინოპოლის ეპისკოპოსს რომის ეპისკოპოსზე ნაკლები პატივი არ მიეგება, და რომის სურვილისდა მიუხედავად, მსოფლიო პატრიარქად იწოდება²⁹.

§ 18. ამასობაში იმპერატორი მიხეილი ბიძამის ბარდასთან ერთად მონაწილეობას ლებულობდა საკრინოზთა წინააღმდეგ ლაშქრობაში, რომლებიც კუნძულ კრეტას ესხმოდნენ თავს. ბარდამ ამ დროისათვის იმდენად დიდი ძალაუფლება მოიპოვა, რომ იმპერატორი ძლიერ შეექცვა მასში და ბოლოს მისი უეცრად შეპყრობა და მის ფერხთით მოკვლა ბრძანა³⁰. ამის შემდეგ ბიზანტიაში დაუყოვნებლივ დაბრუნებული იმპერატორი მალე მიხვდა, რომ სახელმწიფოს მართვას მართო ვერ შეძლებდა, უფრო კი ახალი ლალატისა შეეშინდა, რის გამოც მან იმპერიის თანამმართველად გაიხადა სიბრძნითა და სიმამაცით განთქმული ბასილი მაკედონელი. მიხეილმა ის ჯერ იშვილა, ხოლო სულთმოფენობის დღეს, წმ. სოფიას ტაძარში მისთვის იმპერატორის დიადემის საზეიმოდ დადგმა უბრძანა პატრიარქ ფოტის, რომელმაც დაღუპული ბარდას სახით მართლაც დიდი მფარველი დაკარგა.

§ 19. როცა პაპი ნიკოლოზი მიხვდა, რომ მის ეპისტოლეებს წარმატება არ მოჰყოლია, იმავე წლის ბოლოს გადაწყვიტა, კონსტანტინოპოლში იმპერატორ მიხეილისათვის გაეგზავნა ელჩები: დონატ ეპისკოპოსი, ლევ პრესვიტერი და მარინ დიაკონი, რათა მათი ჩაგონებით იმპერატორს საპატრიარქო ტახტზე დაებრუნებინა ეგნატე, ხოლო ფოტი ჩამოეგდო. იგი ამასთანავე ითხოვდა, ისინი რომში ჩასულიყვნენ. ხოლო მისთვის გამოგზავნილი წერილი, რომელშიც რომის ეკლესიის ძალაუფლება და უპირატესობა უკუგდებული იყო, ცეცხლისათვის მიეცა. წინააღმდეგ შემთხვევაში პაპი იმუქრებოდა, რომ რომ-

²⁹ Synod. Chalcedon. can. 28. in collect. Conc. Harduin. Tom II. col. 611, et Synod. Constant. 1. can. 3 ibidem. Tom. I.

³⁰ ეს ხდებოდა ქრ. შ-დან 866 წელს. Vid. Constant. Porphyr. in. vita Basil. Maced. cap. XVII; pag. 148. edit. Paris. 1685.

ში კრებას მოიწვევდა, აღნიშნულ წერილს ხეს მიაკრავდა და აღმოსავლეთის ეკლესიის სამარცხვინოდ დაწვავდა³¹. მაგრამ აღმოსავლეთსაც უკვე სიტყვით ან წერილობით კი არა, ქეშ-მარიტად სურდა, დაემტკიცებინა ნიკოლოზისათვის, რომ იგი სრულიადაც არ ეთანხმებოდა კონსტანტინოპოლის ეკლესიის დამორჩილებისაკენ მიმართულ პაპის მსჯელობასა და სწრაფვას. იმპერატორმა მიხეილმა და კეისარმა ბასილიმ ბრძანება გასცეს, ნიკოლოზის დესპანები იმპერიის საზღვრებს შიგნით არ შემოეშვათ, თუკი ისინი წინასწარ არ წარადგენდნენ მრწამსს, რომეშიც უარყოფილი იქნებოდა ლათინთა ყველა ის დოგმატი, რომელსაც კონსტანტინოპოლის ეკლესია არ იზიარებდა. იმპერატორის ამ ბრძანების შესახებ პაპის დესპანებმა უკვე ბულგარეთში ყოფნისას შეიტყვეს. მათ იქ ორმოცი დღე უმოქმედოდ დაჰყვეს, შემდეგ კი რომში დაბრუნდნენ, რათა გაგონილი პაპისთვის ეცნობებინათ³².

§ 20. ორ ეკლესიას შორის არსებული უთანხმოება კიდევ უფრო გაღრმავდა ბულგარელთა ქრისტიანულ რწმენაზე მოქცევის გამო. ბულგარელები ბიზანტიის იმპერიისათვის საშიში ხალხი იყო, რომელიც თავისი ხშირი შემოსევებით დიდ ზიანს აყენებდა და აოხრებდა მას. იმპერატორმა მიხეილმა და ბარდა კეისარმა ისარგებლეს ხელსაყრელი შემთხვევით და როდესაც მთელს ბულგარეთში მოუსავლიანობის გამო დიდი შიმშილი მძვინვარებდა, მათ წინააღმდეგ მრავალრიცხოვანი ლაშქრით დაიძრნენ, ზღვიდან თუ ხმელეთიდან ალყაში მოაქციეს და უკიდურეს საფრთხეში ჩააგდეს. თავისი შეფის, ვოგორის თანხმობით ბულგარელებმა გადაწყვიტეს, უბრძოლველად დანებებულყვნენ, ქრისტიანობა მიეღოთ და სამეფო დაექვემდებარებინათ კონსტანტინოპოლის იმპერატორისათვის. ხოლო ეკლესია — კონსტანტინოპოლის პატრიარქისათვის. ხელშეკრულების დადების შემდეგ ვოგორი ყველა თავისი დიდებულის თანხლებით სამეფო ქალაქში ჩამოვი-

³¹ Nicol. Epist. VIII. in Collect. Concil. Harduin. Tom. V. col. 144 et 766 et IX Tom. col. 177.

³² ქ. შ-დან 867 წელს.

და და მოინათლა. მისი ნათლია თავად იმპერატორი იყო, რომელმაც მეფეს თავისი სახელი მიხეილი უწოდა³³. მზრუნველმა პატრიარქმა ბულგარეთში მაშინვე წარგზავნა მქადაგებლები, რომლებსაც ახლადმოქცეული ხალხი უნდა გაენათლებინათ და მისთვის მართლმადიდებლური რწმენის დოგმატები განემართათ. პატრიარქი თვით მეფე მიხეილსაც განუწყვეტლივ უგზავნიდა ეპისტოლეებს და რწმენას განუმტკიცებდა. ამიტომ, რომ ერთ-ერთ თავის ეპისტოლეში ფოტი მას შემდეგი სიტყვებით მიმართავს: „ჩემი შრომის შესანიშნავო ქმნილებაე, ჩემი სულიერი შობის კეთილშობილო და ჭეშმარიტო ნაყოფო“³⁴! მაგრამ ამ შემთხვევის შემდეგ ორი წელიც არ გასულა, რომ ამ ეპარქიის თავისი ძალაუფლებისათვის დამორჩილების მიზნით პაპმა ნიკოლოზმაც წარგზავნა ბულგარეთში თავისი ეპისკოპოსები, რომლებსაც ადგილობრივი მოსახლეობისათვის დასავლეთის ეკლესიის დოგმატები უნდა ესწავლებინათ. დასავლეთის ეპისკოპოსების სწავლებას იმდენად დიდი წარმატება მოჰყვა თან, რომ მათი ჩაგონებით მეფე მიხეილმა პატრიარქი ფოტი მიატოვა, ხოლო პაპ ნიკოლოზთან ძღვენით დატვირთული ელჩები წარავლინა და სთხოვა, მისთვის რჩევა მოეცა ადგილობრივი ეკლესიის აგებისა და ჯერ მოუნათლავი ბულგარელების თაობაზე³⁵. არაა გასაკვირი, რომ ახლადმონათლული, გამოუცდელი ბულგარელები ნორჩი ტოტივით აღმოსავლეთის ეკლესიიდან დასავლეთის ეკლესიისაკენ გადაიხარნენ, მითუმეტეს, რომ ნიკოლოზის ეპისკოპოსები დაუფარავად ქადაგებდნენ, თითქოს კონსტანტინოპოლის პატრიარქი ფოტი ჭეშმარიტი და კანონიერი მწყემსმთავარი არ ყოფილიყოს და ამიტომ მის მღვდელმოქმედებებს არავითარი მადლი არ გააჩნდეს. ამგვარად, ისინი ხელმეორედ სცხებდნენ მირონს მათ, ვინც უკვე მოინათლა ადრე ჩასული აღმოსავლეთის მოძღვრების მიერ.

³³ ქ. შ-დან 866 წელს.

³⁴ Phot. Epist. I. sect. V. et sect. CXVIII.

³⁵ ქ. შ-დან 868 წელს. Vid. Anast. Bibl. Tom. I, p. 420. Metrophanis. epistol. ad Manuel. Patric. apud Baron C. X. an DCCCLXX num. LIII-LIX.

§ 21. ამგვარი საქციელი მეტისმეტად შეურაცხყოფელი იყო კონსტანტინოპოლის მოძღვრებისათვის. ისინი ხედავდნენ, როგორ სტაცებდნენ ხელიდან სულიერ შვილებს, რომლებსაც მათ პირველებმა აუხილეს თვალი სახარებით და რძე კეთილმსახურებისა აწოვეს. განრისხებულმა პატრიარქმა ფოტიმ აღმოსავლეთის პატრიარქებსა და ეპისკოპოსებს აუწყა ამ დიდი შეურაცხყოფის შესახებ, რომელიც მას აღმოსავლეთის ეკლესიაში გაბატონებას მოწყურებულმა ნიკოლოზმა მიაყენა, ჩამოუყალიბა მათ ის დოგმატები, რომლებსაც რომის ეპისკოპოსები ბულგარეთში ქადაგებდნენ, სხვათაშორის, მან განსაკუთრებით მიუთითა მასზედ, რომ მოციქულებისა და წმ. კრებების კანონების საწინააღმდეგოდ, ისინი მღვდლებს ცოლის ყოლას უკრძალავდნენ. ამის გამო ფოტი მათ ღეთისაგან განდგომილების მეთაურებს და ანტიქრისტეს მსახურებს უწოდებს: ფოტიმ იტალიიდან მიღებული წერილების ასლებიც გააგზავნა, სადაც ზოგიერთი დასავლეთის მთავარეპისკოპოსი, სახელდობრ ტრევირელი თევდაგარი, კოლონელი გუნთერი და რავენელი იოანე ნიკოლოზის მეტისმეტ სისასტიკეს უჩიოდნენ და დახმარებისათვის კონსტანტინოპოლის ტახტს მიმართავდნენ; დასასრულ, მან ისინი კრებაზე მოიწვია მამების დადგენილებების და კანონიერი უფლებების დაცვისა და განმტკიცებისათვის, საყოველთაო მშვიდობის დამყარებისა და პაპი ნიკოლოზის ჩანაფიქრთა შეწყვეტისათვის³⁶. მაშინვე შედგა კრება პატრიარქ ფოტის თავმჯდომარეობით. მას ესწრებოდნენ ალექსანდრიის, ანტიოქიისა და იერუსალიმის პატრიარქთა თანამოსაყდრენი, ეპისკოპოსები, კრებულის წევრები, თვით იმპერატორი მიხეილი და ბასილი კესისარი, აგრეთვე სენატორები, დიდებულნი და სხვა მრავალი ერისკაცი. კრებაზე ნიკოლოზის მოქმედება საყოველთაოდ ამხილეს და საგულდაგულო განსჯის შემდეგ მისი დამხობის გადაწყვეტილება მიიღეს, იგი ეკლესიური ძმობის უღირსად ცნეს და დასასრულ ყველა თავის თანამოზიარესთან ერთად ანათემას გადასცეს. კრების აქტები ქალკედონელი

³⁶ Epist. II. pag. 47 ad 61. აგრეთვე

მიტროპოლიტი ზაქარიასა და თეოდორე კარიელის ხელით უწყებისათვის გაეგზავნა თვით პაპ ნიკოლოზს.

§ 22. მაგრამ მალე მოვლენათა ახალი რიგი განვითარდა, საიმპერატორო სახლსა და საპატრიარქოში დიდი ცვლილებები მოხდა. წმ. მოწამის მამანტის სასახლეში ბასილი მაკედონელის ხელით სიცოცხლეს გამოესალმა იმპერატორი მიხეილი, რომელიც თხუთმეტ წელიწადს მეფობდა დედამის თეოდორასთან ერთად, ცხრა წელიწადს მარტო, ხოლო წელიწადსა და ოთხ თვეს — კეისარ ბასილისთან ერთად. თუ ამ საქციელით ვიმსჯელებთ, ბასილი მართლაც უმადურობის მწვერვალად შეიძლება მივიჩნიოთ, მაგრამ, როგორც ამბობენ, მიხეილმა, რომელსაც ყველაფრისა სჯეროდა, ბოროტი ხმების ირწმუნა და ბასილის მოკვლა თვითონ განიზრახა. ბასილიმ გადაწყვიტა, მიხეილისათვის დაესწრო, რადგანაც მან უწყოდა მის წინააღმდეგ მიმართული მზაკვრობისა და ცილისწამების შესახებ. ამგვარად ბასილი მაკედონელი იმპერატორის ტახტის ერთადერთი მფლობელი და რომის თვითმპყრობელი გახდა, ამის შემდეგ მან ფოტი საპატრიარქო ტახტს ჩამოაცილა და სკეპის მონასტერში დაამწყვდია, ხოლო ეგნატესთან ილია დრუნკარი (ფლოტის მხედართმთავარი) წარგზავნა, გადასახლებიდან გამოიწვია და კვლავ პატრიარქობა დაუბრუნა³⁷. პატრიარქ ფოტისაყენ მიმართული ეს მრისხანება ფრიად უცნაურია, ვინაიდან ბასილი ფოტის ყოველთვის პატივისცემით, სიყვარულითა და ნდობით ეპყრობოდა. ამას მოწმობს ისიც, რომ კეისარმა მას თავისი ვაჟიშვილიც კი მოანათვლინა. ზოგიერთი ამბობს³⁸, რომ ბასილიმ ეს გააკეთა ორი მტრული მხარეს შერიგების მიზნით, კერძოდ, თითქოს მან ფოტი განაშორა ეგნატეს გარდაცვალებამდე. სხვების თქმით, იმპერატორის ამგვარი საქციელი პირადული უკმაყოფილებიდან გამომდინარეობდა. იგი ისევე მოიქცა, როგორც ჩვეულებრივ ექცევა ხოლმე მბრძანებელი

³⁷ Symeon. magister et logopet. inter Sezipt. Histor. Byzantin. post Pheophan. p. 454 edit. Paris. 1685.

³⁸ Const. Porphyrog. in vita Basil. Maced. inter script. N. Byz. post Theophil. cap. XXXII. p. 163.

მონას, რომელიც მას წინააღმდეგობას უწევს. მაგრამ რა პირადული უკმაყოფილება უნდა ყოფილიყო მათ შორის? თვით ფოტი მიაჩნებდა ამის შესახებ ერთ-ერთ თავის წერილში ბერი თეოდორისადმი³⁹. სამაგიეროდ ამას დაუფარავად აცხადებს ზონარა თავისი მათიანის 101-ე წერილში ქ. შ-დან დაახლოებით 857 წელს⁴⁰. კერძოდ, როდესაც მიხეილის სიკვდილისა და ტახტზე ასვლის შემდეგ ბასილი საკათედრო ტაძარში საზიარებლად მივიდა, პატრიარქმა ფოტიმ განაყენა ზიარებიდან და მიხეილის მკვლელობაში ამხილა. იმპერატორმა ეს მხილება ვერ აიტანა და ფოტისადმი მისი უწინდელი სიყვარული უმაღლესად სიძულვილმა შეცვალა. იგივეს მოგვითხრობს ლევ გრამატიკოსი⁴¹.

§ 23. ფოტი დიდსულოვნად გადაიტანდა ტახტიდან თავის ჩამოგდებას, მისთვის მშვიდი ცხოვრების საშუალება რომ მიეცათ იმ მონასტერში, რომელიც მას საპყრობილის ნაცვლად მიუჩინეს. მაგრამ მის წინააღმდეგ დაწყებული დევნა ამით არ დამთავრებულა: ერთის მხრივ, ტახტზე ასულმა და კვლავ უფლებამოსილმა პატრიარქმა ეგნატემ ეკლესიიდან განკვეთა ფოტიც და ყველა მის მიერ ხელდასმული თუ მასთან კავშირში მყოფი⁴². მეორეს მხრივ, იმპერატორმა, რომელიც ალბათ ფიქრობდა, რომ პაპი ნიკოლოზი ფოტის დამხობას დასთანხმდებოდა, რომში ელჩები წარგზავნა, რათა პაპს, როგორც მსაჯულს, ეს საქმე გადაეწყვიტა. ეგნატეს მხრივ მან გაგზავნა სილველი მიტროპოლიტი იოანე, ფოტის მხრივ — სარდიელი მიტროპოლიტი პეტრე, ხოლო თავის მხრივ — პროტოსპათარი ბასილი. გარდა ამისა, იმპერატორი წერილობით მიმართავდა პაპს, ამ საქმის განხილვის შემდეგ კონსტანტინოპოლში ზემოხსენებული ელჩებთან ერთად რომში თავისი დესპანებიც გამოაგზავნა, რათა კრებას აქაც იგივე გადაწყვეტილება მიეღო. ელჩები კონსტანტინოპოლიდან გაემგზავრნენ და თან უკანასკნე-

³⁹ Epist. CXVIII. pag. 160.

⁴⁰ Tom. II. pag. 167. edit. Paris, 1687.

⁴¹ Leo Gramat. in Chzonograph. edit. Paris. 1655, pag. 471.

⁴² Leo Gramat. in Chronograph. edit. Paris. 1655. pag. 471. et caet.

ლი კრების აქტები წაიღეს, იმ კრებისა, რომელზედაც პაპი ნიკოლოზი განიკვეთა. რომისაკენ მიმავალ გზაზე მათი გემი დაილუპა, და სარდიელი მიტროპოლიტი პეტრე, რომელსაც ფოტი უნდა დაეცვა, დაიხრჩო, ხოლო დანარჩენები მშვიდობიანად ჩავიდნენ რომში⁴³. ადვილი მისახვედრია, თუ რა მიზანი ამოძრავებდა ბასილის, როდესაც ის პაპს ფოტის საქმეს გადასცემდა. ნიკოლოზი ხომ ფოტის უმძვინვარესი მტერი იყო. ბასილის სურდა, ორივე ეკლესიის მიერ ერთხმად დაემციკრებინა, დაეგმო და დაემხო ფოტი; მაგრამ როდესაც იგი მიზნის მისაღწევად ამ გზას მიმართავდა, მან ვერ გაითვალისწინა, რომ პაპი ნიკოლოზი შემთხვევით ისარგებლებდა და თავის ძალაუფლებას კონსტანტინოპოლის ტახტზე გაავრცელებდა. იგი ოცნებობდა ამაზე მიხეილის ელჩობის ვიზიტის შემდეგ და მის განსახორციელებლად ძალ-ღონეს არ იშურებდა. ადვილი წარმოსადგენია, როგორი სიხარულით შეხვდებოდა პაპი ნიკოლოზი ელჩებს, როდესაც მათ თავისი სამსჯავროს წინაშე იხილავდა და იმ სანუკვარ მიზანს მიაღწევდა, რომლისთვისაც ყოველმხრივ ირჩებოდა. მაგრამ ნიკოლოზი ამ სიხარულს ვერ მოესწრო, ვინაიდან სანამ ის კონსტანტინოპოლის ორი პატრიარქის მსაჯული გახდებოდა, თვითონ წარსდგა ცხოველთა და მკვდართა უზენაესი მსაჯულის წინაშე, ანუ გარდაიცვალა. ეს მოხდა იმავე წელს. ტახტზე აღრიანე მეორე ავიდა⁴⁴.

§ 24. კონსტანტინოპოლის ელჩებმა წერილი სწორედ ამ ახალ პაპს ჩააბარეს და მას იმპერატორის სურვილი აუწყეს. პაპმა ადგილობრივი კრება მოიწვია და ყველაფერი მოიწონა, რაც კი იმპერატორმა ფოტის წინააღმდეგ მოიმოქმედა. მან ნიკოლოზის წინააღმდეგ მიღებული ყველა გადაწყვეტილება დაწვის ღირსად ცნო, ხოლო ფოტი და მის მიერ ხელდასმულნი შეაჩვენა, მათთვის სასულიერო ხარისხის აყრა და ერისკაცებად დაქვეითება ბრძანა (რაც მას არავითარ შემთხვევაში არ უნდა მოემოქმედა, ვინაიდან ფოტის წინააღმდეგ წამოყენებუ-

⁴³ Nicet. David. col. 985. Collect. Concil. Harduin. col. 786. Tom. V.

⁴⁴ ქ. შ-დან 867 წელს. Anast. Biblioth. Tom. I. pag. 423.

ლი ბრალდებების სამართლიანობის შემთხვევაშიც კი მის მიერ აღსრულებული ხელდასხმა ჰემმარიტი იყო), იგივე განაჩენი გამოუტანა მან ყველა მის თანამოაზრეს, რომლებიც კონსტანტინოპოლის უკანასკნელ კრებას ესწრებოდნენ; პაპმა დალოცა ყველა, ვინც კრების აქტებს გაანადგურებდა, განსაკუთრებით მოიხსენია იმპერატორი ბასილი, რომელსაც თავისი ყველაზე უფრო კეთილსაიმედო შვილი და ყველაზე უფრო მართლმადიდებელი იმპერატორი უწოდა; ურჩია მას დედაქალაქში კრება მოეწვია. პაპმა თავის მხრივ დესპანებად წარგზავნა ღონატ და სტეფანე ეპისკოპოსები და მარინ დიაკვანი. მათ კრებაზე უნდა დაედასტურებინათ ყოველივე ის, რაც პაპმა ფოტის წინააღმდეგ რომში მოიმოქმედა; მაგრამ მათ უპირატეს მიზანს წარმოადგენდა იმ კრების ყველა ნუსხის დაწვა, რომელზედაც ნიკოლოზი განკვეთეს. ხოლო მას, ვინც არ მოისურვებდა, აქტები კრებისათვის წარედგინა, პაპი სამუდამო შეჩვენებით და თვით ქრისტეანის სახელის დაკარგვით ემუქრებოდა. ყველაფერმა ადრიანეს სურვილისამებრ ჩაიარა: ლეგატები კონსტანტინოპოლში ჩამოვიდნენ, თან წერილი ჩამოიტანეს. ქ. შ-დან 869 წლის 6 ოქტომბერს, თავისი მეფობის მესამე წელიწადს, იმპერატორმა ბასილიმ კრება მოიწვია თვით იმპერატორის, მისი ორი ძმის, კონსტანტინესა და ლევის, ადრიანეს სამი დესპანის, პატრიარქ ეგნატესა და აღმოსავლეთის საპატრიარქო ტახტების მოსაყდრეთა გარდა (სხვათა შორის, მათ შესახებ ამბობენ, თითქოს ისინი აღმოსავლეთის ემირის წარმოგზავნილი ისმაიტელი ელჩები ყოფილიყვნენ, რომლებიც კონსტანტინოპოლში კრების წინ ჩამოსულან) მას აღმოსავლეთის საეპარქიოებიდან შეკრებილი 102 ეპისკოპოსიც დაესწრო.

§ 25. 23 სექტემბერს შედგა ამ კრების მეხუთე სხდომა, რომელსაც ლათინები მერვე მსოფლიო კრებას უწოდებენ. იმპერატორმა ფოტისაც უბრძანა, კრებაზე გამოცხადებულიყო; ამის შესახებ მამებს აცნობეს, მაგრამ პაპი ადრიანეს დესპანებმა მოითხოვეს, რომ იგი სასულიერო პირებს კი არა, არამედ ერისკაცებს შემოეყვანათ. ასეც მოიქცნენ. გზაზე ფოტიმ განაცხადა, რომ იგი ნებით არ მიდის, არამედ იძულებით მიჰყავთ, ამიტომაც მას განზრახული აქვს. კრინტი არ დაძრას, რო-

გორც დავითი ამბობს: „ვთქუ: ვიმარხნე გზანი ჩემნი, რათა არა
 ვცოდო ენითა ჩემითა; დავსდევ საცომა პირსა ჩემსა“ (ფს. 38, 1).
 სინკელმა ილიამ მას ყვედრებით უპასუხა, რომ ჭიუტ დამნა-
 შავეთა შესახებაც ასევე წერილ არს ფსალმუნებში: „ჭიმითა
 და აღვირითა უქცინე ლაწუნი მათნი, რომელნი შენ არა მოგე-
 ახლნეს“ (ფს. 31, 9). კრებაზე შემოსვლის შემდეგ მას ჰკითხეს,
 ეთანხმება თუ არა იგი რომის ეპისკოპოსების გადაწყვეტი-
 ლებებს, ანუ იმას, რაც უწინ დაადგინა პაპმა ნიკოლოზმა,
 შემდეგ კი უკანასკნელ კრებაზე — აღრიანემ; მაგრამ ფოტი
 არაფერს პასუხობდა. როდესაც დესპანებმა მას უთხრეს, რომ
 მისი დუმილი კრებისათვის შეურაცხმყოფელია და იგი მას
 აშკარა და შეუწყნარებელ დამნაშავედ ამხილებს, ფოტიმ მიუ-
 გო: „ღმერთს მაშინაც ესმის ჩემი, როდესაც ვდუმვარ“. როცა
 მას გაუმეორეს, რომ დუმილით იგი საკუთარ თავს ადანაშაუ-
 ლებს, ფოტიმ უპასუხა: „იესოც განიკითხეს, როდესაც დუმ-
 და“. ამასობაში პაპი ნიკოლოზის ზოგიერთი ეპისტოლე წაი-
 კითხეს. შემდეგ ფოტის მიმართა პატრიცმა ვაანმა. მან შენიშნა,
 რომ კრებას ესწრებოდნენ როგორც აღმოსავლეთის, ასევე და-
 სავლეთის მთავარეპისკოპოსები და ურჩია, თავი დაეცვა, რად-
 გან თუკი კარი დაიკეტებოდა, ველარავინ გააღებდა მას ხელ-
 ახლა. სხვები ეუბნებოდნენ: „გვითხარი, ღვთისკაცო, რა პა-
 სუხს მოგვიგებ დასაცავად?“ — „პასუხი ჩემი არა ამასოფლი-
 საგანი არს; უკეთუ ამასოფლისაგანი იყოს, თქვენმცა უწყო-
 დეთ“. — უპასუხა ფოტიმ. ამაზე ვაანმა ისევ გაუმეორა: „ჩვენ
 ვიცით, რომ დაბნეული ხარ, გეშინია, და ველარაფერს გვპა-
 სუხობ. ამიტომ ეს წმიდა კრება მოსაფიქრებელ ღროს გაძ-
 ლევს, ახლა კი ნებას გრთავს, შენს ადგილს დაუბრუნდე და აქ
 მეორედ მოსვლას გიბრძანებს“. ფოტიმ უთხრა: „მოსაფიქრე-
 ბელი ღრო არ მჭირდება, ჩემი განშორება კი თქვენი ნებაა“. შემდეგ
 პატრიცმა კვლავ შეახსენა მას, რომ კრებაზე მხოლოდ
 ერთი ქვეყნიდან არ შეკრებილან, არამედ მას მსოფლიოს ყვე-
 ლა კუთხის წარმომადგენელი ესწრება, რომ ეს კრება პირუთ-
 ვნელად სჯის ღვთიური ზეშთაგონებით. ამიტომაც მან თავის
 შეცოდებათათვის პატიება ახლავე უნდა ითხოვოს, რათა შენ-
 დობა მიიღოს; თუკი ის პაპის დესპანთა წასვლის შემდეგ
 იტყვის ან მოიმოქმედებს რაიმეს, მაშინ ყოველივე ძალადა-

კარგული და უდროო იქნება. ფოტი იდგა, ისე რომ სიტყვა არ დაუძრავს, და შემდგომ კრების ბრძანების თანახმად, გავიდა.

§ 26. 29 ოქტომბერს, მეშვიდე სხდომაზე ფოტის კვლავ უბრძანეს, კრებაზე გამოცხადებულიყო. ის კვერთხით ხელში მოვიდა, რომელიც მისი სიამაყის ნიშნად მიიჩნიეს, მაშინვე ხელიდან გამოგლიჯეს და უკანასკნელ ადგილზე დაჯდომა უბრძანეს. ფოტისთან ერთად შემოვიდნენ გრიგოლ სირაკუზელი და იოანე ირაკლიელი. ამ უკანასკნელს ჰკითხეს ეთანხმება თუ არა იგი პაპის გადაწყვეტილებას მისი ხელდასხმელი ფოტის შეჩვენების თაობაზე. იოანემ უპასუხა: „თავისი მღვდელმთავრის დამაწყევარი თავადაც კრულ იყოს“. ფოტისთან ერთად მოსული სხვა ეპისკოპოსებიც პასუხობდნენ ამ კითხვაზე: „არ ვეთანხმებით უკანონოდ აღსრულებულ საქმეებს, ე. ი. პაპის ნაცვლებს მსაჯულებად არ ვცნობთ“. შემდეგ, როდესაც მათ ჰკითხეს: „მაშ ვინ იქნება თქვენი დამცველი?“, პასუხად გაისმა: „მოციქულთა კანონები“. დასასრულ, როდესაც კრებაზე დამსწრენი დარწმუნდნენ, რომ ფოტი გადაჭრით უარყოფს ნიკოლოზისა და ადრიანეს გადაწყვეტილებებს, ბრძანეს, ჯერ ამ პაპთა მიერ ფოტის წინააღმდეგ მიღებული გადაწყვეტილებანი წაეკითხათ, შემდეგ კი სტეფანე დიაკვანსა და ნოტარიუსს ხმამალა წარმოეთქვათ ანათემა, ანუ უკეთ რომ ვთქვათ, ანათემათა გრძელი რიგი: „ფოტის — ეკლესიაში სამეფო კარიდან შემოჭრილს, ანათემა; ფოტის — სამეფო კარის წარმომადგენელს და ერისკაცს, ანათემა; ფოტის — ახლადგამომცხვარსა და ტირანს, ანათემა; ფოტის — განდგომილსა და განკითხულს, ანათემა; ფოტის — მრუშსა და მამისმკვლელს, ანათემა; ფოტის — ახალ მაქსიმე ცინიკოსს, ანათემა; ახალ დიოსკორეს, ანათემა; ახალ იუდას. ანათემა; ყველა მის მიმდევარსა და თანამზრახველს, ანათემა“⁴⁵. ფოტი ყოველივეს დუმილით ისმენდა, უხმოდ ითმენდა ხანგრძლივი ანათემის საშინელ დარტყმებს. ერთერთ თავის წერილში კლავდიუპოლელი მიტროპოლიტის ეგნატეს მიმართ ის კიდევ ტრაბახობს ამ ანათემით. წერილი ასე იწყება: „ერთ

⁴⁵ Collect. Concil. Harduin. Tom. V. col. 882.

დროს ანათემა საზარელი და მრისხანე იყო, როდესაც მას კეთილმსახურების მქადაგებლები უსჯულოთა წინააღმდეგ იყენებდნენ, მაგრამ მას შემდეგ, რაც... და სხვ.“⁴⁶.

§ 27. შემდეგ სხდომაზე, რომელიც 3 ნოემბერს შედგა, დიაკვანმა და მომხსენებელმა თეოფილაქტემ მოიტანა იმ კრების აქტები, რომელზედაც პაპი ნიკოლოზი განიკვეთა, აგრეთვე ფოტისა და მის ეპისკოპოსთა სხვა ხელნაწერები. გიორგი ორფანოტროფმა დესპანთა მსახურებს გადასცა ეს ქაღალდები. მათ კი მისი ბრძანებისამებრ ყოველივე ცეცხლს მისცეს და დაწვეს იქვე საგანგებოდ მომზადებულ სპილენძის ჭურჭელში. იანვრის ბოლო რიცხვებში კრება დასრულდა. ყველაფერმა პაპი ადრიანეს სურვილისამებრ ჩაიარა. ასე იქნა დაკმაყოფილებული მისი ძალაუფლებისმოყვარეობა, როგორც ეს ჩანს მეტადრე ერთი კანონიდან, რომელშიც ნათქვამია: „თუკი მსოფლიო კრებაზე მაინც ექნება ადგილი რაიმე შეშფოთებას რომის ეკლესიასთან დაკავშირებით, ჯერ-არს ამ საკითხის მოწიწებით და შესაფერი კრძალვით გამოკვლევა, და არა ხამს კადნიერი სიტყვები ძველი რომის მღვდელმთავართა შესახებ“⁴⁷. საბოლოოდ, კრებამ ყოველივე პაპის დესპანთა ნება-სურვილის თანახმად აღასრულა, ხოლო იმპერატორმა და პატრიარქმა ეგნატემ ყველაფერი დაადასტურეს. ამიტომაცაა, რომ დასავლეთის ეკლესია ამ კრებას, მერვე მსოფლიო კრებას უწოდებს.

§ 28. აღნიშნის ღირსია ამ კრების სამი გარემოება, რაც

არასოდეს არცერთ სხვა კრებაზე არ მომხდარა:

პირველი, — იმპერატორის სურვილისამებრ და ადრიანეს საამებლად, ფოტის დამხობისა და დაგმობის დროს, ყოველგვარი დაბრკოლების თავიდან აცილების მიზნით, კრებაზე შესვლა აეკრძალა ყველას, ვინც რომიდან პაპის დესპანთა მიერ ჩამოტანილ გრაგნილს საკუთარი ხელმოწერითა და მოწმეთა თანდასწრებით არ დაადასტურებდა. ეს გრაგნილი იუწყებოდა შემდეგს: „ვეთანხმებით ნეტარხსენებული ნიკოლოზის დროს

⁴⁶ Epist. Phot. CXV. pag. 156, seq.

⁴⁷ Act. X. can. XIII. Collect. concil. Harduin. Tom. V. col. 1104.

შემდგარი წმ. კრების დადგენილებებს, რომელსაც ხელს აწერ თვით შენ, მეუფე და ანგელოზთასწორი მღვდელმთავარი ადრიანე; მის მიერ შეწყნარებულთ შევიწყნარებთ, და მის მიერ დაგმობილთ ვგმობთ: მეტადრე ფოტის და გრიგოლ სირაკუზელს, აგრეთვე მათი განხეთქილების ყველა მიმდევარსა და თანამოზიარეს. განუხსნელი ანათემით ვპკრავთ ავაზაკთა კრებებსა და იმპერატორ მიხეილის მიერ მიღებულ უსჯულო დადგენილებებს, ორჯერ — უნეტარესი პატრიარქის ეგნატეს წინააღმდეგ, ხოლო ერთხელ — უზენაესი სამოციქულო ტახტის წინააღმდეგ. შევაჩვენებთ იმათაც, ვინც იცავს მათ, ან მათ უსჯულო საქმეებს მალავს. სავსებით ვეთანხმებით სამოციქულო ტახტის ხელმწიფების დადგენილებას უწმიდესი პატრიარქის ეგნატესა და მის თანამოაზრეთა შესახებ. ჩემს ამ აღმსარებლობას მე (ესა და ეს) ეპისკოპოსი ვადასტურებ საკუთარი ხელმოწერით და წარმოგიდგენ შენ, უწმიდეს მეუფეს, დიდ მღვდელმთავარსა და მსოფლიო პაპს ადრიანეს, შენი ელჩების: წმ. რომის კათოლიკური ეკლესიის უწმიდესი ეპისკოპოსების დონატესა და სტეფანეს, აგრეთვე დიაკვან მარინის მეშვეობით. ხელმოსაწერად ვიწვევ მოწმეებს⁴⁸. თვით იმპერატორი და პატრიარქი აცხადებდნენ, რომ გრაგნილის ხელმოწერა ახალი და გაუგონარი ამბავია; მიუხედავად ამისა, ეს ასე მოხდა. თეოდულე ანკირელმა და ნიკიფორე ნიკეელმა, რომლებმაც ხელმოწერაზე უარი განაცხადეს, ვერც კრებაზე დასწრების ნებართვა მიიღეს. ეგ არაფერი, კარიელმა მიტროპოლიტმა თეოდორემ ხელი კი მოაწერა, მაგრამ როგორც კი შეიტყვეს, რომ ის ფოტის კრებას ესწრებოდა, რომელზედაც ნიკოლოზი განკვეთეს, — იგი კრებიდან გააძევეს. იმდენად ძლიერი იყო სიძულვილი ფოტის მიმდევართა მიმართ, რომ მათ მაშინაც კი არ პატიობდნენ, როდესაც ეს უკანასკნელნი ინანიებდნენ!

მეორე, — ამბობენ, რომ აღმოსავლეთის საპატრიარქო ტახტების თანამოსაყდრეთა სახელით კრებას პატრიარქთა ნამდვილი თანამოსაყდრენი კი არ ესწრებოდნენ, არამედ სირიელი ეპირის, ანუ ისმაიტელთა მმართველის მიერ გამოგზავნილი.

⁴⁸ Collect. Concil. Harduin. T. V. 773 et seq.

ელჩები, რომლებიც კონსტანტინოპოლში კრების წინ ჩამოვიდნენ. ამ უცნაურ გარემოებას მარტო ფოტი არ აღნიშნავს. ბერ თეოდოსისადმი წერილში⁴⁹. ამასვე წერს მომდევნო კრებას თავის ეპისტოლეში იერუსალიმის პატრიარქი ილიაც. ეს ეპისტოლე მარტიროპოლელი მიტროპოლიტის ხელით გაიგზავნა, რომელიც მანამდე ანტიოქიის პატრიარქთან იმყოფებოდა და კრებას იქიდან ეახლა. აღნიშნული ეპისტოლეს ტექსტი ამოწერილი აქვს კეისარ ბარონის, თუმცა იგი მას ყალბად მიიჩნევს⁵⁰.

მესამე, — ამის გაგონებაც კი შეგზარავს! კრების მამებმა (ამბობს ნიკიტა დავით პაფლაგონელი ეგნატეს ცხოვრებაში⁵¹) ფოტის დამხობას ჩვეულებრივი მელნით კი არ მოაწერეს ხელი, არამედ — რა საშინელებაა! — კალამი თვით მაცხოვრის სისხლში ჩააწეს, როგორც ამის უტყუარ მცოდნეებთაგან შევიტყვე“. ეს ხომ ძველ ღმერთშემოსილ წმიდა მამებსაც არ გაუკეთებიათ, როდესაც მათ ყველაზე უფრო უღვთო მწვალებლები — ნესტორი, მაკედონი და თვით არიოზი განკვეთეს. იქნებ მათ რომის პაპის, თეოდორეს მაგალითს მიბაძეს, რომელმაც ზუსტად ასევე მოაწერა ხელი კონსტანტინოპოლის პატრიარქის, მონოთელიტ პიროსის განკვეთას⁵². შეუძლებელია, ღვთისმოშიში სული არ შეაკრთოს სიწმიდის ამგვარმა შებლაღვაპმ!

§ 29. მაგრამ ეპისკოპოსებმა თავისი საქციელი მალე შეინანეს. მათ თავიანთი სინანული გამოხატეს იმპერატორთან იმის გამო, რომ აღმოსავლეთის ეკლესია სამარცხვინოდ დაუქვემდებარეს დასავლეთისას, და დაჟინებით მოითხოვეს, უკანვე დაებრუნებინათ ხელმოწერილი გრაგნილი. იმპერატორმა ეპისკოპოსებს სურვილის შესრულება აღუთქვა და ფარული ბრძანება გასცა, დესპანთა ოთახებიდან მსახურების დახმარებით გამოეტანათ გრაგნილი. როდესაც დესპანებმა ეს შეიტყვეს, ყოველი ღონე იხმარეს და გრაგნილი კვლავ დაისაკუთრეს. ამას მოგვითხრობს ნიკოლოზის ბიბლიოთეკარი და ცხოვრების აღ-

⁴⁹ Epist. CXVIII. pag. 159 et seq.

⁵⁰ Ann. Baron. ad ann. Chr. DCCCLXXIX. n. LXXVI.

⁵¹ Collect. Concil. Hard. T. V. col. 988.

⁵² ქ. შ.-დან 648 წელს.

მწერელი ანასტასი, რომელიც მაშინ პაპის ელჩებთან ერთად იმყოფებოდა კონსტანტინოპოლში. იგი ამბობს, რომ მან ეს გრაგნილი თვითონ ჩამოიტანა რომში⁵³. შემდეგი მემატიანე პაპების ცხოვრებისა აღრიანეს ცხოვრებაში დაურთავს⁵⁴, რომ დასასრულ ლეგატებმა იმპერატორს ბულგარელთა საქმეც წარუდგინეს, რამაც მისი სიტყვებით, იმპერატორი შეაძრწუნა, და თუმცა გარეგნულად არაფერი შეიმჩნია, მაგრამ მათი გამასპინძლებისა და დასაჩუქრების შემდეგ დაუყოვნებლივ უბრძანა პროტოსპათარ თეოდოსის, მათს გამგზავრებაზე ეზრუნა. პროტოსპათარი დიდი მონდომებით არ მოეპყრო იმპერატორის ბრძანებას და ლეგატები არაშესაფერი პატივით გაისტუმრა. როგორც იგივე მწერალი გვამცნობს, რომისაკენ მიმავალი ელჩები ხელში ჩაუვარდნენ სლავებს, რომლებმაც გაძარცვეს ისინი და კრების მთელი კოდექსი და აქტები წაართვეს. არავინ იცის, იმპერატორის ბრძანებით და ნებართვით მოხდა ეს, თუ არა.

§ 30. ამასობაში იმპერატორისაგან შერისხულ და უმაღლესი პატივიდან უბედურების უფსკრულში გადაჩენილ ფოტის, მტრების სასტიკი სიძულვილით დევნილს, იმპერატორის ნების აღმსრულებელ სამეფო კარის პირთა მფარველობას მოკლებულს, თავისი ერთგული მეგობრების დახმარებისა და ნუგეშის გარეშე დარჩენილს, რომლებიც კრებაზე ლეგატების წინააღმდეგობისათვის შორს გადაასახლეს; მოსამსახურეს, ხმის გამცემსა და ყოველივე აუცილებელს ჩამოშორებულს; ყველასაგან მიტოვებულს სრულ მარტობასა და ფხიზელი ყარაულებით გარემოცულ საპყრობილეში, არ გააჩნდა არავითარი შესაქცევი, გარდა საკუთარი ფიქრებისა, და არავითარი შვება, გარდა საკუთარი მოთმინებისა. უამრავ უბედურებათა შორის, რომლებსაც იგი აღწერს თავის ეპისტოლეებში ეპისკოპოსთა მიმართ, ფოტის განსაკუთრებით ის წყინდა, რომ მას იმპერატორის ბრძანებით ყველა წიგნი წაართვეს; კითხვა ხომ საუკეთესო საზრდო იყო ამ უადრესად სწავლული და შრომის-

⁵³ Collect. Concil. Hard. T. V. col. 755. in adnot. in prim. action.

⁵⁴ Oper. Anastas. Biblioth. T. I, p. 436.

მოყვარე კაცისათვის. ამას მისი სასტიკი მტერი ნიკიტა დავით პაფლაგონელიც კი ადასტურებს, როდესაც ამბობს: „ის ღამეებს უძილოდ, გულმოდგინე კითხვაში ათენებდა“⁵⁵. ამიტომაც იყო, რომ წიგნების წართმევამ ფოტი აუწერელ და აუტანელ დარღში ჩააგდო. როგორც ის თავად ირწმუნება, როდესაც თავისი მტრების უზომო სიძულვილს უჩივის. მისი სიტყვებით, ისინი წინ აღუდგნენ მის ხორცსა და სულს, ამასთან დასძენს: „წიგნებიც კი მომისპეს; აი, ახალი, უჩვეულო, ჩვენთვის მოგონილი სასჯელი“⁵⁶. ამიტომაცაა, რომ იმპერატორისადმი წერილში, როდესაც იგი თავის უზომოდ სასტიკ ტანჯვას აღწერს, ფოტი სიკვდილს ითხოვს, როგორც წყალობას⁵⁷.

§ 31. იმპერატორი უყურადღებო არ დარჩენილა გაძევებული და შეპყრობილი ფოტის ჩივილის მიმართ; როგორც იქნა, მოწყალე იქმნა მასზე, და თანაგრძნობა გამოავლინა. იმპერატორი მიხვდა, თუ რა საბრალო მდგომარეობასა და უზომო ტანჯვაში ჩააგდო მწყემსმთავარი, გაიხსენა უწინდელი მეგობრული დამოკიდებულება და ურთიერთობა. დაინახა, რომ ფოტი ნამდვილად ბრძენი და სწავლული იყო და დარწმუნდა, რომ ამგვარი ბრძენი ადამიანი ასეთ სასჯელსა და წამებას არ იმსახურებდა. ამიტომაც სიძულვილი კვლავ სიყვარულით შეცვალა, ხოლო რისხვა — წყალობით. იმპერატორმა ფოტი პატიმრობიდან გაათავისუფლა, კარზე მოიწვია, სასწავლებლად თავისი ორი ვაჟი მიაბარა და უწინდელი უბედურებების სანაცვლოდ მრავალი წყალობით დააჯილდოვა⁵⁸. ფოტის მდგომარეობის ამგვარ შემობრუნებას სულ სხვაგვარად ხსნის ნიკიტა პაფლაგონელი⁵⁹. იგი ამბობს, რომ ფოტიმ აიღო იმპერატორის ოჯახის სახელების პირველი ასოები: იმპერატორ ბასილისა — ბ, მისი მეუღლის ვედოკიასი — ე, მისი ოთხი ძისა: კონსტანტინესი — კ, ლევის — ლ, ალექსანდრესი — ა, და

⁵⁵ In vita Ignat. apud Hard. Tom. V. column. 960.

⁵⁶ Phot. Epist. XCVII. pag. 137.

⁵⁷ Ibidem pag. 140 —

⁵⁸ Constant. Porphyr. in vit. Basil. Maced. pag. 171. inter.

⁵⁹ In. vit. Ignat. col-1004 conf. Sym. Magist. et Logephet. Inscriptores Byz. post. Theophan. ter script. Byz. pag. 454.

სტეფანესი — ს; მათგან შეთხზა სახელი ბ ე კ ლ ა ს ი; შეადგინა ცრუ გენეალოგია სომეხთა მეფე ტირიდატიდან ბასილის მშობლებამდე, რომელთაგანაც, წინასწარმეტყველების თანახმად, თითქოს უნდა შობილიყო რომის ყველა მბრძანებელს შორის დიდებული და მეტად სახელგანთქმული მეფე. მას უნდა რქმეოდა ბეკლასი. ეს ამბავი ფოტიმ ძველ ქარტიაზე დაწერა ალექსანდრიული ასოებით, რათა მას ძველთაძველი წიგნის შთაბეჭდილება დაეტოვებინა. შემდეგ თითქოს მან მოახერხა ამ წიგნის დადება იმპერატორის ბიბლიოთეკაში, რაშიც მას თეოფანე პალესტინელი დაეხმარა (იგი იყო ფოტის მეგობარი და იმპერატორის ახლობელი). თეოფანემ ეს ხელნაწერი განზრახ აჩვენა იმპერატორს, როგორც უჩვეულო წინასწარმეტყველებით აღსავსე წიგნი, და დაითანხმა, ფოტი მოეხმო, რომელიც თითქოს ერთადერთი კაცი იყო, ვინც მის წაკითხვას შეძლებდა. სამეფო კარზე მოყვანილმა ფოტიმ, სახელი ბეკლასი რომ ახსნა, იმდენად აამა იმპერატორს, რომ მისი უწინდელი კეთილგანწყობა და სიყვარული დაიბრუნა. მაგრამ, ჭერ-ერთი, ისტორიკოსი ნიკიტა ფოტის აშკარა მტერია, რის გამოც მას ყველაფერში ვერ ვენდობით. გარდა ამისა, ყველა სალად მოაზროვნე ადამიანი მიხვდება, რომ ასეთი გამოგონება არც ფოტის და არც იმპერატორ ბასილის კეთილგონიერებას არ ეკადრება. ბასილი მაკედონელი ძალზედ მიამიტი იქნებოდა, თუკი იგი ფოტის სიბრძნესა და სწავლულებას მხოლოდ ამ შემთხვევის შემდეგ ირწმუნებდა. პირიქით, ჭერ კიდევ იმპერატორობამდე ის კარგად იცნობდა ფოტის, უყვარდა, პატივს სცემდა, და როგორც უკვე აღვნიშნეთ, მას თავისი ერთადერთი ვაჟიც კი მოანათვლინა. „მომისმინე, კაცთმოყვარე იმპერატორო (ასე სწერდა იმპერატორს ფოტი გადასახლებიდან), არც უწინდელ მეგობრობას, არც საშინელ ფიცსა და დაპირებებს, არც მირონცხებასა და მეფედ კურთხევას არ გახსენებ, არ მოგაგონებ იმას, რომ ჩემი ხელით ეზიარებოდი წმიდათაწმიდა და საშინელ საიდუმლოს, არც იმას, რომ შენი შესანიშნავი ძის მამობა გვაერთიანებს“⁶⁰ და

⁶⁰ Epist. Phot. p. 163 —

სხვა. უფრო დასაშვებია ვიფიქროთ, რომ ყოველივე ამის მოგონებამ და თანაც ყოფილი მეგობრის, მწყემსმთავრისა და ბრძენის საბრალო მდგომარეობისადმი თანაგრძნობამ ბასილის გადააწყვეტინა, მოწყალე ქმნილიყო და ფოტისათვის კვლავ მეგობრობის ხელი გაეწოდებინა.

§ 32. ამასობაში გარდაიცვალა ფოტის ორი უმთავრესი მოწინააღმდეგე: ადრიანე II — რომში, ხოლო ოთხმოც წელს მიღწეული პატრიარქი ეგნატე — კონსტანტინოპოლში⁶¹. ადრიანეს მემკვიდრე გახდა იოანე VIII თუ IX. თავის წინამორბედთა, ნიკოლოზ და ადრიანე პაპების მსგავსად, იოანესაც სურდა და ცდილობდა ბულგარელთა ეკლესია თავისი ტახტისათვის დაემორჩილებინა, და იგი კონსტანტინოპოლს აღარ დაქვემდებარებოდა. ამის შესახებ მან ორჯერ მისწერა ეგნატეს, მაგრამ ამაოდ. ბოლოს მისთვის ელჩების წარგზავნა განიზრახა, და პავლე და ევგენი ეპისკოპოსებს თან მუქარით აღსავსე წერილები გაატანა. ამ წერილებში იგი აცხადებდა, რომ თუ პატრიარქი 30 დღის განმავლობაში ბულგარეთიდან არ გამოიწვევდა ყველა აღმოსავლეთის ეპისკოპოსს და სამღვდლო დასის წარმომადგენლებს, რომლებიც იქ ცხოვრობდნენ და იქაურ მოსახლეობას მოძღვრავდნენ, და თუკი იგი გადაჭრით არ განაცხადებდა უარს ბულგარეთზე რომის ტახტის სასარგებლოდ, მაშინ იგი საეკლესიო ძმობის უღირსად ჩაითვლებოდა და პატრიარქობას დაკარგავდა⁶². მაგრამ სანამ ელჩები კონსტანტინოპოლში ჩავიდოდნენ, ეგნატე გარდაიცვალა. მის ნაცვლად იმპერატორმა ბასილიმ ტახტზე უსიტყვოდ აიყვანა ფოტი და აღმოსავლეთისა და დასავლეთის ეკლესიებს შორის სრული ერთობის დამყარებისა და ყოველგვარი საცთურის შეწყვეტის მიზნით პაპ იოანეს ელჩობა გაუგზავნა, რათა მათ უკვე ხელმეორედ არჩეული პატრიარქი ძმობაში მიეღოთ. ამის შესახებ მას სწერდა ფოტიც (რომელთანაც არც კონსტანტინოპოლში ჩამოსულმა პაპის ელჩებმა და არც სხვა

⁶¹ ქ. შ.-დან 878 წელს.

⁶² Collect. Concil. Harduin. Tom. VI. P. 1. col. 20. num XXIV. Apud Labbeum. LXXVIII.

სამღვდლო დასის წევრებმა ურთიერთობა არ ისურვეს); ამას მოწმობს ლათინურ ენაზე დაწერილი იოანეს ეპისტოლეები, სახელდობრ გრიგოლ პრიმიკირის მიმართ, — 12 ინდიქტიონს, 3 აპრილს, და კონსტანტინოპოლის სამღვდლო დასის მიმართ, — 12 ინდიქტიონს, აგვისტოში, ქრ. შობიდან 879 წელს⁶³. იოანეს ამ ეპისტოლეთა შესახებ უნდა ითქვას, რომ მათი ლათინური ასლები ბერძნულს არ ემთხვევა. ლათინები ამბობენ, რომ ბერძნული ასლი ბერძნებმა დაამახინჯეს, ბერძნები კი ამბობენ, რომ ლათინური ასლები ლათინების მიერაა შეცვლილი.

§ 33. ამგვარად, ვითარება ისევ მკვეთრად შეიცვალა! თავისი პირველი პატრიარქობიდან თერთმეტი წლის შემდეგ ფოტი კვლავ პატრიარქი გახდა, და საეკლესიო მღელვარების სრული შეწყვეტის მიზნით დაუყოვნებლივ საჭიროდ ცნო ახალი კრების მოწვევა, რაც იმპერატორის სურვილიც იყო. ამ გადაწყვეტილებას პაპი იოანეც დაეთანხმა. მან დაუყოვნებლივ მიიღო იმპერატორის ელჩობა და ვინაიდან კარგად მოეხსენებოდა მისი წინამორბედების, ნიკოლოზისა და ადრიანეს დროინდელი მოვლენები, თავისი მიზნის მისაღწევად სხვა, უფრო მშვიდობიანი გზა აირჩია. პაპმა ელჩებად დანიშნა იმ დროს ისევ კონსტანტინოპოლში მყოფი პავლე და ევგენი ეპისკოპოსები, რომელთა შესახებაც ზემოთ უკვე ითქვა, და მათ შეუერთა მესამეც, სახელდობრ, კარდინალ-პრესვიტერი პეტრე, რომელსაც ინსტრუქცია ჩააბარა. ამ ინსტრუქციაში იგი მიუთითებდა ლეგატებს, თუ რა ეკეთებინათ კრებაზე⁶⁴. იოანეს ყველა უწყება გამსჭვალული იყო ქება-დიდებათ და პირფერობით, აღსავეს იყო მშვიდობისმოყვარეობით და უწყინარობით, თუმცა ყველგან პეტრე მოციქულის უზენაესი ძალაუფლება და რომის უპირატესობა გამოსჭვიოდა, სიყვარული და სიმშვიდე კი ამპარტავნებასა და მბრძანებლობის წყურვილს ერწყმოდა. ამ ეპისტოლეებში პაპი ადასტურებს ფოტის პატრი-

⁶³ Apud Labbeum Epist. CLXIX; apud Harduin. LXXIV et LXXXIV in Collect. Concil. Tom. VI. Pars 1. col. 49 et 72.

⁶⁴ Ann. Baron. ad ann. 879 p. XVII-IXXXII et Collect. conc. Harduin. Tom. VI. Pars. I. col. 207 et 293. Graeco et Latine.

არქად არჩევას და მას კანონიერ და ქეშმარიტ პატრიარქს, ძმასა და თანამსახურს უწოდებს; იგი ფოტის სხვებთან ერთად ყოველგვარ ანათემას უხსნის, ხოლო მის უარყოფელებს შეაჩვენებს; პაპი არწმუნებს იმპერატორს, რომ ფოტის მიმართ სიყვარულით, მოწიწებით და პატივისცემით განიმსჯელოს, და ყველა მისი წინააღმდეგობი კრების დადგენილებებს გაუქმებულად აცხადებს. ამგვარად, პაპი იოანე აღრიანე II-ს კრებასაც გმობს. ამას იუწყება ლათინურ ენაზე (და არა ბერძნულზე) დაწერილი ეპისტოლე იმპერატორის მიმართ. გარდა ამისა, მასში ნათქვამია, რომ ფოტიმ კრების წინაშე პატიება და შენდობა უნდა ითხოვოს იმისათვის, რომ იგი საპატრიარქო ტახტზე რომისათვის წინასწარი შეტყობინების გარეშე ავიდა⁶⁵. ყოველივე ეს არსად ჩანს იმპერატორისადმი ბერძნულ ენაზე დაწერილ ეპისტოლეებში⁶⁶, ხოლო კონსტანტინოპოლის სამღვდელო დასისადმი ეპისტოლეში ამის შესახებ სხვაგვარად წერია, კერძოდ: „კრებაზე ფოტიმ აღიარა მის მიმართ რომის ეკლესიის ღვთაებრივი გულმოდგინება, მფარველობა და ზრუნვა“⁶⁷. ამის შემდეგ პაპი ყოველმხრივ ცდილობდა, რომის ეკლესიისათვის დაექვემდებარებინა ბულგარეთის ეპარქია, დაჟინებით მოითხოვდა, ან, უკეთ რომ ეთქვათ, ბრძანებდა, რომ პატრიარქს ამ ეპარქიის საქმეებში არავითარი მონაწილეობა არ მიეღო; წინააღმდეგ შემთხვევაში იოანე მას განუხსნელი ანათემით ემუქრებოდა. ინსტრუქცია ამგვარი შინაარსის იყო: პაპი თავის ლეგატებს უბრძანებდა ფოტისთან შეკავშირებას; ხოლო როდესაც კრებაზე შევიდოდნენ, ეკითხათ, კრების ყველა დამსწრე ეთანხმებოდა თუ არა პაპის იმპერატორისადმი ეპისტოლეს, და თუკი ყველა თანხმობას განაცხადებდა, მაშინ ეთქვათ, რომ ისინი მოვლინებული იყვნენ უწმიდესი პაპის მიერ, რათა განზნეულნი შეეკრიბათ, დაყოფილი გაეერთიანებინათ, დაცემული აღედგინათ, მშვიდობა მოეფინათ და საკთური შეეწყვიტათ; შემდეგ ელჩებს უნდა განეცხადებინათ თვით უწმიდესი პაპის სურვილი, რომ წმიდა მამების კანონების თანახმად, ფოტის შემდეგ

⁶⁵ Harduin. T. VI. P. 1. col. 63. num. XCIII. apud Labbeum — CXC.

⁶⁶ Harduin ibid. col. 232.

⁶⁷ Harduin. num. XCIV. Labb. CC.

კონსტანტინოპოლის პატრიარქად ერისკაცი აღარ არჩეულიყო, და რომ ამიერიდან პატრიარქს ბულგარეთში აღარც ეპისკოპოსები, აღარც პრესვიტერები აღარ ეკურთხებინა, რომ აღრიანე II-ს ღრის შემდგარი რომისა და კონსტანტინოპოლის კრებები ძალდაკარგულად მიჩნეულიყო და სხვა კრებების სწორად აღარ მოხსენიებულყო. აი, რა ბრძანა პაპმა იოანემ წერილობით. მაგრამ რა დაადგინა კრებამ?

§ 34. კრება დაიწყო ქ. შ.-დან 879 წელს, ბასილის მეფობის მე-13 წელიწადს, წმ. სოფიას ტაძარში, კათაქმეველთა ადგილიდან მარჯვენა მხარეს. მას ესწრებოდა 383 ეპისკოპოსი, პაპი იოანეს ლეგატები, პავლე, ევგენი და კარდინალ-პრესვიტერი პეტრე, აგრეთვე სხვა პატრიარქების თანამოსაყდრენი ფოტის თავმჯდომარეობით. ამ კრების მოკლე მიმდინარეობა შვიდი სხდომის სახით შთამომავლობას შემოუნახა კონსტანტინოპოლის პატრიარქმა იოანე ვეკამ თხზულებაში ეკლესიის სამყაროს შესახებ; იგი ბერძნულ და ლათინურ ენებზე მოთავსებულია პანდექტთა მე-2 ტომში, ფურცელი 273⁶⁸. იგივე აქტები ხელნაწერის სახითაც არის შემონახული. იგი დაწერილია სხვა, უცნობი პირის მიერ გაცილებით გულმოდგინედ და სრულად; ვეკას თხზულებისაგან მას მხოლოდ სხდომთა რიცხვი განასხვავებს, როგორც ვილჰელმ კავე ამბობს საეკლესიო მწერალთა შესახებ წიგნის მე-2 ტომში, ფურცელი 303⁶⁹. თუ ყველაფერს ერთმანეთს შევეუთანხმებთ, მაშინ კრება შემდეგნაირად წარმართულა.

ს ხ დ ო მ ა 1. 879 წლის ნოემბერი. პატრიარქ ფოტის თავმჯდომარეობით კრების გახსნის შემდეგ შემოდიან პაპის ელჩები იოანეს ნაბოძებ სამღვდელმთავრო შესამოსელში; ფოტი მათ ხვდება უალრესი მოწიწებით და შემწყნარებლურად. იოანე ირაკლიელი წარმოთქვამს სიტყვას, რომელშიც ამბობს, რომ ყველა მომხდარი საეკლესიო საცთურის მიზეზი იყო პაპი ნიკოლოზი, თავის მემკვიდრე აღრიანესთან ერთად. იგი აქებს პაპ

⁶⁸ Pandect. Bevereg. edit. Oxon. an. 1673 et Collect. Conc. Harduin. Tom. VI. Pars. 1. Col. 213 et seq.

⁶⁹ Edit. Londin. Pars I. 1688 et Pars II. 1698.

იოანეს და ჩამოთვლის იმ უბედურებებს, რომლებიც ფოტიმ უსამართლოდ გადაიტანა.

ს ხ დ ო მ ა II. იკითხება იოანეს ეპისტოლეები იმპერატორისა და ფოტის მიმართ, აგრეთვე სამი პატრიარქის: მიხეილ ალექსანდრიელის, თეოდოსი იერუსალიმელის და თეოდოსი ანტიოქიელის ეპისტოლეები, რომლებშიც ისინი გმობენ და შეაჩვენებენ ადრიანეს დროს ფოტის წინააღმდეგ მოწვეულ კრებას. შემოდის მიტროპოლიტი თომა, რომელიც ფოტის წინააღმდეგ მიმართულ კრებას ესწრებოდა და პატიებას ითხოვს.

ს ხ დ ო მ ა III. კითხულობენ იოანეს ეპისტოლეს აღმოსავლეთის ეპისკოპოსთა მიმართ; იგი კრებამ არ მოიწონა, ვინაიდან ეპისტოლედან აშკარად გამოსქვიოდა პაპის უმთავრესი განზრახვა, ანუ რომის ეკლესიისადმი ბულგარეთის ეპარქიის დაქვემდებარებისა და აღმოსავლეთის ეკლესიაზე პაპის ძალაუფლების გავრცელების წყურვილი. ამიტომ კრებამ პირდაპირ განაცხადა, რომ პაპის ეპისტოლეებში გამოთქმული აზრი, თითქოსდა მან აღმოსავლეთის ეკლესიებში ელჩები მშვიდობის დამყარების მიზნით გამოაგზავნა. ზედმეტია; ვინაიდან ისინი თვითონვე ზავდებიან, როდესაც ერთხმად აღიარებენ ფოტის ჭეშმარიტ პატრიარქად და რომ როდესაც ისინი რომს მიმართავდნენ, მას მხოლოდდამხოლოდ ფოტის არჩევაზე დასტურს სთხოვდნენ, და არა სამსჯავროს. და რომ მათ ეს ყოველივე მორჩილების ნიშნად კი არ გააკეთეს, არამედ სიყვარულით. ხოლო რაც შეეხება ბულგარეთის ეპარქიას, ეს იმპერატორის საქმეა, და არა კრების. შემდეგ ზაქარია ქალკედონელი ფოტის დასაცავად წარმოთქვამს სიტყვას, რომელშიც ამბობს, რომ თუმცა ფოტი პატრიარქად ერისკაცობიდან აკურთხეს, მაგრამ ეს ადრეც არაერთხელ მომხდარა, და რომ ტრადიცია და საჭიროება ხშირად კანონს ცვლის. ამის დასტურად მოპყავს ბასილი დიდის სიტყვები, რომელიც დაახლოებით იგივეს სწერს ამფილოქე იკონიელს⁷⁰. კრებაზე იკითხება ანტიოქიისა და იერუსალიმის პატრიარქთა ეპისტოლეებიც იმპერატორის მიმართ, რომლებშიც ისინი ფოტის არჩევას ეთან-

70 Bas. Oper. Tom. III. pag. 325. elit. Paris. 1730 an.

ხმებიან. ამის შემდეგ კითხულობენ კომონიტორის, რომელსაც ხელს აწერს 16 ეპისკოპოსი, 5 პრესვიტერი და 2 დიაკვანი. მასში დაგმობილია აღრიანეს დროს ფოტის წინააღმდეგ მოწვეული კრება.

ს ხ დ ო მ ა IV. შემოდის ანტიოქიის პატრიარქის თანამოსაყდრე ბასილი მარტიროპოლელი, შემოაქვს იერუსალიმის ახლადდასაყდრებული პატრიარქის — ილიას წერილი, რომელშიც ნათქვამია, რომ ფოტის წინააღმდეგ მიმართულ უკანასკნელ კრებას საპატრიარქო ტახტების თანამოსაყდრეთა სახელით ნამდვილად სარკინოზი ელჩები ესწრებოდნენ. ამიტომ კრებამ დაადგინა: „დაგმობილ და განკიცხულ იქნას უნეტარესი პაპის, აღრიანეს დროს რომში მოწვეული კრება, რომელიც მიმართული იყო უწმიდესი პატრიარქის, ფოტის წინააღმდეგ, ასევე დაიგმოს უწმიდესი ფოტის წინააღმდეგ კონსტანტინოპოლში მოწვეული კრება; ამ კრებას ნუ მივაკუთვნებთ სხვა წმიდა კრებებს, და კრებადაც აღარ შევრაცხავთ, თითქოსდა არც ჩატარებულა. ვინც ქრისტეს წმიდა ეკლესიის წინაშე და უწმიდესი პატრიარქის, ფოტის მიმართ იცრუეს, წმიდა ეკლესია ზიარებისგან განყენებისა და მორწმუნეებთან კავშირისა და ძმობისაგან განკვეთის ეპიტიმიას ადებს, სანამ ისინი თავის დანაშაულს არ მოინანიებენ“.

ს ხ დ ო მ ა V. კრებაზე იწვევენ მიტროფანე სმირნელს, რათა მან თავისი განდგომის მიზეზი განაცხადოს, ანუ მოახსენოს კრებას, რატომ არ სურს ფოტის არჩევას დასთანხმდეს. რადგან იგი მოსვლაზე უარს აცხადებდა ავადმყოფობის მიზეზით, მასთან აგზავნიან სამ მიტროპოლიტს. როდესაც მიტროფანემ მათაც იგივე პასუხი გასცა, კრებამ განკვეთა იგი, როგორც მწვალებელი. იმავე დღეს ეს სამი კანონი დაადგინეს: პირველი — ვისაც დაამხოვს ან განკვეთავს პაპი იოანე, ის პატრიარქმა ფოტიმაც დამხოვნილად უნდა მიიჩნიოს; და პირიქით, ვისაც პატრიარქი ფოტი დაამხოვს ან განკვეთს, პაპმა იოანემაც იგი იმავეს ღირსად უნდა ცნოს; ისე, რომ, არც ამჟამად, არც მომავალში, რომის ეკლესიის უწმიდესი ტახტისა და მისი წინამძღვრის ამჟამინდელ უპირატესობებში აღარავითარი სიახლე შეტანილ აღარ იქნას; ამგვარად მთავრდება კანონი; მეორე — თუ რომელიმე მღვდელმთავარი ეპისკო-

პოსობაზე უარს განაცხადებს და ბერად წავა, კვლავ ეპისკოპოსად ნულარ დასვამენ; მესამე — ერისკაცთა ძალაუფლება სასულიერო პირთა დასჯაზე ნუ გავრცელდება. კრებამ ხატმებრძოლნი კვლავ შეაჩვენა და მე-7 ნიკეის კრების დადგენილებები დაადასტურა, ამასთან ამ კრებას დანარჩენი ექვსი კრების შემდეგ მეშვიდე მსოფლიო კრება უწოდა. კრებამ ეს იმიტომ გააკეთა, რომ ზოგიერთები ამბობდნენ, თითქოს წმიდა ხატების თაყვანისცემის შესახებ მეშვიდე კრების დადგენილებებს დასავლეთის ეკლესიაში ყველა არ ეთანხმებოდა. შემდეგ პაპის ელჩებმა პატრიარქის თანამოსაყდრეებმა და ყველა დანარჩენმა ეპისკოპოსმა კრების გადაწყვეტილებები თავისი ხელმოწერით დაადასტურეს. ამგვარად, მათ ერთსულოვნად აღიარეს ფოტი პატრიარქად და დაგმეს ყოველი მისი საწინააღმდეგო ქმედება.

ს ხ ღ ო მ ა VI. კრების მამები იმპერატორის სასახლის ოქროს დარბაზში შეიკრიბნენ; სხდომას ესწრებოდნენ აგრეთვე იმპერატორი ბასილი და მისი ძენი. იმპერატორმა წმიდა მრწამსის წაკითხვა ბრძანა იმ სახით, როგორც ის თავდაპირველად ჯერ ნიკეაში, შემდეგ კი დანარჩენ წმიდა მსოფლიო კრებებზე ჩამოაყალიბეს. წაიკითხეს მეორე მსოფლიო კრების წმიდა მრწამსი. მისი წაკითხვის შემდეგ მამებმა გადაწყვიტეს, რომ ყველა ქრისტიანმა უცვლელად უნდა აღიაროს სწორედ ეს მრწამსი; თუკი ვინმე გაბედავს რაიმეს დამატებას, შეცვლას ან დამახინჯებას, იგი დაიმხოს და განიკვეთოს. ამით კრებას სურდა დაეგმო მრწამსში შეტანილი დამატება: „და ძისაგან“, რომელიც ძლიერი საცთური იყო აღმოსავლეთის ეკლესიისათვის. ამ დადგენილებას, — სახელდობრ წმიდა მეშვიდე კრებისა და პატრიარქ ფოტის დამტკიცებას, ამ უკანასკნელის წინააღმდეგ ნათქვამის თუ დაწერილის განადგურებას ხელი მოაწერეს იმპერატორმა და მისმა ვაჟიშვილებმა: ლევმა, ალექსანდრემ და სტეფანემ.

ს ხ ღ ო მ ა VII. 880 წლის მარტი. ისევე, როგორც ორი დღის წინ, კვლავ წაიკითხეს მრწამსი, რომელიც ერთსულოვნად დადასტურდა საყოველთაო შემახილებით: „ასე გვიპყრის და ასე გვწამს!“ პროკოფი კესარიელმა პატრიარქ ფოტის მისამართით წარმოთქვა ქების სიტყვა. დასასრულ პაპის ლეგა-

ტებმა განაცხადეს: „ვინც უწმიდეს ფოტის კანონიერ პატრი-
არქად არ აღიარებს, ვინც მასთან ძმობაში არ იძყოფება, ნა-
წილი მისი იუდას თანა დაიდვას“. ამ სიტყვებზე მთელმა კრე-
ბამ ერთხმად მიუგო: „ვინც ფოტის ღვთივ დადგენილ
მღვდელმთავრად არ მიიჩნევს, ნულარ იხილავს ღვთის დიდე-
ბას“. დასასრულ, ჩვეულებრივი დასკვნის შემდგომ, კრება
დაიხურა. ამ კრების შესახებ ბევრს ლაპარაკობენ და წერენ
დასავლეთის ეკლესიის წარმომადგენლები, განსაკუთრებით
კეისარი ბარონი, სევერინ ვინი და ლევ ალლატი, რომელმაც
განსაკუთრებული წიგნი დაწერა. მისი სათაურია: „ფოტის კრე-
ბა“. ეს წიგნი დაბეჭდილია რომში, ქ. შ-დან 1662 წელს. მას-
ში ავტორი ცდილობს დაამტკიცოს, რომ ამ კრების აქტები
დამახინჯებულია, რომ თვით კრებაც კი არ შემდგარა. აი, რამ-
დენად მიეკრძოებით სჯიდა იგი! მრავალი აღმოსავლეთისა თუ
დასავლეთის წარმომადგენლის გარდა ამ ფაქტს ხომ თვით პა-
პი იოანეც გარკვევით ადასტურებს, თავის წერილებში ფო-
ტის მიმართ⁷¹, აგრეთვე იმპერატორისა და მისი შვილების მი-
მართ⁷², 13 ინდიქტიონს, ქ. შ-დან 880 წლის 13 აგვისტოს.
მაგრამ დაეუბრუნდეთ საქმეს.

§ 35. როდესაც პაპმა იოანემ კრების ამბები შეიტყო და
დაინახა, რომ მისი არცერთი სურვილი არ შესრულდა, უპირ-
ველეს ყოვლისა კი ბულგარეთის ეპარქია ვერ მიიღო, რომ-
ლის შესახებაც ორჯერ მისწერა ბულგარეთის მეფეს მიხეილს,
მან ჭერ კრება და პატრიარქი ფოტი დაგმო, შემდეგ კი იმ
მიზნით, რომ როგორმე აღმოსავლეთის ეკლესიის აზრი შეეც-
ვალა, ელჩად წარავლინა სწორედ ის მარინი, რომელიც ადრი-
ანეს სახელით ფოტის წინააღმდეგ მოწვეულ კრებას ესწრებო-
და. კონსტანტინოპოლში ჩამოსული მარინი ყოველმხრივ შე-
ეცადა იოანეს სურვილისა და ბრძანების აღსრულებას, მაგრამ
საკუთარი დამცირების გარდა ვერაფერს მიაღწია და 30 დღის
პატიმრობის შემდეგ, ყოველგვარი წარმატების გარეშე უკან
დაბრუნდა. გამოხდა ხანი. იოანეს შემდეგ რომის ტახტზე ავი-

⁷¹ Apud. Labbeum ep. CCL, Harduin. CVIII.

⁷² Labb. CCLI. Hard. CIX.

და მარინი, კონსტანტინოპოლში მიყენებული შეურაცხყოფა მას ჯერ არ დავიწყებოდა. მარინმა ფოტიცა და მისი კრებაც შეაჩვენა. იგივე მოიმოქმედეს მისმა მემკვიდრეებმა ადრიანე III-მ და სტეფან VI-მ. რომიდან კონსტანტინოპოლისაკენ მიმართულმა მუდმივმა ანათემებმა, რომლებიც აღმოსავლეთისა და დასავლეთის ეკლესიებს შორის მტრობას სულ უფრო და უფრო აღვივებდა, ძლიერ განარისხა იმპერატორი ბასილი. მან რომში გაგზავნა ფრიად უხეში შინაარსის წერილი, რომელშიც უკუთავდო რომის ეკლესიის მიერ მითვისებული ძალაუფლება, რითაც ფოტისა და მისი ტახტის დასაცავად სრული მზადყოფნა გამოამყლავნა. მაგრამ მალე იმპერატორი ბასილი გარდაიცვალა, და მისი სახით ფოტიმ თავისი ძლიერი მფარველი და ქომაგი დაკარგა: ძველმა მტრებმა კვლავ გამოააშკარავეს თავისი სიძულვილი და ახალ იმპერატორ ლევს ჩააგონეს, თითქოს იგი მოღალატე იყო ევქაიტელი ეპისკოპოსის თეოდორე სანტავარინელის საქმეში. მათ თავისას მიაღწიეს, ფოტი გადაასახლეს არმონიანის მონასტერში, სადაც სიბერითა და ტანჯვით ღონემიხდილი გარდაიცვალა (იგი პატრიარქის ტახტზე იყო თავდაპირველად 9 წელიწადს, ხოლო მეორეჯერ 8 წელიწადს). ეს მოხდა იმპერატორ ლევის მეფობის პირველ წელიწადს, ქრისტეს შობიდან 866 წელს⁷³.

§ 36. სანამ ფოტის მომხრე უამრავი ეპისკოპოსი მის უსამართლო გაძევებას განიცდიდა, ამასობაში მოწინააღმდეგე მხარემ, მეტადრე სტილიან ნეოკესარიელის გაიძევრობით, რომის პაპს წერილობით მიმართა იმის თაობაზე, რომ მას ფოტის დამხობა და მის ნაცვლად ახალი პატრიარქის, — იმპერატორ ლევის ძმის, სტეფანეს არჩევა დაედასტურებინა. პაპმა თავის წინამორბედთა მსგავსად, რომელთაც ყოველთვის სურდათ, კონსტანტინოპოლის ეკლესიის საქმეებში მსაჯულები ყოფილიყვნენ, საქმის რომში გამოკვლევისა და გადაწყვეტის მიზნით ორივე მხრიდან ელჩების გამოგზავნა მოითხოვა. მაგრამ ამჯე-

⁷³ Leo Gramm in chronogr. pag. 475. Inter scriptor. Hist. Byz. incert. Continuator Pheophanis pag. 215 et Symeon Magist. pag. 461.

რად გამარჯვება ფოტის მხარეს ხვდა წილად: აღმოსავლეთის ეკლესია პაპის მოთხოვნას არ დათანხმდა, ვინაიდან მას კონსტანტინოპოლის საპატრიარქო ტახტის ღირსებისა და თავისუფლების შენარჩუნება სურდა. სამი წლის შემდეგ პატრიარქი სტეფანე გარდაიცვალა. მის ნაცვლად ტახტზე ავიდა ანტონი, მეტსახელად კავლეუსი. მაგრამ საცთური ფოტის ხელმეორე გაძევებისა და სიკვდილის შემდეგაც დიდხანს გრძელდებოდა. სტეფანეს მომდევნო პაპმა, ფორმოზმა კონსტანტინოპოლში კვლავ გამოაგზავნა ელჩები, მაგრამ აღმოსავლეთის ეკლესიამ არც ბულგარეთის ეპარქია დათმო და არც კონსტანტინოპოლის ეკლესიაზე რომის პაპის ძალაუფლება აღიარა. ამგვარად, როდესაც ერთი და მეორე მხარეც თავის აზრს მტკიცედ ადგენენ, საბოლოოდ შეწყდა ერთმანეთს შორის ძმობისა და სიყვარულის კავშირი, რომელიც ამდენი საუკუნის განმავლობაში აერთიანებდა დასავლეთისა და აღმოსავლეთის ეკლესიებს.

§ 37. ამ დიდ ბოროტებას მოწინააღმდეგეთა შორის შუღლმა დაუდო სათავე. ერთ-ერთმა მათგანმა მეორეზე გამარჯვების მიზნით დახმარებისათვის რომის პაპებს მიმართა, ხოლო პაპებმა, რომლებიც მუდამ ძალაუფლების მოპოვებას ესწრაფვოდნენ, ამჯერად შემთხვევით ისარგებლეს და აღმოსავლეთის ეკლესიაზე თავისი ძალაუფლების გავრცელება მოისურვეს. ბულგარელთა საქმემ ეს ბოროტება კიდევ უფრო გაამწვავა. როდესაც საცთური გაძლიერდა და სულ მცირე შეცდომაშიც კი ერთმა მხარემ მეორის მხილება იწყო, მაშინ დავა დოგმატთა თაობაზედაც გაჩაღდა. ამ უკანასკნელმა აღმოსავლეთისა და დასავლეთის ეკლესიებს შორის სრული განხეთქილება გამოიწვია, რომელიც მათ დღემდე ჰყოფს ერთმანეთისაგან.

§ 38. სხვადასხვა დროს მრავალჯერ სცადეს ამ ორ განყოფილ ეკლესიათა გაერთიანება; მაგრამ ამ მცდელობის წამომწყებნი ქრისტიანთა შორის მშვიდობის შენარჩუნების კეთილშობილური სურვილით კი არ იყვნენ გამსჭვალულნი, არამედ ოდენ საკუთარი, წმიდა-აღამიანური მიზნებით ხელმძღვანელობდნენ, და ამიტომაც მათ მცდელობებს სასურველი შედეგი არ მოჰყოლია. ამ საკითხზე მოწვეული არცერთი კრება და

შეკრება წარმატებით არ დაგვირგვინებულა. პირიქით, უფრო მეტად გააღრმავეს შუღლი, როგორც ამას ახლა ვნახავთ.

§ 39. თეოდორე ლასკარის გარდაცვალების შემდეგ, რომელმაც ლათინებისგან კონსტანტინოპოლის აღების შემდეგ ბითინიის ქალაქ ნიკეაში აღადგინა ბიზანტიის იმპერიის ტახტი, გამეფდა მისი სიძე იოანე დუკა ვატაკი⁷⁴. მან სიმამრის მიერ აზიაში, ევროპასა და პელესპონტში მოპოვებულ გამარჯვებებს თავისი მრავალრიცხოვანი წარმატებული ბრძოლანი მიუმატა, მტრები გაანადგურა, და ბიზანტიის იმპერიას თითქმის ყველა უწინდელი სამფლობელოები დაუბრუნა. ასე რომ, ლათინებს ოდენ კონსტანტინოპოლიდა დარჩათ. ლათინთა იმპერატორი ბალდუინ უმცროსი იქიდანაც კი იძულებული გახდა გაქცეულიყო. იგი რომს გაემგზავრა, რათა პაპისთვის და სხვა ქრისტიანთა მმართველებისათვის ეთხოვა დახმარება. ამ მიზეზით შედგა კრება. სწორედ ამ კრებაზე წარმოიშვა ეკლესიათა გაერთიანების საკითხი. ამ გაერთიანებას ესწრაფვოდა ბერძენთა იმპერატორი პაპთან დამეგობრების მიზნით, რითაც მისდამი მტრულად განწყობილი ლათინი უფლისწულებისა და მეფეების კეთილგანწყობის მოპოვებას ლამობდა, რომელთა მტრობაც მისი გამარჯვებების შურითა და ბალდუინის ჩაგონებით იყო გამოწვეული. იგივე სურდა პაპ გრიგოლ IX-საც; პირველ ყოვლისა, აღმოსავლეთის ეკლესიაზე რაიმე ძალაუფლების მოპოვების იმედით; მეორე მხრივ კი იმიტომ, რომ გაენელებინა ბერძენთა სიძულვილი, კონსტანტინოპოლის აღებით გამოწვეული, და ამ ეკლესიის შეერთებით მოწინააღმდეგენიც შეერიგებინა. მითუმეტეს, ხედავდა, რომ ბერძენთა თანადგომის გარეშე ლათინები ძნელადლა თუ დაიბრუნებდნენ სარკინოზთაგან დაპყრობილ სირიისა და პალესტინის მიწებს.

§ 40. ამის გამოისობით ორგზის წამოიწყეს ეკლესიათა გაერთიანება. პირველად ბითინიის ქალაქ ნიკეაში გაიმართა მცირე კრება იმპერატორის თანდასწრებით, სადაც მხოლოდ ორი საკითხის გარშემო გაიმართა დავა: სული წმიდის წარმომავლო-

⁷⁴ 1222 წ. ქ. შ-დან.

ბასა და უფუველ სეფისკვერზე*. მსჯელობა სიტყვიერად და წერილობით მიმდინარეობდა. ლათინთა მხრიდან დავაში მონაწილეობდნენ ღვთისმეტყველების მასწავლებლები — ორი დომინიკანელი და ორი ფრანცისკანელი, ხოლო აღმოსავლეთის ეკლესიიდან — პატრიარქი გერმანე და მასთან მყოფი მღვდელმთავარი. მაგრამ მათი მსჯელობები მხოლოდდამხოლოდ ფუჟ სიტყვიერ პაექრობას წარმოადგენდა, და ამიტომაც იმპერატორმა (როგორც პოლიტიკოსმა და არა ღვთისმეტყველმა) ორივე მხარის შეთანხმების მიზნით ამგვარ დათმობებზე წასვლა შესთავაზა: ლათინებს უფუველი სეფისკვერით წირვა შეენარჩუნებინათ, და როგორც ლოდი საცთურისა, უარეყოთ სულიწმიდის დოგმატის ჩამატება — „და ძისაგან“**. ეს შემთავაზება იყო რაღაც შუალედური, და შერიგებისათვის საუკეთესო საშუალება, რადგან ერთი სადავო საკითხი ლათინთა მოსაზრების მიხედვით წყდებოდა, ხოლო მეორე — აღმოსავლეთის ეკლესიისა. მაგრამ ლათინმა მამებმა განაცხადეს, რომ ერთ იოტასაც არ დათმობენ თავიანთი ეკლესიის სწავლებიდან, და პირიქით, მოითხოვდნენ, რომ აღმოსავლეთის ეკლესია დამდგარიყო მათ მოსაზრებებზე და დაეწვათ ლათინთა წინააღმდეგ დაწერილი ყველა წიგნი. ამან ძლიერ განარისხა იმპერატორი, პატრიარქი და აღმოსავლეთის სხვა წარმომადგენელიც და კრებაზე ლათინთათვის მეტად უსიამო სიტყვები წარმოითქვა. ამის შემდეგ პატრიარქმა გერმანემ კალმით, და იმპერატორმა მახვილით ბულგარელთა დახმარებით ისეთი გამძაფრებული ბრძოლა დაიწყეს ლათინთა წინააღმდეგ, რომ უკიდურესობამდე შეაეწროვეს. ამასობაში კი ბალდუინი მომხრეებს ეძებდა, რათა წინაღდგომოდა ბერძნებს.

§ 41. მეორეჯერაც იყო ეკლესიათა გაერთიანების მცდელობა⁷⁵. პაპი ინოკენტი IV-ის დროს. აღმოსავლეთის ყოფილი ლეგატის, ფრანცისკანელი ლავრენტის, ფრანცისკანელთა გენერ-

* აღმოსავლეთის ეკლესია ტრადიციისამებრ საფუარით აფუეხულ სეფისკვერს იყენებდა წირვაში, ხოლო ლათინები უფუველი სეფისკვერით წირაუდნენ (მთარგმ.).

** ლათინებმა მრწამსში სულიწმიდის დოგმატს: „და სული წმიდა, რომელიც მამისაგან გამოვალს“, მიუმატეს „და ძისაგან“ (მთარგმნ.).
76 კ. შ-დან 1254 წელს.

ლის იოანე დე პარმასა და იმპერატორ თეოდორე ლასკარის ქალიშვილის, უნგრეთის მეფის ბელა VI-ის მეუღლის — მარიას დაჯინებული მოთხოვნით იმპერატორმა რომს ელჩები გაგზავნა ადრონიკე სარდიელთან და გიორგი კიზიკელთან ერთად⁷⁶. ისინი აღმოსავლეთის ეკლესიის სახელით რომის პაპს პპირდებოდნენ დაეთმოთ ყველაფერი, რასაც იგი თავისი უპირატესობის განსამტკიცებლად მოისურვებდა, ოღონდ ეს თანხმობაში უნდა ყოფილიყო წმიდა წერილთან და წმიდა კრებათა კანონებთან. თავისი მხრივ კი შემდეგს მოითხოვდნენ: 1) დაებრუნებინათ კონსტანტინოპოლი, როგორც ბიზანტიის იმპერიის დედაქალაქი, 2) კონსტანტინოპოლის ტახტზე ასულიყო აღმოსავლეთის ეკლესიის პატრიარქი, როგორც კეშმარიტი მღვდელმთავარი, და ლათინთა პატრიარქს იქაურობა დაეტოვებინა. 3) არანაირი დახმარება არ გაეწიათ ბალდუინისათვის. პაპს გადამწყვეტი პასუხი არ გაუცია, მან თქვა, რომ მსოფლიო კრება იმპერატორთა — ვატაკისა და ბალდუინის საქმეს განიხილავს, და გადაწყვეტს, კონსტანტინოპოლი რომელ მათგანს უფრო სამართლიანად ეკუთვნის, და თუკი დედაქალაქი ბიზანტიელთა ხელში გადავა, მაშინ ორივე პატრიარქს — ბერძენსაც და ლათინსაც შეეძლება იქ დარჩენა, რადგან ორივეს თავისი მრევლი ეყოლება. აი, ასეთი პასუხი გასცა პაპმა ელჩებსა და მღვდელმთავრებს, სხვა მრავალ სასიამოვნოსაც დაპპირდა და დასაჩუქრებულნი გაისტუმრა. ამავე წლის ბოლოს პაპი გარდაიცვალა, თითქმის იმ ხანებში აღესრულა იმპერატორი ვატაკი⁷⁷, და ეს საქმეებიც დაუსრულებელი დარჩა.

§ 42. აი, ეკლესიათა გაერთიანებისა და შერიგების კიდევ ერთი მცდელობა. იმპერატორ იოანე დუკა ვატაკის გარდაცვალების შემდეგ სამეფო ტახტზე ავიდა მისი ძე თეოდორე ლასკარი II, რომელიც მხოლოდ 4 წელი განაგებდა იმპერიას, და სიკვდილის შემდგომ იმპერია მის ეჭვისი წლის ვაჟს — იოანეს ჩაბარდა პროტოვესტარი გიორგი მუზალონისა და პატ-

⁷⁶ Pachymer. in Michael. Palaeolog. Lib. V. cap. XI. pag. 249. edit. Rom. 1666.

⁷⁷ 1255 წ. ქ. შ-დან.

რიარქ არსენის მეურვეობის ქვეშ⁷⁸. როცა გიორგი მისი მმართველობით უკმაყოფილო დიდებულებმა მოკლეს, მაშინ კეთილმა პატრიარქმა იმპერატორს მეურვედ მიხეილ პალეოლოგი დაუნიშნა. იგი ჭეშმარიტად მეფობისათვის ღირსეული კაცი იყო თავისი წარმომავლობითაც, უნარიანობითაც და დამსახურებითაც. იმ ხანებში ბიზანტიის იმპერიას უწინდელი დიდების დასაბრუნებლად სწორედ ღირსეული გამგებელი ესაჭიროებოდა, და მიხეილ პალეოლოგი იმპერატორად გამოაცხადეს⁷⁹. მან მეორე წელსვე გამოიხსნა კონსტანტინოპოლი ლათინთა ხელიდან კეისარ ალექსი სტრატეიგოპულის შემწეობით.

§ 43. მიხეილმა ყველა ღონე იხმარა, ადამიანური სიბრძნისათვის მისაწვდომი ყველა ხერხი გამოიყენა, რათა იმპერატორის ტახტზე განემტკიცებინა თავი და თავისი შთამომავლებიც. მან ეს ტახტი უდავოდ უკანონოდ ჩაიგდო ხელში — ახალგაზრდა იმპერატორი მაგნეზიაში გაისტუმრა, დილეგში ჩაამწყვდია და ბოლოს თვალებიც დასთხარა⁸⁰. გადაასახლა პატრიარქი არსენიც, რომელმაც ამ უდიდესი დანაშაულის გამო ეკლესიიდან განკვეთა იმპერატორი და მის განხსნაზე აღარ თანხმდებოდა; პატრიარქის ადგილზე კი თავისი მოძღვარი, ილუმენი იოსები დაადგინა, რომელმაც განხსნა კიდევ იგი. შემდგომ, საბრალო იმპერატორ იოანეს სამივე და გვარ-ტომით არაბერძენთ მიათხოვა იმის შიშით, რომ მათ ქმრებსა და შვილებს იმპერატორის ტახტის ხელში ჩაგდების მცდელობა აღარ ჰქონოდათ. ქმრებად უცხოელი მდიდარი და წარჩინებული დიდებულები აურჩია, რათა იმპერიის საზღვრებს განეშორებინა ტახტის მემკვიდრენი. ერთი და ფრანგ მათე ვალენკურტს მისცა ცოლად, მეორე — ბულგარელ თავადს, მესამე კი — გრაფ დე ვინტიმილ ვილგელმს⁸¹. მხოლოდ ერთი გარემოება-

⁸¹ Pachymer. Lib. III cap. VI. p. 120 et Niceph. Gregor. Lib. IV. cap. IV. Segm. I.

⁷⁸ 1259 წელს Nicephor Gregor. Hist. Byz. Lib. III cap. Segm. IV. edit. Paris. 1702.

⁷⁹ 1260 წელს Niceph. Gr. Lib. IV. cap. I. Segm. I.

⁸⁰ Pachymer. in Mich. Pal. Lib. III. cap. X. pag 127.

და აბრკოლებდა იმპერატორ მიხეილის ტახტზე საბოლოოდ განსამტკიცებლად და სულიერ სიმშვიდეს ურღვევდა: ნეაპოლიტანელთა და სიცილიელთა მეფე — კარლოს დ'ანჟუ, თავის მტერთა მამაცი და დაუმარცხებელი მოწინააღმდეგე, მრავალბრძოლამოგებული და ბიზანტიის იმპერიის ზოგი ქალაქის მიმტაცებელი, იმხანად ემზადებოდა ხმელეთიდან ჯარით დასხმობდა თავს კონსტანტინოპოლს, ხოლო უზარმაზარი ფლოტით ალყა შემოეკრე და აეღო ბერძენთა სხვა ზღვისპირა სიმაგრეებიც. ეს კონსტანტინოპოლიდან განდევნილმა ბალდუინმა სთხოვა დახმარება კარლოსს და აღუთქვა, რომ ტახტის დაბრუნების შემდგომ მთელ აქაიასა და პელიპონესს მისცემდა, და თავის ვაჟ — ფილიპეს კარლოსის ასულზე დააქორწინებდა, იმ პირობით, რომ თუკი ბალდუინი და მისი ძე უშვილოდ გარდაიცვლებოდნენ, მთელი იმპერია კარლოსსა და მის მემკვიდრეთ გადაეცემოდა. მეორე მხრივ, კარლოსის ძმა, ფრანგთა მეფე ლუდოვიკო სხვა ფრანგ უფლისწულებთან ერთად სარკინოზთა წინააღმდეგ ჯვაროსნული ლაშქრობისათვის ემზადებოდა პალესტინის გამოსახსნელად⁸². მიხეილი ხედავდა ამას, და შიშობდა, რომ ეს ორი ძმა შეერთებული ძალებით არ წამოსულიყვნენ მის წინააღმდეგ და ტახტიდან არ ჩამოეგდოთ. ამიტომაც, პოლიტიკური მიზნებით გადაწყვიტა დამეგობრებოდა რომის პაპს, რათა მისი მფარველობით თავი დაეღწია მოსალოდნელი საშიშროებისაგან, და ამასთან ერთად, ხელსაყრელი შემოხვევით დასავლეთელ მეფეებსაც დაახლოებოდა. სწორედ ამ მიზეზით დაიწყო მან მთელი ძალისხმევით ეკლესიათა გაერთიანების მცდელობა.

§ 44. ამასობაში კი, რომის პაპი ურბან IV ბალდუინის თხოვნით გულმოდგინედ ცდილობდა მიხეილის წინააღმდეგ აემხედრებინა ევროპის ყველა მეფე. სწორედ მაშინ დაიწყო იმპერატორმა მიხეილმა მასთან მოლაპარაკებების წარმოება, ჯერ რამოდენიმე ფრანცისკანელ ძმათა მეშვეობით სცადა კავშირის დამყარება, შემდგომ კი უკვე ელჩები გაგზავნა რომს, რათა დრო მოეგო და ძვირფასი საჩუქრებით მოესყიდა კარ-

⁸² ეს ხდებოდა ქ. შ-დან 1266 წელს.

დინალები და პაპთან დაახლოებული პირები⁸³. ამ დროს ყოველდღიურად იზრდებოდა კარლოსის საქმეთა და გამარჯვებათა დიდება. მან იმხანად თავისი ჯარი ძმის მხედრობას შეუერთა, და მიხეილის შიშიც გაძლიერდა. მიხეილმა საგანგებო ელჩობა გაუგზავნა ლუდოვიკოს, და არწმუნებდა, უფრო სწორედ, აფიცებდა მას, თანადგომა გაეწია ეკლესიათა გაერთიანებისათვის. ამისთვისვე იღწვოდა ურბანის მემკვიდრე — კლიმენტი IV-სთან მოლაპარაკებითაც. კლიმენტიმ უწყოდა იმპერატორის შიში, ხედავდა მის აშკარა მძიმე მდგომარეობას, და ღრმად დარწმუნებული, რომ მიხეილი მის ყველა მოთხოვნას დააკმაყოფილებდა, პასუხად მიუგო, რომ ეკლესიათა გაერთიანებისათვის საჭირო არაა არც ბჭობა და არც კრებები, რამეთუ რომის ეკლესიის დოგმატები კრებებზე ძალზე მშვენივრადაა ჩამოყალიბებული, და თუკი იმპერატორი მართლაც ესწრაფვის გაერთიანებას, მაშინ, მანაც და პატრიარქმაც, აღმოსავლეთის ეკლესიის ყველა მღვდელმთავარმა და მათმა ქვეშევრდომთაც მიიღონ გამოგზავნილი მრწამსი, რომელიც ლათინთა მთელ სწავლებას შეიცავს, და მის ქვეშ ხელი მოაწეროს ჯერ თავად იმპერატორმა, ხოლო შემდგომ სხვებსაც აიძულოს ასევე მოიქცნენ, და ეს ფურცლები რომს გამოაგზავნოს საუკუნოდ შესანახად.

§ 45. აქამომდე იმპერატორი მიხეილი ცხადად სიტყვითა და დაპირებებით მოქმედებდა, ფარულად კი შეძლებისდაგვარად ცდილობდა კარლოსის წინააღმდეგ მტრები აემხედრებინა, განსაკუთრებით კი ვენეციელებს აქეზებდა. მაგრამ ახლა უკვე იძულებული გახდა აშკარად ემოქმედა, რადგან ურბანთან და აწ უკვე გარდაცვლილ კლიმენტისთან კი აღარ ჰქონდა საქმე, არამედ ფრიად გონიერ და მასავით ცბიერ კაცთან: ეს იყო გრიგოლ X, — კლიმენტის მემკვიდრე რომის საპატრიარქო ტახტზე⁸⁴. ეს პაპი განზრახვას მიუხვდა იმპერატორს და გადაწყვიტა, რადაც არ უნდა დაჯდომოდა, ეკლესიათა გა-

⁸³ Pachym. loc. cit. Lib. II. cap. XXXVI. p. 109.

⁸⁴ ქ. შ-დან 1271 წელს.

ერთიანება ეიძულებინა მისთვის; პირველ ყოვლისა, მან ჩაშალა მიხეილის კავშირი ვენეციელებთან, კარლოსის წინააღმდეგ რომ იყო განზრახული; ევროპის ყველა მეფესა და უფლისწულს მისწერა, რომ მზადყოფნაში ჰყოლოდათ ჯარები; ყველანი ეპისკოპოსებთან ერთად მოიწვია მომავალ წელს ლიონში დანიშნულ კრებაზე; და მერმე მიხეილს გაუგზავნა ლეგატები უწყებითურთ, რომელიც ფრიად მბრძანებლური ტონით იყო დაწერილი, სადაც იგი იმპერატორს აუწყებდა, რომ თავად იგი დაუყოვნებლივ გამოცხადებულყო კრებაზე, ანდა თავისი ნაცვალნი გამოეგზავნა; აღმოსავლეთს ყოველგვარი განსჯის გარეშე მიედო ლათინთა მრწამსი, რომელიც მისმა წინამორბედებმა გაუგზავნეს, თუკი ლათინებთან მეგობრული კავშირი სურდა.

§ 46. ასეთ გამოუვალ მდგომარეობაში ჩავარდნილი იმპერატორი ხედავდა, რომ მიზნის მისაღწევად, ე. ი. მტრების მოსაცილებლად და ტახტის განსამტკიცებლად ერთადერთი საშუალებაა რჩებოდა: აღმოსავლეთის ეკლესია დასავლეთის უბადრუკ მორჩილებაში შეეყვანა. მე აღარ შევეუდგები იმ ყველაფრის აღწერას, რაც მან პაპი გრიგოლის მოსათაფლად წარმოთქვა და მოიმოქმედა; მსურველებს შეუძლიათ ყოველივეს დაწვრილებით გაეცნონ ისტორიკოსთა თხზულებებში⁸⁵. და დაინახვენ, რომ თავის განზრახვაზე მყარად მდგომი იმპერატორი ყოველგვარ ღონეს ხმარობდა, რათა ყველა თავისი ქვეშევრდომი თავისი აზრებისაკენ გადაებირებინა. თავიდან პირმოთნე დაპირებებით და საჩუქრებით ცდილობდა მიზნის მიღწევას, ხოლო მერე შეურაცხყოფაზე, მუქარაზე, გადასახლებასა და სიკვდილით დასჯაზე გადავიდა. რალას არ იქმონდა, ოღონდ კი მისი მოთხოვნა დაეკმაყოფილებინათ.

§ 47. იმპერატორმა საპატრიარქო ტახტიდან ჩამოაგდო და ერთ-ერთ მონასტერში⁸⁶ გადაასახლა ჩინებული კაცი, კეთილ-

⁸⁵ Geog. Pachym. I. c. Lib. V. cap. XI et XII, Niceph. Gregor. Lib. V. cap. I. et II.

⁸⁶ მთავარანგელოზ მიქაელის მონასტერში.

⁸⁶ Vid. Niceph. Greg. lib. V. cap. II. Segm. II.

მორწმუნე ღვთისმსახური და თავისი მოძღვარი, პატრიარქი იოსები, რომლისაგანაც მიიღო განხსნა თავისი დიდი დანაშაულისა, და რომელთანაც უწინ განუზომელი სიყვარული და პატივისცემა აკავშირებდა. იმპერატორმა ჯერ მარტო სცადა, შემდეგ კი მის მონა-მორჩილთა: კონსტანტინე მელიტინიოტის, გიორგი მეტოხიტისა და გიორგი კვიპრელის დახმარებით დააპირა თავის მხარეს გადაებირებინა ეკლესიის სახელგანთქმული ქართოფილაქსი იოანე ვეკა, რომელიც თავისი ღრმა განსწავლულობისათვის პატრიარქისა და იმპერატორის კარზე დიდ პატივს იმსახურებდა. იოანე ცნობილი იყო, როგორც უქკვიანესი კაცი, მკერამეტყველი, მეცნიერებათა მცოდნე და როგორც ყველასაგან გამორჩეული ნიჭით დაჯილდოებული ადამიანი. მაგრამ რადგანაც ვეკა ამის წინააღმდეგი იყო და ლათინებს მწვალებლობაში გაბედულად ამხილებდა, ამიტომ მიხეილმა ვინმე იოანე ხუმნის მეშვეობით კრებაზე მას ბრალი დასდო იმპერატორის ხელისუფლების წინააღმდეგ შეთქმულებაში. ამ კრების მსაჯულები სასულიერო პირებთან ერთად, მიხეილის ერთგული ერისკაცებიც იყვნენ, უმაღლესი ლოგოფეტის*, გიორგი აკროპოლიტის თაოსნობით. ამის შემდეგ იმპერატორმა იოანე ვეკა საპყრობილეში ჩააგდო. საპყრობილეში იოანემ თავისი მდგომარეობა გაიანზრა, და როდესაც მიხვდა, რომ ძლიერ სახიფათოა წინ აღუდგე ისეთ იმპერატორს, როგორიც მიხეილია, თავის მიმართ უსიტყვო მორჩილებას რომ ითხოვს, აზროვნება შეიცვალა, სიტყვით თუ საქმით ლათინების მომხრეთა მეთაური გახდა და ყველაფერში იმპერატორის სურვილისამებრ იქცეოდა: სიტყვით, კალმით თუ ქადაგებით ცდილობდა, ეამებინა მისთვის. შემზარავია ქრისტეს ეკლესიის მქადაგებლის მიხეილ ოლოვოლის ბედი. ჭეშმარიტების საჯაროდ ქადაგებისათვის იმპერატორის ბრძანებით მას ტუჩები და ცხვირი მოაჭრეს და ბითინიის მონასტერში გადაასახლეს. შემდეგ იმპერატორმა იგი კონსტანტინოპოლში გამოიძახა და უმეტესი შეურაცხყოფის მიზნით ბრძანა, ახლადმოკლული ცხოველის შიგნეულობა სახეში ერტყათ მისთვის. ამ შემთხვე-

* ლოგოფეტი — (ბერძნ.) — ბიზანტიაში ერთ-ერთი უმაღლესი ხიმოხელეო თანამდებობა.

ვამ ხალხი იმდენად შეაძრწუნა, რომ მას შემდეგ წინააღმდეგობის გაწევა ველარავინ გაბედა. იმპერატორი უკეთ არც თავის ნათესავებს მოქცევია, ზოგიერთს თვალები დასთხარა და პაპის ელჩებს აჩვენა იმ მიზნით, რომ ისინი უფრო დარწმუნებულიყვნენ, თუ როგორ არ უნდოდა იგი განხეთქილების მომქმედთ და როგორ გულწრფელად სურდა ეკლესიათა გაერთიანება. იმპერატორს ოჯახის წევრებს შორის ყველაზე ძლიერ უყვარდა თავისი და, ევლოგია, რომელიც მას ბავშვობისას ზრდიდა და მისდამი დიდ მზრუნველობას იჩენდა; მაგრამ იმ-ს გამო, რომ ევლოგია მტკიცედ იღვა მართლმადიდებელთა მსარეზე, იმპერატორმა მისდამი ესოდენ ძლიერი სიყვარულიც კი უსასტიკესი სიძულვილით შეცვალა. ვინღა გაბედავდა ყოველივე ამის შემდეგ იმპერატორის მრისხანებას აღდგომოდა წინ? ყველა ქედს იხრიდა და დამარცხებული ნებდებოდა.

§ 48. პაპ გრიგოლ X-ეს მიერ ლიონში მოწვეულ კრებაზე მიხვილმა ელჩები გააგზავნა: თავისი და თავისი ძის. ანდრონიკეს მხრივ — უმაღლესი ლოგოფეტი გიორგი აკროპოლიტი, პროტოვესტარი პანარეტი და მთავარი თარჯიმანი ვერიტი, ხოლო საეკლესიო მხრიდან — მომავალი პატრიარქი გერმანე. მიტროფანე ნიკეელი და მათთან ერთად რამოდენიმე სამღვდელო დასის წარმომადგენელი, რომელთა შორისაც იოანე ვეკაც იმყოფებოდა, მაგრამ იმპერატორის ელჩების გემი დაიღუპა, ხოლო მეორე გემზე მყოფი აკროპოლიტი, მღვდელმთავრები და სამღვდელო დასის წარმომადგენლები 26 ივნისს მშვიდობიანად ჩავიდნენ კრებაზე, სადაც მათ ფიცით მიიღეს და ხელმოწერით დაადასტურეს ლათინთა აღმსარებლობა. ასე ვადაწყდა ყოველივე პაპის სურვილისამებრ, რომელიც ცდილობდა აღმოსავლეთის ეკლესია დასავლეთისათვის დაექვემდებარებინა და ბერძნებთან ემეგობრა იმ იმედით, რომ ლათინები მათი სახით მტრებს დაკარგავდნენ და პალესტინასა და სირიას იოლად გამოსტაცებდნენ ხელიდან სარკინოზებს, რომელთა წინააღმდეგაც ისინი ჯვაროსნულ ლაშქრობის წამოწყებას აპირებდნენ; მიხეილი კი თავის მხრივ იმედოვნებდა, რომ ამ გზით ლათინებთან, მეტადრე კარლოსთან მშვიდობას დაამყარებდა და ტახტზე განმტკიცდებოდა. როდესაც იმპერატორის ელჩები დაბრუნდნენ და მას

კრებაზე მომხდარის შესახებ აუწყეს, იმპერატორმა გაერთიანებისადმი თავისი გულწრფელი სურვილის გამოხატვის მიზნით ჯერ გაერთიანების წინააღმდეგი პატრიარქი იოსები აიძულა, პატრიარქობაზე უარი განეცხადებინა, და მის ნაცვლად ტახტზე თავისი თანამოაზრე იოანე ვეკა აიყვანა, იოსების ერთგული მოკავშირე, მართლმადიდებელი იობი იასიტი კი ციხეში ჩააგდო; შემდეგ პირველივე წირვაზე კვერექსებში, უწინარეს ყოველთა პატრიარქთა, პაპის სახელის მოხსენიება ბრძანა. ამასობაში პაპმა, რომელსაც იმპერატორმა მეორე ელჩობა გაუგზავნა, კარლოსი დაარწმუნა, რომ ეკლესიის მშვიდობისა და ერთსულოვნების მიზნით მიხეილს შერიგებოდა და საომარი სამზადისი შეეწყვიტა.

§ 49. მაგრამ იმპერატორის ეს ქმედება არ იქმარა პაპმა ნიკოლოზ III-მ — შემკვიდრემ ერთმანეთის მიყოლებით გარდაცვლილი პაპების: გრიგოლ X-ის, ინოკენტი V-ის და იოანე XXI-სა. იგი ხვდებოდა, რომ იმპერატორი ეკლესიის გაერთიანებას ოდენ პოლიტიკური მიზნების გამო ესწრაფვოდა, ხოლო მისი ქვეშევრდომნი არანაირად არ იყვნენ ამისთვის მოწადინებულნი. ამიტომაც მან ელჩები გაუგზავნა მიხეილს და მოსთხოვა: ეკლესიათა გაერთიანება უფრო სარწმუნო რომ ყოფილიყო, იმპერატორს უნდა მიეღო ლათინთა მრწამსი ჩამატებითურთ: „და ძისაგან“ და შემდეგ აღმოსავლეთის ეკლესიაც ეიძულებინა იგივე გაეკეთებინა.

ასეთი მოთხოვნა აღმოსავლეთის ეკლესიისათვის არც მანამდე, და არც მერმე არცერთ პაპს არ წამოუყენებია. იმპერატორი მიხეილიც გამოუვალ მდგომარეობაში ჩავარდა. თვითონ არ ლებულობდა ამ წინადადებას, და მითუმეტეს ვერ მოთხოვდა ამის ქმნას წმიდა მამათა დოგმატების მტკიცე დამცველებს, რომლებიც ეკლესიათა გაერთიანებაზე არ თანხმდებოდნენ და იმპერატორსაც ისე ცივად ეკიდებოდნენ. რომ უკვე შინაომის საშიშროებაც დგებოდა. მეორე მხრივ, მიხეილს პაპისთვისაც უნდა ეამებინა, რათა თავისი მოქმედებების სიწრფელეში ეჭვი არ შეეტანინებინა. ამასთანავე, ხედავდა, თუ დღითიდღე როგორ იზრდებოდა კარლოსის საქმეთა სახელი და დიდება. ამიტომაც ამგვარი ქმედება დაიწყო: ერისკაცთა საამებლად პატ-

რიარქის ტახტიდან დაამხო იოანე ვეკა. იმპერატორი თვითონაც უკვე ველარ უძღვებდა მის დაჟინებულ და უჯიათ ხასიათს — (პატრიარქი თავისი სურვილების ასრულებას დაუყოვნებლივ მოითხოვდა იმპერატორისაგან)⁸⁷. ამავე დროს პაპთან მოლაპარაკებებს აგრძელებდა: ხან პპირდებოდა, ხან ებოდიშებოდა, და ბოლოსდაბოლოს თავის მხარეზე გადაიბირა. პაპი სხვადასხვა მიზეზის გამო კარლოსის დიდი მტერი იყო, მიხეილმაც დრო იხელთა და საიდუმლო კავშირი დაამყარა მასთან, რათა თანადგომა გაეწია კუნძულ პროხიტას თავადის — იოანეს წამოწყებისათვის, რომელიც არაგონის მეფე — პეტრესთან ერთად კარლოსის ძალაუფლების ქვეშ მყოფი სიცილიის მოპოვებას ცდილობდა⁸⁸. ეს იოანე, სიცილიის ტახტის მემკვიდრედ აცხადებდა თავს, კარლოსმა კი მას მთელი ავლადიდება წაართვა, და ახლა იგი ფარულად დადიოდა კონსტანტინოპოლში, რომსა და ესპანეთში მონაზვნის სამოსში გადაცმული და როცა კარლოსის წინააღმდეგ სამოქმედოდ გადმოიბირა ბერძენი იმპერატორი, არაგონის მეფე და პაპი ნიკოლოზი, ყველანაირი ღონე იხმარა სიცილიაში აჯანყების მოსახდენად.

§ 50. ამ დროს გარდაიცვალა პაპი ნიკოლოზი. კარლოსის შემწეობით ტახტზე ავიდა პაპის მემკვიდრე მარტინ IV. მიხეილმა უწინდელი კავშირის აღსადგენად დაუყოვნებლივ გაგზავნა მასთან ელჩები — ლევ ირაკლიელი და თეოფანე ნიკეელი. მაგრამ პაპმა ეკლესიის საქმეთა განგება პირველი ნაბიჯებიდანვე პოლიტიკური გზით წარმართა — პოლიტიკური ვითარების ცვლილების მიხედვით ცვლიდა ეკლესიის საქმეებს. პაპი ნიკოლოზი კარლოსის მეგობარი იყო, და მისი რჩევით იმპერატორი მიხეილი ეკლესიიდან განკვეთა ყოველგვარი სამართლიანი მიზეზის გარეშე, როგორც ამას აღიარებს მაიმბურგ-იეზუიტიც, რომელიც ამ ამბებს დაწვრილებით აღწერს მართლმადიდებელთა წინააღმდეგ დაწერილ

⁸⁷ Pachym. Lib. VI. cap. XII et XIII. p. 310 et 311.

⁸⁸ Platina in vitis Pont., vid. Vitam Nicolai III edit. Colon. 1574. p. 211.

„ეკლესიათა განყოფის ისტორიაში“⁸⁹. ეს კიდეც არაფერი, პაპს სურდა კარლოსთან და ვენეციელებთან ერთად იმპერატორისთვის ხმელეთიდანაც და ზღვიდანაც შეეცია. მაგრამ ამოდ: შემთხვევამ, უფრო სწორედ ღმრის განგებამ სხვაგვარად წარმართა საქმე. იმპერატორმა მიხეილმა როგორც კი შეიტყო პაპის ამგვარი მოქმედებანი, უპირველესად ასეთი ნაბიჯი გადადგა: კვირას, წირვაზე, როცა დიაკვანი ჩვეულებისამებრ (როგორც ლიონის კრების მერე იყო მიღებული). პაპის სახალის წარმოთქმას აპირებდა, იმპერატორი წამოდგა და სმამალა, ყველას გასაგონად შეაჩერა იგი⁹⁰. შემდგომ შეუკავშირდა არაგონის მეფე — პეტრეს და ოცდაათი ათასი უწყია ოქრო გაუფზაენა წარმატებით დაწყებული ომის გასაგრძელებლად. ალბანეთში მიხეილის ჯარებმა სძლიეს კარლოსის ჯარების ნაწილს. სიცილიელები აჯანყდნენ: წმიდა აღდგომის საღამოს წინასწარი შეთანხმებისამებრ უცაბედი ამბოხი მოაწყვეს, მთელი ფრანგები დაბოცეს და კარლოსის ბატონობიდანაც დაიხსნეს თავი. კარლოსმა იმხანად სხვა ბევრი დამარცხებებიც იწვნია, სიცოცხლე დაასრულა, და თან გაიყოლა ოცნება ბევრ ბრწყინვალე გამარჯვებებზე. ამის შემდეგ მიხეილი სრულ უსაფრთხოებაში აღმოჩნდა, თუმცა აღარც მას უცოცხლია დიღხანს. მეორე წელსვე, როცა მის წინააღმდეგ ამბოხებული თესალიის განმგებელ — იოანეს დასამორჩილებლად დაძრა ჯარი, პახომიევოს დასახლებას რომ მიუახლოვდა, გარდაიცვალა. ტახტი დაუტოვა თავის ძეს — ანდრონიკეს, რომელმაც მეფეს შესაფერი პატივით დაკრძალვაც არ აღირსა; ბრძანა, ყოველგვარი ცერემონიის გარეშე დაემარხათ ორმოში და იმდენი მიწა მიეყარათ, რომ ფრინველთა და მხეცთა საჭიჯგნი არ გამხდარიყო⁹¹. მაშინ პატრიარქის ტახტზე კვლავ იოსები დააბრუნეს, გადასახლებული ევლოგიაც იმპერატორის კარზე ჩამოიყვანეს, ლათინთა თანამოაზრეებმა შეინანეს და შენდობაც მიიღეს; დასავლეთის ეკლესიის ახალი დოგმატები დაიგმო და აღმო-

⁸⁹ Histoire du Schisme de Grecs. par. Maimburg. Lib. V. Tom. II. p. 119. Edit. Paris. 1680.

⁹⁰ Pachymer. Lib. VI. cap. XXX. p. 314.

⁹¹ ქ. შ-დან 1283 წელს, Niceph. Gregor. Lib. V. cap. VII. Segm. III et VI.

სავლეთის ეკლესია უწინდელზე მეტად დასცილდა მას. ასეთი იყო დასაწყისი და დასასრული იმპერატორ მიხეილ პალეოლოგის მიერ წამოწყებული ეკლესიათა გაერთიანებისა.

§ 51. იმპერატორ მიხეილის სიკვდილის შემდეგ მისი შემართებით გამოცოცხლებული ბიზანტიის იმპერია ანდრონიკეს მეფობის სანაში დაკნინების გზას დაადგა. პირველმა თურქმა სულთანმა ოტომანმა ბითინიის ქალაქ ბრუსში რეზიდენცია დააარსა და აღმოსავლეთიდან იმპერიის მიწების დიდი ნაწილი დაიპყრო, რითაც ძლიერ შეარყია იგი. ანდრონიკე უმცროსის მეფობის დროს (რომელმაც ძალით წაართვა ტახტი თავის პაპას⁹²), აზიიდან ევროპაში შემოიქრა ოტომანის ძლევა მოსილს ვაჟი — ორზანი და სასტიკად ააოხრა ბერძენთა სამფლობელოები. ამავე ხანებში იმპერია თურქთა, ბულგარელთა და სხვა მტერთა მრავალრიცხოვან შემოსევებსაც განიცდიდა. მტრებისაგან შეშინებულმა ანდრონიკემ ლათინთა მხრიდან შემწეობის იმედით გადაწყვიტა ისევ გაემართა მოლაპარაკებები ეკლესიათა გაერთიანებაზე და ელჩებიც გაგზავნა: ფრანგთა მეფე ფილიპესთან ვენეციელი დიდებული დანდოლი მიავლინა, ხოლო პაპ ბენედიქტე XII-სთან — მონაზონი ვარლამი. ეს ვარლამი ეკლესიის ისტორიაში საკმაოდ ცნობილი პირია მის მიერ მოხდენილი განხეთქილების გამო. ამ განხეთქილებას ძირფესვიანად აღწერენ გრიგორასი და იოანე კანტაკუზენი, შემდგომ იმპერატორის ტახტზე ასული⁹³. ამ ბერმა პაპს ორი წინადადება შესთავაზა: პირველი, პაპს უნდა დაერწმუნებინა ლათინი მეფეები ამხედრებულიყვნენ ბარბაროსთა წინააღმდეგ, და ამით დაეყოლებინათ ბერძენები გაერთიანებაზე. მეორე — მოითხოვდა, მოეწვიათ მსოფლიო კრება, რომელზეც აღმოსავლეთის ყველა პატრიარქი ანდა მათი თანამოსაყდრენი დაესწრებოდნენ. ამ კრებას უფრო მტკიცედ უნდა გაეერთიანებინა ეკლესიები, ვიდრე ეს ლიონის კრებამ შეძლო. ბენედიქტემ უპასუხა: ჯერ აღმოსავლეთის ეკლესია შემოგვიერთდეს, და მერე ვიზრუნებ ლათინები დასახმარებლად შევიაარა-

⁹² 1328 წ. ქ. შ-დან.

⁹³ Niceph. Gregor. Lib. XI. cap. X. იხ. აგრეთვე
Cantacus. Histor. Lib. II. cap. XXXIX et XL.

ლო. რაც შეეხება კრებას, მისი მოწვევა სულაც არაა საკირო, რადგან დასავლეთის ეკლესიის დოგმატთა გამორკვევის არანაირი აუცილებლობა არ არსებობს, ისინი ხომ კრებებზე უკვე მრავალჯერ ჩამოყალიბებული და ახსნილიაო.

§ 52. ასეთი პასუხით გამოსტუმრებული ვარლამი ორი ლათინი ეპისკოპოსის თანხლებით დაბრუნდა უკან. პაპს უნდოდა ხელსაყრელი შემთხვევით ესარგებლა და ეს ეპისკოპოსები აღმოსავლელებთან საპაექროდ გამოეგზავნა კონსტანტინოპოლს. მაგრამ ამგვარი პაექრობის გამართვას წინ აღუდგა ნიკიფორე გრიგორასი, რომელმაც პატრიარქ იოანესა და მასთან მყოფ მღვდელმთავრების თანდასწრებით წარმოთქვა სიტყვა. ამ სიტყვაში საკუთარი აზრებითაც და წმიდა მამათა გამონათქვამების მოშველიებითაც დაასაბუთა, რომ სარმწუნოებაზე დავა საშიშია, და რომ აღმოსავლეთის ეკლესიის დოგმატები საკმაროდ ნათლადაა ჩამოყალიბებული სხვადასხვა წმიდა კრებებზე და აღარანაირ ეკვს არ იწვევს⁹⁴. ნიკიფორე მაშინ დიდი პატივით სარგებლობდა იმპერატორთან და სასულიერო პირთა შორისაც განთქმული იყო თავისი განსწავლულობით. მისმა სიტყვამ იმოქმედა. ლათინი ეპისკოპოსები იძულებულნი გახდნენ უკან გაბრუნებულიყვნენ, და ეკლესიათა გაერთიანების საქმეც ჩაიშალა. მითუმეტეს, რომ მალე იმპერატორი ანდრონიკე გარდაიცვალა⁹⁵.

§ 53. ამის შემდეგ ბიზანტიის იმპერიის მდგომარეობა დღით-დღე უარესდებოდა და უკიდურეს მდგომარეობამდე მივიდა ანდრონიკე უმცროსის ძის — იოანე პალეოლოგის მეფობის ხანაში. იგი იმდენად მტრულად იყო განწყობილი თავისი მეურვისა და სიმამრის — იოანე კანტაკუზენის მიმართ, რომ იმპერიაში დიდხანს მძვინვარებდა სისხლიანი შინაომები⁹⁶. იმხანად ბერძნებს ორი სასტიკი მტერი ჰყავდათ: ერთი — თურქთა სულთანი, იმპერიის დასაპყრობად მოწადინებული, და მე-

⁹⁴ Niceph. Gregor. Hist. Byz. Lib. XX cap. VIII.

⁹⁵ ქ. შ-დან 1341 წელს.

⁹⁶ Ioann. Cantacuzen. Lib. III. cap. XX-XXXV.

ორე — პაპი, ეკლესიის დამორჩილების მოსურნე. საბრალო ბიზანტიელმა იმპერატორებმა იმპერიის დამონებისაგან განთავისუფლების მიზნით გადაწყვიტეს აღმოსავლეთის ეკლესია დასავლეთისათვის დაექვემდებარებინათ. ასე დაიწყო მოლაპარაკებები გაერთიანებისათვის, რომლებიც არასოდეს წარმატებით არ დასრულებულა, რადგან ბერძნები ყოველთვის ბარბაროსთა წინააღმდეგ დახმარების იმედით იწყებდნენ გაერთიანების მცდელობას, ლათინებს კი არასოდეს აღმოუჩენიათ ეს შემწეობა.

§5 4. კანტაკუზენმა ორჯერ გაგზავნა ელჩები რომს, — ერთხელ კლიმენტი VI-სთან, მეორეჯერ — ინოკენტი VI-სთან, მაგრამ ამაოდ⁹⁷. შემდგომ, როცა მან ტახტზე უარი განაცხადა და ბერად აღიკვეცა, იოანე პალეოლოგი უკიდურესად შეავიწროვა თურქმა სულთანმა — ამურატმა. მან უკვე აიღო კალიუპოლი და მრავალრიცხოვანი ლაშქრით დაიძრა კონსტანტინოპოლისაკენ. მაშინ იმპერატორმა ჯერ ელჩები გაუგზავნა პაპს, მერე თვითონ წავიდა რომს, და იქ (როგორც ლათინები ამტკიცებენ, თუმცა ძლიერ საეჭვოა), დასავლეთის ეკლესიის მრწამსი მიიღო და თავისი სიგელით დაადასტურა, ბარბაროსთა წინააღმდეგ დახმარების მიღების იმედით. მაგრამ არათუ დახმარებას ვერ ეღირსა, არამედ რომისკენ მიმავალ გზაზე ვენეციაში გევახშეებმა შეიპყრეს და სანამ მისმა ძემ — მანუელმა ფული არ გამოგზავნა ვალების გადასახდელად, არ გაუთავისუფლებიათ⁹⁸. უწინდელზე უფრო უსახსროდ დარჩენილი იმპერატორი კონსტანტინოპოლში დაბრუნდა, და იძულებული გახდა ამურატხანს უკიდურესად არახელსაყრელი პირობებით დაზავებოდა: ბარბაროსთა ბრძანებით უფროსი ვაჟი — ანდრონიკე უნდა დაებრძავებინა, ხოლო მეორე — მანუელი, ტახტის მემკვიდრე, მძევლად გაეგზავნა.

§ 55. ამის შემდეგ მანუელი გამეფდა თურქებისაგან შევიწროებულ და დანგრეულ სამეფოში. ლათინების შემწეობის იმე-

⁹⁷ Idem. Lib. IV. cap. IX. pag. 732. edit. Paris. 1645.

1845.

⁹⁸ Laonic. Chaleocondyl. Histor. Lib. I. pag. 25 et seq. edit. Paris. 1650.

დით შეპყრობილი, საფრანგეთს გაემგზავრა კარლოს VI-სთან, იქიდან კი ინგლისში გადავიდა. მან დიდი ხანი დაჰყო იქ, და ბევრი მცდელობის შემდეგ ხელმოცარული დაბრუნდა უკან.

§ 56. ეკლესიათა გაერთიანების საქმე უკანასკნელად წამოიწყო იოანე პალეოლოგმა, მანუელის ძემ, მაშინ, როცა ამხელა იმპერიიდან მისი ძალაუფლების ქვეშ კონსტანტინოპოლის გარდა თითქმის აღარაფერი დარჩა. ბერძნების მღვდლმარეობა უკიდურესად მძიმე იყო. პაპმა ევგენი VI-მ ფერარაში მოიწვია კრება (რომელიც ფლორენციაში დასრულდა). ამ კრების მიზანი იყო: გაენადგურებინა კონსტანციაში და პაზელში მომხდარი მოქმედებანი, სადაც პაპის ძალაუფლება უარყვეს, და თავის მხარეს გადმოებირებინა აღმოსავლეთის ეკლესია, რისთვისაც ესოდენ საჭირო შემწეობის აღმოჩენას ჰპირდებოდა ბერძნებს. ამ კრებას ესწრებოდნენ იმპერატორი იოანე, მისი ძმა დიმიტრი და პატრიარქი იოსები მრავალ მღვდელმთავრებთან ერთად. მასზე მომხდარ ამბებს დაწვრილებით აღწერს სილვესტერ სიროპული, ეკლესიის უმაღლესი ეკლესიარზი და დიკეოფილაქსი⁹⁹, რომელიც ყველაფრის თვითმსილველი იყო. თავის თხზულებაში იგი აშკარად აჩვენებს ლათინთა მიზნებსა და მანქანებებს და აღმოსავლელთა უმძიმეს გასაჭირს. რაღა მოხდა მერე? ფლორენციის კრება და მისი ქმედება არ ცნო შემდგომმა კონსტანტინოპოლის კრებამ. იგი შედგა წმიდა სოფიას ტაძარში, იოანეს ძმის — კონსტანტინეს მეფობის დროს. ლათინებს შემდგომშიც არანაირი დახმარება არ აღმოუჩენიათ ბერძნებისათვის და შორიდან უცქერდნენ, როგორ აიღო კონსტანტინოპოლი მუჰამედ II-მ და მთელ ბიზანტიის იმპერიაზე გაბატონდა¹⁰⁰. ამგვარად, ეკლესიები აქამდე განყოფილი რჩება. დაე, ოდესმე მტკიცე კავშირით შეაუღლოს ისინი სული წმიდის მაღლმა! ამინ.

⁹⁹ Syropul. Concil. Florentin. exacti. nazzat. edit. Hagae Comitit. 1660.

¹⁰⁰ ქ. შ-დან 1453 Laonic. Chaleocond. De redus Turcie. Lib. VIII. pag. 209.

ამბროსი ნეკრესელი ეპისკოპოსი

ამბროსი ნეკრესელი (ერისკაცობაში — ზაქარია მიქაძე); დაიბადა 1728 წელს; ბერად აღიკვეცა 1777 წელს; 1794 წლიდან იყო ნეკრესის ეპისკოპოსი; იგი იყო ფრიად სწავლული და განათლებული მღვდელმთავარი; ამბროსი დაუცხრომლად იბრძოდა კახეთში გაღვებებისა და გამაჰმადიანების წინააღმდეგ; ერთ-ერთ ქადაგებაში იგი მიმართავს ხალხს: „აჰა ესერა, რომელთა ესე ქრისტეს მიერ ნათელ-გვიღებიეს, განვიძარცვეთ ძველი — იგი სიმყრალე მაჰმადიანთა, და აწ, ვითარცა ქრისტეს უყვარდა ერი და მოყვასნი, ისე შევიყვაროთ ჩვენი ქართველობა და დავიცვათ იგი“. აგრეთვე დაუცხრომლად იღწვოდა ცრუმორწმუნეობის აღმოსაფხვრელად: „ნუცა თილისმა, ნუცა ქადაგი, ნუცა მხარი, ნუცა ბეჭი და სიზმარი და ყოველი ამისებრი საქმე საეშმაყო, გჯერათ; ესე ყოველივე არა არს შვილნო, ღვთისანი, და აიღეთ ხელი ახლავ; განავდეთ თქვენგან და ნურღარა იქმთ ამისთანებს“. მის ქადაგებაში საკმაოდ დიდი უქირავს ეკლესიური დოგმატების ახსნასაც. 1808 წელს ღრმად მოხუცებული ამბროსი გარდაიცვალა. იგი დაკრძალულია სიონის ეკლესიაში.

(„ქადაგებანი და მოძღვრებანი თქმულნი ამბროსი ნეკრესელ ეპისკოპოსის მიერ“.

გამოცემული ალექსანდრე ეპისკოპოსის მიერ.

ქ. თბილისში 1881 წ.).

ამგროსი ნეკრესელი ეპისკოპოსის ქადაგება
პირველსა კვირაჲჲსა მარხვისასა, წმიდათა ხანთა თაჲჲვანისცემასა.
სიბჱვა სარწმუნოებისათვის მართლ-ალსარებისა

„...სარწმუნოება უნმს, რომელი მო-
უნდების ღმერთსა, რამეთუ არს და მე-
ძიებელთა მისთა სასყიდლის — მიმცე-
მელ იქმნების“.

(ებრ. 11, — VI)

სახელითა მამისათა და ძისათა და სულისა წმიდისათა,
ამინ.

აქა შემოკრებულნო კეთილ მორწმუნენო მსმენელნო! ით-
ქვა წარსულისა წინა დღესასწაულისათვის სიტყვა და ქადაგება
თქვენდა მიმართი, რაოდენ შესაძლებელ იყო ჩემ გლახაკისა
მწყემსისაგან და რაოდენ დაიტევდა გონება თქვენი, და ახლა,
რადგან სარწმუნოებისათვის ჯერ არს სიტყვა და ქადაგება დღე-
ინდელსა ამას დღესა, რაოდენ ძალ-გვედვას ვიტყოდეთ მად-
ლითა ყოვლად წმინდისა სულისათა, რომელსაცა მართალსა და
ჭეშმარიტს სარწმუნოებას აღიარებს დღეს ჩვენი ეკლესია, ჩვენ
მართლმადიდებელთა: დიდისა საბერძნეთისა, დიდისა რუსე-
თისა, ბულღარიისა, საქართველოისა და იმერეთისა. იმათ გა-
ნუჰრელი, განუყოფელი და შეუცვალეზელი იგივე და ერთი
მართლმადიდებელი სარწმუნოება გვიპყრიეს, ღვთის მოყვა-
რენო, და ხუთნივე ესე ერთობით და მტკიცედ ვდგევართ მად-
ლითა ყოვლად წმინდისა სულისათა. რაგვარადაც ერთს მა-
დალსა და შეუტყვეველსა გოდოლზედ დამყარებულნი, შვიდთა
მსოფლიოთა კრებათაგან დამტკიცებული ძეგლი აღწერილი
გვიპყრია, ვითარცა თითითა ღვთისათა წერილნი და იმაზედ
ვსდგევართ. გვწამს და განმტკიცებულნი ვართ მათვე შვიდთა
კრებათავე მადლითა, და აწ პირველად მათ შვიდთავე კრება-
თათვის ვიტყოდეთ თვითეულად ადგილთა მართლმადიდებ-
ლობით შეკრებულთა და მწვალებელთათვის, თუ ვინ იყვნენ
და სადათ გამოჩნდეს.

პირველი კრება იქმნა ნიკიას — ვითინისა მიტროპოლიასა
შინა, დროსა კეთილმსახურისა და დიდისა მეფისა კონსტანტი-
ნესსა. მაშინ გამოჩნდა უღუთო არიოს, ხუცესი ალექსანდრი-

ელთა დიდისა ეკლესიისა, რომელიცა ძესა თანა დაუსაბამოსა მამისასა არა იტყოდა თანა არსად მამისა, არამედ შექმნილად და დაბადებულად იტყოდა. ამას ზედა შემოკრბენ წმიდანი მამანი სამას ათვრამეტნი, და შეაჩვენეს უსჯულო იგი, არიოს და მისნი მიმდგომნი განჰკვეთეს და ქეშმარიტი აღსარება დაწერეს და დაამტკიცეს, „მრწამს ერთი ღმერთი, მამა ყოვლისა მპყრობელი, შემოქმედი ცათა და ქვეყნისა, ხილულთა და არა ხილულთა. და ერთი უფალი იესო ქრისტე, ძე ღვთისა მხოლოდ შობილი, მამისაგან შობილი უწინარეს ყოველთა საუკუნეთა, ნათელი ნათლისაგან, ღმერთი ქეშმარიტი ღვთისაგან ქეშმარიტისა, შობილი, და არა ქმნილი, თანა არსი მამისა“. ესრეთ აღიარეს და დაამტკიცეს.

მეორედ შეკრბენ კონსტანტინუპოლის შინა, სამეუფოსა. ქალაქსა, დროსა კეთილმსახურისა მეფისა თეოდოსი დიდისასა, ას ერგასნი წმიდანი მამანი და შეაჩვენეს უღვთო მაკედონიოს და აპოლინარი, რომელნიცა ცხოველმყოფელსა სულსა ღვთაებისაგან უცხო ჰყოფდნენ და სიტყვისა ღვთისა ხორცსა, უგონებოდ და უსულოდ აღიარებდნენ. ესენი განჰკვეთეს წმიდათა მამათა და სრული და ქეშმარიტი სარწმუნოება დაწერეს, რომელსაც დღითი-დღე აღვიარებთ. „სული წმიდა უფალი და ცხოველმყოფელი, რომელი მამისაგან გამოვალს, მამისა თანა და ძისა თანა თაყვანის იცემების და იდიდების“.

მესამედ შეკრბენ ეფესოს — დროსა კეთილ-მსახურისა თეოდოსი მცირისასა, ორასნი წმიდანი მამანი და შეაჩვენეს ურია, ცნობილი ნესტორ, რომელიცა ჰგომბდა ღვთისმშობელსა მარიამს და კაცის მშობელად იტყოდა, და ორს ძეს აღიარებდა. ესე განკვეთეს წმიდათა მამათა, და ჩვენ ქეშმარიტი აღსარება დაგვიმტკიცეს, და ესრეთ აღვიარებთ ერთსა და იმავე ძესა, საუკუნოდ მამისაგან შობილსა, ღმერთად და განხორციელებულად და განკაცებულად ჟამსა შინა, შობილად ქალწულისა მარიამისაგან, და არათუ კაცად ლიტონად განღმრთობილად, და ეგრეთვე წმიდა ქალწულსა. არა მხოლოდ ქრისტეს მშობელად, არამედ ქეშმარიტად და საკუთრად ღვთისმშობელად აღვიარებთ და თაყვანისცემთ.

მეოთხედ შეკრბენ ქალკიდონს შინა, ექვსას ოცდა ათნი წმიდანი მამანი, დროსა კეთილ-მსახურისა და თვითმპყრობე-

ლისა მარკიანესა და პულხერიასსა, და შეაჩვენეს უღმრთო ევსტიხი არქიმანდრიტი და დიოსკორე, რომელნიცა უფალსა ჩვენსა იესო ქრისტესა, ერთის არსებით და ერთის ბუნებით შეზავებულად იტყოდენ, რომელსაცა დღეს სომეხნი აღიარებენ. ესენი განჰკვეთეს და შეაჩვენეს წმიდათა მამათა, და კეთილ-მსახური, და მართალი სარწმუნოება დაგვიწერეს, რომელსაც აღვიარებთ და გვრწამს უფალი იესო ქრისტე, შემდგომად შეერთებისა ორის სრულის არსებით, ორის ბუნებით, ორის ნებით და ორის მოქმედებით; შეურევნებლად შეერთებულად და ერთს გვამად, და ერთს ძედ, და ერთ ქრისტედ, ესე იგი, საღმრთოსაგან და კაცობრივისა ღუთად სრულად. და კაცად სრულად, ჰეშმარიტებით.

მეხუთედ შეკრბენ კონსტანტინუპოლისევე, მუნვე სამეუფოსა ქალაქსა, ას სამოცდა ხუთნი წმიდანი მამანი, კეთილმსახურისა და თვითმპყრობელისა იუსტინიანე მეფისაზე, როდეს გამოინდა ეშმაკებრი თქმული მოძღვრება ორიგენისა, პირველად, ვითარმედ, გვამნი ჩვენნი არღარა აღდგებიანო; მეორედ ვითარმედ სამოთხე ხილული არა შეუქმნიესო ღმერთსა; მესამედ ვითარმედ ადამ ხორცითა არა დაბადებულ არს; მეოთხედ ვითარმედ დასასრული აქვსო სატანჯველსა ცოდვილთასა და, მეხუთედ, ვითარმედ ეშმაკნი კვალადვე ეგებიანო პირველსავე პატივსა. ესე და მსგავსნი ამისნი წვალეზანი ორიგენისნი, ამასთანავე ევაგრეცა და დიდიმოს თანახმანი მისნი. კვალად დიოდორე ტარსელი და თეოდორე მომფსვეტელი, და მსგავსნი ამათნი შეაჩვენეს, და განჰკვეთეს, და რომელიცა მართალი სარწმუნოება ქალკიდონსა შინა შეკრებულთა წმიდათა მამათა აღწერეს, ამათცა იგივე ჰეშმარიტი საცხოვრებელი სარწმუნოება დაგვიწერეს და დაამტკიცეს.

მეექვსედ შეკრბენ კვალად კონსტანტინუპოლისევე, ას-სამეოცდაათნი წმიდანი მამანი, დროსა კეთილ-მსახურისა მეფისა კონსტანტინე პოლონათისასა, და შეაჩვენეს ონორი, წინამძღვარი, და პაპა პრომისა სერგი, და პავლე, პატრიარქნი კონსტანტინუპოლისანი, და შემდგომნიცა მათნი, რომელნიცა წარვედნენ და ჰგმობდნენ. ამისთვის დაამტკიცეს წმიდათა მამათა სარწმუნოება მართალი და ჰეშმარიტი რომელ, ვითარ იგი უფლისა ჩვენის იესო ქრისტეს შორის ორთა არსებათა,

და ორთა ბუნებათა შეუკრევენელთა და განუყოფელთა აღვიარებთ; ეგსახეთ ორთა ბუნებითთა ძალთა, და ნებათა, და მოქმედებათა განუყრელად შეერთებულთა ვიტყვით, და გვწამს და აღვიარებთ. ვინათგან თვითეული ბუნება თანაზიარებითა მეორისათა მოქმედებს, და მათ ორთავე მნებებელი და მოქმედი, თვით განხორციელებული სიტყვა იგი ძე მამისა, და ძე ქალწულისა იგივე და ერთი გვაში არს.

ხოლო მეშვიდედ შეკრბენ კვალად ნიკიასვე, ვითინისასა, სამას ოც-და-ათნი წმინდანი მამანი, დროსა კეთილ-მსახურთა მათ და თვითმპყრობელთა კონსტანტინე და ირინა დედისა მისისათა. მათთვის, როდესაც გამოაცხადეს წმიდათა ხატთა გმობა და არა თაყვანისცემა, უღმრთომამ ანასტასი, კონსტანტინე და ნიკიტა, კონსტანტინუპოლის პატრიარხთა, და ეგრეთვე თეოდოსი ეფესელმა. სისინი, პერგელიმ და ვასილი ანტიოქიელმა. ამისთვის წმიდათა მათ შეკრებულთა მამათა, ამათ უღვთოთა შეკრებულობანი შეაჩვენეს და განჰკვეთეს, და დამტკიცეს წმიდათა ხატთა თაყვანისცემა, და სურვილით და სასოებით ამბორება წმიდისა ხატისა მაცხოვრისა, გინა ღვთისმშობლისა, ანუ უხორცოთა წმიდათა ძალთა, ანუ წმიდათა მოციქულთა, და მამათ-მთავართა, და მოძღვართა, და მწყემსთა, და მოწამეთა, ღირსთა და მართალთა ხატთა და სახეთა მათთა, რომელიცა ღვთისა მიმართ მეოხად, და მფარველად ცხოვრებისა ჩვენისათვის ვსასოებდეთ, ვითარცა იობს შინა წერილ არს, 22,8, ვითარმედ „წარვედით მონისა ჩემისა მიმართ იობისა და ჰყოს მსხვერპლი თქვენთვის, ხოლო იობ მონაჲ ჩემი ევედროს თქვენთვის, რამეთუ პირსა მისსა თვალვახებ“. კვალად დიდისა ვასილისა მიერი თქმაჲ ამფილოქეს მიმართსა შინა, 10 თავსა ვითარმედ „პატივი ხატისა პირმშოსა მიმართ ხატისა აღიწვივს.“ კვალად გამოსლვათას შინა წერილარს, 25,9 ვითარმედ „უბრძანა უფალმან მოსეს, მიქმენ შენ ყოვლისა მისებრ, რაოდენი გიჩვენო შენ მთასა ზედა, მაგალითი კარავისა, და მაგალითი ჭურჭელთა მისთაო“. ამავებით ცხადი და საცნაური არის, რომ ესენი წმიდათა ხატთა გამოსახვისა და პატივისცემისა მიზეზნი, და ჭეშმარიტნი თქმანი და მოსწავებანი არიან, და ამისათვის შეაჩვენეს და განჰკვეთეს წმიდათა და ღმერთ შემოსილთა მამათა, მგმობარნი და შეუ-

რაცხის მყოფელნი წმიდათა ხატთანი. და ჩვენ პატივის-ცემით და სურვილით თაყვანისცემა გვასწავეს და გვიქადაგეს სამ-ას-ოცდა-ათთა მამათა, და ეგრეთვე შვიდთა ამათ მსოფლიოდ შეკრებილთა, ესე ვითარი სარწმუნოება გვასწავეს, და გვამ-ცნეს, რომელიც აღვწერეთ და შეწევნითა ღვთისათა, და მად-ლითა მათითა მიერთებან მტკიცედ დამტკიცებულვართ და ვპვიეთ მათვე მოცემულთა ძეგლთა სარწმუნოებასა ზედა, რომელნიცა ზემოთ მოვიხსენეთ ხუთნი ესე, საბერძნეთი, რუსეთი, ბულდარეთი, საქართველო და იმერეთი; რომელნიცა დაგვიც-ვენს ღმერთმან შეუცვალებელად და შეურყეველად უკუნისამ-დე ამინ.

კვალად ამისათვის წმინდანი მოძღვარნი აღწერენ და მოიხ-სენებენ, რომ ოდესმე ადგილ-ადგილ სხვანიცა კრებანი იქმნე-ნო, მაგრამ იგინიცა კვალად ამ შვიდთავე კრებათაგან იქმნა შეწყნარებული და დამტკიცებულიო, ჩვენს მართლ-აღსარე-ბასა სრულება ამ შვიდის კრებით მოეცა და დამტკიცდაო, ღვთისმეტყველებისა, და განგებულობისაცაო. ამისათვის კვა-ლად გაგიახლებ ქრისტეს საყვარელნო შვილნო, რომ ყოველ-მა სჯულმა თავისი სჯული და სარწმუნოება იცის, და ჩვენს საქართველოში ამ ცოდნაზედ დიად დიდად ნაკლებათა ვართ, რომე თვით მღვდელთაც არ ვიცით სარწმუნოების სიმეოლ-ონი. ახლა რომ კიდევ მოკლედ მოგახსენებ, რომ ღვთისმე-ტყველებაზე აღსარება მხოლოდ სამწმიდა სამებაზე ითქმის სარწმუნოება ასე, რომ ერთი იგი დაუსაბამო ღმერთი სამის გვამოვნებით ითქმის: მამა, ძე და სული წმიდაჲ. ამას სამ-წმიდა სამება ეწოდება, და ეს სამწმიდა სამება, ერთ არსებით ითქმის. ერთ არსებით, და ერთის ბუნებით, რიცხვთა სახელ-თათა განყოფილნი, ესე იგი გვამოვნებითა, პირითა და თვითე-ბითა; ვითარ იგი გვრწამს მამა უშობელად, ძე შობილად და სული წმიდა მამისაგან გამოსრულად, ვითარცა მეორემ კრე-ბამ ესრედ დაწერეს მრწამსი და დაამტკიცეს. ხოლო ღვთაე-ბითა და მეუფებითა, და დამბადებლობითა, და ბუნებითა, და არსებითა, და ნებითა, სამთავე ერთი არის ძალი და მოქმე-დება, რამეთუ განყოფებიან და შეიერთებიან შეურწყმელად ვითარ იგი წამებენ ღმერთ შემოსილნი მამანი, ღვთივ გან-მბრძობილნი. და ესე კმა არს სიტყვად, რომელ მამისა და ძი-

საგან გამოსვლა არცა ერთსა რომელსამე წინასწარმეტყველ-
თაგანსა და არცა კრებაში სადმე თქმულა. ფლორენცას მერ-
ვედ შემოკრბენ ლათინნი, და მამისა და ძისაგან გამოსვლა მა-
შინ ითქვა; ისინი მერვეს კრებას აღიარებენ, და ჩვენ შვიდის
კრების მეტი არ უნდა გვწამდეს, რომელიც ამ შვიდს კრება-
ში ჩვენ ეს უნდა გვწამდეს, ვითარცა დაგვიწერია და გვით-
ქვამს. ღვთისმეტყველებისა ეს თქმული არის ჭეშმარიტი სარ-
მუნოება და აღსარება; და განგებულება, განკაცება, და გან-
ხორციელება, რომ ერთი არის უფალი იესო ქრისტე ორი
ბუნებით, ორის ნებით, ორის მოქმედებით და ორის არსებით,
გვწამს, ერთი ღვთაებისა და ერთი კაცებისა, ერთ ქრისტედ
და ერთ გვამად, შეურევნელად, შეერთებულად, რომ ორისავ
თვითება და მოქმედება იმავე ერთს წმიდას გვამსა შორის
ცხად არს, და ჭეშმარიტებით მოქმედებულ და მნებელ ღვთა-
ებისადა და კაცებისადა; და ერთბუნებად როგორ უნდა ით-
ქმოდეს, და როგორ უნდა აღიარებდეს? ნუ იყოფინ. ამის-
თვის ჭეშმარიტი აღსარება ამაზედ მეოთხემ წმიდამ კრებამ
დაგვიმტკიცეს, ვითარცა აღვწერეთ; და ღმერთ-შემოსილთ მა-
მათაც პირველად დოღმატი აღგვიწერეს, რომ ღვთისმეტყვე-
ლებისათვისადა, და განგებულებისათვისადა, ესრეთ არის დამ-
ტკიცებული, და ამათს შემდგომად ნექტარიოს პატრიარქისა-
გან თქმული წიგნი სამნაწილი ესრეთის ჭეშმარიტის აღსარებით
არის დაწერილი და დამტკიცებული. ეგრეთვე წიგნი თქმული,
„გრდემლი“ საქართველოს პატრიარქისა ბესარიონისაგან. და ეგ-
რეთვე წიგნი თქმული „კატეხისმოსი“ საქართველოს პატრიარ-
ქისა ანტონისაგან. ესე ყოველივე ღვთივ განბრძნობილნი და ზე-
სთა ბრწყინვალენი წიგნნი და წერილნი ესე ვითარის ჭეშმარი-
ტის სარწმუნოების აღსარებით აღგვიწერენ, გვამცნებენ და და-
გვიმტკიცებენ, რომელიც მოგახსენე და გამცნე ყოველთავე სუ-
ლიერთა შვილთა ჩვენთა, სამწყსოთა; ესრეთ უნდა გვწამდეს,
და ესრეთ აღვიარეთ, და გულით და პირითა და სასოებითა,
ესრეთ დავისწავლოთ ყოველთავე და დავიბეჭდოთ სამღვდე-
ლოთადა, და საეროთადა დამტკიცებით; ესრეთ ვიცოდეთ და
ნუ შევცვლით, რადგანაც ეს სარწმუნოება მოგვცემია, როდეს-
საც საქართველო ნინო მოციქულს მოუქცევია, და საბერძნე-
თილამ მღვდელი და ეპისკოპოსი მირიან ხელმწიფესა და ნანა

დედოფალს რომ დიდის კონსტანტინესათვის უთხოვნიათ, და რამდენი ათასი სული ქართველი მცხეთას მონათლულან, და მერმე წმინდაჲ ნინო ხომ იქიდამ ქისიყს წამოსულა, და ეს ქვეყანა მოუქცევია, და ეს სარწმუნოება, რომელიც მოგახსენე მიერთგან დღეს აქამდე ესრეთ გვისწავლია და ესრეთ გვწამს, და ღმერთმან დაგვამტკიცნეს უკუნისამდე ამინ!

ამაზე გვიქადაგა და გვიმოძღვრა წმიდა მოციქულმა, ვითარმედ „სარწმუნოება უხმსო რომელი მოუხდების ღმერთსა, რამეთუ არს იგი, და მეძიებელთა მისთა სასყიდლის მიმცემელი იქმნებისო“.

ამ ბრძანებასა ჭეშმარიტის სარწმუნოების აღსარებისათვისაც ამბობს, რომ ღმერთი ჭეშმარიტის აღსარებითა და სარწმუნოებით უნდა გრწამდეს, როგორც მოგახსენე, და ამ სიტყვაში, საქმის მიღვენებასაც გვიბრძანებს წმიდა მოციქული, რომ კეთილის სარწმუნოების მქონებელსა კეთილის საქმის მქონებელობაც უნდა მისდევდეს, რომ რასაც ეძიებს და ითხოვს ღვთისაგან, სასყიდელსაც მიიღებს, ვითარცა დღეისა ამისთვის დაგვიწერა, ვითარმედ „სარწმუნოებით შესწირა აბრაამ ისაკი გამოცდასა მას, და მხოლოდ შობილსა მას შესწირვიდაო, რომელმან აღთქმა იგი მიიღო“. ამ ჭეშმარიტის სარწმუნოებითაცა სწამდა დიდს აბრაამ მამათმთავარს ღმერთი, და საქმეც იმისთანა კეთილი მიუძღოდა, რომ რასაც ღვთისაგან ითხოვდა, კიდევ მიიღებდა, და ღმერთიც ისმენდა იმის თხოვნასა და ვედრებასა. ამას წამებასა ზედა დასწერს ნეტარი მაქსიმე აღმსარებელი ასეულსა შინა, 3 პუნქტსა შინა, ვითარმედ: „რომელსა ჰრწამნ უფალი, ეშინინ ტანჯვათაგან; ხოლო ტანჯვათაგან მოშიში, იმარხავს ვნებათაგან; ხოლო მმარხველი. ვნებათაგან მოითმენს საჭირველთა: ხოლო საჭირველთა მოთმინესა აქვს სასოება ღვთისა მიმართ; ხოლო ღვთისა მიმართ სასოებაჲ განაშორებს ყოველთა ქვეყნიერთაგანისა ვნებულ. მოყვარებისაგან; ხოლო ამისგან განაშორებულსა გონებასა აქვს ღვთისა მიმართ სიყვარული. ამით ვხედავთ, ღვთის-მოყვარენო, რომ წმიდა მოციქულმან და ამ სანატრელმა მამამ, სარწმუნოება და კეთილი საქმე ერთმანეთს მოჰკიდეს, ერთმანეთს შეუდგინეს და დაამტკიცეს; ვითარცა იაკობ მოციქული დასწერს, 2,26, ვითარმედ „ვითარ იგი არა განმართლ-

დებისო კაცი საქმეთაგან სჯულისათა, თვინიერ სარწმუნოებისა, უფლისა ჩვენისა იესო ქრისტესისა, ეგახედ სარწმუნოება თვინიერ საქმეთასა მკუდარ-არსო“. ამისთვის მოგახსენე პირველად სარწმუნოების აღსარება, რომ თავი და პირველი კეთილი საქმე, მართალი სარწმუნოება, და ღვთის ცნობა არს; მაგრამ ამ ჩვენს სარწმუნოებასა თუ კეთილი საქმეც არ მივადევნეთ, მართო სარწმუნოება კაცს ვერ აცხოვრებს, რომ იძახოდეს: მე ხომ ქრისტეანედ ჩემს მამასა და დედას მოუნათლავევარო, და ის მაცხოვრებსო“, არა, ძმანო და შვილნო, მამანო და დედანო! ამ ჩვენს კეთილს სარწმუნოებასა კეთილი საქმეც უნდა მივადევნოთ, თორემ როგორც ფრინველი ცალის ერთის ფრთით ვერსად გაფრინდება, თუ მეორე ფრთაც არა აქვს, ეგრეთვე ჭეშმარიტს ქრისტეანესა, პირველად, როგორც მართალი სარწმუნოება უნდა სწამდეს და იცოდეს, ეგრეთვე კეთილი საქმეც უნდა სჭირდეს, რომ ამ ორის კეთილის ფრთით ზეცას სასუფეველში წასვლა ეღირსოს; საუკუნოდ ცხოვრება, საუკუნოდ განსვენება, ღვთის დიდების ხილვა, წმიდას ანგელოსებთან და ყოველს წმინდანებთან ყოფნა, იმათთან ნათელში ყოფნა და იმათის შვენიერებისა ბრწყინვალეებისა, და სიხარულის სმენა, და თვალთ დანახვა! აბა ამ სოფლიერად, რას უნდა მივამსგავსო, საყვარელნო, იმ საკვირველის სუნნელების ყნოსა, და უცხოსა და უცხოს ტკბილ-ხმოვანობის სმენა და გონება, ამ სოფელს კაცი ვერას მიაგავსებს, რომელს ენას შეუძლიან, რომ მოიგონოს და ის პირისპირ შეამსგავსოს რასმე? ვერას მოიგონებს, და ვერცარას შეუშგავსებს ჭეშმარიტად იმ ნათლისა და იმ ბრწყინვალეების შესამსგავსს რასმე, ამის მეტსა, რომე ერთის ცხოვნებულის პირის სახე მზისა და მთოვარისაგან კიდევ უფრო. და რავდენგზის უმეტესად განბრწყინებულნი და განათლებულნი იქნება, და აბა სხვა რა უნდა მოიგონოს და შეამსგავსოს კაცმა იქაურს დიდებასა, ნათელსა და სიხარულსა ცხოვნებულთასა?! ამით დავინახოთ თავნი ჩვენნი, შვილნო და ძმანო საყვარელნო, რომ კეთილს მორწმუნესა და ღვთისმოყვარეს კაცს ეს ამისთანა ადგილი და განსვენება მოელის, და ვაი, ჩვენი ბრალი, რომ, თურმე ამ კეთილის საქმეებისაგან ღმერთი ნაკლებად გვხედავსო და უსჯულონი, და ურწმუნონი ჩვენის ცოდვისა და უსასოებისაგან

გვერევიან, გეჩაგვრენ და გემძლავრობენ, სიკვდილითაც, და-
ტყვევებითაცა, აოხრებითაცა, წასდენითაცა; მუდამ ჩვენზედ
კადნიერებენ, ლაღობენ, და კიდევ უმეტესად გვემუქრებიან,
თავს გვიქნევენ და გვაშინებენ! ამ სოფელს ხომ მუდამ ჩვენი
ქვეყანა ამისთანას სატანჯველშია, და ახლა იმ საუკუნოსაცა,
ვთუ ჩვენი ცოდვისაგან, იმ სასუფეველისა და დიდებისა-
განაც დავიკარგნეთ, და საუკუნოდ წარვწყმდეთ, და ღვთისა-
გან დავისაჯნეთ?! ამისთვის გვედრებით, სულიერო შვილნო,
რადგან თქვენი მწყემსი ვარ, და თქვენის მოხსენებისა და
სწავლების ვალი მაქვს, და თქვენც გაგონებისა, და დაჯერე-
ბის თანამდებობა გაქვსთ, რომ ამისთანას სწავლაზედ სიტყვით
მოგახსენო, თუ სწავლითა, უნდა დაიჯეროთ და შეისმინოთ,
რომელიც მომიხსენებია პირველად სარწმუნოება მართალი და
ქეშმარიტი, და მერმე კეთილი საქმე, რომ წელიწადში ერთხელ
მინც აღსარება და ზიარება არის და უნდა ეღირსნეთ; ეგ-
რეთვე მუდამ წირვისა და ლოცვის სიყვარული, და უფრო ნა-
მეტანად, კვირასა და უქმესა; ეგრეთვე თქვენის ძმებისა და
ქრისტიანე მეზობლების სიყვარული, შებრალება, და მოწყა-
ლება გქონდესთ, ეგრეთვე მდაბალი, მშვიდი, და მორჩილი
თავისის მშობლებისა, ანუ უპირატესისა, მებატონისა,
მოძღვრისა თუ ეპისკოპოსისა. ეგრეთვე მოთმინებაც უნ-
და გქონდეს, რომ ეს წუთისოფელი უმწუხაროსა და უგან-
საცდელოს ძნელად დააგდებს კაცსა, რომ ერთი რამ მწუხა-
რება არ მიაყენოს, ან სიგლახაკისა, სიმშილისა და დაობლე-
ბისა და ან მტრისა ვისგანმე შინაურისა და თუ უსჯულოსა-
გან მორევისა და გაოხრებისა! ღმერთმანი ამაების უცხონი
ვართ, და გამოუცდელია ჩვენი ქვეყანა? ყველა ჩვენზედ არის
მოწევნული ქეშმარიტად; მაგრამ ისევ ღვთის მადლობის მი-
ცემისა და მოთმინების მეტი არა გაგვეწყობა რა. და თუ ამა-
ებს ვერ მოვითმენთ და ღმერთს დავაყვედრებთ რასმე, ღმერ-
თსაც მოვიმღურებთ და ჩვენს თავსაც ვავნებთ, რომ მოთ-
მინებას გვიბრძანებს, და ჩვენ წმიდას სახარებას წინა აღუდ-
გებით. ესეები არის, ქრისტიანენო, კეთილი საქმე, და კვალად
ამასთანა ესეც კეთილ-საქმედ არის დაწერილი მოძღვართაგან-
ნაცა, და წმიდა მოციქულიც დასწერს: „შვილნი კეთილად გან-
ზარდენითო“ და უქმისა და გაურჯელისა კაცისა პურისა და

საზრდელისა უღირსებასაც დასწერს. ამიტომ მინამ ამ წუთს სოფელს სცხოვრებს კაცი, როგორც სულისათვის უქადაგებთ ზრუნვასა, ეგრეთვე ხორციელადაც თავისი თავი მცონარებასა და დაზარებას არ უნდა მისცეს თავის სახლეულსა, თუ შვილსა თუ სახლსა და მამულსა, სხვათა უცილებელად, უშფოთველად, უდრტვიწველად და მიუმძლავრებელად, უნდა გაუძღვეს და მოუაროს სიმდაბლით, სიმშვიდით, სულგრძელობით, სიტკბოებით და დაწყნარებით; და ყოვლის შეძლებით, გარჯითა და შრომითა რომ იმავ პირველთგანვე ღვთის ბრძანება ასე დასწერს „ოფლითა შენითა სკამდე პურსაო!“ და როდესაც ამისთანას ცხოვრებასა და კეთილს ქცევაში აღსრულდება კაცი, თუ უნდა ერთის რომლისამე საქმისათვის სხვას ადგილსაც ესწრას სიკვდილი, რადგან ამისთანა გამზადებული ღვთის ნებისყოფელი ქცევა ექნება; და წმიდის აღსარებითა და ზიარებითაც განმზადებული იქნება, და ეგოდენი კეთილი საქმეც მიუძღვის, ჭეშმარიტად, რომელიც ზეცას ცხოვნებულთათვის განსასვენებელი ადგილი მოგახსენე და დავსწერე, ისიც იმავ საუკუნოს ნათელსა, და განსასვენებელს ადგილსა შინა მისლვას ეღირსება, და დაემკვიდრება უკუნისამდე, რომელსა შინა ღირმსცა ვართ, ყოველნი მიმთხვევად მადლითა უფლისა ჩვენისა იესო ქრისტესითა. მისა შევენის პატივი, დიდება და თაყვანისცემა აწ და უკუნისამდე ამინ.

აღწერილ იქმნა და ითქვა მადლითა ღვთისათა, შილდას ეკლესიასა შინა, გლაზაკისა ნეკრესელისა ამეროსისაგან, სამწყსოთა შვილთა თვისთა სწავლად და წერთნად. მარტს. თ. წელსა, ქრისტესითა, ათას შვიდას ოთხმოცდაათექვსმეტსა. პირველსა კვირეაქესა წმიდათა მარხვათასა, ხატთა თაყვანისცემასა.

წმიდა ეკისკოპოსი ეგნატე

წმიდა ეგნატე (ერისკაცობაში დიმიტრი ბრიანჩანინოვი) დაიბადა 1807 წლის 6 თებერვალს ვოლოგდის გუბერნიის სოფელ პაკროვსკოში. მისი მამა ალექსანდრე ბრიანჩანინოვი დიდგვაროვან თავადთა შთამომავალი იყო. დედა სოფია, ამავე გვარის წარმომავლობისა, მეტად განათლებული და ღვთისმოსავი ქალი იყო. პატარა დიმიტრის სიყრმიდანვე უყვარდა სასულიერო წიგნების კითხვა და ლოცვა. ეკლესიაში ხშირად დადიოდა, ესწრებოდა წირვა-ლოცვას. 1822 წელს 16 წლის დიმიტრი მამამ სანკტ-პეტერბურგში წაიყვანა მთავარ საინჟინრო სასწავლებელში შესაყვანად. მან ბრწყინვალედ ჩააბარა მისაღები გამოცდები, რითაც ამ სასწავლებლის გენერალ-ინსპექტორის, შემდგომში იმპერატორ ნიკოლოზ პავლეს ძის ყურადღება მიიპყრო, სასწავლებლის შემდეგ დიმიტრიმ დაახლოებით ორი წელი იმსახურა სპეციალობით. მთელი ამ დროის განმავლობაში მისი სანუკვარი ოცნება იყო, ღვთისმსახურებისათვის შეეწირა თავი, მაგრამ ამ მიზნის განხორციელებისათვის ოჯახისა და იმპერატორის მხრიდან დიდ წინააღმდეგობას წააწყდა. ამ დროისათვის გაეცნო ერთ-ერთ გამოჩენილ მოძღვარს — მამა ლეონიდეს, რომელსაც მთელი გულით მიენდო. ამის შესახებ ასე წერდა თავის მეგობარ ჩიხაჩოვს: „მთელი გული დამიტყვევა მამა ლეონიდემ. ახლა უკვე გადაწყვეტიე: სამსახურს ვტოვებ და შევუდგები მოძღვარს. მას მივენდობი და მხოლოდ-მხოლოდ სულის ცხონებისთვისღა ვიზრუნებ განმარტობაში“. მაგრამ მის გადაწყვეტილებას დიდი გამოცდა ელოდა წინ. იმპერატორმა ნიკოლოზმა დიმიტრის განზრახვა რომ შეიტყო, თავის ძმას — მიხეილს დაავალა, გადაეფიქრებინებინა მისი საყვარელი აღზრდილისათვის სამსახურის დატოვება და ბერად აღკვეცა. 19 წლის დიმიტრი დიდი თავადის წინაშე წარსდგა, რომელმაც მეფის გვარდიაში სამსახური შესთავაზა, მაგრამ დიმიტრი მყარად დადგა თავის აზრზე, მაშინ მისი სურვილის წინააღმდეგ დინაბურგის საინჟინრო რაზმში გადაიყვანეს. როცა იმპერატორის ძმამ იგი მოინახულა და დაინახა, რომ დიმიტრის სუსტი ჯანმრთელობის გამო ამ სამსახურში დარჩენა აღარ შეეძლო, ბოლოსდაბოლოს

ნება დართო გადამდგარიყო. დიმიტრი მაშინვე გაემგზავრა თავის მოძღვარ მამა ლეონიდესთან ალექსანდრო-სვირსკის მონასტერში. მამა ლეონიდე ამ მონასტრიდან პლოშჩანის უდაბნოში გადავიდა, სადაც დიმიტრიც გაჰყვა. ცოტა ხანში იგი ობტინის უდაბნოში წავიდა სამოღვაწეოდ, და მალე თავის მეგობარ ჩინაჩოვთან ერთად ნოვოოზერსკის მონასტერში გაემგზავრა, სადაც დიდხანს აღარ დასცალდათ ყოფნა, რადგან იქაური მძიმე პირობების გამო ორივენი დასნეულდნენ და დიმიტრის ოჯახში დაბრუნება მოუწია.

როცა ცოტა მომჯობინდა, ვოლოგდის ეპისკოპოსის — სტეფანეს ლოცვა-კურთხევით სემიგოროდის უდაბნოში დასახლდა, შემდეგ კი გადავიდა დიონისევო-გლუშიცკის მონასტერში. აქ გატარებულმა წლებმა დიმიტრი სულიერი სიბრძნით გაამდიდრა.

1831 წელს ეპისკოპოსმა სტეფანემ იგი ბერად აღკვეცა ეგნატეს სახელით. იმავე წლის ივნისში იეროდიაკენად დაასახეს ხელი, და სულ მოკლე ხანში კი მღვდელმონაზვნად აკურთხეს. მალე მღვდელმონაზონი ეგნატე დაინიშნა პელიშემსკის მონასტრის წინამძღვრად, რომელიც მალე უნდა დახურულიყო. მამა ეგნატემ მხოლოდ ორი წელი დაჰყო აქ, მაგრამ ამ მცირე ხანში თავისი სიბრძნითა და დაუღალავი ენერგიით ეს საფანე ააღორძინა.

1833 წელს იგი ილუმენის ხარისხში აიყვანეს. მამა ეგნატეს მოღვაწეობა ცნობილი გახდა პეტერბურგში, იგი გამოიძახენ დედაქალაქში და წმიდა სერგის უდაბნოს წინამძღვრად დაადგინეს უკვე არქიმანდრიტის ხარისხში. ეს უდაბნო უკიდურესად მძიმე მდგომარეობაში იყო ჩავარდნილი. და 27 წლის არქიმანდრიტს მოუწია, ყველაფერი თავიდან დაეწყო. ააშენა და კეთილმოაწყო ეკლესიები, მოაწესრიგა სოფლის მეურნეობა, შექმნა შესანიშნავი გუნდი. არქიმანდრიტი ერთად აღასრულებდა თითქმის შეუთავსებელ საქმეებს: ის იყო შესანიშნავი წინამძღვარი და ადმინისტრატორი და ამავე დროს ღრმად სულიერი მოძღვარი. — 27 წლისა უკვე სულიერად ხელმძღვანელობდა მონასტრის ძმობას.

1838 წელს არქიმანდრიტი ეგნატე პეტერბურგის ეპარქიის ყველა მონასტრის ბლალოჩინად დაინიშნა. გარეგნულად მო-

უცლელი ცხოვრების მიუხედავად იგი შინაგანად ასკეტ მეუ-
დაპნოდ რჩებოდა. წმიდა სერგის უდაბნოს განმარტობულ
კელიაში მამა ეგნატე მღვიძარებაში, ლოცვასა და სინანულში
ატარებდა ღამეებს.

1847 წელს მძიმედ დასნეულებული არქიმანდრიტი სამ-
კურნალოდ გაემგზავრა ნიკოლაევო-ბაბაევოს მონასტერში. აქ
მან 11 თვე დაჰყო და კვლავ წმიდა სერგის უდაბნოში დაბ-
რუნდა. კვლავ დაიწყო სიძნელეებით აღსავსე ღღეები.

მამა ეგნატეს ნაცნობთა წრე საკმაოდ ფართო იყო: ეპისკო-
პოსები, ბერები, უბრალო ერისკაცები რჩევისათვის მიმართავ-
დნენ მას. იგი საზოგადოების ყველა ფენაში იყო ცნობილი.
მომოწერა ჰქონდა მალალ არისტოკრატიასთან. ღღეისათვის
მისი 800 წერილია ცნობილი.

წლები გადიოდა. მამა ეგნატეს ფიზიკური ძალები სულ
უფრო და უფრო სუსტდებოდა. 1857 წელს პეტერბურგის
მიტროპოლიტმა გრიგოლმა არქიმანდრიტ ეგნატეს ეპისკოპო-
სად დაასხა ხელი და წმ. სინოდმა მას კავკასიისა და შავი-
ზღვისპირეთის ეპარქია ჩააბარა. მოკლე ხანში ეპისკოპოსი
ეგნატე სტავროპოლს გაემგზავრა, რათა ეპარქიის მართვას
შესდგომოდა. აქ მან 4 წელი დაჰყო და ამ ხნის განმავლო-
ბაში ბევრი რამის გაკეთება მოასწრო თავის სამწყსოსათვის.
მძიმე ავადმყოფობის გამო 1861 წელს ეპისკოპოსმა ეგნატემ
თხოვნით მიმართა წმიდა სინოდს, გადამდგარიყო ეპარქიის
მართვა გამგებლობიდან და ბაბაევოს მონასტერში წასულიყო.

განმარტობული ცხოვრების წლები მეუფე ეგნატემ ამ
მიყრუებულ სავანეში გაატარა. აღადგინა თითქმის დაქცეუ-
ლი მონასტერი და ააშენა ახალი ეკლესია ივერიის ღვთის-
მშობლის ხატის სახელზე.

ეპისკოპოსი ეგნატე ნაყოფიერი სასულიერო მწერალიც
იყო. ბაბაევოს მონასტერში მან გადახედა და შეასწორა ცხოვ-
რების სხვადასხვა დროს შექმნილი ნაწარმოებები, ერთად მო-
უყარა თავი და რამდენიმე ტომი თავის სიცოცხლეშივე გამო-
აქვეყნა. მის კალამს ეკუთვნის „ასკეტიკური გამოცდილება-
ნის“ ორტომეული, „ასკეტიკური ქადაგებანი“, „თანამედროვე
ბერ-მონაზვნობისათვის“ და სხვა. მისი სასულიერო ნაწარმო-

ებები არა მარტო რუსეთშია ცნობილი და მიღებული, მისი ავტორიტეტი ძალზე დიდია მართლმადიდებლურ აღმოსავლეთში. თვით წმიდა ათონის მთის ბერ-მონაზვნობამ დიდი სიყვარულით მიიღო მისი სწავლებები.

1867 წლის 16 აპრილს სნეულებებით დაუძღურებულმა ეპისკოპოსმა უკანასკნელად სწირა, ამის შემდეგ საერთოდ აღარ გამოსულა კელიიდან, და ამავე წლის 30 აპრილს „ლოცვანის“ კითხვის დროს მიიცვალა.

თქმული ღიღი მარხვის პირველ კვირიაკეს

მართლმადიდებლობის შესახებ

საყვარელო ძმანო! ამ მართლმადიდებლობის კვირიაკეს ბუნებრივი იქნება ჩვენი ქადაგება დავიწყოთ შეკითხვით: რა არის მართლმადიდებლობა?

მართლმადიდებლობა ჭეშმარიტი შემეცნება და მსახურებაა ღვთისა; მართლმადიდებლობა თაყვანისცემაა ღვთისა სულითა და ჭეშმარიტებითა; მართლმადიდებლობა ჭეშმარიტი შემეცნებითა და თაყვანისცემით განდიდებაა ღვთისა; მართლმადიდებლობა ღვთის მიერ მისი ჭეშმარიტი მსახურის გამოჩინებაა სულიწმიდის მადლის მინიჭებით; სული წმიდა დიდებაა ქრისტიანთა¹, სადაც არაა მადლი სულისა წმიდისა, იქ არაა მართლმადიდებლობა.

არაა მართლმადიდებლობა ადამიანურ სწავლებასა და ნაზრევებში: აქ მეუფებს მტყუვარი გონება — ნაყოფი დაცემისა. მართლმადიდებლობა სული წმიდის სწავლებაა, ღვთით მონიჭებული ადამიანთა საცხოვნებლად. სადაც არაა მართლმადიდებლობა, აქ ცხოვნების გზაც დაკარგულია. „რომელსა უნდეს ცხოვრებად, პირველ ყოვლისა თანა არს მას პყრობად კათოლიკესა სარწმუნოებისა, რომელი უკუთუმცა ვინმე არა დაიმარხოს სრულად და უბიწოდ, თვინიერ ყოვლისავე რაიმე მიზეზისა, საუკუნოდ წარწყმდეს იგი“².

უძვირფასესი საუნჯეა სული წმიდის სწავლება! ეს სწავლება წმიდა წერილსა და მართლმადიდებელი ეკლესიის საღვთო გადმოცემაშია შემონახული. უძვირფასესი საუნჯეა სული წმიდის სწავლება! მასშია წინდი ჩვენი ცხოვნებისა. ყო-

¹ იოანე, 7, 39.

² თქმული წმიდათა შორის მამისა ჩვენისა ათანასე ალექსანდრიის პატრიარქისა მიერ. წინათქმა ფსალმუნისა.

ველი ჩვენგანისათვის შეუფასებელი, შეუცვლელი და შეუდარებელია ჩვენი ნეტარი ხვედრი მარადისობაში: იმგვარადვე ღირებულია, იმგვარადვე ყოველგვარ საფასეს აღმატებულია წინდი ჩვენი ნეტარებისა — სული წმიდის სწავლება.

ღღეს წმიდა ეკლესია ყველას გასაგონად ჩამოთვლის სატანისაგან წარმოშობილსა და გამოსულ სწავლებებს, რათა ეს წინდი დაიკვას ჩვენი ცხოვნებისათვის. ეს სწავლებანი ღვთის მტრობის გამომხატველია, წინააღმდეგომნი ჩვენი გადარჩენისა. წარმტაცებელნი ჩვენი ცხოვნებისა. ეკლესია ამხილებს ამ მოძღვრებებს, როგორც მგელთ მტაცებელთ, გველთ წარწყმედელთ, როგორც მპარავთა და მკვლელთ. იგი ანათემას გადასცემს ამ სწავლებებს და მათაც, ვინც შეუპოვრად ადგას ამ გზას; ამით გვიფარავს ამ მოძღვრებებისაგან და უფსკრულიდან ამოსვლას მოუწოდებს მათით მოხიბლულებს.

სიტყვა ანათემა განყენებას, განკვეთას ნიშნავს. როცა ეკლესია ანათემას გადასცემს რაიმე სწავლებას, ეს ნიშნავს, რომ ეს სწავლება სული წმიდის გმობის შემცველია და ცხოვნებისათვის უნდა უარიყოს და მოიკვეთოს. როცა ეკლესია შეაჩვენებს ადამიანს, ეს ნიშნავს, რომ ამ კაცმა საბოლოოდ შეისისხლხორცა ღვთისმგმობი სწავლება და ამით თავისთავსაც უკარგავს ცხოვნების გზას და იმ ახლობლებსაც, ვისაც თავის მოსაზრებებს უზიარებს. როცა ადამიანი გადაწყვეტს დაუტეოს ღვთისმგმობი მოძღვრება და მიიღოს მართლმადიდებელი ეკლესიის სწავლება, მაშინ მან მართლმადიდებელი ეკლესიის წესისამებრ უნდა შეაჩვენოს ის ცრუმოძღვრება, რომელზეც მანამდე იდგა, რომელიც ღუპავდა მას, განაშორებდა ღვთისაგან და ღვთისმტრობასა და სულიწმიდის გმობაში მყოფს სატანას თანაზიარად ზრდიდა.

ანათემა ეკლესიის სულიერი წამლობაა ადამიანის სულის საუკუნოდ მომაკვდინებელი სენისაგან განსაკურნავად. საუკუნო სიკვდილს გვპირდება ყოველი ადამიანური სწავლება, მტყუვარი გონებიდან და ხორციელი ზრახვიდან, — დემონთა და ადამიანთა ამ საერთო საკუთრებიდან მოხმობილი ნააზრევი ღვთივ განცხადებულ სწავლებაში რომ შეაქვს. ადამიანური გონების ნაყოფს, ქრისტიანული სარწმუნოების მოძ-

ღვრებაში შეტანილს, ეწოდება მწვალებლობა, ამ სწავლების შედგომას კი — ბოროტმორწმუნეობა¹.

მოციქული მწვალებლობებს ხორციელ საქმეთა თანა რაცხავს². მწვალებლობანი თავისი დასაბამით ხორციელ ვნებათ განეკუთვნება. ეს დასაბამია „ზრახვა იგი ჯორცთა“, რომელი „სიკუდილ არს“, „მტერობა არს ღმრთისა; რამეთუ სჯულსა მას ღმრთისასა ვერ დაემორჩილების და ვერცა ძალ-ჟც“³. მწვალებლობანი ხორციელ საქმეთ მიეთვისება თავისი შედეგებითაც. ისინი ადამიანის სულს ღვთისაგან განაშორებენ, და სატანის სულთან ხლიან თანაზიარს მთავარი სატანური ცოდვით—ღვთის-მგმობელობით, ვნებათა ღელვას უქვემდებარებენ მას, როგორც ღვთისაგან მიტოვებულსა და თავისი დაცემული ბუნების ანაბრად დარჩენილს. „და დაუბნელდა უგულისჯმომ იგი გული მათი“ — ამბობს მოციქული. ჭეშმარიტი ღვთისშემეცნებისაგან განდგომილ ბრძენთა შესახებ — „იტყოდეს თავთა თჳსთა ბრძენ და განცოფნეს... გარდაცვალეს ჭეშმარიტებაჲ ღმრთისაჲ სიცრუევდ... ამისთჳს მისცნა იგინი ღმერთმან ვნებასა მას გინებისასა“⁴. გინების ვნებებად გარყვნილების მრავალგვარი ვნებანი იწოდება. გარყვნილებით იყო სავსე ერესიარხთა საქციელი: აპოლინარი მრუშობდა⁵, ევტიხი ვერცხლისმოყვარებას ჰყავდა შეპყრობილი⁶, არიოზი უგარყვნილესი კაცი იყო. როცა ნიკეის პირველ მსოფლიო კრებაზე მისი საგალობლის — „ტალიას“ კითხვა დაიწყეს, წმიდა მამებმა ყურები დაიკვეს და უარი განაცხადეს ამგვარი ბილწსიტყვაობის მოსმენაზე. „ტალია“ დაწვეს. ქრისტეანობის საბედნიეროდ მისი ყველა ნიმუში განადგურდა. დაგვრჩა მხოლოდ ისტორიული ცნობა, რომ ეს ნაწარმოები უმძაფრესი გარყვნილებით სუნთქავდა⁷. „ტალიას“ მსგავსია თანამედროვე ერესიარხთა ბევრი თხზულება: მათში საშინელი ღვთისმგმობელობა არაადამიანურად გარყვნილ და აღვირახსნილ გამონათქვამებ-

¹ სათნოებათა-კიბე. სიტყვა 1.

² გალ. მიმართვა. V, 20.

³ რომ, VIII, 6, 7.

⁴ რომ, I, 22, 25, 26.

⁵ Житие преподобного Ефрема Сирина.

⁶ Церковская история Флери. Том. 2, кн. 27, гл. 28.

ცემულმა ანგელოსებმა უხორცო ბუნებას ხორციელი მანკი-ერებანი შესძინეს. ეს მათთვის არაბუნებრივი ბიწიერებანი თავიანთში გაცილებით მეტად განავითარეს, ვიდრე ეს ადამიანებშია შესაძლებელი¹. „ვითარ განვარდა ცისაგან მთიები განთიად აღმომავალი?“ — ამბობს წინასწარმეტყველი დაცემულ ქერუბიმზე — „შეიმუსრა ქუეყანასა ზედა, ხოლო შენ სთქუ გულსა შინა შენსა: ზეცად მიმართ აღვიდე, ზედაით ვარსკულავთა ცისათასა დავდგა საყდარი ჩემი, და ვიყო მსგავს მადლისა. ხოლო აწ ჯოჯოხეთადმი შთაჰვდე და საფუძველთა მიმართ ქვეყანისათა, დაჰვარდე მათთა ზედა, ვითარცა მკუდარი მოსაგებული“².

დაცემული ანგელოსნი, ყოველგვარი ცოდვის დასაბამის შემცველნი, ადამიანთა წარწყმედის მიზანსწრაფვით შეპყრობილნი, ცდილობენ ყოველგვარი ცოდვის თანამდებნი გახადონ ისინი. კაცთ ითრევენ ხორცის მრავალფეროვან მაამებლობაში, ანგარებაში, დიდებისმოყვარებაში, თვალისმომქრელად გვიხატავენ თვალწინ ამ ვნებათა საგნებს. მთელი ძალისხმევით კი ცდილობენ ამპარტავნებაში შთაგდებას, რადგან ამ ცოდვისაგან აღმოცენდება, როგორც თესლიდან მცენარე, მტერობა და გმობა ღვთისა. ღვთისმგმობელობა, რომელიც ყოველი მწველებლობის არსს წარმოადგენს, ყველაზე მძიმე ცოდვაა, როგორც კერძოდ დაცემულ ანგელოსთა საკუთრება და მათი გამოსარჩევი თვისება. დაცემული ძალნი კეთილსახიერების საფარველქვეშ ცდილობენ შენიღბონ ყოველგვარი ცოდვა. კეთილსახიერების ამ საბურველს მამათა ასკეტიკურ თხზულებებში განმართლებანი³ ეწოდება. ამგვარად მოქმედებენ ღემონები ადამიანთა ადვილად მოსახიბლად და ცოდვაზე დასათანხმებლად. ღვთისმგმობელობის ცოდვასაც ნიღბავენ: ბრწყინვალე დასახელებით, მდიდრული მკვევრმეტყველებითა და ამაღლებული ფილოსოფიით ცდილობენ მის შებურვას. საშინელი იარაღია ღემონთა ხელში — მწველებლობა! მისი შემწეობით დალუბეს მათ მთელი ერები, მათთვის შეუმჩინეველად

¹ წმ. ბასილი დიდი დაცემულ ანგელოსს უწოდებს ვნებიან ხორციელ სისუსტეთა მშობელს. Малитвы отьосквернения. кс. поникх.

² ესაია, XIV, 12, 13, 14, 15, 19.

³ ღირსი მამა აბბა დოროთე. „რათა არა მიეენდნეთ განზრახვათა და გულის-ხმის-ყოფათა ჩვენთა“.

გამოაცალეს ხელიდან ქრისტიანობა, ღვთისმგმობი სწავლებით შეუცვალეს იგი და მომაკვდინებელი სწავლება განწმენდილი, ქეშმარიტი, აღდგენილი ქრისტიანობის სახელით შეალამაზეს. მწვალებლობა უპირატესად გონებაში აღსრულებული ცოდვაა. ეს ცოდვა, გონებით შეწყნარებული, სულს ეუწყება, სხეულს მოეფინება და შეგვიბილწავს, სხეულს, რომელიც იმ თვისებითაცაა აღკუთრვილი, რომ ღვთიურ მადლთან ზიარებით იკურთხოს და იმ თვისებითაც, რომ დაცემულ ანგელოსებთან კავშირით შეიმწიკლოს და განირყვნას. ეს ცოდვა ქრისტიანობის ძირეულად არმცოდნეთათვის ძნიადშესამჩნევი და ნაკლებად გასაგებია. და ამიტომაც ადვილად ხლართავს თავის ქსელში სიალალეს, უცოდინარობას და ქრისტიანობის გულგრილ და ზერელე აღმსარებლობას. მწვალებლობის მახეში იყვნენ გაბმულნი მცირე ხნით ღირსნი მამანი იოანიკე დიდი, გერასიმე იორდანელი და ზოგიერთი სხვანიც. თუკი ამ წმიდა ადამიანებმა, მთელს ცხოვრებას მხოლოდ ცხონებაზე ზრუნვაში რომ ატარებდნენ, ვერ შეძლეს შენიღბული ღვთისმგმობელობა ერთი შეხედვით გამოეცნოთ, რაღა ვთქვათ მათზე, ვინც ამასოფლური ზრუნვით არიან შემთობილნი და სარწმუნოებაზე არასაკმარისი, სავსებით არასაკმარისი წარმოდგენა გააჩნიათ? როგორ იცნობენ ისინი მომაკვდინებელ მწვალებლობას, როცა ის სიბრძნის, სიმართლისა და სიწმინდის ნილაბმოსილი წარმოუდგებათ? აი, ის მიზეზი, რომლის გამოც მთელი საზოგადოებები და მთელი ერები ადვილად მოიდრიკნენ მწვალებლობის უღელქვეშ. ამავე მიზეზით ძნიად თუ მოექცევა კაცი მწვალებლობიდან მართლმადიდებლობისაკენ. ეს ბევრად უფრო ძნელია, ვიდრე ურწმუნოებიდან და კერპთაყვანისმცემლობიდან გამოსვლა. ურწმუნოებასთან ახლოს მდგომი მწვალებლობანი უფრო ადვილად საცნობი და დასატოვებელია, ვიდრე სწავლებანი, მართლმადიდებლობიდან მცირედ გადახრილნი და ამიტომ მეტად შეფარულნიც. რომის იმპერატორი, მოციქულთასწორი კონსტანტინე დიდი წერდა ალექსანდრიის პატრიარქს წმიდა ალექსანდრეს, ერესიარხი არიოზის მამხილებელს და ურჩევდა შეეწყვიტა მშვიდობის დამარღვეველი დავა რაღაც „ფუჭი სიტყვების“ გამო. ამ ფუჭად შერაცხილი სიტყვებით კი უარიყვება

უფლისა ჩვენისა იესო ქრისტეს ღვთაება, იავარიქმნება ქრისტეანობა¹. ასე შეაცდინა უცოდინარობამ კეთილმსახურად მოღვაწე წმიდა კაცი, მისთვის გამოუცნობი მწვალებლობის მანქანებით. მწვალებლობა თუმცაღა უმძიმეს და მომაკვდინებელ ცოდვას წარმოადგენს, მაგრამ როგორც ცოდვა გონებისა, სწრაფად და საბოლოოდ იკურნება მისი გულწრფელი შეჩვენებით. წმ. იოანე კიბისაღმწერელი ამბობს: „რაჟამს მწვალებელი მოვიდიან კათოლიკე ეკლესიასა მართლ-მადიდებლობად და უარ-ყვიან და შეაჩუენიან წვალებაჲ იგი გულითა, მეყსეულად ღირს-ჰყოფს მათ ეკლესიაჲ ზიარებასა წმიდათა საიდუმლოთასა; ხოლო რომელი დაეცნიან სიძვითა, მო-რამ-ვიდენ აღსარებად და საქმე იგი დაუტეონ, ეამ რაოდენმე განაყენებს მათ კანონი მოციქულთა და მამათა ზიარებისაგან²“. კვალი ხორციელი ცოდვისა აღსარებისა და ცოდვის დატევების მერმეც შთება; კვალი მწვალებლობისა კი მისი უარყოფისთანავე უჩინარდება. მწვალებლობის წრფელი და მტკიცე შეჩვენება წამლობაა სულისა ამ სენისაგან საბოლოოდ და სრულად განსათავისუფლებლად. ამ წამლობის გარეშე ღვთისმგმობელობის საწამლავი ადამიანის სულში შთება და მწვალებლობისადმი აღმოუფხვრელი თანაგრძნობით გამოწვეული მიუხვედრელობითა და ეჭვებით არ მოასვენებს მას. შთელმრთისასა“³. საძნელოდ ქმნიან ცხონებას ამ სნეულებით შეპბიან „გულის-სიტყუანი, ამალლებული მეცნიერებასა ზედა ყრობილისა, ქრისტესადმი დაუმორჩილებლობითა და წინააღმდგომობით მოცულისა, სატანის თანაზიარად გამხდარისა. მწვალებლობის საშინელი სენის ანათემით მკურნალობას ყოველთვის აუცილებლად მიიჩნევდა წმიდა ეკლესია. როცა კირიის ეპისკოპოსი ნეტარი თეოდორიტე მეოთხე მსოფლიო კრებაზე ეკლესიის მამათა წინაშე წარსდგა და მასზე წაყენებული ბრალდებისათვის თავისმართლება მოისურვა, წმიდა მამებმა უპირველესად ერესიარხი ნესტორის შეჩვენება მოსთხოვეს. თეოდორიტე უარყოფდა ნესტორიანობას, მაგრამ არც ისე მტკიცედ, როგორც ეკლესია, და ამიტომაც სცადა.

¹ Церковская история Флери. Томъ I. кн. 10, гл. 42.

² იოანე კიბისაღმწერელი — სათნობათა კიბე. სიტყვა მე-15.

³ ლაოდიკიის კრების კანონი. № 7.

⁴ 2 კორ. 10, 5.

თავისმართლება. მამებმა კვლავ მოსთხოვეს ყოველგვარი ახსნა-განმარტების გარეშე შეეჩვენებინა ნესტორი და მისი მოძღვრება. თეოდორიტემ კვლავ გამოთქვა თავისმართლების სურვილი, მაგრამ მამებმა კვლავ მოსთხოვეს, ნესტორი ანათემას გადაეცა და დაეპუქრნენ, რომ წინააღმდეგ შემთხვევაში თავად მას მიიჩნევდნენ მწვალებლად. თეოდორიტემ შეაჩვენა ნესტორი და ყველა იმდროინდელი ცრუმოძღვრებანი. მაშინ წმიდა მამებმა აღიდეს ღმერთი და თეოდორიტე მართლმადიდებელ მწყემსმთავრად აღიარეს. თეოდორიტე კი უკვე აღარ თხოულობდა ახსნა-განმარტებას, რადგან სულიდან განაგლო თავისმართლების საჭიროების მიზეზი¹. ასეთია ადამიანის სულის მიმართება მწვალებლობის საშინელი სენისადმი.

დღეს მოვისმინეთ სულიერი წამლობის მკაცრი უწყება. სწორედ გავიგოთ და მივიღოთ იგი; გულში ჩავიკრათ, და წრფელად და მტკიცედ უარეყოთ ის დამლუპველი სწავლებანი, რომლებსაც ეკლესია ჩვენივე ცხოვრებისათვის ანათემით განგმირავს. თუკი ყოველთვის უარეყოფდით ცრუმოძღვრებებს, მაშინ განემტკიცდეთ მათ უგულვებელყოფაში ეკლესიის ხმით. ის სულიერი თავისუფლება, სიმსუბუქე და ძალა, უცილობლად რომ შევიგრძნობთ, დაგვიდასტურებს ეკლესიის ქმედების სისწორეს და მის მიერ უწყებული სწავლების ჭეშმარიტებას. დაღაღებს ეკლესია: „ყოველთა, რომელთა დაატყვევეს თვისი გონება ღვთიური განცხადების მორჩილებაში და იღვაწენ მისთვის, თაყვანის-ვცემთ და ვადიდებთ. ჭეშმარიტების წინააღმდეგობით, თუკი არ შეინანებენ წინაშე უფლისა, მარადის მომლოდინესი მათი მოქცევისა და სინანულისა; თუკი არ ისურვებენ შედგომას წმიდა წერილისა და პირველადი ეკლესიის გადმოცემისა, განვკვეთთ და შევაჩვენებთ“.

„ღვთის არსებობის უარისმყოფელთა და მტკიცებელთა, რომ ეს სოფელი თვითმყოფადია, რომ მასში ღვთის განგებით კი არ ხდება ყველაფერი, არამედ შემთხვევის წყალობით, შევაჩვენებთ“.

„ყოველთა, რომელთაც თქვან, რომ ღმერთი არაა სული,

¹ Флери. История Христианства. Том 2. кн. 20. гл. 24.

არამედ ნივთიერია; ასევე, რომელთაც არ სცნონ იგი მართლად, მოწყალედ, ყოვლადბრძნად და ყოვლისმცნობელად, და ამგვარი გმობანი წარმოსთქვან: შევაჩვენებთ“.

„გაკადნიერებულთ იმის დასამტკიცებლად, რომ ძე ღვთისა არაა თანაარსი მამისა, როგორც სული წმიდა, — არააღმსარებელთა, რომ მამა, ძე და სული წმიდა — ერთი ღმერთია: შევაჩვენებთ“.

„ყოველნი, რომელთაც თავს ნება მისცეს ეთქვათ, რომ ჩვენი ცხონებისათვის და ცოდვათაგან გამოსნისათვის არ უხმდა ამსოფლად ძე ღვთისას ხორციელი მობრძანება, მისი ნებსითი ვნება, სიკვდილი და აღდგომა: შევაჩვენებთ“.

„სახარებით უწყებული გამოსნის მადლის არმიღებელთა, როგორც ღვთის წინაშე განმართლების ერთერთი საშუალებისა: შევაჩვენებთ“.

„გაკადნიერებულთ სათქმელად, რომ ყოვლადწმიდა ქალწული მარიამი შობამდე, შობისას და შობის მერმე ქალწული არ ყოფილა: შევაჩვენებთ“.

„ყოველთა, რომელთა არ სწამთ, რომ წინასწარმეტყველნი და მოციქულნი სული წმიდამ განაბრძნო, მათი პირით გვაუწყა ცხონების ჭეშმარიტი გზა და ეს სასწაულებით დაამტკიცა, და რომ სული წმიდა ღღესაც მოქმედებს ერთგულ და ჭეშმარიტ ქრისტიანთა გულებში და მათ ყოველგვარ ჭეშმარიტებას ამცნობს: შევაჩვენებთ“.

„უარყოფელთა ქრისტეს წმიდა ეკლესიის საიდუმლოებათა: შევაჩვენებთ“.

„უარყოფელთა წმიდა მამათა კრებათა და მათ გადმოცემათა, რომელნიც თანხმობაშია ღვთიურ განცხადებასთან, და კეთილმსახურებითაა დამარხული კათოლიკე-მართლმადიდებელი ეკლესიის მიერ: შევაჩვენებთ!“¹.

ღვთიური ჭეშმარიტება განხორციელდა გამოსახსნელად კაცთა, წარწყმედილთა მომაკვდინებელი სიცრუის მიღებითა და შეთვისებით. „უკუეთუ თქუენ დაადგრეთ სიტყუათა ჩემთა“. — გვაუწყებს იგი, — თუკი ჩემს მოძღვრებას მიიღებთ და მისი ერთგულნი იქნებით, — „ჭეშმარიტად მოწაფენი ჩემ-

¹ Последованіе въ недѣлю Правословія.

ნი ხართ, და სცნათ ჭეშმარიტი, და ჭეშმარიტებამან განგათავისუფლნეს თქუენ“¹. ქრისტეს სწავლებაზე დადგრომას შეძლებს მხოლოდ ის, ვინც მტკიცედ შეაჩვენებს და მარადის უარყოფს ყველა მოძღვრებას, დაცემულ ანგელოზთა და ადამიანთა გამონაგონსა და გამოსაგონებელს, ქრისტეს მოძღვრების, ღვთის მოძღვრების წინააღმდეგმსა და მისი მთლიანობისა და შეუხებლობის ხელმყოფს. ღვთივ განცხადებული სწავლება ხელუხლებელი მთლიანობით მხოლოდდამხოლოდ აღმოსავლეთის მართლმადიდებელი ეკლესიის წიაღშია დამარხული. ამინ!

თარგმნა რუსიკო კობახიძემ

წერილები ერის კაცთა მიმართ

30.

შენ ჯოჯოხეთისა და სამუდამო სატანჯველის არსებობა გეეჭვება? დღევანდელ მოღურ გამოთქმას რომ იმეორებ: „ეს არ შეესაბამება ისეთ გულმოწყალე არსებას, როგორც ღმერთია“.

ეჰ, ჩემო მეგობარო! შეუძლია კი ისეთ სუსტსა და შეზღუდულ არსებას, როგორც ადამიანია, თავისით განსაჯოს განუსაზღვრელი ღმერთი, ყოველგვარ წვდომასა და განსჯას აღმატებული, და საკუთარი თავიდან გამომდინარე მასზე დადებითი დასკვნები გამოიტანოს? დაუტევე შენი აზრები და მთელი გულით იწამე ყოველივე, რასაც სახარება გვასწავლის. თავად მაცხოვარმა ბრძანა: „და წარვიდენ ესენი სატანჯველსა საუკუნესა“ მათე, 25, 46), და სხვა ადგილას გვეუბნება: „და ჯოჯოხეთს შინა აღიხილნა თუალნი თვისნი“ (ლუკა, 16, 23). მაცხოვარმა ბრძანა, რომ არსებობს ჯოჯოხეთი, არსებობს სა-

¹ იოანე, 8, 31, 32.

მუდამო სატანჯველი, — რატომღა ეწინააღმდეგები! თუკი შენ-
ში ეს წინააღმდეგობა არსებობს, ეს ნიშნავს, რომ მაცხოვრის
სიტყვების ჭეშმარიტებაში შეგაქვს ეჭვი და უგულვებელპყოფ
მათ. ვინც ქრისტეს მოძღვრებაში ერთ დოგმატს მაინც უარ-
ყოფს, ის თავად ქრისტეს უარყოფს. კარგად დაფიქრდი: —
შენი ეჭვი არც ისე მსუბუქი ცოდვაა. თუკი მას გაითავისებ
და სიტყვით განახორციელებ, — სასიკვდილო ცოდვაში ჩა-
ვარდები. ერთმა სიტყვამ რწმენისამ შეიძლება გეაცხოვნოს და
ერთმა სიტყვამ ურწმუნოებისამ წარგვიწყმიდოს სული. ჯვარ-
ზე გაკრულმა ავაზაკმა სიკვდილის ჟამს აღიარა ქრისტე, —
და თავისთვის სამოთხის ბქენი განიხვნა. ფარისევლებმა ჭეშ-
მარიტების უარყოფით დაგმეს სული წმიდა, — და წარ-
წყმდნენ. „რამეთუ სიტყუათა შენთაგან განპართლდე და
სიტყუათა შენთაგან დაისაჯო“. (მათე, 12, 37). — გვაუწყა
მაცხოვარმა. თუკი გონებას ნებას მისცემ წინაღუდგეს ქრის-
ტეს სწავლებას, იგი ასეთ წინააღმდეგობებს ათასობით მოი-
ძიებს: გონება ამოუწურავია, როცა მას ქრისტესადმი მტრო-
ბით დაასნეულებ. თანდათანობით ის ქრისტეანობის ყველა
დოგმატს უარყოფს. აღვირახსნილი, თვითნებური აზროვნების
ეს ნაყოფი ახალი არაა. მისგან წარმოიშვა ამქვეყნად ამდენი
უღმერთო და ღვთისმგმობელი! გამოუცდელ თვალს ისინი
ბრწყინვალე მოაზროვნეებად ეჩვენებოდა, რომელთაც ჯაქ-
ვები გაწყვიტეს, თავისუფლება მოიპოვეს, ჭეშმარიტება აღ-
მოაჩინეს და სხვა ადამიანებს დაანახვეს. მაგრამ შემდგომ
აღმოჩნდა, რომ მათი ჭეშმარიტება ცრუ და უსაშინლესი, დამ-
ლუპველი შეცდომა ყოფილა. ეს ცრუ აზრები სისხლში განი-
ბანა, მაგრამ ამ განბანით მაინც ვერ განიწმიდა. საშინელებაა
აზრის ტყუილით წაბილწვა: ადამიანის სისხლს არ ძალუქს
ტყუილის ამ შავი ლაქების ამორეცხვა. ასეთი განწმენდისათ-
ვის კაცობრიობა ღმერთკაცის სისხლს საჭიროებდა. მან ეს
სისხლი მიიღო, განიბანა მასში და განიწმიდა. სარწმუნოებით
განმტკიცებული ადამიანი ღვთისშემეცნებისა და თვითშე-
მეცნების ნათელში გამოვიდა, — გამოვიდა ხორციელი, ცრუ
გონების ღრმა და ბნელი უფსკრულიდან. ეს გონება მას
კვლავ უფსკრულისაკენ უხმობს, — და ისიც ყურად-იღებს
დამლუპველ მოწოდებას! რა გასაკვირია? ადამიანმა თავისი
ხასიათი შეინარჩუნა: ღვთიური კეთილსურნელებითა და ნე-

ტარებით აღვსილ სამოთხეში მყოფი დაუყოვნებლად ენდო ეშმაკის მაცდურ სიტყვებს.

ჩემო მეგობარო! შენ ქრისტიანი ხარ, აღმოსავლეთის მართლმადიდებელი ეკლესიის წევრი. ერთგული იყავი იმ სულიერი სწეულისა, რომლის ნაწილსაც წარმოადგენ; დაიცავი ერთობა წმინდა ეკლესიასთან, რომელსაც შენ ეკუთვნი; ფასდაუდებელი განძივით შეინახე შენი სულიერი ღირსება. შენი უძლურების გამო ნუ დაიწყებ დოგმატების განსჯას: ეს ღრმა უფსკრულია, სახიფათო ზღვაა. მასში მრავალი გამოუცდელი და თვითდაჯერებული მოცურავე დაიღუპა. ღვთისმეტყველების ამ საოცარ ტალღებზე უშიშრად და უხვი სულიერი სარგებლის მოპოვების იმედით შეუძლიათ იცურონ მხოლოდ მათ, ვისი მასაზრდოებელი გონებაც სულიწმიდის მფარველობაშია. წმიდა პავლე მოციქულის რჩევით: „წარმოვსტყუენავთ ყოველსავე ცნობასა მორჩილებად ქრისტესა“*, ნუ შეეკამათები ცრუ გონებიდან დაბადებულ ეჭვებსა და წინააღმდეგ აზრებს, ნურც მათ განსჯას შეუდგები. რწმენის მახვილით მოკვეთე თავი ამ გველებს, როგორც კი თავისი ხვრელიდან გამოსრილდებიან! ეს იქნება სწორი და ჭეშმარიტი ქმედება! ასეთი ქმედება შეპფერის მას, ვინც ერთხელ და სამუდამოდ შეუდგა ქრისტეს. განსჯა შეერთებამდე ხდება; შეერთების შემდეგ კი უკვე დანაშაულს წარმოადგენს. დაე, ნურაფერი დაარღვევს, ნურაფერი შეარყევს შენს ერთგულებას! ეჰ! სჯობს საერთოდ არ შეუდგე, ვიდრე უღალატო. სიმდაბლით მოუდრიკე ქედი ტკბილ უღელს, კეთილმორწმუნედ იცხოვრე, ხშირად იარე ეკლესიაში, იკითხე ახალი აღთქმა და წმიდა მამათა თხზულებანი, კეთილი უყავ მოყვასს. თავის დროზე შენი სული ქრისტეს ღვთაებრივ სწავლებას გაითავისებს, სწავლებას, რომლითაც სიწმიდე და ჭეშმარიტება სუნთქავს. მაშინ მას არანაირი ეჭვი აღარ შეაწუხებს. ქრისტეს სწავლება ზებუნებრივია, რადგან ღვთაებრივია. ის ადამიანის გონებისათვის მხოლოდ და მხოლოდ რწმენის საშუალებითაა მისაწვდომი. უგუნური წამოწყებაა ზებუნებრივის ახსნა ადამიანური აზ-

* 2 კორ. X; V.

როვნებით. ამ აზროვნებას არ ძალუძს საერთო ჩვეულებრივი ბუნებრივი წრიდან გამოსვლა. ეს უგუნური წამოწყება იწვევს შეუთანხმებლობებს, ურიცხვ წინააღმდეგობებს, იწვევს არაბუნებრივის უარყოფას, თუნდაც ეს არაბუნებრივი ღვთაებრივი იყოს.

თავიანთი საქციელით ადამიანები ხშირად საკუთარ თავსვე ეწინააღმდეგებიან! თვალს სიბინძურისაგან იცავენ, სულის თვალს — გონებას კი სულ არ უფრთხილდებიან და ყოველგვარი ნაგავით ავსებენ. უფალმა უპირველესად გონების დაცვა გვიბრძანა, რადგან იგია კაცის წინამძღოლი. თუკი გონება ქეშმარიტი გზიდან გადაუხვევს, ადამიანის მთელი ცხოვრება შეცდომად გადაიქცევა. ქეშმარიტი გზიდან ასაცდენად კი გონებას სულ ცოტა ჰყოფნის: ერთი ცრუ აზრი. „ოდეს თუალი შენი განმარტებულ იყოს“, — ბრძანებს მაცხოვარი, — „ყოველი გუამი შენი ნათელ იყოს: და უკუეთუ თუალი შენი ბოროტ იყოს, ყოველი გუამი შენი ბნელ იყოს. იხილე, ნუუკუე ნათელი იგი შენ შორის ბნელ იყოს“ (ლუკა, 11, 34). ამ წმიდა მცნებას ჩვენ საერთოდ არ ვასრულებთ; არ ვცდილობთ, რომ ჩვენი ნათელი—გონება ბნელად არ იქცეს, და ყოველგვარი აბდაუბლით ვაბინძურებთ. გონება საბოლოოდ რომ დაბნელდება, წყვდიადი მოიცავს მთელ ჩვენს მოქმედებებს, მთელ ჩვენს ცხოვრებას. საიდან შეიძლება გაჩენილიყო შენს სულში ღვთისადმი მტრული, დამღუპველი ურწმუნოებისა და ცრუსიბრძნის აზრები? უთუოდ რელიგიაზე დაწერილი მრავალგვარი ფუჭი უცხოური წიგნები იკითხე, მრავალნაირი უსაფუძვლო მსჯელობები მოისმინე. ამგვარი მსჯელობებით ფრიად მდიდარია ჩვენი დრო; დრო, რომელიც ქეშმარიტი რელიგიური შემეცნებით ასე გაღარიბდა. „არაფერი ისე არ წარმართავს ადამიანს ღვთის გმობისაკენ, როგორც ერეტიკული წიგნების კითხვა“. — თქვა წმიდა ისააკ ასურმა. თავი ანებე ამ უწესრიგო კითხვას, გონებას დახლართული, უკულმართი აზრებით რომ გივსებს; მას სიმყარეს, დამოუკიდებლობასა და სწორ შეხედულებას აცლის და სკეპტიკურ მერყეობაში აგდებს. საფუძვლიანად შეისწავლე აღმოსავლეთის ეკლესია მისი გადმოცემის მიხედვით, რომელიც წმიდა მამათა თხზულებებშია დაცული. ამ ეკლესიას ეკუთვნის? მისი

საფუძვლიანად გაცნობა შენი ვალია. დააკვირდი, რა კარგად იციან დასავლეთში თავისი რელიგია! მართალია, თავისი რწმენის დაწვრილებითი შეცნობა მათთვის უფრო ადვილი საქმეა. კათოლიკემ ირწმუნა თუ არა პაპი, როგორც ღმერთი, ყველაფერი დაამთავრა — ის სრულყოფილი კათოლიკეა! შეუძლია ისულელოს, რამდენიც უნდა! პროტესტანტი როგორც კი დაეჭვდა მთელ საღვთო გადმოცემაში და წინაღუდგა ქრისტეს სწავლებას, თუმცაღა ქრისტეანის სახელი შეინარჩუნა, — ისიც ყველაფერს მორჩა: ნამდვილი პროტესტანტია. ასეთი სრულყოფილების მიღწევის შემდეგ ლათინიც და პროტესტანტიც მრავალტომიან თხზულებებს წერენ, მათ შემოქმედებას ორთქლმავლებში ტვირთავენ და რუსეთში აგზავნიან მკითხველების საძებრად. ნუ წაიკითხავ ამ ადამიანთა ნაწერებს, თვითონაც კი რომ არ ესმით, რას თხზავენ. ახლანდელი მოდის მიხედვით შენ ისე ცუდად იცნობ ქრისტეანულ რელიგიას, რომ ძალიან ადვილად შეიძლება რომელიმე ცრუ აზრი შეითვისო და სული წარიწყმიდო. ჯოჯოხეთი არსებობს, სამუდამო სატანჯველიც არსებობს; ღვთისათვის სათნო ცხოვრებით შეეცადე ისინი შენთვის არარსებული გახდეს.

ჩემი პასუხი დასრულებულად მიმაჩნია. ხოლო რასაც ამის შემდეგ ვიტყვი, ჩემი მეგობრული ვალია. არა, სხვაგვარად უნდა ითქვას: ეს ვალი კი არა, უქმი მეტყველებაა, თუმცაღა ის გულახდილობიდან და მეგობრობიდან გამომდინარეობს. ხშირად მომისმენია შენს მიერ აწ გამოთქმული აზრი, რომელსაც სწორედ იგივე არგუმენტით ამყარებენ, რომ ჯოჯოხეთისა და სამუდამო სატანჯველის არსებობა არ შეესაბამება ღვთის გულმოწყალებას. ერთხელ, ამგვარი საუბრის შემდეგ, სტუმარმა როცა დამტოვა, უნებლიედ შეუმჩნეველმა მკმუნვარებამ მომიცვა, გულზე სევდა დამაწვა, თუმცა არანაირი განსაკუთრებული აზრი არ მაწუხებდა. ეს იყო ჩემი მნახველის მიერ დატოვებული შთაბეჭდილება. როგორ არ დამრჩებოდა სევდიანი გრძნობა, როდესაც ვუსმენდი ქრისტეს წინააღმდეგ გაკადნიერებულ ქრისტეანს, რომელმაც თავს უფლება მისცა, თვით ჭეშმარიტების — ღვთის სიტყვები ტყუილად და ცრურწმენის გამონაგონად შეერაცხა. როგორ არ დამრჩებოდა სევდიანი გრძნობა, როცა ვხედავდი, რომ უარყოფილია ღვთის

წყალობა, წყალობა, რომელიც შეუძლია მიიღოს და დაიცვას მხოლოდ ქრისტიანული საწმუნოების დოგმატთა მართალმა აღმსარებლობამ, ღვთისაგან რომ გვეძლევა. და ამ წყალობის უარყოფის მიზეზად მოაქვთ ამაო კაცობრივი ზრახვა ღვთის მოწყალების შესახებ! — მოულოდნელად მეზადება აზრი, რომელიც ქვეყნიერების გარშემო მოგზაურობას მთავაზობს. აზრი ისეთი ნათელი იყო და ისეთი სასიამოვნო შეგრძნება გამოიწვია, რომ აღარც დავფიქრებულვარ. ადვილად მივენდე. ეს აზრი თითქოს საპაერო ბურთით მიმაფრენს. ვხედავ მთელ ქვეყნიერებას, გზად არაფერი მაჩერებს, მივქრვიარ ნისლიანი მთების შორიახლოს, სწრაფად გადავუფრინე მდინარეებს, ტბებსა და ზღვებს. მთელი სამყარო უმციირეს დროში მოვიარე და ამავე დროს მშვიდად ვიჯექი ჩემს სავარძელში. რა ვნახე ამ მოგზაურობისას? კაცობრიობის ტანჯვა. დიახ! მე ვიხილე ტანჯვა ფიზიკურიც და ზნეობრივიც. ისეთი ადამიანი არ შემხვედრია, რომელიც არ იტანჯებოდა. მე ვიხილე ტანჯულნი სასახლეებსა და სამეფო ტახტზე; მე ვიხილე ტანჯულნი მოზღვაებულ ფუფუნებაში, სადაც სხეულს ჯანმრთელს და მადარს ვხედავდი, იქ სული იყო მშვიერი და სნეული, ამ საშინელი სენის დათმენა არ შეეძლო და განუწყვეტლივ კვნესოდა. ვნახე პატიმრები, სამუდამოდ დასამარებულნი დახუთულ და ბნელ საპყრობილეებში; ვნახე მიწის წიაღში მომუშავენი, სადაც მზის სხივიც ვერ აღწევს, სადაც ბორკილების ჟღარუნი და უროებისა და წერაქვების ხმა გაისმის. აქ მოიპოვებენ ოქროს, ადამიანთა ერთი ნაწილის განცხრომისათვის მეორეთა მუდმივი გაჭირვების ხარჯზე. ყველაზე ცივილიზებულ სახელმწიფოებში ვიხილე უამრავი დამშეული ოჯახი; ვიხილე მოსახლეობის დიდი ნაწილი, ფიზიკური და ზნეობრივი სილატაკით გაუბედურებული. მე ვიხილე კაცობრიობა ბოროტმოქმედებით დაცემული! კაცობრიობა შეცდომებით დამახინჯებული! კაცობრიობა ბარბაროსობით დასახინჯებული! მე ვიხილე კაცობრიობა პირუტყვთა და მხეცთა მსგავსებაზე დასული! იქ ადამიანებზე ისე ნადირობენ, როგორც ცხოველებზე, იქ ადამიანებით ვაჭრობენ, როგორც უსულო ნადავლით, როგორც პირუტყვით, — და ამ ბაზარზე კაცს შინაურ ცხოველზე უფრო

იაფად აფასებენ. იქ ადამიანი თითქმის პირუტყვივით ცხოვრობს, და როგორც მძვინვარე მხეცი, ისე იქცევა, სისხლისღვრაში პოეებს სიამოვნებას, გაშმაგებული, გამხეცებული ჭამს თავისივე მსგავსთ. ეპ, ასეთ საშინელ არსებობას სჯობს სულ არ არებობდე! ასეთია ჩვეულებრივი ადამიანური ცხოვრების ამქვეყნიური სურათი. უნდა გავიხსენოთ ის უბედურებანი, დროდადრო და ადგილ-ადგილ რომ დაატყდება ხოლმე კაცობრიობას: მიწისძვრები, შავი ჭირი, შინაომები, დამპყრობელთა მახვილი, ასე უხვად რომ ღვრის სისხლს, როცა ის ბათო-ყაენს ან თემურლენგს უპყრია. აი, უკვე რამდენიმე ათასწლეული გაკიდა, რაც დედამიწაზე ერთი თაობა მეორეთი იცვლება, იცვლება მხოლოდ სატანჯველად. თუმცაღა ამ ყველაფერს ხედავს ღმერთი, შემოქმედი და მეუფე ყოველთა, ყოვლისშემძლე და ყოვლადმოწყალე. ეს უსაშინლესი ბოროტება, რომლითაც დედამიწაზე ადამიანთა მოდგმა იტანჯება, ღმერთს ხელს არ უშლის ყოვლადმოწყალედ დარჩეს. უსასრულობას რამდენი რიცხვიც არ უნდა მიუმატო, ან დააკლო, ის მაინც არ შეიცვლება, კვლავ უსასრულობად რჩება! — მაგრამ თუკი ამ თვალთ შევხედავთ ამ ქვეყანას, სადაც მიყოლებით იტანჯებოდნენ და ამდენი თაობა მეტ-ნაკლებად საშინელი სიკვდილით დაიღუპა, — ჯოჯოხეთსა და სამუდამო სატანჯველზე ფიქრი უცხოდ აღარ მოგვეჩვენება!

ადამის მოდგმა დაცემულ ადამიანთა წყებაა. ეს ქვეყანა ჯოჯოხეთის კარიბჭეა, სადაც დამნაშავეებს პირველდაწყებითი სასჯელი მიეზღვებათ. მაცხოვარმა ის სამოთხის კარიბჭედ აქცია.

თარგმნა ზ უ რ ა ბ ა რ ო შ ვ ი ლ მ ა

წერილავი ერის კაცთა მიმართ

44.

ახლა ვკითხულობ წიგნს, რომელიც სლავურ, რუსულ და სხვა ენებზე მომეპოვება. ეს წიგნი „წმიდა ეგვიპტელ მეუღაბნოე მამათა გამონათქვამების კრებულს“ შეიცავს. ეს გამონათქვამები ფასდაუდებელი მარგალიტებია! ზღვის სიღრმეში ეშვება მყვინთავი ძვირფასი მარგალიტის საძებრად. წმიდა

მამები უდაბნოებში იხვეწებოდნენ, იქ საკუთარ თავს ღრმად ჰკრეტდნენ და მრავალნაირ ფასდაუდებელ მარგალიტს პოულობდნენ; პოულობდნენ ქრისტესმიერ სიმდაბლეს, ჩჩვილთა უბრალოებასა და უმანკოებას, ანგელოზებრივ უვნებლობას, სულიერ განსჯასა და სიბრძნეს, — ერთი სიტყვით, პოულობდნენ სახარებას.

დღეს სისოი დიდის ის გამონათქვამი წავიკითხე, რომელიც ყოველთვის გამორჩეულად მომწონდა, ყოველთვის ვანსაკუთრებით ახლოს მომდიოდა გულთან. „მამან ჰკითხა მამასა სისოის და ჰრქუა: ვხედავ, რამეთუ ხსენებად ჩემი ღმრთისა თანა დადგომილ არს. ჰრქუა მას ბერმან: არა დიდ არს, რამეთუ გულისსიტყუად შენი ღმრთისა თანა არს, არამედ დიდ ესე არს, უკუეთუ თავი შენი ყოველთა დაბადებულთა ქვემო კერძო შეგერაცხოს“¹.

მაღალი ღვაწლია — მესხიერებით მუდმივად ღმერთთან დადგრომა! მაგრამ ეს სიმალღე ძალზე სახიფათოა, როცა მისკენ მიმავალი კიბე სიმდაბლის მტკიცე ქვაზე არაა დაფუძნებული.

დაუკვირდით, როგორ თანხმობაშია წმიდა წერილი მამათა ნაწერებთან! წმიდა წერილი ამბობს: „საკუთრთხი არა გთნდეს, მსხუერპლი ღმრთისა არს სული შემუსრვილი, გული შემუსრვილი და დამდაბლებული ღმერთმან არა შეურაცხოს“. კაცთა მსხვერპლი და საკვერთხი სულიერი სიგლაზაკისა და სინანულის გრძნობაზე უნდა იყოს დამყარებული. ამის გარეშე ღმერთი განაგდებს ამ შესაწირავს. ასევე ძალიან მომწონს პიმენი დიდის გამონათქვამი: „თუკი ყოველთვის და ყველაფერში საკუთარ თავს დავადანაშაულებთ, სიმშვიდეს მოვიპოვებთ“. სხვა წმიდა მამა ამბობს: „ჩვენ დავუტევეთ მსუბუქი ტვირთი საკუთარი თავის განკითხვისა და ავიღეთ სიმძიმე სხვისი დადანაშაულებისა“. ასეთი გამონათქვამები მთელი ტომეულების ფასია! მგონი ისე ღრმად არავინ არ ჩასწვდომია სახარებას, როგორც წმიდა მეუდაბნოე მამები. ისინი ცდილობდნენ სახარება ცხოვრებით განეხორციელებინათ, განეხორციელებინათ თავიანთი აზრებითა და გრძნობებით. მეუდაბნოე მამები

¹ შუა საუკუნეთა ნოველების ძველი ქართული თარგმანები. თბ. 1966, გვ. 214.

ულრმესი სიმდაბლით გამოირჩეოდნენ. მათი ფიქრის მუდმივ საგანს კაცობრიობის ცოდვით დაცემა წარმოადგენდა, საკუთარ ცოდვებზე ტირილი მათ მუდმივ საქმედ ქცეულიყო.

სხვა მიმართულება აირჩიეს დასავლეთის ეკლესიის მოღვაწეებმა და ასკეტიზმის მასწავლებლებმა მას შემდეგ, რაც ეს ეკლესია აღმოსავლეთისას გამოეყო და მწვალებლობის დამლუპველ წყვდიადში ჩაეფლო. ღირსი ბენედიქტე და წმიდა პაპი გრიგოლი დიოლოლოსი ჯერ კიდევ ეთანხმებოდნენ აღმოსავლეთის ასკეტიზმის მასწავლებლებს; ბერნარდი უკვე საგრძნობლად გამოირჩევა მათგან; შემდგომნი კი უფრო მეტად გადაიხარნენ. ისინი თავიდანვე მიისწრაფვიან და მკითხველებსაც იზიდავენ ახალდამწყებთათვის მიუწვდომელი სიმალღებებისაკენ, თვითონაც ეფლობიან და სხვებსაც ითრევენ. აგზნებული, ხშირად გონებადადბინდული მეოცნებეობა უცვლის მათ მთელ სულიერებას, რომელზეც არანაირი წარმოდგენა არ გააჩნიათ. ამ მეოცნებეობას ისინი მადლად შერაცხავენ. „ნაყოფთა მათთაგან იცნეთ იგინი“ — თქვა მაცხოვარმა. საყოველთაოდ ცნობილია, როგორი სისხლისღვრებით, როგორი აშკარად ქრისტიანობის წინააღმდეგომი ქმედებით გამოხატეს დასავლეთელმა ფანატიკოსებმა თავისი დამახინჯებული აზროვნება, თავისი უგვანი გულისთქმა. აღმოსავლეთის ეკლესიის წმიდა მამები თავიანთ მკითხველებს სიყვარულის ბადეში კი არ ახვევენ, ხილვების სიმალღეზე კი არ აღამაღლებენ, არამედ თავიანთი ცოდვის, თავიანთი დაცემის შეცნობისაკენ მიჰყავთ ისინი, მიჰყავთ ქრისტეს აღიარებამდე, საკუთარი თავის დატირებამდე შემოქმედის მოწყალების წინაშე. ისინი გვასწავლიან ჯერ ჩვენი ხორციელი უწმინდური ვნებების ალაგმვას, ხორცის შემსუბუქებას სულიერი მოღვაწეობისათვის; შემდეგ გონებას მიმართავენ, იწყებენ აზროვნების გასწორებას, გონებას დაცემისაგან გათავისებული აზრებისაგან ასუფთავებენ და მათ განახლებული კაცობრივი ბუნებიდან გამომდინარე აზრებით ცვლიან, სახარებაში ასე ცოცხლად რომაა გამოხატული. გონების გამართვის შემდეგ წმიდა მამები გულის გამოსწორებისათვის ზრუნვას იწყებენ, მისი ჩვევებისა და შეგრძნებების შეცვლას. გულის განწმენდა გაცილებით უფრო ძნელია, ვიდრე გონებისა: გონება ახალი აზრის

სისწორეში რომ დარწმუნდება, ადვილად დაუტევებს ძველს და ამ ახალ აზრს შეითვისებს. მაგრამ ჩვევის ჩვევით შეცვლა, თვისების თვისებით, გრძნობის სხვა საწინააღმდეგო გრძნობით, — ეს უკვე ღვაწლია, ეს უკვე მძიმე და ხანგრძლივი შრომაა, შეუპოვარი ბრძოლაა. ამ ბრძოლის სიმძაფრეს მამები ასეთი სიტყვებით გამოხატავენ:

„მეიცი სისხლი და მიიღე სული“. ეს ნიშნავს: სისხლისა და ხორცის ყველა ცოდვისმიერი სურვილი უნდა ჩაეკლათ, უნდა მოვაკვდინოთ ყოველი მათმიერი მოძრაობა გულისა და გონებისა; ხორციც, გონებაც და გულიც სულის გამგებლობაში შევიყვანოთ. ბევრნაირი ვნება ალაგზნებს სისხლსა და ნერვებს: მრისხანება, ვერცხლისმოყვარეობა, გემოთმოყვარეობა და დიდებისმოყვარეობა. არასჯულიერად მოღვაწეებს ეს ორი უკანასკნელი ვნება უჩქროლებს სისხლს ყველაზე მძაფრად და მათ გონებადაკარგულ ფანატიკოსებად აქცევს. დიდებისმოყვარეობა უდროოდ მიილტვის სულიერი ფასეულობებისაკენ. ამ ფასეულობების მიღწევა კი ადამიანს ჯერ არ ძალუძს თავისი უწმინდურობის გამო, და ჰეშმარიტებას რომ ვერ სწვდება, მეოცნებეობას იწყებს. დიდებისმოყვარეობის მოქმედებას ემატება გემოთმოყვარებაც. ეს ვნება მომხიბლავ, ცრუნუგეშინისცემას, ტებობისა და თრობის გრძნობას იწვევს გულში. ამგვარ მდგომარეობას ჰქვია სულიერი ხიბლი. ყველა არასჯულიერად მოღვაწე ამ მდგომარეობაში იმყოფება. სულიერი ხიბლი იმისდამიხედვით ვითარდება, თუ ისინი თავიანთ ღვაწლს რამდენად გააძლიერებენ. ასეთ მდგომარეობაში მყოფნი წერდნენ დასავლეთის მწერლები უამრავ წიგნებს. სწორედ ამ წიგნებს ეტანება დაბრმავებული და ამაყი მსოფლიო, მათ ცნობს უფრო წმინდად და წმიდა წერილის გვერთავს უაღრესად განათლებულად მიიჩნევს და ამიტომაც აღარ დით დგომის ღირსად შერაცხავს. მსოფლიო, რომელიც თავის საჭიროებს განუხრელად მისდიოს აღმოსავლეთის ეკლესიის გადმოცემას.

აღმოსავლეთის ეკლესიის წმიდა მამათა თხზულებებში ვერ ნახავ ამგვარ ალაგზნებულ მდგომარეობას. მათ არასოდეს არ იპყრობს ენთუზიაზმი, სისხლიდან რომ იბადება და ხშირად სისხლისღვრასვე ეძიებდა დასავლეთში. წმიდა მამათა ნაწე-

რებში კეშმარიტი თავდადება სუნთქავს, სუნთქავს ვნებების დამორგუნავი კეთილსურნელება სული წმიდისა. ამ კეთილსურნელებას გაუბრძიან ამა სოფლის ძენი, ისე როგორც კრახანები იფანტებიან საკმევლის კმევისას. „სოფელიმცა თვისთა ჰყუარობდა“ — თქვა უფალმა. დასაელეთის მწერალთა თხზულებანი, სულიერი ხიბლის მდგომარეობაში დაწერილნი, უამრავ მკითხველს პოულობს, არაერთხელ ითარგმნება რუსულ ენაზე, იბეჭდება, გადაიბეჭდება. ისინი წარმოთქვამენ, წერენ და ბეჭდავენ სმამალალ ქება-დიდებას. ის, რაც მომაკვლინებელი საწამლავითაა გაჭერებული, მოწონებული და განმტკიცებულია. წმიდა მამათა თხზულებანი დავიწყებას მიეცა! წმიდა ეკლესიის მიერ ოდითგანვე მიღებული, მოღვაწეობისათვის ერთადერთ სწორ წინამძღოლად მიჩნეულ ნაწერებს უპატივცემლოდ ეკიდებიან. მათ აკრიტიკებენ, პოულობენ მათში შეუთანხმებლობებს, წინააღმდეგობებს წმიდა წერილთან. ყველაფრის მიზეზი კი იმაშია, რომ წმიდა მამები სული წმიდის ჩაგონებით წერდნენ, მათ ამსოფლიური სიბრძნე უარყვეს სული წმიდის სიბრძნის მოსაპოვებლად. ამათა მათი მცდელობა, ვინც მოციქულის სწავლების, ეკლესიის სწავლების საწინააღმდეგოდ ამქვეყნიური სიბრძნით ცდილობს სული წმიდის სიბრძნის მოპოვებას. და „შეიპყრის ბრძენნი სივერაგითა მათითა“ (I კორ. 3, 19). შებრკოლდნენ და დაეცნენ საშინელი დაცემით. მათ „სულიერის“ ახსნა ბნელი მშვინივიერი გონებით მოინდომეს და ეს „სულიერი“ წმიდა მამათა თხზულებებში უცნაურად, წმიდა წერილის წინააღმდეგოდ მოეჩვენათ. „სულიერთა სულიერად შევატყუებთ“ — ამბობს წმიდა პავლე მოციქული — „ხოლო მშვინივიერი კაცი არა შეიწყნარებს სულსა ღმრთისასა, რამეთუ სიცოფე უჩინ მას და ვერ შემძლებელ არნ ცნობად, რამეთუ სულიერად განიკითხვინ“ (I კორ. 2, 13, 14). ეს უკანასკნელი სიტყვები ახალ თარგმანში ასე იკითხება: „რადგან სულიერზე სულიერად უნდა ვიმსჯელოთ“.

თარგმნა რუსიკოკობახიძემ

წმიდა თეოფანე დაყუდებული (ერისკაცობაში გიორგი ვასილის ძე გოვოროვი), დაიბადა 1815 წლის 10 იანვარს, ორლოვის გუბერნიის სოფელ ჩერნოვსკში, მღვდლის ოჯახში. მშობლებმა მას ბავშვობიდანვე ჩაუნერგეს ღვთისმოსილება. ოჯახშივე მიიღო კარგი დაწყებითი განათლება, რაც დაეხმარა ლიევენის სასულიერო სასწავლებლის, ხოლო შემდგომ ორლოვის სემინარიის წარმატებით დამთავრებაში. შესანიშნავი მასწავლებლების წყალობით მომავალი მღვდელმთავარი სასარგებლო ზნეობრივ და სულიერ ატმოსფეროში აღიზარდა. სწავლების ბოლო წელს იგი ბერად აღიკვეცა. ზნეკეთილმა და ნიჭიერმა სტუდენტმა მაგისტრის ხარისხი მიიღო და ჯერ კიევის სასულიერო სასწავლებლის რექტორად დაინიშნა, შემდეგ კი— ნოვგოროდის სემინარიის ინსპექტორად. 3 წლის შემდეგ იგი სანკტ-პეტერბურგის სასულიერო აკადემიაში გადაიყვანეს სამოძღვრო ღვთისმეტყველების ბაკალავრად.

1847 წელს მამა თეოფანე გახდა წევრი რუსეთის სასულიერო მისიისა იერუსალიმში, სადაც 6 წელი დაჰყო. ამ ხნის განმავლობაში იგი საფუძვლიანად სწავლობდა ბერძნულ და ფრანგულ ენებს, ვაეცნო აგრეთვე ებრაულსა და არაბულს, გულმოდგინედ შეისწავლა წმიდა მამათა თხზულებანი უძველესი ხელნაწერებიდან, წერდა ხატებს ადგილობრივი ღვთისმეტყველებისათვის. მის ამგვარ მოღვაწეობას ხელი შეუშალა ყირიზის ომმა და რუსეთში დაბრუნებული მღვდელმონაზონი თეოფანე კვლავ გულმოდგინედ შეუდგა პედაგოგიურ მოღვაწეობას.

1856 წელს, უკვე არქიმანდრიტის ხარისხში აყვანილი მამა თეოფანე კონსტანტინოპოლში გადაყავთ საელჩოს ეკლესიის წინამძღვრად. ერთი წლის შემდეგ იგი წმიდა სინოდმა გამოიხმო მის ახალ თანამდებობაზე დანიშვნის გამო და იგი გახდა სანკტ-პეტერბურგის სასულიერო აკადემიის რექტორი, ღვთისმეტყველების პროფესორი. აქ მან მხოლოდ 2 წელი იმსახურა, შემდეგ კი ეპისკოპოსად დაასხეს ხელი.

25 წლიანი საეკლესიო მსახურების შემდეგ წმიდა მამა თეოფანემ გადაწყვიტა განმარტოებით დაყუდება, რათა დაუბ-

რკოლებლად მისცემოდა ღმრთისათვის სათნო ღვაწლს. დარჩენილი 28 წელი, ცხოვრების ბოლომდე მან ტამბოვის ეპარქიაში, ვიშინსკის უდაბნოში გაატარა. მეუფე თეოფანე თავისუფალ დროს ლიტერატურულ და საღვთისმეტყველო საქმიანობას უთმობდა, დიდი მიმოწერა ჰქონდა ათასობით სულიერ შვილთან, როგორც სამეფო კარის მოხელეებთან, ასევე უბრალო ხალხთან. მისი წერილების უმრავლესობა გამოქვეყნებულია. მათგან განსაკუთრებით ცნობილია: „წერილები სულიერი ცხოვრების შესახებ“, „წერილები ქრისტიანული ცხოვრების შესახებ“, „რა არის სულიერი ცხოვრება და როგორ უნდა დავიწყოთ იგი“, „წერილები სხვადასხვა პირებისადმი“. ეს წერილები ჩვენი დროისთვისაც მეტად აქტუალურია. მათგან გამოსკვივის მოყვასისადმი საოცარი ყურადღება, სიკეთე და სიყვარული.

1890 წელს სანკტ-პეტერბურგის აკადემიამ მრავალმხრივი და სასარგებლო საღვთისმეტყველო მოღვაწეობისათვის ეპისკოპოს თეოფანეს ღვთისმეტყველების დოქტორის წოდება მიანიჭა. რუსეთის მართლმადიდებელი ეკლესიის ყველა სასულიერო აკადემიებმა იგი თავის საპატიო წევრად აირჩიეს.

ამა სოფლის დატევება და განმარტოებით დაყუდების ღვაწლი მეუფე თეოფანეს ხელს არ უშლიდა აქტიური მონაწილეობა მიეღო ეკლესიის ცხოვრებაში. მან მეტად მდიდარი ბიბლიოთეკა შეაგროვა. სასულიერო ლიტერატურულ მოღვაწეობას იგი ღვთის ერთ-ერთ უპირველეს სამსახურად თვლიდა. ბიოგრაფიაში ეპისკოპოს თეოფანეს სამართლიანად უწოდებენ „ქრისტიანული ფილოსოფიის უდიდეს სწავლულს“. საოცრად ნაყოფიერია მისი მთარგმნელობითი საქმიანობა. ასკეტური მწერლობის შესანიშნავმა მცოდნემ ბერძნულიდან თარგმნა „სიკეთის მოყვარების“ ხუთტომეული.

„ადამიანს თავისი ძალებით არ შეუძლია ჭეშმარიტი ქრისტიანული ცხოვრება, ამისათვის საჭიროა მადლი ღვთისა“ — გვასწავლის თეოფანე დაყუდებული. წმიდა მღვდელმთავრის ღვთივგანბრძნობილი თხზულებებით ხელმძღვანელობა ყველა ქრისტიანისათვის მარადიული ცხოვრების დამკვიდრების

საიმედო საფუძველია. იგი მოგვიწოდებს: „ყველამ დაიმარხეთ ქრისტეანობა, როგორც ის არის და როგორც დაცულია ქრისტეს ეკლესიაში, მტკიცედ სდევით მასზედ, არ გაკადნიერდეთ და რაიმე არ შესცვალოთ მასში, საკუთარ თავს კი მოუკლებლივ სრულყოფდით მისი სწავლების მიხედვით“.

ვმ. თეოფანე დახუდებულნი

მართლმადიდებლობის საფუძველი ერთაჯრობაშია. მისი საწყისი
საოველთაოდ აღიარებული პიუზარიტაა, მისი სიხარა და
სიბაკიყა პიუზარიტაის ცოდნაშია

დღეს ეკლესიაში მართლმადიდებლობის ზეიმია — ვლდე-
სასწაულობთ ჭეშმარიტების გამარჯვებას სიცრუესა და შეც-
თომილებზე. — როგორც მძლეველნი ჩვეულებრივი გამარ-
ჯების შემდგომ მტრებთან იმ გადამწყვეტ შეჯახებებზე მოგვი-
თხრობენ, სადაც მტერი დაამარცხეს და მომავალი თაობის
საწვრთნელად უმამაცეს წინამძღოლთა და მეომართა ჭემა-
დიდებას აღავლენენ; ასევე სვეტი და სიმტკიცე ჭეშმარიტები-
სა — წმიდა ეკლესია ჭეშმარიტებისადმი წინააღმდეგომი ამოდ-
ბრძნობის თავდასხმებს განიცდიდა ჟამ და ჟამ, და დიდებით
რომ უკუაქცია მტერი, დაადგინა თავის გამარჯვებათა საზეი-
მოდ უწყება: განიკითხავს ჭეშმარიტების მოძულეთ, ამხილებს
მათ ცრუ ნააზრევს და ამავდროს საყოველთაოდ ქადაგებს
წმიდა ჭეშმარიტებას და განადიდებს მის თანამდგომთ, რათა
ეკლესიის ნამდვილმა შვილებმა უწყოდნენ, რას მოითხოვს
იგი და როგორ დააღწიონ თავი ასეთივე ან სხვაგვარ შეცთო-
მილებებს. ამის გამგონეთ ვადიდოთ უფალი; მან მისცა
ძლევა ჭეშმარიტებას, რათა, როგორც ნათელი ბნელში, ისე
ანათებდეს ადამიანურ შეცთომილებათა წყვედიდში და შე-
უცთომელ ბილიკს უჩვენებდეს სწორი გზის მაძიებლებს.

ჭეშმარიტებას უფალი მფარველობს: ვინ მოგეტაცებს?!
მაგრამ ნუ გვავიწყდება, რომ უფალი არა მარტო თავისი ზე-
ბუნებრივი ძალით იცავს მას, არამედ ამასთანავე იმგვარად
ინება წმიდა ეკლესიის მოწყობა, რომ ეს ეკლესია იყო და
იქნება საუკუნოდ ამ ჭეშმარიტების დამარხვის შემძლე, ღვთის
წინამძღოლობით. ამ თვალსაზრისით ორკედლება წმიდა ჭეშ-
მარიტებისადმი ჩვენი ვალი: რაც უფალმა მოგვმადლა მის
დასაცავად, მადლობითა და მორჩილებით მივიღოთ, — რაც
ეკლესიაშია, მის მიმართ ჩვენი ვალდებულებაც უნდა შევიგ-
ნოთ, როგორც ეკლესიის ნამდვილმა შვილებმა, და შეძლები-

სამებრ თანაშევეწით კიდეც. და ასე უნდა იქცეოდეს ყველა — დიდი თუ პატარა, ხელდასხმული თუ ხელდაუსხმელი.

აი ესაა აზრი, რომელსაც ბევრნი არ იზიარებენ, და შესრულებით ხომ უფრო ცოტანი ასრულებენ. მე მინდა თქვენი მოსაზრება ამ აზრს მიუთახლოვო.

რაშია ჭეშმარიტების დამარხვის ის ძალა, უფალმა თავის ეკლესიაში რომ განაჩინა? — ეს ძალა ერთაზრობაშია. — ნახეთ, როგორ წამოვიდა ამქვეყნად ქრისტიანული ჭეშმარიტება. მოვიდა უფალი და წმიდა მოციქულებს აუწყა. — შემდგომ სული წმიდა გარდამოუვლინა, სული წმიდით ძალამიციებულმა და მადლშემოსილმა მოციქულებმა ყოველი მხრით იქადაგეს ერთიანი ზეციური ჭეშმარიტება. როგორც ერთია უფალი და ერთია სული წმიდა, ასევე ერთიანი იყო ყველგან მათი სწავლებაც — „ერთ არს უფალი“ — ამბობს მოციქული — „ერთ სარწმუნოებად“. „ერთ ხორც და ერთ სულ, ვითარცა იჩინენით ერთითა მით სასოებითა ჩინებისა თქუენისათა“ (ეფ. 4, 4, 5). ასე იქცა ერთსულოვნება, ერთსარწმუნოება, ერთაზრობა ქრისტიანობის არსებით ნიშნად, მისი არსებობის დასაბამად, მისი სიმყარის საფუძვლის ქვაკუთხედად. ამ ერთიანობას იმდენად ძვირფასად რაცხდნენ წმიდა მოციქულები, რომ თავიანთ სწავლებებში ყოველ ნაბიჯზე ამას გვიბეჭითებენ: და არაა სიტყვა, არაა ეპისტოლე, სადაც ერთიანობა არ იყოს ნახსენები. — ხან „ერთსულ და ერთზრახვა“ ყოფნას შეგვაგონებენ (ფილ. 2, 2; 1 პეტრ., 3, 8), ხან გვარწმუნებენ, „ილუაწდით ერთგზის მოცემულისა მისთვის წმიდათა სარწმუნოებისა“ (იუდა, 3) და მთელი გულისხმით დაიმარხეთ სულიერი ერთობა მშვიდობაში, ხან იმათ ადიდებენ, ვინც დგანან „ერთითა სულითა“ და არა ჰფრთხებიან „არარაათ მხდომთა მათგან“ (ფილ. 1, 27, 28), ხან გვაფრთხილებენ, არ მიმოგვიტაცოს „ყოველმან მან ქარმან მოძღურებისამან“ (ეფ. 4, 14) ხან კი მთელი სიმკაცრით ამხილებენ განწვალებისათვის, და სწორედ — სწავლებაში (1 კორ. 1 —).

წმიდა მოციქულთაგან მორწმუნეებში ჩანერგილმა ერთაზრობის ამ სულმა მუდმივად დაისადგურა მათში და შემდგომ უკვე სასინჯ ქვად იქცა ჭეშმარიტების სიცრუისაგან გამოსარჩევად. ვინ ჭეშმარიტებას ეძიებდა, ვინ ტყუილს ეკრძალო-

და, ვინ მტკიცებას ითხოვდა, ეუბნებოდნენ, წადი იერუსალიმს, ანტიოქიას, ალექსანდრიას, ეფესოს, რომს, — იქ დათესეს მოციქულებმა ქეშმარიტება. ისე ირწმუნე, როგორცაა საყოველთაო სწავლება — ანდა, ქეშმარიტება ამასა და ამაშია. რადგან ასე ასწავლიდნენ და ასწავლიან ყოველგან. და ეს ყოველი, ყოველგან, ყოველთვის იქცა ქრისტეანული ქეშმარიტების დამახასიათებელ ტერმინად.

როგორ უნდა გვეწამდეს და ვასწავლიდეთ? — ისე, როგორც სწამდა და ასწავლიდა ყოველი, ყოველგან და ყოველთვის.

დასაბამითგან აქამომდე სწორედ ამ ერთაზრობით მოწმდებოდა ქრისტეანული ქეშმარიტება და იმხილებოდა სიცრუე, რადგან ერთიანობა მხოლოდ წიგნებში როდი იყო გამოხატული, იგი ცოცხლობდა გონებასა და გულში და ყველა მორწმუნის ნამდვილ განწყობას წარმოადგენდა. რატომ ხდებოდა, რომ, როგორც კი სადმე ვინმესგან აზრთა სხვაობა იჩენდა თავს, მას მაშინვე ყველა შენიშნავდა, ყველა ამხილებდა და გამოაჩინებდა, როგორც საერთო წესიდან გადახრილს, — არაკანონიერს. დაიწყო არიოზმა ქადაგება: „დრო იყო, როცა ძე არ იყო“, გულისხმობდა ყოვლადწმიდა სამების მეორე წევრს. მაშინვე ყველა შეაძრწუნა ამ აზრმა. — ერთი, მეორე, მესამე, ყველა კითხულობდა: როგორ თუ არ იყო? შესაძლოა, რომ არ ყოფილიყო? — საიდანაა ეს სიახლე? ეს შეუფოთება ალექსანდრიიდან სხვა ეპარქიებშიც გავრცელდა, და იქიდან — მთელს ეკლესიაში — სიცრუე ყველგან ამხილეს და ერთმზრახველი საერთო აღმსარებლობით განამტკიცეს ქეშმარიტება. ასევე მოუვიდა ნესტორსაც. მისმა თანადგომმა მქადაგებელმა ერთი სიტყვა ახსენა ღვთისმშობელზე: ქრისტემშობელი. ამ ახალმა სიტყვამ ყველანი შეაუფოთა. როგორ ამბობენ ქრისტემშობელიო? მან ხომ ხორციელი ღმერთი გვიშვა და ქეშმარიტად ღვთისმშობლად იწოდება, როგორც თავიდანვე აღიარა ელისაბედმა: „და ვინაჲ ჩემდა ესე, რამთა მოვიდეს დედაჲ უფლისა ჩემისაჲ ჩემდა?“ (ლუკა, 1, 43). და მოჰყვა ასე ლაპარაკს მთელი ერი, სამღვდლო დასი, ხელისუფალნი — ხმამ მეფის ყურამდეც მიაღწია — და მწვალებელი ამხილეს მიუხედავად მისი ყოველგვარი მანქანებისა.

ახლა თქვენთვის ნათელია, რომ ჭეშმარიტების დაცვის ძალას, თვით ეკლესიაში დამარხულს, ეკლესიის წევრთა ცოცხალი ერთაზრობა წარმოადგენს, — როცა ჭეშმარიტება ყველა მათგანის გულსა და გონებაში ცოცხლობს და ყოველთა ეუფლება, როცა, მოციქულის სიტყვით, ყოველთა აქვთ „იგივე ზრახვად ურთიერთას“... (რომ., 15, 5) — მასვე იტყვიან ყოველნი და არიან „განმტკიცებულნი მითვე გონებითა და მითვე მეცნიერებითა“ (1 კორ. 1, 10).

თქვენი გულის-ზრახვა ამ ჭეშმარიტებისათვის მინდოდა მიმეახლოვებინა. მაგრამ იმიტომ კი არ დავმშურალვარ, რომ ამ საფუძველზე ეკლესიის განჩინება გამემართლებინა, ახლა რომ მოისმინეთ, — არამედ იმისთვის, რომ თქვენს შეგნებამდე დამეყვანა ყველა ქრისტიანზე დადებული ჭეშმარიტების დაცვის ჰოვალეობა.

თუკი ჭეშმარიტების დაცვა ნაწილობრივ თვით ეკლესიას აქვს მინდობილი, ე. ი. მის ყველა წევრს, — და ამ დაცვის ძალა კი ერთაზრობაშია დამარხული, ცოცხალ ერთაზრობაში; მაშინ ნათელია, რომ თითოეული წევრი ამ ერთაზრობას უნდა შეუერთდეს თავისი ძალ-ღონისამებრ და შემდგომ მასში განმტკიცდეს — შეიტყოს და დაიცვას ეს საყოველთაოდ მიღებული ჭეშმარიტებანი.

ჭეშმარიტების დაცვა რომ შესძლო, იგი ჯერ უნდა მოიპოვო, — მოპოვება რომ შესძლო, ჯერ უნდა შეიტყო. ამგვარად, ყოველი მცნობელი ქრისტიანული ჭეშმარიტებისა მისი დამმარხველი, ებგური და მფარველი ხდება. რაც მეტმა იცის ეს ჭეშმარიტება, მით ძლიერია მისი დაცვის ძალა და თავადაც უფრო უშიშრად დგას იგი, — ადამიანთა შორის, და არა თავისთავად. და პირიქით, რაც უფრო მცირედმა უწყის ჭეშმარიტება, მით უფრო სუსტია ზღუდე სიცრუის წინააღმდეგ, — მით უფრო სახიფათოა ჭეშმარიტების მდგომარეობა ჩვენს შორის, რადგან თუკი ცრუ სწავლება გამოჩნდება, ჭეშმარიტების უცოდინარს გაეპარება, რადგან არც მისი შეცნობა ძალუძს და არც მხილება. ერთი უცოდინარიდან მეორესთან გადავა, მეორისაგან — მესამესთან და ა. შ. სიცრუე გაბატონდება და ჭეშმარიტებას გამოდევნის. მართალია კი ის, ვინც სიცრუე გაატარა?! — არაფრით. ეს იგივეა, რომ მეომარმა თა-

ვისი დაუდევრობის გამო ნიშანი ვერ იცნოს, და მტერი ბანაკში შეუშვას. ამ მიმართებით ქვეშარიტების ყოველი არმცოდნე მისი მოლალატე გამოდის, მოლალატე მორწმუნეთა დასისა, და წმიდა ეკლესიისა. — მკაცრადაა არა? მაგრამ ასეა.

თავისთავად ცხადია, რომ ეს ბრალი მთელი სიმძიმით აწევბა იმ ადამიანებს, ვისაც ქვეშარიტების გაგება ძალუძს და არ იქმან ამას — ეს მეტწილად განათლებულთა წრეს ეხება. რამდენადაა ამაში დამნაშავე ჩვენი ქვეყნის განათლებული საზოგადოება, თავადაც უწყით. — თავად უწყით, როგორი საფუძველი ეყრება ჩვენში ქრისტიანული სწავლებისაგან განსხვავებულ მოძღვრებებს. ეს მოძღვრებანი ჩვენში სწორედ მათ შემოაქვთ, თუმცაღა მათ გამონაგონს არ წარმოადგენს. — სხვათაგან იღებენ და გადმოგვცემენ. დაიწყებდნენ კი ისინი სხვისი სიცრუის გადმოღებას, თავისი ქვეშარიტება რომ იცოდნენ? — ამ სიცრუეს მთგან ისევ ქრისტიანული ქვეშარიტების უცოდინარნი იღებენ, — და იმიტომაც იღებენ, რომ სიმართლე არ იციან. რაღაც უცნაურად დაინერგა ჩვენში: თუ ერისკაცი ხარ, არანაირ საჭიროებას არ ხედავ, ქრისტიანული ქვეშარიტების შესწავლით დაიტვირთო თავი — ერცხვინებათ ამ შრომის თავს-ღება, — და კიდევაც რომ უწყოდნენ, ამ ცოდნის წარმოჩენასაც ერიდებიან, და მითუმეტეს, მის თანადგომას. — და ამგვარად ფართოდება ჩვენში სიცრუის სამფლობელო და მეუფება მისი მამისა (ე. ი. ეშმაკისა — მთარგ.).

ვინმე იტყვის: მე თავად მივედი ქრისტიანობისაგან განსხვავებულ დებულებამდე. საექვოა. — უფრო სარწმუნოა, რომ სხვა, ქრისტიანობის წინააღმდეგომი წიგნი ჩაგივარდა ხელში, წაიკითხე და გზა აგებნა. გზა კი იმიტომ აგებნა, რომ საქმის უცოდინარს მაცდუნებელი ალბათობები მოგეჩვენა საქმედ. — ხოლო ცრუ ჩვენების შემოწმება და მისი საწინააღმდეგო ქვეშარიტების მოსმენა აღარც მოგესურვა გულგრილობის გამო: ლანდი იგდე ხელთ და გგონია, ქვეშარიტებას ფლობ და დაკმაყოფილდი.

ზოგს დამოუკიდებელი მოსაზრებებისადმი ლტოლვა იზიდავს, ამ დამოუკიდებლობას კი ქრისტიანული მოძღვრებისაგან განდგომით, მისგან გაუცხოებითა და მისი წინააღმდეგობით ზომავენ, და ესეც ქრისტიანობის უცოდინარობის გა-

მოისობით ხდება, ჩვენ ხომ მხოლოდდამხოლოდ ქრისტიანობა გვაძლევს დამოუკიდებლად დგომის საყრდენს. — დამოუკიდებლად დგომა კარგი საქმეა, მაგრამ დგომისათვის სანდო წერტილი კი უნდა მოიპოვო. — ქრისტიანობა ღვთიურ ჭეშმარიტებაზეა დაფუძნებული — სად ნახავ უკეთეს საფუძველს? გონიერ ქმნილებებს ღმერთი მოძღვრავს. ხოლო ამ ქმნილებათა ვალია ამ მოძღვრების ყურადღება. — და ყოველი ყურადღებელი უეჭველად შეიტყობს ჭეშმარიტებას, რადგან თავად ღმერთია ჭეშმარიტება. — უფალი ოდითგანვე გვაუწყებდა წინასწარმეტყველთა პირით, ბოლო ეამს თავისი ძის პირით გვამცნო. ძემ ღვთისამ და უფალმა ჩვენმა ჭეშმარიტება წმიდა მოციქულებს გადასცა, მოციქულებმა — ეკლესიას. — ეკლესიაში კი რას მიიჩნევენ უეჭველ სიმართლედ? — საყოველთაოდ აღიარებულ ჭეშმარიტებას. — თავადაც ამ მოსაზრებაზე დადექი და დამოუკიდებლობას მოიპოვებ — დამოუკიდებლობას ყველაზე სარწმუნოსა და შეუცთომელს; თუმცაღა იგი იმ დამოუკიდებლობის უარყოფა იქნება, როგორც მას ჩვეულებრივი გაგებით ხმარობენ. ჩვეულებრივი დამოუკიდებლობა ცოდნის გამორჩეულობას გულისხმობს, ქრისტიანული კი რწმენის ერთობას წარმოადგენს. ქრისტიანისათვის უცხოა ყველაფრის თავისებურად გაგების სურვილი; ის მხოლოდ ერთს ეძიებს — შეიტყოს როგორ აზროვნებდნენ და სჯიდნენ ყველანი ყოველთვის. მისი აზრით, აქედან გამორჩევა ჭეშმარიტებისაგან განდგომას ნიშნავს და მაშასადამე არა სრულყოფის გზაზე დადგომას, არამედ წარწყმედისაკენ მიმავალზე. ქრისტიანს არ მიაჩნია, რომ საერთო მრწამსს დამორჩილებული დამოუკიდებლობას კარგავს. — ამ ერთობაში იგი მხოლოდ საწყისებს შეითვისებს, ჭეშმარიტ საწყისებს, ღვთისაგან გამომავალს. — და შემდგომ მათზე დაყრდნობით სჯის და წყვეტს ყველაფერს — და ცთომილებაშიც არ ვარდება, რადგანაც ეყრდნობა ჭეშმარიტ დებულებებს, ბეჭედ-დასმულს ღვთიური ავტორიტეტით.

ჭეშმარიტების ამ ძირითადი წესის დარღვევიდან მოდის ყველა მწვალებლობა და ყოველი სიცრუე. მწვალებლობა რაიმეს შესახებ თვითმყოფად განსჯას წარმოადგენს, რომელიც არ ითვალისწინებს, თუ უფალმა როგორ დაუდგინა ამის გან-

სჯა ეკლესიას. არიოზმა თავისებურად დაიწყო უფალზე მსჯელობა, და მწველებლობაში ჩავარდა. იგი უფალ იესო ქრისტეს მამა ღმერთისა და სული წმიდის თანაარსად არ რაცხდა. ლუთერიც თავისებურად შეუდგა ქრისტიანული სწავლების სისტემის აგებას და — რამდენი სიცრუე გამოიგონა? ასევე პაპმა, ასევე ყველა ახალმა გზასაცდენილმა. როცა რაიმე კითხვა იბადება, ქრისტიანი თავისთავში კი არ ეძიებს და თვითონ კი არ ცდილობს ჩაწვდომას, არამედ საერთო აღმსარებლობაში ეძიებს პასუხს. არც ისეა საქმე, თითქოს ის თავადაც არ სჯიდეს და არანაირი მოსაზრებანი არ ებადებოდეს. შესაძლოა მას სხვებზე მეტადაც უფუთფუთებენ ამგვარი აზრები. მაგრამ საქმე იმაშია, რომ ქრისტიანისათვის ამ აზრებს არანაირი ღირებულება არ გააჩნია, სანამ საერთო სწავლებით არ შეამოწმებს. თუ მისი მოსაზრება თანხმობაშია ამ სწავლებასთან, მაშინ იტოვებს, — თუ არადა — უარყოფს. და ამაშია მისი სიმშვიდე. — ქრისტიანი ამ ერთობაზე დგას, როგორც მყარ საფუძველზე, რამეთუ აქედან აღვალს იგი ღვთისაკენ, როგორც სათავისაკენ.

ვფიქრობ, საკმარისად ითქვა თქვენს აღსაძვრელად ქრისტიანული ჭეშმარიტების სრული შეცნობისათვის და მისკენ მიმავალი სწორი გზის ამოსარჩევად. ძმანო, ვაიძულოთ თავი, გავეცნოთ ამ ჭეშმარიტებას, და გაცნობის მერმე მისი შემწეონი გავხდეთ, ვისწავლოთ ეს ეკლესიისაგან და მივბაძოთ იმ თანამდგომთ, რომელსაც ის განადიდებს. რაგვარად დაშვრა ეკლესია ჭეშმარიტებისათვის ბრძოლაში?! რაგვარად მფარველობს მას უფალი?! და თითქოსდა არც ყოფილა ეს ყველაფერი! — ვილოცოთ, დაე მუდამ იდიდოს ერთიანმა ჭეშმარიტებამ, თავისთავს რომ გვთავაზობს მის დასაცავ იარაღად — ამინ!

ქრისტეანობაში ღრმის სულისკვეთებისა და მიხედვით
არაფერი არ უნდა შეიძვალოს, არამედ მკაცრად უნდა
დავიცვათ ყველაფერი, რაც დასაწყისიდანვე მოგვაცა
და არ უნდა ვეპიოთ შეღავათები.

ჩემს ყურამდე მოაღწია, თითქოს ჩემი სწავლებანი ძალზე
შკაჯრად მიგიჩნევიათ და ფიქრობთ, რომ დღევანდელ დღეს
ასე აზროვნება არ შეიძლება, ასე ცხოვრება არ შეიძლება, და
ალბათ — ასე სწავლებაც არ შეიძლება. ის დრო აღარაა! —
როგორ გავიხარე ამის გამგონემ! ეს იმას ნიშნავს, რომ თქვენ
ყურადღებით მისმენთ, და არა მარტო მისმენთ, არამედ მოს-
მენილის შესრულებაც მოგიხდომებიათ. — მეტი რაღა შეიძ-
ლება ვისურვოთ ჩვენ — რომელნიც იმას ვქადაგებთ, რო-
გორც გვამცნეს და რაც გვამცნეს.

მიუხედავად ყველაფრისა, თქვენ მოსაზრებას ვერაფრით
ვერ დავეთანხმები. მისი დაძრახვა და შესწორება ჩემს ვალად
მიმაჩნია. მიუხედავად თქვენი სურვილისა და დარწმუნებისა,
ეს აზრი ბოროტი სათავიდან მომდინარეობს; მომდინარეობს
იმ წყაროდან, თითქოს შეუძლებელია, რომ ქრისტეანობა თა-
ვის დოგმატებს, წესებს და მაკურთხეველ მოქმედებათ
ღრმის სულისკვეთებისა და მიხედვით ცვლიდეს და ამა სოფ-
ლის ძეთა მერყევი ხასიათის გათვალისწინებით ამ მოძღვრე-
ბას ზოგი რამ შეიძლება მიუმატოს და ზოგიც დააკლოს. ეს
ასე არაა — ქრისტეანობა მარადის ხელუხლებლად უნდა რჩე-
ბოდეს, ღრმის სულისაგან დამოუკიდებელი და განუგე-
ბელი. და პირიქით, თავად მმართველად და მბრძანებლად
დადგენილი მასზე, ყველა მის წინამძღოლობაზე დამორჩილე-
ბულთათვის. — თქვენს დასარწმუნებლად რამდენიმე აზრს
შემოგთავაზებთ. —

ამბობენ: მკაცრია ჩემი სწავლება. — ჩემი სწავლება ჩემი
არაა, და არც შეიძლება ჩემი იყოს. არავის არ უნდა, და არც
შეუძლია იქადაგოს ამ წმიდა ადგილიდან თავისი საკუთარი
სწავლება. — და თუ ან მე ან ვინმე მავანი ასრერიგად გაკად-
ნიერდება, აქედან მოგვაშორეთ. — ჩვენ ვქადაგებთ მოძღვრე-
ბას უფლისა, ღვთისა და მაცხოვრისა ჩვენისა იესო ქრისტეს-
სი, წმიდათა მისთა მოციქულთა და წმიდისა ეკლესიისა,

ღვთის სულით განბრძნობილისა. — და ყოველგვარ ღონეს
 ეხმარობთ, რომ ეს სწავლება თქვენს გონებასა და გულებში
 სრულად და ხელშეუხებლად დაიმარხოს, — სიფრთხილით
 ვარჩევთ ყოველ აზრსა და ყოველ სიტყვას, რომ ამ ნათელ,
 ღვთაებრივ მოძღვრებას რაიმე ჩრდილი არ მივაყენოთ. —
 სხვაგვარი მოქმედება არ შეიძლება. ეკლესიაში ქადაგებისათ-
 ვის ეს კანონი ქვეყნიერების დასაბამითგანვეა ღვთის პირით
 დადგენილი და მის აღსასრულამდე უნდა იქნას დაცული.
 წმიდა წინასწარმეტყველმა მოსემ ისრაელის ხალხს ღვთის
 მცნებები აუწყა და დაუდგინა: „არა შესძინო შენ სიტყუაჲ
 ერთი, რომელსა-ესე მე გამცნობ თქუენ და არცა დააკლოთ
 მაგას, არამედ დაიცვენე შენ მცნებანი უფლისა ღმრთისა შენი-
 სანი, რომელთა-ესე მე გამცნებ შენ დღეს-დღე“ (II სჯულ.
 4, 2). უცვალებლობის ეს კანონი იმგვარად ხელშეუხებელია,
 რომ თავად უფალმა და მაცხოვარმა ჩვენმა მთაზე ქადაგები-
 სას ბრძანა: „ნუ ჰგონებთ, ვითარმედ მოვედ დახსნად სჯული-
 სა, გინა წინააღსწარმეტყუელთა; არა მოვედ დახსნად, არამედ
 აღსრულებად — ამინ გეტყვი თქუენ: ვიდრემდე წარხდეს ცაჲ
 და ქუეყანაჲ, იოტა ერთი გინა რქაჲ ერთი არა წარხდეს სჯუ-
 ლისაგან და წინააღსწარმეტყუელთა, ვიდრემდის ყოველივე
 იქმნეს“ (მათე 5, 17, 18). შემდგომ ასეთივე ძალა მიანიჭა თა-
 ვის მოძღვრებასაც; სანამ ამ მცნებებს სახარებისეული სუ-
 ლით გამოათარგმანებდა, დაამატა: „უკუეთუ ვინმე დახსნეს
 ერთი მცნებათა ამათგანი უმციირესთაჲ და ასწავოს ესრეთ კაც-
 თა, უმციირეს ეწოდოს მას სასუფეველსა ცათასა“ (მათე 5,
 19). ეს ნიშნავს: ვინც ამ მცნებებს მრუდედ გამოათარგმანებს
 და მათ ძალას დაამცირებს, განწირულ იქნება მომავალ ცხოვ-
 რებაში. ასე ბრძანა უფალმა თავისი ქადაგების დასაწყისში.
 გამოცხადებაში იგივე დაუდასტურა წმიდა იოანე ღვთისმეტ-
 ყველსაც. ამა ქვეყნის და ეკლესიის უკანასკნელი ხვედრის ჩვე-
 ნების შემდეგ აუწყა: „ვეწამებ მე ყოვლისა მიმართ, რომელსა
 ესმოდიან სიტყუანი წინააღსწარმეტყუელებისა ამის წიგნისანი.
 უკუეთუ ვინ შესძინოს ამათ ზედა, შესძინენ ღმერთმან მის
 ზედა წყლულებანი იგი, რომელ წერილ არიან ამას წიგნსა-და
 უკუეთუ ვინ მოაკლოს სიტყუათა წიგნისა ამის წინააღსწარმეტ-
 ყუელებისათა, მოაკლენ ღმერთმან ნაწილი მისი ძელისა მისგან

ცხოვრებისა და ქალაქისა მისგან წმიდისა“ (გამცხ. 22, 18, 19). მოციქულებს ასეთი კანონი დაუდგინა უფალმა მთელი ამ დროისათვის, მისი პირველი გამოჩენიდან მეორედ მოსვლამდე: „წარვედით და მოიბოწაფენით ყოველნი წარმართნი... და ასწავებდით მათ დამარხვად ყოველი, რაოდენი გამცენ თქვენ“. — ე. ი. ის კი არ ასწავლოთ, რაც მოვაფიქრდებათ, არამედ რაც „მე გამცენ თქვენ“. — და ესრეთ აღსასრულადმდე სოფლისა. „და აჰა ესერა მე თქვენ თანა ვარ ყოველთა დღეთა და ვიდრე აღსასრულადმდე სოფლისა, ამინ“ (მათე 28, 19, 20). მოციქულებმა ეს კანონი მიიღეს და მისი აღსრულებითვის სიცოცხლე დასდვეს. სასჯელისა და სიკვდილის შიშით ცდილობდნენ, ეიძულებინათ ისინი, აღარ ექადაგათ ამგვარად, მაგრამ მოწაფეები მიუგებდნენ: „უკუეთუ სამართალ არს წინაშე ღმრთისა, თქუეხი სმენაჲ უფროჲს, ანუ ღმრთისა, საჯეთ, რამეთუ ჩუენ ვერ ხელ-გვეწიფების, რომელი-იგი გუესმა და ვიხილეთ, ვითარმცა არ ვიტყოდეთ“ (საქმე 4, 19, 20). მოციქულებმა თავის მოწაფეებს გადასცეს ეს კანონი, მათ მიიღეს და მას აქეთ იგი მუდმივად მოქმედებს ღვთის ეკლესიაში. ეს კანონია ის ძალა, რაც ჭეშმარიტების სვეტსა და სიმტკიცეს წარმოადგენს. — ხედავთ, როგორი ხელშეუხებელი ურყევობაა! ვინ გაბედავს ამის შემდეგ რაიმეს ხელყოფას ანდა ქრისტიანულ სწავლებასა და კანონებში რაიმეს შექცვას? უსმინეთ რა ეუწყა წინასწარმეტყველ იეზეკიელს. „შვიდ დღეს ილოცვიდა იგი“ განმცხრომელ „და იყო შემდგომად შვიდთა დღეთასა“, ესმა მას სიტყვა უფლისა: „ძეო კაცისაო, ებგურად მიგეც სახლსა ისრაელისასა, და ისმინო პირისა ჩემისაგან სიტყუა, და უთქმიდე მათ ჩემ მიერ“. — და აჰა შენ კანონი! — უკეთუ ნახავ უსჯულოსა უსჯულოებასა შინა და არ ეტყვი მას: დაუტევე უსჯულოება შენი და მოიქეც მაგ გზათაგან, „უსჯულოჲ იგი უსჯულოებითა მისითა მოკუდეს, და სისხლი მისი ხელისაგან შენისა გამოვიძიო“. — „ხოლო უკუეთუ შენ განამკაცრე უსჯულოჲ იგი და არა მოქცევით მოიქცეს უსჯულოებისაგან მისისა და გზისაგან მისისა, უსჯულოჲ იგი უსამართლოებასა შინა მისსა მოკუდეს, და შენ სული შენი განირინო“. ასევე, უკეთუ ხედავ „მი-რამ-იქცეს მართალი სი-

მართლეთაგან თვისთა“, არ შეეწევი მას და მის მოქცევაზე არ იზრუნებ, შეცოდებული მართალი „ცოდებათა შინა მისთა მოკუდეს მით,... და სისხლი მისი ხელისაგან შენისა გამოვიძიო — და უკუეთუ შენ განამკაცრო მართალი არაცოდვად და მან არა ცოდოს, მართალი ცხორებით ცხონდეს, და შენ სული შენი განირინო“ (იეზეკ. 4, 17—21). რა მკაცრი კანონია! არადა ეს კანონი ყველა მოძღვრის სინდისში ისმის მათი ხელდასხმის ჟამს, როცა კისრადიდებენ მძიმე უღელს — მწყემსონ მათთვის ჩაბარებული პატარა თუ დიდი ფარა ქრისტესი და არა მხოლოდ მწყემსონ, არამედ დამწყსონ კიდეც. როგორ გავებდაეთ ქრისტეს კანონში რაიმეს გამრუდებას, როცა ამის გამო ჩვენც დავიღუპებით და თქვენც! ამ მოძღვრების მაცხოვრებლობა ჩვენს მოსაზრებებსა და დათანხმებაზე რომ იყოს დამოკიდებული, მაშინ კიდეც აზრი ექნებოდა, რომ მავანს და მავანს უძღუტვების გამო ამ საუკუნის მიდრეკილებისდა მიხედვით ქრისტეანობის გარდაქმნა და მისი ბოროტი გულისთქმისათვის მისადაგება მოენდომებინა. ქრისტეანული განმგებლობის მაცხოვრებელი ძალა კი ჩვენზე არაა დამოკიდებული, იგი ღვთის ნებისაგან გამომდინარეობს. გამომდინარეობს იქიდან, რომ თავად ღმერთმა დაგვისახა სწორედ ეს გზა ცხოვრებისა და ამასთანავე იმგვარად, რომ სხვა გზა არც არსებობს და არც იარსებებს — თუკი ასეა, სხვაგვარად სწავლება სწორი გზიდან გადახვევას უნდა ნიშნავდეს და თქვენსა და ჩემს დაღუპვასაც. ამაში კი რა აზრია? ნახეთ, როგორი მკაცრი სასჯელი დადგინდა, როცა ისრაელის ერში ამგვარი რამ მოხდა, მათი ტყვეობის ჟამს ზოგ წინასწარმეტყველს ნათრევე-ნატანჯი ხალხი ებრალეოდა და ღვთის სიტყვას უცვალეებლად კი არ აუწყებდნენ, არამედ თავისი გულისკარნახის მიხედვით. აი, რა უბრძანა უფალმა იეზეკიელს: „და შენ, ძეო კაცისაო, განამტკიცე პირი შენი ასულთა ზედა ერისა შენისათა, რომელნი წინასწარმეტყველებენ გულით გამო მათით და წინასწარმეტყველებდ მათ ზედა... ვაი, რომელნი შეაკერვენ სასთაულებსა ყოველსა ქვეშე იდაყუსა ხელისასა და ჰყოფენ სადგმელებსა და ყოველსა ზედა თავსა ყოვლისა ჰასაკისასა გარდასაქცევლად სულთა“. — ეს ნიშნავს, ვაი მათ, ვინც ყოველგვარ შეღავათებს ეძიებს და შერ-

ბილებულ წესებს გვთავაზობს, რათა არც მაღლიდან და არც დაბლიდან არანაირმა უსიამოვნებამ არ შეგვაწუხოს. იმას კი აღარ ჩივიან, გვაცხოვნებს ეს თუ წარგვწყმედს, ღვთისათვის სათნო იქნება თუ საძაგელი. ვაი მათ, რამეთუ „ამათ იტყვის აღონამ უფალი: აჰა მე თავისსაცოებსა თქვენსა ზედა“ — ე. ი. მაცდურ და შემამსუბუქებელ სწავლებათა ზედა, — რომელთა ზედა თქვენ მიმოიქცევით მუნ სულთა დასარღვეველად, და განვხეთქნი... და განვავლინნე სულნი, რომელთა თქუენ გარდააქცევთ სულთა მათთა განბნეულებად“. თქვენ კი განმხრწნელთ, წარგვწყმედთ (იეზეკ. 13, 18—21). აი სარგებელი იმ შეღავათებისა და შემსუბუქებისა, მქადაგებელთა პირიდან რომ გასურთ გაიგონოთ! გულისხმა რომ ყოთ, იმას კი არ უნდა ნატრობდეთ, რომ თქვენს საამებლად რაიმე დათმობებზე წავიდეთ, არამედ პირიქით, დაჟინებით უნდა გვთხოვდეთ ქრისტეს სწავლებაზე რაც შეიძლება მკაცრად და შეურყევლად დადგომას.

მოგიყვებით ერთ შემთხვევას, რომლის თითქმის მოწმეც ვიყავი აღმოსავლეთში. ერთმა ქრისტიანმა სცოდა. მივიდა სულიერ მამასთან, შეინანა და ეუბნება: მოიქეცი კანონისამებრ, — მე შენ კრილობას გიჩვენებ, მიმკურნალე, არ დამზოგო, და როგორც საჭიროა, ისე ჰქმენ. — მოძღვარს გული მოუღბო მისმა გულახდილობამ და კრილობაზე იმდენი მალამო აღარ დაადო, რამდენიც ეკლესიაშია დაწესებული. — გარდაიცვალა ეს ქრისტიანი. გავიდა რამდენიმე ხანი. ეცხადება თავის მოძღვარს სიზმარში და ეუბნება: მე კრილობა გიჩვენე და წამალი გთხოვე. — შენ კი საკმაო მალამო არ მცხე, — და ახლამის გამო არ მამართლებენ. გამოეღვიძა მოძღვარს. კმუნვარებამ მოიცვა მისი სული. არ კი იცოდა, რა ექნა? მიცვალებული კი ისევ ეცხადება, მეორედ, მესამედ, და ყოველდღე, დღეგამოშვებით, კვირაგამოშვებით. — იგივე სიტყვებს უმეორებს: მე წამალი გთხოვე, შენ კი არ მომეცი. და ახლაცუდად ვარ. — შეაშთო მოძღვარი მწუხარებამ და შიშმა. — წავიდა ათონზე, იქაურთა რჩევით მძიმე ეპიტიმია დაიდო და რამდენიმე წელი მარხვაში, ლოცვასა და მოღვაწეობაში გაატარა, სანამ არ მიიღო უწყება, რომ მასაც ეპატია და იმ

ქრისტეანსაც, რომელსაც ცრუ შემწყნარებლობის გამო არ უმკურნალა.

აი სადამდე მივყავართ შემსუბუქებებსა და შეღავათებს! — და ვინ მოგვცა მათი გამოწერის უფლება? — ამას ჩვენგან ნუ მოელთ! გსმენიათ რომის პაპის ინდულგენციების შესახებ? აი ესაა — შემსუბუქება და შეღავათები, რომლებსაც პაპი ქრისტეს კანონის წინააღმდეგ იძლევა. მაგრამ რა? ამან შეურყვნა მთელს დასავლეთს რწმენა და ცხოვრება... და ახლა ურწმუნოებაში იღუპება ამსოფლიურ თავისუფლებაში ჩაფლული თავისი ინდულგენციებითურთ. პაპმა ბევრი დოგმატი შეცვალა, ყველა საიდუმლოება შერყვნა, ეკლესიის მმართველობის წესები და ზნეობრივი კანონები შეარბილა და ყველაფერი ღვთის ნებით კი არ წარიმართა, — არამედ უარესად და უარესად. შემდეგ გამოჩნდა ლუთერი — გონიერი, მაგრამ თავისნება კაცი. ამბობს — პაპს რაც მოუნდება, ყველაფერს ცვლის, მე რატომღა არ შევცვალო? და დაიწყო ყველაფრის თავის ჭკუაზე მოწყობა და გადაწყობა. და ამგვარად შექმნა ახალი ლუთერანული სარწმუნოება, სრულიად განსხვავებული უფლის მიერ დადგენილი და წმიდა მოციქულთა მიერ გადმოცემული სარწმუნოებისაგან. ლუთერის შემდეგ გამოჩნდნენ ფილოსოფოსები. ამბობენ: ლუთერმა ახალი რელიგია გამოიგონა. მართალია, თითქმის სახარებისეულია, მაგრამ თავის ჭკუაზეა გაწყობილი. — ჩვენ რატომღა არ შევადგინოთ სახარებისაგან განსხვავებული სწავლება ჩვენი საკუთარი გონებით? და ყველამ თავისებურად დაიწყო ფილოსოფოსობა და მკითხაობა — ღმერთზე, სამყაროზე, ადამიანზე, და იმდენი მოძღვრებები ჩამოაყალიბეს, რომ მარტო იმათი ჩამოთვლით გონება აგერევა — და ახლა ასე დადგინდა: როგორც ფიქრობ, ისე ირწმუნე; როგორც გსურს, ისე იცხოვრე; დატკბი, რითაც მოგეგუნება. — არ ცნობენ არანაირ კანონებსა და შეზღუდვებს, ღვთის სიტყვას არ ემორჩილებიან. — სიფართოვეა: ყველა ზღვარი წაშლილია. მაგრამ, როგორც უფალმა ბრძანა, „ფართო არს გზად, რომელსა მიჰყავს წარსაწყემდელად“. — აი, სადამდე მიგვიყვანა სწავლების შემსუბუქებამ!

ღმერთო, დაგვიფარე ამგვარი სიფართოვისაგანი სჯობს

ყოველგვარ სივიწროვეს ვიყუარებდეთ, ჩვენივე ხსნისათვის რომ გვირჩია უფალმა. — ვიყუარებდეთ ქრისტიანულ დოგმატებს, მათით შევავიწროთ ჩვენი გონება და სხვაგვარ აზროვნებას გადავაჩვიოთ. ვიყუარებდეთ ქრისტიანულ ცხოვრების წესს და ამით შევავიწროთ ჩვენი ნება, ვაიძულოთ სიმდაბლით და მოთმინებით ატაროს ეს ტკბილი უღელი. — ვიყუარებდეთ ყველა დამმოდღვრავ, გამომასწორებელ და გამწმენდელ განწესებებსა და მსახურებებს, ამით შევავიწროთ ჩვენი გული და ვაიძულოთ ჩვენი გულისთქმა მიწიერობისა და ხრწნადობიდან ზეციურობამდე და უხრწნელობამდე აიყვანოს. შევიკეტოთ, თითქოსდა გალიაში, ანდა იწრო ბჰესთან მივათრიოთ ჩვენი თავი. დაე, იყოს იწრო, რომ არც მარჯვნივ, არც მარცხნივ გადახრა არ შეიძლებოდეს; — სამაგიეროდ ეს ვიწრო გზა სასუფეველამდე მიგვიყვანს — ღმრთის სასუფეველამდე. უფალმა ეს ვიწრო გზა დაგვიდგინა და გვიბრძანა: ამ გზით იარეთ და სასუფეველში შეხვალთ. — როგორღა შეიძლება დავეკვდეთ, რომ ამ გზით მიმავალი ბოლომდე მიაღწევს? და ვინ ჭკუათმყოფელი ისურვებს რამენაირ გადახვევას, როცა ამით იმწამსვე გზას აცდები და დაიღუპები?

მყარად დადექით ამ აზრზე და ნუ სწუხხართ, თუკი ჩვენს სწავლებაში რაიმე მკაცრად მოგეჩვენებათ, და მხოლოდ იმაში დასარწმუნებლადღა იზრუნეთ, ღვთისაგანაა ეს თუ არა. როცა დარწმუნდებით, რომ ღვთისაგანაა, მთელი გულით მიიღეთ, როგორი მკაცრი და შემავიწროვებელიც არ უნდა იყოს. სწავლებასა და ცხოვრების წესში შეღავათებსა და შერბილებებს ნუ ეძიებთ, არამედ განერიდეთ, როგორც გვენიის ცეცხლს. ეს სატანჯველი არ ასცდება მათ, ვინც ამ შეღავათებს იგონებს, ამით ხიბლავს სულიერად არამტკიცე ადამიანებს და თავისთან ერთად ღუპავს. ამინ!

თარგმნა რ უ ს ი კ ო კ ო ბ ა ხ ი ძ ე მ

სიამოვნებით გიპასუხებ, ანუ უფრო უკეთ, შევეცდები შენთან ერთად განვსაჯო ყოველივე, რაზეც შენს ერთობ მნიშვნელოვან წერილში მწერდი. ადრეც მსმენია რაღაც იმ ამბებზე, შენ რომ მატყობინებ, მაგრამ ვფიქრობდი, ისეთი არაფერია, ყურადღების მიქცევად რომ ღირდეს-მეთქი. ახლა კი ვხედავ, რომ მანდ, თქვენთან, რაღაც ეკლესიის ხანძრის მსგავსი დაწყებულა, და ვჩქარობ მოგწერო, რასაც ღმერთი მომძალღებს. 1) მწერ: „ჩვენთან გამოჩნდა ვიღაც, მქადაგებელი სარწმუნოებისა, თავად-აზნაურთა წრიდან უნდა იყოს; ვგონებ, საკმაოდ მაღალი მოხელეც გახლავთ, ეს კაცი დადის სახლებში, მხოლოდ მდიდრულ კი არა, ღარიბულ ქოხებშიც. კითხულობს და განმარტავს სახარებას, ქადაგებს ქრისტეს სარწმუნოებას და სინანულს. ჩემს ახლოს ღარიბი მკინძავი ცხოვრობს, რომელთანაც ეს მქადაგებელი დადის. იქ თავს იყრის ხალხი, მეც ვიყავი ორ-სამჯერ. ამბობენ, სხვაგანაც იმართება ამგვარი თავშეყრები და დიდძალი ხალხი იკრიბებაო“. ამ სიტყვებზე შევჩერდეთ. გამოჩნდა სარწმუნოების მქადაგებელი, მქადაგებელი — არა ეკლესიის სახელით, ეს აშკარაა. უკვე ამის გამო უნდა გაგჩენოდათ ეკვი: როგორ ჰმოძღვრის ის, ვინც მოძღვრად არავის დაუდგენია? ეს ჩვენში უჩვეულო სიახლეა. ამ ეკვიდან მაშინვე უნდა გადასულიყავით ასეთ მსჯელობაზე: „აქ რაღაცაშია საქმე, ეს კაცი ღმერთის სახლიდან კი არ მოდის ჩვენთან, არამედ გარედან, ამიტომ ფრთხილად ვიყოთ“. თქვენ კი როგორ მოიქცით? აზრადაც არავის მოგსვლიათ გაფრთხილებულიყავით, უსმენდით, და კვლავაც უსმენთ, ისე რომ თავს არ იტკიებთ იმაზე ფიქრით, სიმართლეა თუ არა ის, რასაც ისმენთ, და კარგი იქნება თუ არა, მას თუ დაუჭერებთ? აი თქვენი პირველი შეცდომა!

ამბობთ, ქრისტეს სარწმუნოებას გვასწავლის და ყველაფერს სახარებიდან იღებსო, მაგრამ სწორედ ამას უნდა დაეეკვებინეთ. თქვენ ვინდა ხართ, თათრები თუ უსჯულოები? თქვენ ხომ გწამთ უფალი იესო ქრისტე, ცდილობთ ცხონდეთ წმიდა მართლმადიდებელ ეკლესიაში, და ცხონების საქმეს

წარმართავთ იმ ჩვენი წმ. მამების მიბაძვით, რომლებიც ღმერთმა აღიდა! თავიდანვე უნდა მიხვედრილიყავით, რომ რაკი მან სარწმუნოების განმარტება დაიწყო, და თანაც გვიხსნიდა ჩვენ, მორწმუნეებს, მაშასადამე ეს მისი სარწმუნოება არის განსხვავებული ჩვენი სარწმუნოებისაგან. როცა მან გითხრათ: იწამეთ იესო ქრისტეო, თქვენ უნდა გეკითხათ: რატომ გვეუბნები ამას? განა ჩვენ მოუნათლაეები ვართ? — თქვენ კი აზრდაც არ მოგსვლიათ ამის თქმა. იწამეთ იესო ქრისტე, რომ გვეუბნებოდით, ამით ურწმუნოებაში გამხილათ, თქვენ კიდევ ისე უსმენდით, თითქოს მართლა ურწმუნოები ყოფილიყავით. და თუ ის სხვა სარწმუნოებას ქადაგებს, თქვენ კი მორჩილად უსმენთ, მაშინ თქვენ მასთან ერთად გმობთ ძველ სარწმუნოებას, გმობთ წმიდა ეკლესიას და ყველას, ვინც ოდესმე იცხონა სული თვისი ამ ეკლესიაში, და ვინც ახლა ცდილობს იცხონოს. ესაა თქვენი მეორე დანაშაული, პირველზე უფრო დიდი! რატომ ხდება ეს ყოველივე თქვენთან? განა ეს შესაძლებელი იქნებოდა მათთან, ვისაც კეშმარიტად სწამს უფალი და მადლით მითითებული გზით მიდის? ძენი ეკლესიისანი მშვიდად და წყნარად მისდევენ სულის ცხონების საქმეს. ამ დროს მოდის ვინმე კაცი, აქამდე მათთვის უცნობი, და იწყებს ღაღადისს: იცით რას გეტყვით? ქრისტე მოკვდა ჩვენთვის. გწამდეთ, შეინანეთ, და ცხონდებით. — და ეს ადამიანები, თითქოს რაღაც უჩვეულო გაიგონესო, მისდევენ ამ კაცს, მზად არიან მიატოვონ თავისი ეკლესიაც, მოძღვრებიც, და ყველაფერი, რაც აქამდე ძვირფასად მიაჩნდათ, რითაც საზრდოობდა და რითაც განიწმინდებოდა მათი სული! საოცარია! განა აქამდე უფლისა მიერ არ იქმოდით სულის ცხონების საქმეს? განა მისი სახელით არ მოინათლეთ? განა მისი ძალით არ იღებდით ცოდვათა მიტევებას სონანულის საიდუმლოს მეშვეობით? განა თვით მას არ იღებდით საკუთარ თავში, როდესაც მის წმიდათაწმიდა ხორცსა და წმიდათაწმიდა სისხლს ეზიარებოდით? განა მას არ მიმართავდით თქვენს ლოცვებში, განა მხოლოდ მასზე არ ამყარებდით ცხონების იმედს? მაშ რაღაა ახალი და განსაკუთრებული იმაში, რასაც ეს უცხო კაცი გეუბნებათ? იგი ამბობს: ქრისტე მოკვდა თქვენთვის, გწამდეთ ეს, და ცხონ-

ქადაგებით ზოგიერთ ჩვენს ბატონსა და ქალბატონს, იმათ, დებით. განა ამას არ აღიარებთ ყოველდღიურად, როდესაც მრწამსს კითხულობთ: „მრწამს... უფალი იესო ქრისტე... რომელი ჩვენთვის, კაცთათვის, და ჩვენისა ცხოვნებისათვის გარდამოხდა ზეციით და ხორციანი შეისხნა სულისაგან წმიდისა და მარიამისაგან ქალწულისა, და განკაცნა. და ჯვარს ეცვა ჩვენთვის“... და სხვა. განა ამასვე არ აღიარებთ, როდესაც ეკლესიაში გალობთ: „მხოლოდწმობილო ძეო... რომელი ჯვარს ეცვ... გვაცხოვნე ჩვენ?“ ანდა: „მოვედით თაყვანის-ვსცეთ და შეუვრდეთ ქრისტესა... გვაცხოვნენ ჩვენ, ძეო ღმრთისაო?“ ანდა: „ნათელო მხიარულო წმიდისა დიდებისა უკვდავისა მამისა ზეცათასა, ძეო ღმრთისაო ცხოვრების მომცემელო?“ ანდა: „აწ განუტევე... რამეთუ იხილეს თვალთა ჩემთა მაცხოვარება შენი“. ხოლო ლიტურგია სხვა არა არის რა, თუ არა ჩვენი საცხოვნებელი სისხლიანი მსხვერპლის საიდუმლო გამეორება უსისხლო მსხვერპლის სახით. მაშ რაღა გესმით ახალი ამ მოსული კაცისაგან, რომ მზადა ხართ დაუტევოთ ყოველივე ძველი და მას შეუდგეთ, თან ისე, რომ დანამდვილებით არც იცით, საით მიყავხართ ამ კაცს; სამაგიეროდ კარგად იცით, რომ გზა, რომლითაც აქამდე ვიდოდით, ქვეშაირი გზაა? მართლაც რომ გაუგებარია. იცით, ვის ჰგავხართ? ვთქვათ, გუნდი გალობს, და თქვენც იმ გუნდს ეკუთვნით. გალობა აწყობილია, ყველა ხმა ერთად ისმის. ამ დროს მოდის ვიღაც, შუაში ჩაგიდგებათ და თავისი ხმით ყველასაგან გამოიყოფა. თქვენ კიდევ გუნდსაც თავს ანებებთ. ვალობასაც წყვეტთ და მთელი გულისყური ამ უცნაური ხმისკენ გაგირბით, თან გიკვირთ, როგორ გამოსცემს ასეთ ბევრებსო. აზრადაც არ მოგდით განსაჯოთ, კარგად იქცევით თუ არა, ან ის, ან თქვენ, მხოლოდ იმიტომ უსმენთ, რომ ის ახალია, გამოირჩევა, უწინდელ გალობას კი მიეჩვიეთ და მოგებზრდათ. გალობის ხელოვნების მცოდნენი კი ამტკიცებენ, როდესაც ერთი ხმა გამოირჩევა გუნდში, ეს ნიშნავს, რომ ამ კაცს არაფერი გაეგება გალობისა, ხოლო ასეთი მომღერლით მოხიბლულნი თავიანთ უგემოვნებას ადასტურებენო. აი, ვის ჰგავხართ თქვენ თქვენი ცხოვნების საქმეში. მშვიდად და წყნარად მიდიოდით ცხოვნების გზაზე, სხვა ძმებისა და დების გუნდთან

ერთად. მაგრამ გამოჩნდა ვიღაც მჩხავანა და დაიწყო რაღაც ერთი ფრაზის გამეორება, რომელიც მაცხოვრებელ ჭეშმარიტებათა ერთიანობიდან ამოგლიჯა. და თქვენც მისკენ მიიქეცით, სხვა ყოველივე დაუტევეთ და მზადა ხართ ყველას გამოეყოთ. იმაზე კი არც დაფიქრებულხართ, სწორად იქცევა თუ არა ის, თავისი ფრაზით რომ გამოიყოფა, და სწორად იქცევით თუ არა თქვენ, მის მხარეს რომ დგებით. ცხონების საქმეში ღრმად ჩახედულნი სამართლიანად გისაყვედურებენ სულიერ უგემოვნებას თქვენც და მით უმეტეს, იმ მჩხავანასაც.

ამგვარად, ეგ კაცი პირველი სიტყვების გაგონებისთანავე უნდა მოგეშორებინათ თავიდან, ან თვითონ შეგექციათ ზურგი, თქვენ კიდევ დაუმეგობრდით და უფრო და უფრო უმეგობრდებით.

2) მწერ: „იგი განუწყვეტლივ ლაპარაკობს იესო ქრისტეზე და ცხონებაზე, თან შთაგონებით ლაპარაკობს. სასიამოვნო მოსაუბრეა, გული სულ მისკენ მიმიწევს“. დაფიქრებულხართ კი შენ და სხვა შენნაირი მსმენელები, ჩვენია ეს კაცი თუ უცხო? ალბათ გადაწყვიტეთ, რაკი რუსია და რუსულად უბნობს, იესო ქრისტეზე ლაპარაკობს და თანაც ასეთი შთაგონებით, მაშ, რაღა თქმა უნდა, ჩვენი ყოფილავ, და მიაშურეთ კიდევ მას, მაგრამ მწარედ მოტყუვდით. დიახ, რუსია, მაგრამ რუსეთის სარწმუნოება აღარ უპყრია; მართლმადიდებელი იყო, მაგრამ უცხო რჯული მიიღო. იგი ქადაგებს ცხონებაზე, მაგრამ ისე არა, როგორც ამაზე თვით უფალი და მისი მოციქულები ქადაგებდნენ. აღფრთოვანებით ლაპარაკობს, მაგრამ ეს იმას როდი ნიშნავს, რომ ჭეშმარიტია მისი ნათქვამი, არამედ მხოლოდ იმას ამტკიცებს, რომ გატაცებულია თავისი მოძღვრებით და ცდილობს ჭეშმარიტად დასახოს იგი, თუმცა სინამდვილეში ეს მოძღვრება სიცრუითა და სიყაღბითაა სავსე.

ნუთუ ეს ყოველივე თქვენთვის ახალი ამბავია? არ იცით განა, ვისი მოწაფეა ეგ მჩხავანა? მოძღვრის მიხედვით იცანით მოწაფეც. ეს სიცრუე, ეს გადამღები სენი ზომ თქვენს თვალწინ ჩაისახა. ჩამოვიდა ვიღაც ინგლისელი, დაიწყო კარდაკარ სიარული, თავისთანაც იწვევდა ხალხს, და თავისი

ვინც მყარად ვერ იდგა ჭეშმარიტების გზაზე, თავგზა აუბნია. ერთი ამ გზააბნეულთაგანია თქვენი მჩხავანაც, რომელიც განდევნილი ინგლისელის ნაცვლად დადის კარდაკარ და აბდაუბდას გაიძახის, რომ სხვებიც თავის მსგავსად ააცდინოს მართალ გზას. ასე რომ, რაც ის ინგლისელია სარწმუნოებით, ისაა ეგ თქვენი მჩხავანაც. ინგლისელი კი ვილაა? იგია ღმრთაებრივი ჭეშმარიტებისაგან განდგომილი, სიცრუისა და ბნელეთის ორმოში ჩავარდნილი, თანაც მეოთხე ხარისხში ჩავარდნილი. აი ვინ არის იგი! საქმის არსს არ განვიხილავ, მოკლედ წარმოგიდგენ ამ ჩავარდნის გარეგნულ მხარეს. ქვეყნად იყო ერთი ეკლესია, ერთი, ჭეშმარიტი სარწმუნოებით. მაგრამ მას განსაცდელი დაატყდა თავს — პაპი თავისი მომხრეებით ამოადბრძნობით გაერთო და განუდგა ჭეშმარიტ ეკლესიას, ჭეშმარიტ სარწმუნოებას. ესაა პირველი ხარისხი სიცრუისა და ბნელეთის ორმოში ჩავარდნისა. პაპისტებს შორის მერე გამოჩნდნენ პროტესტანტები, ისინიც, პაპის არ იყოს, ამოადბრძნობით გაერთნენ და პაპისტურ ეკლესიასა და სარწმუნოებასაც განუდგნენ. ესაა მეორე ხარისხი ბნელეთისა და სიცრუის ორმოში ჩავარდნისა. პროტესტანტებს გამოეყო ინგლისური მწვალებლობა. ესაა მესამე ხარისხი სიცრუისა და ბნელეთის ორმოში ჩავარდნისა. და ინგლისური მწვალებლობისაგან (ამოადბრძნობისაგან) იშვა ის სწავლება, რომელსაც აჰყვა ზემოხსენებული ინგლისელი, ამ ინგლისელმა მოხიბლა თქვენი მჩხავანაც და სხვა მისთანანი. ესაა მეოთხე ხარისხი სიცრუისა და ბნელეთის ორმოში ჩავარდნისა. ამ ხარისხში გახლავთ თქვენი მჩხავანა, რომელიც თქვენს სახლებსა და ქალაქის საზვინეებში დაეხეტება თავისი ქადაგებებით. იგია ერთგული მოწაფე იმ ინგლისელისა, თუ არაფერი დაუმატა თავის მხრივ მისგან მიღებულ სიცრუეს, რათა ასე და ამგვარად სიცრუისა და ბნელეთის ორმოში ჩავარდნის მეხუთე ხარისხში არ დაემკვიდროს. აი ვინაა ეგ თქვენი მჩხავანა! არც პაპისტებს, არც პროტესტანტებს, არც ანგლიკანებს, არც იმათ, ვისაც თქვენი მაცდუნებელი წარმოადგენს, არ გააჩნიათ ღმრთაებრივი ჭეშმარიტება — ნამდვილი, სუფთა, სრული. იგი სუფევს მხოლოდ ერთიან, ჭეშმარიტ, მართლმადიდებელ ეკლესიაში. მართალია, თვით ის მოხიბლულნი ფიქ-

რობენ, თითქოს ჭეშმარიტება უპყრიათ, მაგრამ სინამდვილეში ჭეშმარიტება შორსაა მათგან. პაპისტები პირველნი განუდგნენ ჭეშმარიტებას, მაგრამ ჰგონიათ, თითქოს სწორედ ისინი იმარხავენ მას. პროტესტანტებმა ამხილეს პაპისტების მრავალი შეცდომა, მაგრამ თავად ვერ მიაგნეს ჭეშმარიტებას და კიდევ უფრო დაშორდნენ მას. ახალი სარწმუნოება თავიანთ ამოღობრძობაზე ააგეს და არა ღეთაებრივ ჭეშმარიტებაზე, ისე კი, პაპისტების არ იყოს, ფიქრობენ, რომ უპყრიათ ჭეშმარიტება, რომელიც იგივე პაპისტებმა დაკარგეს. ინგლისელებს გერმანული სარწმუნოება არ მოეწონათ და თავისი გამოიგონეს, ისიც საკუთარი ამოღობრძობით და არა ღობრთაებრივ ჭეშმარიტებაზე დაყრდნობით. მათ თქვეს: გერმანელებთან ესა და ეს არა ვარგა, ჩვენ ჩვენს სარწმუნოებას შევქმნით, რომელიც უფრო გამოგვადგებაო — და შექმნეს კიდევ, ამით ღეთაებრივ ჭეშმარიტებას უფრო მეტად დაშორდნენ, თანაც ჰგონიათ, რასაკვირველია, რომ სწორედ ისინი იცავენ მას ყველაზე მეტად. ინგლისელებთან მერე, გერმანელების არ იყოს, უამრავი სარწმუნოება გაჩნდა, რომლებსაც ასევე ჰგონიათ, რომ ჭეშმარიტება ჰპოვეს, ამ ღროს კი უფრო და უფრო შორდებიან მას. რაკილა ისინი ჭეშმარიტებას ეძიებენ არა იქ, სადაც მას უფალმა მიუჩინა ადგილი, არამედ საკუთარი ამოღობრძობის ფარგლებში, ამიტომ ჭეშმარიტებას კი არა, მის აჩრდილს წააწყდნენ, და მასზე ააგეს თავიანთი სარწმუნოება. ასეთია ის სარწმუნოება, რომელიც იმ ინგლისელმა შემოიიტანა თქვენში და რომელმაც ასე მოხიბლა თქვენი მხნავანა. და იმ ღროს, როცა დასავლეთში მრავლდებოდა ეს ერთმანეთზე უფრო მტყუვარი სარწმუნოებები, აღმოსავლეთში უცვალებლად ეგო თავის სარწმუნოებაში მართლმადიდებელი ეკლესია, ერთი ჭეშმარიტი ღობრთაებრივი ჭეშმარიტების დამმარხველი, იმ ჭეშმარიტებისა, რომელიც გვამცნო უფალმა იესო ქრისტემ და რომელიც ეკლესიაში დააფუძნეს წმიდა მოციქულებმა. ჩვენ, მართლმადიდებელი ეკლესიის შვილებს, გვიპყრია ეს ჭეშმარიტება და მტყიცეთ ვდგავართ მას შინა. საუკუნეთა მანძილზე მოდიოდა ეს შეუვალი ჭეშმარიტება მართლმადიდებელ ეკლესიაში და ჩვენამდე მოაღწია. ჭეშმარიტებასა შინა დგას წმ. ეკლესია, და ჩვენც მასთან ერთად. მადლობა უფალს,

რომელმაც ინება ჩვენი დაბადება ერთი, ჭეშმარიტი, მართლ-
მადიდებელი ეკლესიის წიაღში!

ამგვარად, თქვენ მარადიული ჭეშმარიტება ვიპყრიათ, ამ
მჩხავანამ კი გუშინდა ისწავლა მომხიბლავი ტყუილი გუშინვე
მოხიბლული ინგლისელებისაგან. ჰოდა, როგორც კი დაიწყო
თქვენთან ზეტიალი და თავისი ტყუილის ძახილი, მყისვე გა-
ნუსჯელად მიჰყევით და მის მხარეზე დადებით, მზად ხართ
სულაც მოსწყდეთ წმ. ეკლესიას და მასში დამარხულ ღვთა-
ებრივ ჭეშმარიტებას. რასაც ჩვენ აღვიარებთ და როგორაც
მიგვყავს ჩვენი სულის ცხონების საქმე, იგივეს აღიარებდნენ
ჩვენი მამები, პაპები, პაპის პაპები და იმათი პაპები (და ყველა
რუსი იქიდან მოყოლებული, რაც ისინი ჭეშმარიტ სარწმუნოებაში
მოაქცია თავადმა ვლადიმერმა. მას მერე თითქმის
ათასი წელიწადია უკვე გასული.) და რამდენი წმიდანი გამო-
ზარდა ჩვენმა ეკლესიამ, მეოხნი და მლოცველნი ჩვენთვის
წინაშე ღმრთისა! ამას მოწმობს მათი წმ. ნაწილები, ჩვენს
მიწაზე უხვად რომაა გაბნეული. და უცებ ვილაც მჩხავანა, გუ-
შინ მოხიბლული ტყუილით, ცდილობს მოგწყვიტოთ ამ წმიდა
დასს! მაგრამ უფრო შორს წადით — იგივე სარწმუნოებას და
იგივე სულის საცხონებელ მოღვაწეობას წააწყდებით ბერძ-
ნებთან, ვისგანაც ჩვენ მივიღეთ წმ. სარწმუნოება. კიდევ უფ-
რო იქით ვაიხედეთ — მიხვალთ საეკლესიო კრებებამდე, რომ-
ლებიც იცავდნენ და ამტკიცებდნენ მსოფლიო ჭეშმარიტებას.
მოიხილეთ ეს კრებები ვიდრე კონსტანტინე დიდამდე — ყველ-
გან ნახავთ ერთსა და იმავე ჭეშმარიტებას, რომელსაც იმარ-
ხავს მორწმუნეთა მთელი დასი, და რომელიც სუფევს მთელ
ქვეყანაზე. უფრო შორს წავიდეთ — მოციქულთა დროც ვნა-
ხთ — იქაც იგივე აღმსარებლობა და ცხონებისათვის მოღ-
ვაწეობაა, რაც დღეს ჩვენთანაა შემონახული. ის, რასაც მო-
ციქულები გვასწავლიდნენ და რაც მათ დაგვიწერეს, უფლისა-
განაა მიღებული, უფალი კი იმას ამბობდა და აკეთებდა, რაც
შიილო თავისი მამისგან ყოვლადწმიდა სამების საიდუმლო-
თი. აი, საიდან მოდის ჩვენი სარწმუნოება! აი, როგორ მოე-
დინებოდა იგი საუკუნეთა მანძილზე ღმრთაებრივი სათავე-
დან და როგორ მოვიდა ჩვენამდე! თქვენ კი ეს ღმრთაებრივი,
ძირძველი სარწმუნოება მზად ხართ დაავლოთ და გაცვალოთ

ტყუილზე, რომელსაც ეგ თქვენი გუშინ მოხიბლული მჩხავანა გაიძახის! კი მაგრამ, რატომ?

3) მესმის, რომ შენ და შენი ამხანაგები დაახლოებით ასეთი პასუხის გაცემას მიპირებთ: „განა რა ტყუილს ამბობს ეს კაცი? ჭეშმარიტებას გვამცნობს, უფლისმიერ ცხოვნებას გვიქადაგებს, სახარებას გვიკითხავს“.

მოიცა, მოიცა! პასუხს ნუ ჩქარობ, ჯერ ის მითხარი, შეიძლება თუ არა, რომ იესო ქრისტეზე მრუდედ და უსწოროდ გვიქადაგონ, მისმიერ ცხოვნებაზე კი ისე დაგვმოდღვრონ, რომ თუ დაუჯერებ, ცხოვნების ნაცვლად წარწყმედას მოიპოვებ? თუმცა, აქ გასარკვევიც არაფერია, ეს ასე ხდებოდა და დღესაც ხდება. რამდენი მოძღვრება იყო, ჭეშმარიტებას რომ ამახინჯებდა, არიოზამდე და მის მერე? ყველა ისინი ეკლესიამ ამხილა და შეაჩვენა. რამდენი ასეთი მოძღვრებაა დასავლეთში? უთვალავი. და თუმცა მათში მხოლოდ და მხოლოდ იესო ქრისტეზეა ლაპარაკი, მართლმადიდებელი ეკლესია მაინც ყველა მათგანს ერთნაირად უარყოფს. მაშ თურმე არ შეიძლება ასე მსჯელობა, რაკი ესა და ეს კაცი იესო ქრისტეზე ქადაგებს, ესე იგი ჭეშმარიტებას დალადებს. ჯერ უნდა გაარკვიო, მართლად ქადაგებს თუ არა იგი. თქვენთან კი, ჩანს, თავი არავის შეუწუხებია ამის განსჯით — როგორც კი ესმათ უტკბესი სახელი იესო ქრისტესი, მაშინვე დაუფიქრებლად, განსჯის გარეშე მის მხარეზე დადგნენ, და აზრადაც არ მოსვლიათ, რომ ეს სათაყვანო სახელი მოხიბლულის ბაგეთაგან გულუბრყვილო მორწმუნეთა სულების მოსანადირებელ მახედ იქცა. არ წაგიკითხავთ სახარებაში თვით იესო ქრისტეს გაფრთხილება: „ეკრძალენით ცრუწინასწარმეტყველთაგან, რომელნი მოვიდოდნენ თქუენდა სამოსლითა ცხოვართაჲთა, ხოლო შინაგან იყვენენ მგელ მტაცებელ“ (მათე, 7, 15)? იქნებ გგონიათ, რომ უფალი აქ იმათ გულისხმობს, ვისაც არც კი სმენია მისი სახელი? არა, სწორედ იმათზე ლაპარაკობს, ვინც მისი სახელით ინიღბება და მტყუფარი გზისკენ იზიდავს ადამიანებს, რადგან იქვე ამბობს: „მრავალთა მრქჳან მე მას დღესა შინა (ანუ სამსჯავროს დღესა): უფალო, უფალო, არა სახელითა შენითა ვწინასწარმეტყუელებდითა?“ (მათე, 7, 22) ხედავთ? უფლის სახელით ქადაგებდნენ, უფალი კი გვამცნებს, ეკრძა-

ლენითო. სამსჯავროზეო, განაგრძობს, ასე გეტყვითო: „არა გიცნი თქვენ“ (მათე, 7, 23). როგორ შეიძლება, რომ ისინი არ სცნობოდა მას, ვინაც ყოველი იცის? ამით უფალი ამბობს, რომ არასოდეს სცნობდა მათ ისეთებად, როგორებდაც თავი მოჰქონდათ — ჭეშმარიტების მქადაგებლებად. ისინი ქრისტეზე ჭადაგებდნენ, მაგრამ ისე, რომ უფალი მათ სიტყვებში ვერ სცნობდა თავის თავს, ისინი ვილაც სხვა ქრისტეს ჭადაგებდნენ და არა მას, ჭეშმარიტს, ვინაც ჩვენ ცხოვრება მოგვანიჭა. ხომ ხედავთ, შესაძლებელი ყოფილა, რომ ქრისტე იქადაგო და მაინც უფალი იესო ქრისტე კი არა, სულ სხვა იგულისხმო. თქვენ კი, ყველანი მიაწყდით მაგ ვილაც მჩხავანას, მხოლოდ იმიტომ, რომ მან იესო ქრისტეს სახელით შენიღბა თავისი ტყუილი. თქვენ გგონიათ, მას არ შეიძლება ეხებოდეს სიტყვები: „მრავალნი მოვიდოდნენ სახელითა ჩემითა... და მრავალთა აცთუნებდნენ“ (მათე, 24, 5)? სწორედ რომ სამართლიანად ჟღერს თქვენდამი პავლე მოციქულის სიტყვები, კორინთელთა მიმართ თქმული: „მე თქვენ მიგათხოვეთ უფალ იესო ქრისტეს, როგორც წმიდა ჭალწულნი. მაგრამ მეშინია, როგორც გველმა აცთუნა ევა თავისი მზაკვრობით, თქვენი გონებაც არ განხრწნას ვინმემ თავისი ცრუ ჭადაგებით. თქვენ ისე გიყვართ ახალი სწავლებანი, რომ ვინმე რომ მოვიდეს და სხვა იესო ქრისტე იქადაგოს, მაშინვე შეიწყნარებთ და მის მხარეზე დადგებით“ (2 კორ, 11, 2—4). და აი, რასაც მოციქული შიშით მოელოდა კორინთელთაგან, სწორედ ის ხდება დღეს თქვენთან. მოვიდა ვილაც მჩხავანა, სხვა იესოს ჭადაგება დაიწყო, და თქვენც მისკენ გაიწიეთ.

მეტყვით: „რომელ სხვა იესოზეა ლაპარაკი? ეს კაცი ყველაფერს სახარებიდან ამბობს, სახარების სიტყვებს გვასწავლის: „შეინანეთ და გრწმენინ სახარებისაჲ“ (მარკ. 1, 15) იგი სულ იმას გააძახის: „ქრისტე ჩვენთვის მოკვდა, გწამდეთ ეს და ცხონდებით. სად არის აქ ტყუილი და მოხიბლვა“?! მართლაც ტკბილი ხარებაა, ვინ შეიძლება გულგრილი დარჩეს მის მიმართ? მაგრამ ხარებასაც შეიძლება შეერიოს ტყუილი და შერყვნას იგი, და ამას მოწმობს პავლე მოციქულის სიტყვები, გალატელთა მიმართ თქმული: „მიკვირს, რამეთუ ესრეთ აღრე გარდაიქცევით მისგან, რომელმან-იგი გიჩინა თქუნ მად-

ლითა ქრისტესითა, სხუად სახარებად“ (გალ., 1, 6). გალატელებმა გულთ ირწმუნეს უფალი იესო ქრისტე და სიხარულით მიიღეს ქადაგება ქრისტესმიერი ცხონების შესახებ, პავლე მოციქულის მიმართ კი, რომელმაც ჭეშმარიტი სარწმუნოება ამცნო, ისეთი მადლიერებით იყვნენ განმსჭვალულნი, რომ მზად იყვნენ საკუთარი თვალები დაეთხარათ და მისთვის მიეცათ. მაგრამ დაშორდათ თუ არა პავლე, მაშინვე ვილაც ამოდმბრძნობი კაცები მოადგნენ, იმათაც სახარება მოჰქონდათ, მაგრამ ჭეშმარიტი კი არა, სიცრუით შერყვნილი, და მათ ხელახლა სწავლებას მოჰყენენ. გალატელებსაც დიდი გარჩევა არ დაუწყიათ, სახარების სახელით მოიხიბლნენ, ცრუმახარებლებიც შეიფარეს და ტყუილის მახეშიც გაებნენ. მათი სიტყვები საამო ხარებად ეჩვენებოდათ, სინამდვილეში კი დამლუპველი, ბოროტი სწავლება გახლდათ. ასეთი მომხიბლავია ტყუილი, რომელიც წმინდა და ტკბილი სახელებით ინიღბება! ეს რომ შეიტყო წმ. პავლემ, ისინი გონს მოიყვანა და უცვალებელ, ყოველი დროისათვის ვარჯის კანონად განუჩინა შემდეგი: „დალაცათუ ჩუენ, გინა თუ ანგელოზი, ზეცით გახარებდეს თქუენ გარეშე მისსა, რომელი იგი გახარე თქუენ, შეჩუენებულ იყავნ. ვითარცა წინაჲსწარ ვთქუ და აწ კუალად ვიტყვი, უკუეთუ ვინმე გახარებდეს თქუენ მისსა გარეშე, რომელი იგი მიიღეთ, შეჩუენებულ იყავნ“ (გალ., 1, 7—9). ხომ ხედავთ, არსებობს თურმე „სხუად სახარებად“, რომლის მახარებლებიც ანათემას გადაეცემიან. მე და თქვენ კი ეს დავივიწყეთ და, როგორც კი გამოჩნდა ვილაც მჩხავანა სახარებით ხელში, იმას გამოვეკიდეთ, აღარც კი გაგვახსენდა ის, რაც ჭეშმარიტად გეწამს და რაც ცხონებას გვანიჭებს. თქვენც იგივე გალატელნი ხართ. ის დროა, მოციქულისაგან მათ მიმართ თქმული საყვედური გავიმეოროთ კაცმა: „ჰოი უცნობელნო გალატელნო, ვინ გეშურებოდა თქუენ ჭეშმარიტებისა არა მორჩილებად“ (გალ., 3, 1)?

4) ამბობ, სახარებას გვიკითხავს, იქიდან გვასწავლისო. წმ. სახარება და მოციქულთა წიგნები, მთელი ახალი აღთქმა არის ყველაზე სანდო წყარო ჭეშმარიტი ქრისტეანული ცოდნისა, ცხონების ჭეშმარიტი გზის შეცნობისა. ყველა, ვისაც ცხონება სურს, სწორედ წმიდა წერილიდან გაიგებს, როგორ უნდა მოიპოვოს იგი. მაგრამ ყველა როდი შეძლებს სწორედ დაინა-

ზოს ცხონების გზა. ზოგიერთი სახარებას კი კითხულობს, მაგრამ არასწორად ესმის, არასწორად განმარტავს, და ესაა შერყვნა სახარებისა. ასეთ კაცს სახარება ვერას არგებს, და ის ამბავი, რომ სახარება უპყრია ხელთ, ვერ იხსნის ყვედრებისა და სასჯელისაგან. შედარებისათვის ასეთ მაგალითს მოგიყვანთ: ვთქვათ, კაცს მშვენიერი ნაჭერი აქვს და რალაცის შეკერვა უნდა. თუ კარგი მკერავი გამოჩნდა, კარგ ტანსაცმელსაც შეკერავს, უმეცარი კი ისეთს მოჭლანავს, რომ ჩაცმაც შერცხვება ადამიანს და ვერც სიცივისაგან დაიფარავს. ასევე, სახარებიდან ზოგს ისეთი უვარგისი მოძღვრება გამოჰყავს, რომელიც თვითონ იმასაც ღუპავს და მის მიმდევრებსაც. რატომ? იმიტომ, რომ არ იცის, როგორ დაიწყოს საქმე. არსი სულის საცხოვრებელი მოღვაწეობისა რამდენიმე პუნქტად შეიძლება ჩამოყალიბდეს: უნდა გეწამდეს, მცნებები დავიმარხოთ, სული წმიდის მადლი მოვიხვეჭოთ და სხვა, მაგრამ სახარებაში ეს პუნქტები ერთად ზომ არაა თავმოყრილი, სხვადასხვა ადგილასაა გაბნეული — ერთგან ერთია ნათქვამი, მეორეგან — მეორე. იმისთვის, რომ ნამდვილად გავიგოთ, რას წარმოადგენს ცხონება, ყველა ამ პუნქტს ერთად უნდა მოვუყაროთ თავი — ყველას, უკლებლივ. ეს აუცილებელი პირობაა. და სწორედ აქ იტეხენ ხოლმე კისერს უმთავრესად ხელმოცარული მძებნელები. კი დააპირებს კაცი ამ პუნქტების თავმოყრას, მაგრამ არ იცის, როგორ ხდება ეს; ამიტომ ამოიჩემებს ერთი-ორ მცნებას, ამოგლეჯს მათ საღვთო წერილიდან და გაიძახის: მორჩა, ვიპოვე! აი ესაა ცხონების გზა! ერთი ამბობს, გწამდეს და ცხონდებიო, მეორე — სულის წმიდის მადლი მოიხვეჭე და სხვა არაფერია საჭიროო, მესამე — გიყვარდეს, და ნეტარ აღსასრულს მოიპოვებო, სხვა კიდევ სხვას ამბობს. ყველა ეს დებულება ჭეშმარიტია და საღმრთო წერილი ყოველ მათგანს უცილობელ კანონად გვიდგენს, მაგრამ თითოეული ცალ-ცალკე ცხონებას ვერ მოგვანიჭებს. ყველა ეს პუნქტი უნდა. ძვეაერთოთ, და მაშინ მივიღებთ სრულ წარმოდგენას ცხონების შესახებ.

ამბობ, თითქოს ეგ თქვენი მჩხვანაც სახარებიდან გიკითხავთ და გიხსნით, როგორ უნდა ცხონდეთ. მაგრამ ყველა პუნქტს იღებს იქიდან, თუ მხოლოდ ნაწილს? ყური დაუგდე და მიხვდები, რომ ყველას არა. ის მხოლოდ იმას გაიძახის,

შეინანეთ და გრწმენინო. მაგრამ განა ამით ყველაფერია ნათქვამი? სრულიადაც არა. მეტიც, ამ პუნქტშიც ყველაფერს როდი იზიარებს. შეინანეთო, ამბობს. ჰკითხეთ ერთი, საჭიროა აღსარების თქმა, ან მიტევების მიღება? ამაზე ვერაფერს გიპასუხებთ, ანდა მიკიბულ-მოკიბულით შეეცდება თავის დაძვრენას. რადგან ის რომ თქვას, რასაც სინამდვილეში ფიქრობს, მაშინვე ზურგს შეაქცევ (მისი აზრით, ეს ყოველივე ზედმეტია, თუმცა კი უფალმა გვამცნო საღმრთო წერილის მეშვეობით).

მწერ: „ეს კაცი ამბობს, სახარებით დამიმტკიცე, რომ ეტყუივარო!“ — იმას არავინ ეტყვის, „შეინანეთ და გრწმენინ“ ტყუილიაო, ეს უფალმა გვამცნო და აუცილებელია ცხონებისათვის. მაგრამ მაშინ კი ტყუის, როცა ამბობს, მხოლოდ ესაა საკმარისიო, რადგან ცხონების მოსაპოვებლად სხვაც ბევრი რამაა საჭირო. ვთქვათ, ექიმმა გამოგიწერა წამალი, რომელშიც ბევრი ბალახი და ესენცია შედის, აფთიაქარმა კი აიღო ორი-სამი კომპონენტი და გითხრა: აჰა შენ წამალიო. ვინ გამოდის ეს აფთიაქარი? ცრუ და მატყუარა. ასევე, ჩვენი სულელების მკურნალმა, იესო ქრისტემ, სახარებაში გვამცნო, როგორ უნდა ვუმკურნალოთ ჩვენს სულს ისე, რომ ცხონება მოვიპოვოთ, მოგვცა სრული კრებული წამლებისა, თქვენმა მჩხვანამ კი ორი-სამი კომპონენტი ამოგლიჯა იქიდან და გაიძახის, ესაა მხსნელი წამალი, მიიღეთ და ცხონდებითო. ამიტომაა იგი ცრუ და მატყუარა. თქვენ კიდევ, როგორც კი თავისი მოწოდება წარმოთქვა, მყისვე ჩიხში მოექცეით და ამით გაათამამეთ, უფრო და უფრო ხმამაღლა იმეორებს, გწამდეთ იესო ქრისტე, და ცხონდებითო.

5) ჭეშმარიტად! — „არავინ არს სხვით ცხორებად და არცაღა არს სახელი სხუად ცასა ქვეშე მოცემული კაცთა, რომლითამცა ჭერ-იყო ცხოვრებად ჩუენდა“ (საქ. 4, 12) „დიდ არს ღმრთის მსახურებისა იგი საიდუმლოდ; ღმერთი გამოჩინდა ხორციითა“ (I ტიმ. 3, 16). — მოღრიკა ცანი და ქვეყანა, და ჩვენ ცადმდე აგვამაღლებს. გიხაროდენ, მადლობას შესწირვიდეთ და შეუდევით მას, მაცხოვარსა და ღმერთსა ჩვენსა, რომელიც ამაღლდა ცად და ჩვენი კაცობრივი ბუნება მამა ღმერთის მარჯვენით ჯღომარე ჰყო. და მაინც, ნუ დაივიწყებთ, რომ

ესაა მხოლოდ ერთი პუნქტი ცხონების საქმეში. მას თვით უფალმა დაუმატა სხვა პუნქტები, რომლებიც ასევე აუცილებლად უნდა დაეიმარხოთ, თუ ცხონება გვინდა. იმათზე მერე გესაუბრები, ახლა კი გეტყვი, რომ ეს პუნქტიც: „გრწმენინ უფალი მაცხოვარი“, ისე უნდა შეიმეცნო და ისე გაითავისო, რომ ყოვლადწმიდა სამების საიდუმლოებასთან სრულპარმონიაში იყოს. თორემ ისეც შეიძლება მოხდეს, რომ მუდამ გვახსოვდეს იესო ქრისტესგან მონიკებული ცხონება, ყოვლადწმიდა სამება კი სულ დაგვაფიწყდეს და იგი იესო ქრისტეს სახემ დაჩრდილოს. ეს კი იმის ნიშანი იქნება, რომ დაიძრება სწორი წარმოდგენა ცხონებაზე, ანდა სხვაგვარად რომ ვთქვათ, ჩამოყალიბდა გამრუდებული, გაუკუღმართებული ქრისტიანული აზროვნება.

ამის შეხსენება მიხდოდა სწორედ: იესო ქრისტემ ჩვენი ცხონების ზოგადი წესი მამასა და სული წმიდასთან ერთად ჩამოაყალიბა, თვითეული ჩვენგანის ცხონება იესო ქრისტეს მიერ ხდება მამისა და სული წმიდის მონაწილეობით. ამრიგად, ცხონება მოგვანიჭა და თვითეულ ჩვენგანს აცხონებს ღმერთი, ერთარსება და სამ იპოსტასად ცნობილი და თაყვანისცემული მამა, ძე და სული წმიდა. ეს კარგად უნდა დაეიმახსოვროთ ყველამ, ვისაც ცხონება გვინდა. შეხედე, როგორ ხდება იესო ქრისტეს ნათლისღება! ნათელ-იღებს ძე ღმერთისა განკაცებული, მაგრამ მასზე და მასში ჰგვიეს მამა ღმერთი თავისი ნებით და სული წმიდა თავისი ქმედებით. აქედან ნათლად ჩანს, რომ ჩვენი ცხონების საქმე, რომელიც ნათლისღებით დაიწყო, განხორციელდა უფალი იესო ქრისტეს მიერ, რომელსაც მუდამ თან ახლდა ნება მამისა და ქმედება სული წმიდისა. ძე არაფერს იქმნოდა მამისა და სული წმიდის გარეშე, რადგან, მას შემდეგაც, რაც განხორციელდა, არ მიუტოვებია წიაღი მამისა თვისისა.

ხომ ხედავ, როგორ ხორციელდება ჩვენი ცხონება ერთარსება და სამ იპოსტასად ცნობილი და თაყვანისცემული ღმერთის მიერ? ახლა იმასაც გიჩვენებ, რომ თვითეული ჩვენგანის ცხონებაც სწორედ სამების მიერ ხდება. ჩვენი ცხოვრებაც და ჩვენი ცხონებაც ღმერთთან ცოცხალ კავშირში მდგომარეობს. დაცემის შედეგად ჩვენ ეს კავშირი დავკარ-

გეთ. მაგრამ მოვიდა ღმერთი განხორციელებული — ძე ღმრთისა მხოლოდშობილი, და თავის იპოსტასში დაცემული კაცობრივი ბუნება ღმერთთან შეაერთა, და ყველა მორწმუნე თავის თავთან გააერთიანა და ამით ღმერთს შეუერთა. ეს თვით მაცხოვარმა გვიჩვენა, როცა წმ. მოციქულებს უთხრა: „მე მამისა ჩემისა თანა, და თქუენ ჩემ თანა, და მე თქუენ შორის“ (იოანე, 14, 20). ეს ნათქვამი ყველა მორწმუნეს ეხება. ესაა ოქროს ჯაჭვი, რომელიც ღმერთთან გვაერთებს. უფალმა ეს სხვა ადგილსაც დაადასტურა: „მე ვარ გზად და მე ვარ ჭეშმარიტება და ცხოვრება, არაეინ მოვიდეს მამისა, გარნა ჩემ მიერ“ (იოანე, 14, 6). ამგვარად, მამასთან მიდიან ძისა მიერ. ძესთან როგორღა მიდიან? ძესთან მამას მივყავართ, როგორც უფალი იტყვის: „ვერვის ხელ-ეწიფების მოსლვად ჩემდა, უკუეთუ არა მამამან, მომავლინებელმან ჩემმან, მოიყვანოს იგი ჩემდა“ (იოანე, 6, 44). რაკი ძესთან მიყვანების გარეშე თვითთელი ჩვენგანის ცხონების საქმის დაწყებაც კი შეუძლებელია, ხოლო ეს მიყვანება ხდება მამის მიერ, მაშასადამე ცხადია, რომ თვითთელი კაცის ცხონების საქმის დაწყები თვით მამა ღმერთია. ეს უნდა ახსოვდეს და ამას უნდა აღიარებდეს ყოველი, ვისაც ქრისტეს მიერი ცხონება სწადია, და მუდამ უნდა ხედავდეს ზეციური მამის მარჯვენას. რომელსაც იესო ქრისტესთან მივყავართ. მამას როგორღა მივყავართ ძესთან? — სული წმიდის მეშვეობით, რომელიც ამის მერე ადამიანების გულსა და გონებაში განახორციელებს ყველაფერს, რაც ცხონებისათვისაა საჭირო. ქრისტე მაცხოვარი ევნო, ჯვარს ეცვა და აღდგა, ამაღლდა და დაჯდა მარჯვენით მამისა, თავის ნაცვლად კი გამოგვიგზავნა მამისაგან სული წმიდა, რომელიც დამკვიდრებულია ჭეშმარიტ ეკლესიაში და წარმართავს ყოველი ჩვენგანის ცხონების საქმეს. გავიხსენოთ: თავიდან იგი მოციქულებზე გარდამოვიდა, მერე მთელი ქვეყანა მოატარა მათ, მისცა სიტყვა, ხოლო ამ სიტყვას მიანიჭა დამარწმუნებელი ძალა. იმათ, ვინც ირწმუნა, ნათლავდა, აკურთხევდა და ყოველგვარ კეთილ საქმეში განამტკიცებდა, და მათი კრებულისაგან შექმნა წმ. ეკლესია. დღესაც ასევე მოქმედებს სული წმიდა ამ ეკლესიაში და განაგებს ყველას ცხონებას. სული წმიდის გარეშე ვერავინ ცხონდება. ამიტომაც თქვა

უფალმა: „უმჯობეს არს თქვენდა, რადთა მე წარვიდე, უკუეთუ მე არ წარვიდე, ნუგეშინის-მცემელი იგი არა მოვლეს თქვენდა“ (იოანე, 16, 7). ამით მან თქვა: ჩემი განხორციელება, სიკვდილი, აღდგომა — ყოველივე ეს ამაოა, თუკი არ მოვა ნუგეშინისმცემელი — სული წმიდა. ამ შემთხვევაში ვერ ცხონდებით, რამეთუ სული წმიდის გარეშე ვერ გარდაიქმნებით ისეთებად, როგორებიც ცხონების საქმეს შედგომილნი უნდა იყვნენ. ამგვარად, გწამდეს და სასოება იქონიეთ, რომ ცხონდებათ იესო ქრისტეს მიერ, მამის ნებით, შენი ცხონების საქმეს კი წარმართავს სული წმიდა, რომელიც გადმოდის შენზე წმ. ეკლესიაში საღმრთო საიდუმლოებების მეშვეობით, და რომელიც ამის შემდეგ დაემკვიდრება შენს გულში, მუდმივად გასწავლის და განგამტკიცებს ცხონების საქმეში. ხედავ როგორ ვცხონდებით? იესო ქრისტეს მიერ, მამის ნებით და სული წმიდის მადლით. ეს დაიძარხე გულსა და გონებაში, ასეთი იყოს შენი აღმსარებლობა. და გახსოვდეს, ვინც მხოლოდ იმას გიჩიჩინებს, გრწმენინ უფალი, გრწმენინ უფალიო, და არასოდეს მოუვა აზრად ცხონების საქმეში მამა ღმერთისა და სული წმიდის მონაწილეობის წარმოჩენა, მასთან არ არის სრული ჭეშმარიტება, ის ამღვრევს ქრისტეანულ წარმოდგენას და აბნელებს ქრისტესმიერ ნათელს.

ეს იცოდნენ წმ. მოციქულებმა, და ნახე, როგორ გამოხატეს! წმ. მოციქული პეტრე წერს: „წინააღმართთა და სიწმიდითა სულისადათა დასამორჩილებელად და საპყურებლად სისხლისა იესო ქრისტესისა. მადლი თქვენ თანა!“ (I პეტრ. 1, 2). წმ. პავლე მოციქული ასე ლოცულობს: „მადლი უფლისა ჩვენისა იესო ქრისტესი და სიყვარული ღმერთისა და მამისაჲ, და ზიარებაჲ სულისა წმიდისაჲ თქვენ ყოველთა თანა!“ (II კორ, 13, 13). პავლე მოციქულის ამ სიტყვებს უცვლელად იმეორებენ ეკლესიაში, წირვის დროს, ვიდრე იესო ქრისტეს ხორცისა და სისხლის საიდუმლოს შესრულებას დაიწყებდნენ. და ყველა ჩვენი წმიდა მამა, როცა ცხონებაზე მსჯელობდა, ამბობდა, რომ ცხონებას გვანიჭებს ღმერთი, სამებით თაყვანისცემული: მამა, ძე და სული წმიდა, ესაა ერთი, მთლიანი საწყისი. შენც ასე გახსოვდეს, მიეჩვიე, რომ სწორედ ასე უნდა აღიქვამდე შენში მიმდი-

წარე პროცესს ცხონებისა — და ამის შემდეგ მაგ საზომით გაზომე, დღევანდელი ახალი მასწავლებელიც და სხვანიც, ზეალ-ზეგ რომ გამოჩნდებიან.

6) ახლა ბარემ ყველაფერს გეტყვი, რაც საჭიროა თვით-ული ჩვენგანის ცხონებისათვის. მოკლედ ეს ასე შეიძლება გამოითქვას: გწამდეს ღმერთი, სული წმიდის მადლი მოიხვეჭე წმიდა საიდუმლოებებში მონაწილეობის მეშვეობით, უფლის მცნებების მიხედვით იცხოვრე, ღმრთივდადგინებული მოძღვრების რჩევებით იხელმძღვანელე და წმ. ეკლესიასთან ცოცხალი კავშირი გქონდეს. უფრო ნათლად რომ წარმოიდგინო, რაოდენ აუცილებელია ის ყოველივე, ცხონების გზა ჩვეულებრივ მოგზაურობას შეადარე. მოგზაურს მარჯვე და უსაფრთხო გზა რომ ჰქონდეს, ამისთვის აუცილებელია სინათლე და გაკვალული ბილიკი, თვითონ მგზავრიც ჯანმრთელი და ღონიერი უნდა იყოს, წინაც ვინმე ისეთი უნდა მიუძღვოდეს, ვინც საჭიროების შემთხვევაში — მოსახვევებში ან გზაჯვარედინებზე — სწორ გზას უჩვენებს. ცხონების გზაზეც ასეა: აუცილებელია სინათლე — სარწმუნოება, აუცილებელია გზა გაკვალული — მცნებები, აუცილებელია ჯანმრთელობა და ძალა — სული წმიდის მადლი, წმიდა საიდუმლოებების მეშვეობით, რომ გვეძლევა, აუცილებელია გზამკვლევი და ხელმძღვანელი — ეკლესიის მწყემსები. ყოველივე ამას შენ წმ. ეკლესიაში ჰპოვებ, ამიტომაც მასთან ცოცხალ კავშირში იმყოფება ყველა, ვისაც სწორედ მიჰყავს თავისი ცხონების საქმე. ყველა, ვინაც ცხონება მოიპოვა, ამ გზით ვიღოდა, და დღესაც ამ გზით მიდის ყველა, ვისაც ცხონება სურს... სხვა გზა არ არსებობს.

არა მგონია, თვითელი ამ პუნქტის აუცილებლობის ახსნა და დამტკიცება გჭირდებოდეს. მაგრამ ზოგ რამეს მაინც განგიმარტავ.

ცხონებისათვის სარწმუნოება აუცილებელია, ამაზე ლაპარაკიც ზედმეტია. ურწმუნო კაცს ცხონებაზე ფიქრი აზრადაც არ მოსდის. ამიტომ ამბობს პავლე მოციქული: „სარწმუნოებაა უღირს, რომელი მოუხდების ღმერთსა, რამეთუ არს და შეძიებელთა მისთა სასყიდლის მიმცემელ იქმნების“ (ებრ. 11, 6). ზოლო უნდა გეწამდეს სრულად — ყველაფერი, რისი გამჟღავნებაც ინება ჩვენთვის ღმერთმან, რაიმეს მიმატების ან

მოკლების გარეშე. უნდა გვწამდეს ისე, როგორც წმიდა მართლმადიდებელი ეკლესია გვასწავლის. კერძოდ: ღმერთი ერთ არს ბუნებით, სამსახოვანი, მან თავისი სიტყვით შექმნა ქვეყანა და ზრუნავს მასზე, ჩვენ, კაცნი, სამოთხისათვის შეგვქმნა, რამეთუ ხატად თვისად გვქმნა, მაგრან ჩვენ დაევარგეთ სამოთხე წინაპრების შეცოდების გამო, და ამ დაცემის შემდეგ თვითონ ველარ წამოვდგებოდით, მაგრამ ძე ღმრთისამ შეგვიბრალა, აღიღო ჩვენი გამოხსნისა და აღორძინების საქმე, მოვიდა სოფლად, განაკცადა, ევნო, მოკვდა ჯვარზე, აღდგა, ამაღლდა ცად და მჭდომარე არს მარჯვენით მამისა, გვწამს, რომ ჭეშმარიტია მის მიერ კაცობრიობისათვის გაღებული მსხვერპლი, და რომ მისი მეოხება ჭეშმარიტად მაცხოვრებელია მორწმუნეთათვის. ხოლო შემდგომად ამაღლებისა მამისაგან გამოგვიგზავნა სული წმიდა, რომელიც მოციქულებზე გარდამოვიდა და აღავსო ისინი სიბრძნითა და ძალით, მათ კი, სული წმიდით აღვსებულებმა, ქვეყნად გაავრცელეს ქრისტიანული სარწმუნოება, მორწმუნეთაგან შეადგინეს სხეული წმ. ეკლესიისა, რომლის თავიც თვით იესო ქრისტეა, ეკლესიას ჩააბარეს სარწმუნოების ყველა საიღუმლო და ყველა წმიდა საიდუმლოება, რომელთა მეოხებითაც სული წმიდის მადლს ვღებულობთ, ხოლო მოციქულებმა თავიანთ მემკვიდრეებად თვით უფლის ბრძანებით დატოვეს მღვდლები და ეპისკოპოსები, რომლებიც ხელდასხმით იღებენ ამ განსაკუთრებულ მადლს, და ეს ძაფი უწყვეტლივ მოდის მოციქულებიდან ვიდრე ჩვენამდე, ცხონების მსურველნი აღწევენ ეკლესიის წიაღში, ანუ, ცალ-ცალკე კი არა, ყველასთან ერთად, ცხოვრების იმ წესით, რომელიც საერთოა ყველა ჭეშმარიტი მორწმუნისათვის; ეკლესიის საიდუმლოებებით განიწმინდებიან და მოძღვართა ხელმძღვანელობის ქვეშ იმყოფებიან, თვითეული ჩვენგანის ცხონების საქმე დაფარულად მიმდინარეობს ადამიანის სულში, ხოლო სრული ბრწყინვალებით სხვა ცხოვრებაში ცხადდება, ამ იმედით აღჭურვილნი, ნებსით და უნებლიე გაჭირვებას მოთმინებით ვიტანთ მომავალი ცხონებისათვის, ვიცით, რომ ისინი, ვინც სიკვდილს მიჰყავს სხვა ცხოვრებაში, მაინც ეკლესიის ერთიანი სხეულის წევრებად რჩებიან და არც ჩვენ-

თან ურთიერთობას წყვეტენ, თუმცა ეს ურთიერთობა უკვე უხილავია და არა ხილული.

ეს ყოველივე უნდა გვწამდეს და ჩვენც აღვიარებთ ამ სარწმუნოებას, როდესაც ყოველდღე ვკითხულობთ სარწმუნოების სიმბოლოს. მოკლედ იგი ასე შეიძლება გადმოიცეს: ღმერთი, სამებით თაყვანისცემული, რომელმაც შექმნა ქვეყანა და განაგებს მას, თავის წმ. ეკლესიაში გვაცხოვნებს ჩვენ, დაცემულებს, უფალი იესო ქრისტეს მიერ, მამის ნებით და სული წმიდის მადლით. ეს ცხონება აქ საიდუმლოდ ხდება, მომავალ ცხოვრებაში კი სრულად გაბრწყინდება თავისი გამოუთქმელი ნათლით. ხომ ხედავ, ყველა პუნქტი, რომლებიც ცხონების პირობად დაგისახე, სარწმუნოების სიმბოლოში შედის. მთელი გულით გვწამდეს, რომ ასეა, და შეუძლებელია სხვაგვარად იყოს.

7) მაგრამ ცხონებისთვის მხოლოდ სარწმუნოება არ კმარა. ამასთან ერთად საჭიროა სიწმიდით ცხოვრება, უფლის ყველა მცნების დაცვით. „არა ყოველმან, რომელმან მრქუას მე: უფალო, უფალო! შევიდეს იგი სასუფეველსა ცათასა, არამედ რომელმან ყოს ნებაჲ მამისა ჩემისა ზეცათაჲსაჲ“ (მათე, 7, 21). ზეციერი მამის ნება კი მის მცნებებშია გადმოცემული. წაიკითხე სახარება, იქ, ცხადია, სარწმუნოების მოთხოვნებზეცაა ლაპარაკი, მაგრამ არც ისე ბევრი. ძირითადად იგი გვთავაზობს წმიდა და ღმრთის სათნო ცხოვრების მაგალითებს. სახარებიდან ასეთი დასკვნა გამოდის: მთელი გულით, დაუღალავად შეასრულე მცნებები, და ცხონდები. ცხადია წინ უნდა გიძლოდეს სარწმუნოება და ყოველივეს ღმრთის სათნო-ყოფისათვის წარმართავდეს. ისმინე, რას ამბობს უფალი: „რომელსა აქუნდნენ მცნებანი ჩემნი და დაიმარხნეს იგინი, იგი არს, რომელსა უყუარდე მე, ხოლო რომელსა უყუარდე მე, საყუარელ იყოს მამისა ჩემისა მიერ, და მეცა შევიყუარო იგი და გამოუცხადო მას თავი ჩემი“ (იოანე, 14, 21). და იქვე დასძინს: „უკუეთუ ვისმე უყუარდე მე, სიტყუანი ჩემნი დაიმარხნეს, და მამამანცა ჩემმან შეიყუაროს იგი, და მოვიდეთ მისა და მის თანა დავადგრეთ“ (იოანე, 14, 22). ასევე, მოციქულთა ეპისტოლეებში ბევრი რამ წერია სარწმუნოებაზე, მაგრამ უფრო მეტი — სიწმიდით ცხოვრების შესახებ, წმ. პავლე მოციქულ-

მა ცხონების საქმის არსი ორიოდ სიტყვით გადმოსცა: „სარწმუნოებად, სიყვარულისაგან შეწევნული“ (გალ. 5, 6). სიყვარულში იგი გულისხმობს ყველა მცნების დამარხვას და განშორებას ყოველი ცოდვისა და ცოდვილ ვნებათაგან (რომ. 13). ამიტომ ყველა თავის ეპისტოლეში ქრისტიანთა მთავარ საზრუნავად მიიჩნევს წმიდა და ღმრთის სათნო ცხოვრებას, „რავდენი არს ჭეშმარიტ, რავდენი პატივოსან, რავდენი მართალ, რავდენი წმიდა, რავდენი საყუარელ, რავდენი საქებელ, რავდენი სათნო და რავდენი ქებულ, მას ზრახევდით... და ღმერთი მშვიდობისაჲ იყავნ თქუნ თანა“ (ფილ. 4, 8—9). მოციქული იმასაც ამბობს, რომ თვით განგებამ ღმრთისა ჩვენი ცხონება იმისთვის ინება, რომ სიწმიდით ცხოვრების უნარი მოგვცა. „რამეთუ გამოჩნდა მადლი იგი ღმრთისაჲ მაცხოვრად ყოველთა კაცთა, სამოძღურებელად ჩუენდა, რაითა უარ-ვეყოთ უღმრთოებაჲ და სოფლისა გულის თქუმაჲ, სიწმიდით და სიმართლით და ღმრთის-მსახურებით ვცხონდებოდით ამას სოფელსა, და მოველოდით ნეტარსა მას სასობასა და გამოჩინებასა დიდებისა დიდისა ღმრთისა და მაცხოვრისა ჩუენისა იესო ქრისტესსა (ტიტ. 1, 11—13). ამასვე დაბეჭითებით გვიჩვენებს სხვა წმ. მოციქულები. მაგალითად წმ. იაკობ მოციქულის სიტყვებს მოგიყვანთ: „რამ სარგებელ არს, ძმანო ჩემნო, უკუეთუ ვინმე თქუას: სარწმუნოებაჲ მაქუს, და საქმენი არა ჰქონდენ? ნუ ძალ-უტყეა სარწმუნოებასა ხოლო ცხოვნებალ მისა?... სარწმუნოებაჲ უკუეთუ არა აქუნდენ საქმენი, მკუდარ არს იგი ხოლო. არამედ თქუას თუ ვინმე: შენ სარწმუნოებაჲ მაქუს და მე საქმენი მქონან, მიჩუენე მე სარწმუნოებაჲ შენი საქმეთაგან შენთა, და მე გიჩუენო შენ საქმეთაგან ჩემთა სარწმუნოებაჲ ჩემი. შენ გრწამს, ვითარმედ ერთ არს ღმერთი, კეთილად იქმ, და ეშმაკთაცა ჰრწამს და ძრწიან მისგან. ვნებაუსა ცნობად მ კაცო ამაოო, რამეთუ სარწმუნოებაჲ თვინიერ საქმეთასა მკუდარ არს? აბრაჰამ, მამაჲ ჩუენი, არა საქმეთაგან განმართლდაა, რამეთუ შესწირა ისაკი, ძე თვისი, საკურთხეველსა ზედა? ჰხედავა, რამეთუ სარწმუნოებაჲ შეეწია საქმეთა მისთა და საქმეთაგან სარწმუნოებაჲ იგი სრულ იქმნა?... ჰხედავთა რამეთუ საქმეთაგან განმართლდების კაცი და არა სარწმუნოებისაგან ხოლო?“ (იაკობ, 2, 14—24).

ხედავ, რა აუცილებელია ყოველი ჩვენგანის ცხონებისათვის მცნებათა აღსრულება. შეგნებულად ვთქვი მეტი ამ საკითხზე, რამეთუ ისინი, რომლებმაც თქვენი ახალი მასწავლებელი შეაცდინეს, არასწორად წარმოაჩინენ ამ საკითხს. ამბობენ, თითქოს ცხონებისათვის მხოლოდ სარწმუნოება იყოს საკმარისი, საქმეებს კი თითქმის მთლიანად უგულებელყოფენ. ალბათ ეგ თქვენი მასწავლებელიც ასევე უკუღმართად ფიქრობს. ჰოდა, თავად განსაჯე. საღმრთო წერილის მიხედვით, სარწმუნოება და მცნებათა აღსრულება ერთნაირად მნიშვნელოვანია, უპირატესობა არც ერთს არ ენიჭება. ცალ-ცალკე ორივე უძლურია — სარწმუნოება გარეშე საქმეთა, და საქმეები — გარეშე სარწმუნოებისა. მხოლოდ უწყვეტ კავშირში ყოფნისას შეუძლიათ მათ ჩვენი ცხონება, და თავადაც ამ კავშირში ჰპოვებენ თავიანთ ნამდვილ ფასს, ძალასა და მნიშვნელობას.

8) იმისათვის, რომ სარწმუნოებაც მართალი იყოს, და შესაბამისი საქმეებიც თან ახლდეს, აუცილებელია სული წმიდის მადლი. უიმისოდ არათუ სარწმუნოებას ვერ მოვიპოვებთ, რაიმე კეთილ ფიქრსაც კი ვერ გავივლებთ (II კორ. 3, 5), და რომც გავივლოთ, ვერ შევასრულებთ. რამეთუ, მოციქულის თქმით, კეთილი განზრახვა შეიძლება მოგვივიდეს, მაგრამ საქმე საქმეზე რომ მიდგება, შესრულება არ გვინდა. მოციქულიც ამას ამბობს: „ნებაჲ იგი წინა-მიც მე, ხოლო საქმედ კეთილისა მის არა ვჰპოვებ“ (რომ. 7, 18). ღმერთს რომ მხოლოდ ის ეჩვენებინა, როგორ უნდა გეწამდეს და როგორ ვცხოვრობდეთ, და ამის ამარა დავეტოვებინეთ, ვემსგავსებოდით კაცს, რომელიც მზის სხივითაა განათებული, ხედავს გზას, რომლითაც უნდა ვიღოდეს, იცის, რომ სხვაგვარად დაიღუპება, მაგრამ ამ გზაზე შედგომის ძალა არ შესწევს, რადგან სუსტია და დავრდომილი. თუ ასეა, სჯობს საერთოდ არაფერი იცოდეს და ვერაფერს ხედავდეს, ვიდრე იცოდეს, ხედავდეს და ამის გამოყენების უნარი კი არ ჰქონდეს. მოწყალე ღმერთს არც დავუტოვებიათ ამ ცოდნის ამარა, არამედ ინება სული წმიდის გამოგზავნა, რათა მან ჩვენთან ერთად წარმართოს ჩვენი ცხონების საქმე. სული წმიდა პირველად მოციქულებზე გარდამოვიდა, და მერე მათი მეშვეობით ყველა მორწმუნეს მოეფინა. იგი მოციქულთა სიტყვის საშუალებით აღვიძებდა სარწმუნო-

ებას ადამიანებში და იმათ, ვინც გადაწყვეტდა სიწმიდით ცხოვრებას, ამ გადაწყვეტილების შესრულების ძალასაც აღლევდა. რასაც მოციქულები აკეთებდნენ და ღღესაც აკეთებენ მათი შემკვიდრებები ღმრთივე განჩინებული წესით. მაღლი სულისა წმიდისა დამკვიდრებულია მორწმუნეთა დასში, ანუ წმ. ეკლესიაში, ყველას განანათლებს, განწმენდს და განასპეტაკებს. და თუკი ვინმე ცხონდა ან ცხონდება, მხოლოდ სული წმიდის მაღლით. „რამეთუ მაღლითა ხარტ გამოხსნილ სარწმუნოებისა მიერ, და ესე არა თქუენგან, არამედ ღმრთისა ნიჭი არს“ (ეფეს. 2, 8), ამბობს მოციქული, და თავის თავზეც ამას იმეორებს: „ხოლო მაღლითა ღმრთისაათა ვარ, რამ-იგი ვარ“. წმ. პეტრე მოციქული თავის თავზეც და სხვებზეც გვიმოწმებს: „რომელმან-იგი ყოველივე თვისისა ღმრთეებისა ძალი საცხორებელად მოგუანიჭა ჩუენ“ (II პეტრ. 1, 3). ამიტომ ყველა მოციქული მორწმუნეთა მიმართ მიწერილი ეპისტოლეების თავსა და ბოლოში უსურვებენ მათ სული წმიდის მაღლის დამკვიდრებასა და განმრავლებას: „მაღლი უფლისა ჩუენისა იესო ქრისტესი თქუენ ყოველთა თნა“ მართალია, თითქმის არავინ დაობს იმაზე, რომ სული წმიდის მაღლი, როგორც მაცხოვრებელი ძალა, აუცილებელია ჩვენთვის და მხოლოდ მას შეუძლია წარმართოს ჩვენი ცხონების საქმე, მაგრამ ის, თუ როგორ მიიღება იგი, ხშირად ამიტომაც ხდება ხოლმე საკამათო. ამიტომ განგებ ვამახვილებ ყურადღებას ამ საკითხზე: იქნებ თქვენი ახალი მასწავლებელიც ერთი იმათგანია, ვისაც არასწორად ესმის იგი. ხომ არიან ისეთი ბრძენკაცებიც, რომლებიც ამტკიცებენ, რომ საკმარისია სარწმუნოება შეიძინო, და მაღლი უფლისა მყისვე მოვა და დამკვიდრებს შენში. მაშ იცოდე და კარგად გახსოვდეს, რომ სული წმიდის მაღლი გვეძლევა და მიიღება მხოლოდ საიდუმლოებების მეშვეობით, რომლებიც თვით უფალმა დააწესა ეკლესიაში წმ. მოციქულთა ხელით. ეს ამბავი შენთვის უფრო სარწმუნო რომ გახდეს, რამდენიმე მაგალითს მოგიყვან იმისა, თუ როგორ მიიღება სული წმიდის მაღლი უფლის ბრძანებით.

თვით უფალმა და მაცხოვარმა ნიკოდიმოსთან საუბარში ბრძანა: „ჯერ არს თქუენდა მეორედ შობაჲ (იოანე, 3, 7). აჟ იგი

გულისხმობს ახალი ცხოვრებისთვის დაბადებას. და რა საშუალება მიგვითითა ღმერთმა? განა ისა თქვა, ოღონდ გწამდეს, და პირს დააღებ თუ არა, უმაღლესი წმიდის მადლი შემოვა შენში და განჯაბლებსო? არა, ასე არ უთქვამს. მაშ რაღა თქვა? „უკუეთუ ვინმე არა იშვეს წყლისაგან და სულისა, ვერ ხელწვიფება შესლვალ სასუფეველსა ღმრთისასა“—ო (იოანე, 3, 5). წყლითა და სულით შობა არის ნათლისღება — პირველი ქრისტიანული საიდუმლო. მაგრამ განახლება მხოლოდ სული წმიდის ნიჭის მიღების, დატევნისა და დამარხვის უნარს აძლევს ჩვენს ბუნებას, თვით მოცემა კი ამ ნიჭისა ხდებოდა განსაკუთრებული საიდუმლოთი, კერძოდ, მოციქულთა ხელდასხმით. ამას ცხადყოფს თუნდაც ერთი შემთხვევა, რომელიც ეფესოში მოხდა წმ. პავლეს მოციქულებრივი მოღვაწეობის დროს. ეფესოში ჩასულ მოციქულს იქ თორმეტი მორწმუნე დახვდა და ჰკითხა: მას შემდეგ, რაც ირწმუნეთ, მიიღეთ თუ არა სული წმიდაო? მათ უპასუხეს, სული წმიდის არსებობის შესახებ არც კი გვსმენია რამეო. პავლე მოციქულმა ჰკითხა: მაშ როგორღა მოინათლეთო? იოანეს ნათლისღებითო, მიუგეს მათ. მაშინ წმ. პავლემ მათ განუმარტა, რომ იოანეს ნათლისღება იყო მხოლოდ მომზადება უფალი იესო ქრისტეს რწმენისათვის. შემდეგ მოციქულმა უფრო სრულად განუმარტა ეფესელებს სახარება, ნათელ-სცა ქრისტიანული ნათლისღებით, მონათელის მერე ხელნი დაასხა, და ამრიგად, მათ მიიღეს სული წმიდის მადლი. ხომ ხედავ, ნათლისღება ცალკეა, ხელდასხმა ცალკე, სული წმიდის მადლი კი მხოლოდ ხელდასხმის შემდეგ მიიღება? ხელდასხმა მოციქულებმა შემდეგ მირონცხებით შეცვალეს, და იგი თავიანთ მემკვიდრეებს გადასცეს, როგორც საიდუმლო, ნიჭი სული წმიდისა, მორწმუნეთათვის მიმადლებული. იგი ახლაც მოქმედებს წმ. ეკლესიაში.

ეს ორი მაგალითი კმარა იმის დასანახად, რომ სული წმიდის მადლი გონების გზით მხოლოდ სარწმუნოებით კი არ მიიღება, არამედ ხილულადაც, წმ. საიდუმლოთა მეშვეობით. ნათლისღების შემდგომ, ჩადენილ ცოდვათა მიტევება ხდება არა მაშინ, როცა კაცი მხოლოდ ბუნებაში ინანიებს და ღმრთის წინაშე აღიარებს თავის ცოდვებს, არამედ მაშინ, რო-

ცა შეინანებს, გადაწყვეტს მეტად აღარ სცოდოს, აღსარებას ეტყვის თავის სულიერ მამას და მისგან მიტევებას მიიღებს. ცოცხალი ურთიერთობა ღმერთთან ხდება მაშინ, როცა ადამიანი ეზიარება მის ხორცსა და სისხლს, ევქარისტიის საიდუმლოთი. სული წმიდის მადლი მოციქულთაგან გადაეცათ მღვდელმთავრებსა და მღვდლებს ხელდასხმის მეშვეობით. ქორწინების საიდუმლოთი უკავშირდება ერთმანეთს საცოლვე და საქმრო, ზეთისკურთხევის საიდუმლოთი განიკურნება სხვადასხვა სნება.

ეს შეიძლება საიდუმლო არის შეიძლება ნაკადი ღმრთაებრივი მადლისა, ეს საიდუმლოები მოქმედებს წმ. მართლმადიდებელ ეკლესიაში. სხვა გზა სული წმიდის მადლის მოპოვებისა არ არსებობს. ვინც შეეცდება სხვა გზა გიჩვენოს, ზურგი აქციე ასეთ კაცს, იცოდე, ამოდმბრძნობია იგი.

9) სამ დასახელებულ პუნქტს — სარწმუნოებას, მცნებათა მიხედვით ცხოვრებას და სული წმიდის მადლს, საიდუმლოთა მეშვეობით მიღებულს — უნდა დაემატოს მეოთხე, ღმრთივდაწესებული მწყემსობა. სარწმუნოება უნდა შეეძინოთ, მაგრამ როგორ უნდა მოხერხდეს ეს მქადაგებელის გარეშე? „ანუ ვითარმე ქადაგებდნენ, არა თუ წარივლინენ“ (რომ. 10, 15)? მადლი ღმრთისა საიდუმლოთა მეშვეობით უნდა მივიღოთ, მაგრამ როგორ, განა ეს შესაძლებელია გარეშე მსახურთა ქრისტესთა და მნეთა საიდუმლოთა ღმრთისათა (I კორ. 4, 1)? აუცილებელია მცნებათა მიხედვით ცხოვრება სარწმუნოებრივი სულით, მაგრამ ან ეს როგორღაა შესაძლებელი ხელმძღვანელის გარეშე. რომელიც მიუთითებს, აფრთხილებს, შეცდომებს უსწორებს, აღადგენს დაცემულთ და კვალად წარმართავს ჭეშმარიტ გზას აცდენილებს? ამრიგად, ცხოვრების მისანიჭებლად აუცილებელია არსებობდნენ ადამიანები, რომლებიც ღმრთის სახელით მოქმედებენ, გვასწავლიან სარწმუნოებას, სული წმიდის მადლს გადმოგვცემენ საიდუმლოთა მეშვეობით და ხელმძღვანელობას გვიწვევენ ქრისტეანულ ცხოვრებაში — აუცილებელია ღმრთივბოძებული და ღმრთივდადგინებული მწყემსები. და უფალმაც ინება მათი მოვლინება მოციქულიც გვიმოწმებს თავისი სიტყვით: „და მან (ღმერთმან) მოსცნა, რომელნიმე მოციქულნი, რომელნიმე წი-

ნაღწარმეტყველნი, რომელნიმე მახარებელნი, რომელნიმე მწყემსნი და მოძღვარნი“ (ეფეს. 4, 11). ეს საქმითაც გამოჩნდა. ღმერთმა მოგვივლინა და უბრძანა მათ: „წარვედით და მოიმოწაფენით ყოველნი წარმართნი და ნათელს ცემდით მათ სახელითა მამისაჲთა და ძისაჲთა და სულისა წმიდისაჲთა, და ასწავებდით მათ დაძარხვად ყოველი, რაოდენი გამცენ თქუენ“ (მათე, 27, 19—20). მოციქულები ასეც იქცეოდნენ. მაგრამ რაკილა ისინი მოკვდავნი იყვნენ, მოციქულებრივი საქმე კი საუკუნითგან და უკუნისამდე უნდა ცოცხლობდეს, ამიტომ მათ, ღმრთის განგებით, ყველგან დატოვეს მემკვიდრენი და მოწაფენი, მღვდელნი და მოძღვარნი, რათა მათ გაეგრძელებინათ მოციქულთა საქმე — საიდუმლოთა აღსრულება. ასე გაანათლეს პავლემ და ბარნაბამ ლუსტრა, დერბია, იკონია, პისიდიის ანტიოქია. და როცა სირიის ანტიოქიაში მათი დაბრუნების დრო დადგა, განა დაივიწყეს გამოვლილი ქალაქის მკვიდრნი და სარწმუნოების ამარა დატოვეს ისინი? არა, ისევ გამოიარეს ყველა ქალაქი, დაუწესეს მათ ეკლესიური ცხოვრების რიგი, ხოლო მეთვალყურეობისა და ყოველივეს ჭეროვნად შესრულებისათვის დაუდგინეს მწყემსნი, „უკურობნენ მათ ეკლესიად — ეკლესიად ხუცესნი“ (საქმე, 14, 23). ასევე მოიქცა ეფესოში და ასიის სხვა ქალაქებში, ყველგან დაადგინა კურთხევით მწყემსები და მასწავლებლები. შემდეგ, როდესაც ეფესოს ახლოს აღმოჩნდა ზღვით მოგზაურობისას და იქ ჩასვლის დრო კი არ ჰქონდა, ყველა ეს მწყემსი მილებში მიიხმო, დაემშვიდობა მათ და საბოლოო დარიგება მისცა მათი მსახურების შესახებ: „ეკრძალენით უკუე თავთა თქუენთა და ყოველსავე სამწყსოსა, რომელსა-ეგე თქუენ სულმან წმიდამან დაგადგინნა მოღუაწედ და მწყსად ეკლესიისა უფლისა ღმრთისასა, რომელი მოიგო სისხლითა თვისითა“ (საქმე, 20, 28). კიდევ ა.: რა მოხდა: რომიდან დაბრუნებისას, პირველი პერობილებიდან გათავისუფლების შემდეგ, პავლე მოციქულმა კუნძულ კრეტაზე შეიარა და იქ ქრისტეს სარწმუნოება გაავრცელა. მაგრამ რაკილა არ ჰქონდა დრო, რომ ყველგან დაეყენებინა მწყემსები, ამ საქმისთვის იქ დატოვა წმ. ტიტე, — „რამთა... დაადგინნე ქალაქად — ქალაქად ხუცესნი“ (ტიტ. 1, 5). ცხადია, წმ. პავლე სხვა ქალაქებშიც ასევე მოიქ-

ცოდა და ზუსტად ასევე იქცეოდნენ სხვა მოციქულები, რადგან თავიანთი მოსაზრებით კი არა, უფლის ბრძანებით მოქმედებდნენ. და არც ერთი ქრისტიანული საზოგადოება არ დარჩენილა ხელდასხმული მწყემსების გარეშე. ასე გრძელდება უფლის ეკლესიაში დღესაც, და მორწმუნეთათვის ესაა კანონი: „დაემორჩილენით წინამძღუართა თქუენტა და ერჩლით მათ, რამეთუ იგინი იღვიძებენ სულთა თქუენტათვის“ (ებრ. 13, 17). და ის, რაც უფალმა უთხრა თავის მოციქულებს, მღვდლებსაც შეეხება: „რომელმან თქუენი ისმინოს, ჩემი ისმინა, და რომელმან თქუენ შეურაცხ-გყვენეს, მე შეურაცხმყოფს, და რომელმან მე შეურაცხმყოს, შეურაცხ-ჰყოფს მომავლინებელსა ჩემსა“ (ლუკა, 10. 16).

10) ესაა ის ოთხი პუნქტი, რომლებიც უნდა შევასრულოთ და რომელთა მიხედვითაც უნდა წარვმართოთ ჩვენი ცხოვრების საქმე, თუ ჰეშმარიტად გვინდა ცხოვრება. მაგრამ არსებობს კიდევ ერთი პუნქტი, კერძოდ — მორწმუნეთა დასთან ცოცხალი ერთობა ეკლესიის წიაღში. უფალმა თავის ეკლესიას ვენახი უწოდა, სადაც იგია ვაზი, ხოლო მორწმუნენი — რტოები ვაზისა. ამიტომ ეკლესია, ანუ ერთობა მორწმუნეთა, არის ერთი, განუყოფელი მთლიანობა, რომელსაც ცოცხალი კავშირი აქვს ღმერთთან, ასეთივე კავშირია მის წევრებს შორის. როგორც ხმება და კვდება ხეს მოწყვეტილი ტოტი, ისევე კვდება სულიერად ყოველი, ვინც განუშორება ღმრთის ეკლესიას, ხოლო ეკლესიისგან განდგომით განუდგება უფალსაც (იოანე, 15). წმ. პავლემ ეს კიდევ უფრო ნათლად გამოთქვა, როდესაც ეკლესიას უფლის სხეული უწოდა. ჩვენ ყველანი, მორწმუნენი, შევადგენთ ქრისტეს სხეულს, ქრისტე კი არის თავი ამ სხეულისა. სხეულის ყოველი ასო ხომ საკუთარი კი არა, მთელი სხეულისათვის საერთო ცხოვრებით ცხოვრობს, და თუ სხეულს მოშორდა, კვდება და ლპება. ასევე თვითეული მორწმუნეც განცალკევებით კი არა, მორწმუნეთა მთელი დასის, ანუ ეკლესიის საერთო ცხოვრებით ცხოვრობს, და თუ მას გამოეყოფა, სულიერად შრება და კვდება (I კორ. 12, ეფეს. 4). ჰეშმარიტ მორწმუნეთა შორის ყოველთვის ითვლებოდა და დღესაც ითვლება ცხოვრების კანონად ეკლესიის წი-

აღში ყოფნა. ჩვენ აღვიარებთ, რომ ეკლესია დედაა ჩვენი, მართლად უთქვამთ, რომ ვისთვისაც ეკლესია დედა არ არის, მისთვის არც ღმერთია მამაო. ხოლო თუ ღმერთი არაა, მაშ ვინდა? როდესაც უფალმა წმიდა მოციქულთა მეშვეობით წმიდა ეკლესია დააფუძნა, ყოველივე, რაც ცხოვნებისათვისაა საჭირო, მასვე ჩააბარა დასაცავად და ქვეყანაზე გასავრცელებლად. ეკლესია იმარხავს სარწმუნოების ყველა საიდუმლოს და ყველა ქეშმარიტებას, მასშია მთელი მადლი და საიდუმლოებანი, რომელთა მეშვეობითაც გვეძლევა ეს მადლი, მასშია ქეშმარიტი სამღვდლოება, რომელიც ხელმძღვანელობს ჩვენი ცხოვნების საქმეს, მასზეა ნება უფლისა, რომელიც იცავს თავის ეკლესიას და ისმენს მის ლოცვას, და ამ ეკლესიაში კაცნი და ანგელოზნი, ყოველნი გონიერნი არსნი, ერთობით ემსახურებიან ყოვლად სახიერ ღმერთს.

ეს ამბავი, ანუ ეკლესიის წიაღში ყოფნა და საკუთარი ცხოვნების საქმის იქვე წარმართვა ყოველ მორწმუნეს რამდენიმე მოვალეობას აკისრებს: 1) სწამდეს, როგორც სწამს მთელ ეკლესიას დასაბამიდან ვიდრე დღეინდელ დღემდე, ეკლესიის ხმას შეუდაროთ ყოველი ახალი მოსაზრება, ჩვენი თუ სხვისი, იმავე წესით გადავწყვიტოთ ყოველი ახლად გაჩენილი გაუგებრობა, და არავითარ შემთხვევაში არ მივცეთ მას უფლება რაიმე ისეთის გაკეთებისა, რაც თუნდაც სულ ოდნავ უხვევს ეკლესიის სწავლებიდან, რამეთუ ეკლესია „არს სუეტი და სიმტიციე ქეშმარიტებისაჲ“ (I ტიმ. 3, 15). იცოდე, ვინც ამას არ ასრულებს, ისაა მეზვერე და წარმართი, როგორც თვით უფალი ამბობს (მათე, 18, 17). 2) არაფრით არ გამოირჩეოდეს სხვებისაგან ეკლესიური ცხოვრების მხრივ — მარხვა შეინახოს მაშინ, როცა ყველა იმარხავს, ეზიაროს ისე, როგორც ეკლესიაშია დაწესებული, და საერთოდ, ყველა ეკლესიური წესი შეასრულოს თანახმად მოციქულის სიტყვისა, რომელიც გვიჩრძალავს კრებულის მიტოვებას (ებრ. 10, 25). 3) გვჯეროდეს, რომ ამ ქვეყნიური და ზეციური მკვიდრნი უწყვეტ, ცოცხალ და უშუალო კავშირში არიან ერთმანეთთან. ამიტომ ჩვენს ლოცვებს მათთვის და მათ წინაშე, და მათ ლოცვებს ჩვენთვის კიდევაც ისმენს ღმერთი და ძალაცა აქვთ. ჩვენა ვართ თვისნი და მახლობელნი ანგელოსთა და ყოველთა საუკუნითგან

ღმრთის სათნოყოფილთა, რამეთუ, რაკი ეკლესიის წევრები ვხდებით, მოსულ ვართ „მთასა სიონსა და ქალაქსა ღმრთისა ცხოველისასა, იერუსალემსა ზეცისასა და ბევრეულსა ანგელოზთა კრებულსა, და ეკლესიასა პირმშობთასა, აღწერილსა ცათა შინა“ (ებრ. 12, 22—23).

აჲლა თავი მოვეუყაროთ ყოველივეს, რაც აქამდე ვთქვით ცხოვნების გზის შესახებ და გავიმეოროთ: გნებავს ცხოვნება? გრწმენინ მთელი ღმრთივეგამოცხადებული სწავლება, საღმრთო საიდუმლოთა მგეშვებობით მიიღე სული წმიდის მადლი, იცხოვრე უფლის მცნებებით, ღმრთივდადგინებული მოძღვრების ხელმძღვანელობით და მათი მორჩილების გზით, ოღონდ ყოველივე ეს უფლის ეკლესიის წიაღში უნდა ხდებოდეს, მისი სჯულისმდებლობით, მასთანვე უნდა იმყოფებოდე უწყვეტ, ცოცხალ კავშირში, და ცხოვრებით. ცხოვნების გზის ამ სურათს თამამად შეგვიძლია დავუმატოთ იოანე ღვთისმეტყველის შეგონება: „ყოველივე, რომელი გარდაჰხდებოდის და არა ეგოს მოძღურებასა ზედა ქრისტესსა, მის თანა ღმერთი არა არს, ხოლო რომელი ეგოს მოძღურებასა ზედა ქრისტესსა, მის თანა ძეცა და მამაცა არს. რომელი მოვიდეს თქუენდა და ესე მოძღურება არა მოაქუნდეს, ნუ შეიწყნარებთ მას სახლთა თქუენთა და „გიხაროდენ“ ნუ ეტყვით მას. რამეთუ რომელმან ჰრქუას მას „გიხაროდენ“, ეზიარების საქმეთა მისთა ბოროტთა“ (II იოანე. 9—11).

11) ყოველივე ზემოთქმულის შემდეგ თვითონვე შეგიძლია იმსჯელო, არის თუ არა რაიმე სიმაართლე თქვენი ახალი მასწავლებლის სიტყვებში. „ერთხელო“, მწერ, „დიდხანს გვესაუბრა იმის შესახებ, რომ აუცილებელია სიტყვით აღვიაროთ უფალი იესო ქრისტე, და მხოლოდ ის, ვინც ასე აღიარებს ქრისტეს, მიიღებს კიდევ მას თავის თავში, და ქრისტე აღავსებს მას და იცავს მადლითა თვისითა. ერთ კაცს ეს ჩვენი მასწავლებელი ჩააცივდა, აღიარეო, ის კი არ დათანხმდა, ამბობდა, მრცხვენიაო. ძალიან კარგად მოიქცა, რომ არ დათანხმდა. წრფელი სული ჰქონია, რადგან ასეთი აღიარება ღმრთის ნების საწინააღმდეგოა. ამ კეთილ ქრისტეანს სინდისმა არ მისცა უფლება ამგვარი აღიარებისა. ეს იქნებოდა მეტიჩრობა და თავისმოწონება. იესო ქრისტეს აღიარება დიდი ღვაწლია

და უფალმა აღგვიტქვა, რომ მას, ვინც აღიარებს წინაშე კაცთა, თავდაც აღიარებს წინაშე მამისათვისისა (მათე. 10, 32). მაგრამ როდისაა ესოდენ ფასეული ეს აღიარება? მაშინ, როცა ან უნდა აღიარო, რომ გრწამს უფალი იესო ქრისტე, და ამის გამო მყისვე საშინელი წამება და სიკვდილი მიიღო, ან უნდა უარყო ქრისტე და თაყვანი სცე კერპებს. კაცი, რომელიც ასეთ დროს აღიარებს ქრისტეს, უკვე მოწამის ღვაწლს იღებს, ამიტომაცაა მისი აღიარება ესოდენ ფასეული. უფლის ეკლესიაში აღმსარებელნი მოწამეთა სწორებად არიან შერაცხილნი. მოწამეები არიან ისინი, ვინაც აღიარა ქრისტე, ეწამა და მოკვდა. აღმსარებელნი — ისინი, ვინაც აღიარა ქრისტე, ეწამა, მაგრამ რაიმე შემთხვევის გამო ცოცხალი დარჩა. აი, როგორ აღიარებას გულისხმობს უფალი! ამიტომაც უპირისპირებს ასეთ აღმსარებლებს იმათ, ვინაც უარყოფს მას: „და რომელმან უარ-მყოს მე წინაშე კაცთა, უარ-ვეყო იგი მეცა წინაშე მამისა ზეცათაჲსა“ (მათე. 10, 32). ერთი მითხარბი, არის კი თქვენთან ასეთი ვითარება, რომ ან უნდა უარყო ღმერთი, ან ბედნიერი ცხოვრება არჩიო? არა. მაშასადამე, ვერც ისეთ აღმსარებლობას გამოიჩინ უფლის წინაშე, რომ ესოდენ სათნო იყოს. მეტიჩრობისა და თავმოწონების საშუალება კი ყოველთვის გაქვს. გამოდი ქუჩაში და იყვირე რამდენიც გინდა: მწამს ღმერთი და აღვიარებ მას. მაგრამ ასეთი აღიარება ქარს გატანებული იქნება, იმ თქვენი მასწავლებლის მოთხოვნისა არ იყოს. თქვენი ახალი მასწავლებელი აღიარებას ასეთ აღთქმას უკავშირებს: როგორც კი სიტყვით აღიარებ ქრისტეს, მაშინვე მიიღებ მას შენში. საიდან მოიტანა? იხილე, რას გვასწავლიან უფალი და წმ. მოციქულები იმის შესახებ, თუ როგორ შეიმოსავეს ქრისტეს ადამიანი. წმ. პავლე მოციქული ამბობს: „რაედენტა ქრისტეს მიმართ ნათელ-იღეთ, ქრისტე შეიმოსეთ“ (გალ. 3, 27). იმან, ვინაც ქრისტე შეიმოსა, ცხადია, მიიღო კიდევ იგი თავის თავში. მაშასადამე, ქრისტეს ღებულობს ის, ვინაც ნათელ-იღო. ნათლისღების წინ ადამიანი კითხულობს მრწამსს და ამით აღიარებს ქრისტეს, მაგრამ ამ გზით კი არ დაიმკვიდრებს მასში უფალი, არამედ ნათლისღების შედეგად. აი, რას გვასწავლის მოციქული, თქვენი მასწავლებელი კი

სულ სხვა რამეს ამბობს. ეს მისი გონების ნაყოფია და არა უფლის გამოცხადების ან აღთქმის შედეგი.

გარდა ამისა, უფალი ამბობს: „და რომელი ჰამდეს ხორცსა ჩემსა და სუმიდეს სისხლსა ჩემსა, იგი ჩემ თანა დადგრომილ არს, და მე მის თანა“ (იოანე. 6, 56). უფალი იმიტომ არის იმ ადამიანთან, რომელიც ეზიარა, რომ წმ. ზიარების წყალობით მან მიიღო უფალი თავის თავში... ზიარების წინ ჩვენ ვალიარებთ ქრისტეს და ვამბობთ: „მრწამს, უფალო, და აღვიარებ“... მაგრამ ამ აღიარების გამო კი არ დაემკვიდრება ჩვენში უფალი, არამედ ხორცისა და სისხლის მიღების წყალობით. აღიარება კი მხოლოდ კარს უღებს უფალს, რათა იგი შემოვიდეს ჩვენში მის წმ. საიდუმლოთა ზიარების გამო.

ხომ ზედავ, ქრისტე დაიმკვიდრებს ჩვენში ნათლისღებისა და წმ. ზიარების მეშვეობით, და არა მხოლოდ მისი აღიარებით, თუმცა კი ამ საიდუმლოთა შესრულების წინ ჩვენ აღვიარებთ ქრისტეს. თქვენმა ახალმა მასწავლებელმა კი სულ სხვა გზა აღმოაჩინა უფლის მიღებისა. ის ამას აკეთებს თავისი ამაღლებიერებას აყოლილი გონებით.

სხვა ადგილას იმავე იოანე ღვთისმეტყველის პირით უფალი გვიჩვენებს კიდევ ერთ გზას მისი მიღებისას, ანუ მცნებათა დამარხვის გზას. „რომელსა აქუნდენ მცნებანი ჩემნი და დაიმარხნეს იგინი, იგი არს, რომელსა უყუარდე მე, ხოლო რომელსა უყუარდე მე, საყუარელ იყოს მამისა ჩემისა მიერ, და მეცა შევიყვარო იგი და გამოუცხადო მას თავი ჩემი“ (იოანე. 14, 21). და კიდევ იქვე: „უკუეთუ ვისმე უყუარდე მე, სიტყუანი ჩემნი დაიმარხნეს, და მამამანცა ჩემმან შეიყვაროს იგი, და მოვიდეთ მისა და მის თანა დავადგრეთ“ (იოანე. 14, 23). არ გეგონოს, თითქოს მცნებათა აღსრულება ცალკე გზა იყოს, რომელსაც ნათლისღებისა და ზიარების გარეშე მიყვარვართ უფლის მიღებისაკენ. ნათლისღებისა და ზიარების მადლი გვაძლევს იმის ძალას, რომ მტკიცედ დავიმარხოთ მცნებები. გული ისეთი კაცისა, ვინაც ყველა მცნებას ასრულებს, თავის სულს სხვადასხვა სათნოებებით ამკობს, ხდება ტაძარი, ღირსი უფლის დამკვიდრებისა, და მასში მართლაც შევალს ღმერთი. უფალი კაცის გულშია დავანებული წმ. ნათლობის დროს, კიდევ უფრო წრფელია ეს ერთობა წმ. ზიარების დროს. მაგ-

რამ ვიდრე სულში ჯერ კიდევ რჩება ვნებების კვალი, ვიდრე იგი მთლიანად არ განიწმინდება მცნებათა დამარხვის გზით, უფალი საბოლოოდ არ დაიმკვიდრებს მასში. იგი არ დაივანებს ასეთ სულში, ჯერ ვერ ენდობა მას მთლიანად, ჯერ მხოლოდ იმზადებს მასში მშვიდ სამყოფელს. ხოლო როცა სული სათნოებებით განიწმინდება, მაშინ კი მინდობილად შედის მასში ღმერთი, და ცხოვრობს იქ მშვიდად, რამეთუ არ აშფოთებს ცოდვისა და ვნების სუნთქვა. ამრიგად, სარწმუნოება მიიზიდავს უფალს, საიდუმლოებებში მონაწილეობა ღირსყოფს კაცს, რომ უფალმა მოიხილოს და თანამეყეოს, ხოლო როდესაც მორწმუნე ღმრთის შეწევნით განწმენდს თავის თავს ცოდვათაგან მცნებათა აღსრულების გზით და გულში სათნოებებს მისცემს ადგილს, მაშინ ღმერთი საბოლოოდ ჩასახლდება მასში და იქ დაივანებს. აი ესაა უფლის მიღების გზა. ამ გზას აქვს თავისი ეტაპები — დასაწყისი, გაგრძელება და დასასრული. ზემოთ მოყვანილ ადგილას უფალი სწორედ ამ დასასრულზე ლაპარაკობს. მაგრამ საფუძველი მთელი ამ საქმისა არის საიდუმლოებების გზით მიღება უფლისა. საიდუმლოებების გარეშე უფალს ვერც სარწმუნოება მიიზიდავს და ვერც სათნოებები. თავისთავად ამ ორი პირობის გამო უფალმა შეიძლება კაცი მიიყვანოს საიდუმლოებებში მონაწილეობამდე და ასე დაემკვიდროს მასში, როგორც ეს კორნელიუს ასისტავს უყო. ამ გზაზე თავისი ადგილი აქვს აღმსარებლობასაც, მაგრამ ესაა მხოლოდ მოსამზადებელი ნაწილი, და სრულიადაც არაა ერთადერთი გადამწყვეტი პირობა უფლის მიღებისათვის.

უფლის აღმსარებლობას მხოლოდ ის მნიშვნელობა როდი აქვს, რომ მაგით თქვა, მწამს უფალიო. აღმსარებლობა საერთოდ ქრისტიანად ყოფნას ნიშნავს. როდესაც გვეკითხებიან, რომელ აღმსარებლობას ეკუთვნითო, ვპასუხობთ, ქრისტიანულსო, და ეს პასუხი უკვე იმას ნიშნავს, რომ ვამბობთ: ქრისტიანი ვარო. ახლა ვნახოთ ამ სიტყვის მკაცრი მნიშვნელობა. რას ნიშნავს ქრისტიანობა? იმას, რომ მართლად გვეწამდეს, სიწმიდით ვცხოვრობდეთ, საიდუმლოებებით განვიწმინდებოდეთ, მოძღვრებს ვემორჩილებოდეთ; მართლმადიდებელი ეკლესიის წევრები ვიყოთ და მტკიცედ ვასრულებდეთ ყოველივე, რასაც ეკლესია ბრძანებს, — ანუ, გავაკეთოთ ყველა-

ფერი, რაც ცხოვრების გზას შეადგენს. მაშასადამე, ჭეშმარიტად აღიარებს უფალს ის, ვისაც სწამს უფალი, საიდუმლოებებით განიწმინდება და მათი მეშვეობით სული წმიდის მადლს იღებს, სიწმინდით ცხოვრებას მისდევს უფლის მცნებათა მიხედვით და ეკლესიის მოძღვრების მორჩილებით: და ყოველივე ეს შარულშადიდ უფლა ეკლესიის სჯულისდების მისეღვით ხდება. აი ესაა ნამდვილი აღმსარებლობა და არა ის, ვინც მხოლოდ ბაგით აღიარებს უფალს. წმ. იოანე ღვთისმეტყველი თავის პირველ ეპისტოლეში, აღმსარებლობაზე საუბრისას, სწორედ ასეთ, საქმიან ქმედით აღმსარებლობას გულისხმობს.

თქვენი მასწავლებელი უფლის ზეპირი აღმსარებლობის ნაყოფად მიიჩნევს აღმსარებლის აღვსებას სული წმიდის მადლით. აღმსარებლობის გზით უფალი რომ შემოდიოდეს ჩვენში, მაშინ, ცხადია, მადლიც შემოვიდოდა, რამეთუ მადლი არის მოხილვა ჩვენი უფლისა მიერ და მისი ერთობა ჩვენთან. მაგრამ როგორც უწინაც ვთქვი, უფალი შემოდის ჩვენში არა აღმსარებლობის გზით, არამედ საიდუმლოებების მეოხებით. ისიც განგიმარტე, რომ მადლი სული წმიდისა მხოლოდ საიდუმლოებათა მეშვეობით მიიღება. არასოდეს მომხდარა უფლის ეკლესიაში, რომ რაიმე სხვა გზით მიეღოს იგი ვინმეს. მაშასადამე არ უნდა ვიფიქროთ, რომ მხოლოდ ზეპირი აღმსარებლობით შეიძლება მადლის მიღება. ეს რაღაც ამასა ჰგავს: ოღონდ შენ პირი დააღე, და სული წმიდის მადლიც შემოფრინდება. ამ შემთხვევაში უპრიანია თქვენს მასწავლებელს და მის მიმდევრებს, რომლებიც მხოლოდ ზეპირი აღმსარებლობის გზით ფიქრობენ მადლის მიღებას, პირლიები ვუწოდოთ.

12) მწერ: „ჩვენი ახალი მასწავლებელი თავისი სიტყვებით ლოცულობს, მაგრამ ლოცვის დროს არც პირჯვარს ისახავს, არც მუხლს იყრის“.

ხომ ხედავ, რა მოდური კაცია? მთელი ქრისტიანული სამყარო პიჯვარს იწერს, ისინიც კი, ვინც ქრისტეს სარწმუნოებას არასწორად აღიარებენ, ამას კი ეთაკილება. პირჯვარს ვინც ისახავს, ის უსიტყვოდ აღიარებს უფალ იესო ქრისტეს, რომელმაც ჩვენთვის დაითმინა ჯვარცმა და სიკვდილი, და ამით გამოგვიხსნა სასჯელისაგან. თქვენი მასწავლებელი გაიძახის, ბაგით აღიარეთ ქრისტეო. თქვენც უნდა გეთქვათ, აღიარე ქრის-

ტე პირჯვარის გადასახვითო. ერთი და იგივეა: ერთიც აღმსარებლობაა და მეორეც, ოღონდ პირველი — სიტყვით, მეორე კი საქმით. საქმე სიტყვაზე ძლიერია. თქვენი მასწავლებელი ეუბნება მას, ვინც უარი თქვა სიტყვით აღიაროს უფალი: აჰა, გრცხვენია ხომ კაცთა წინაშე უფლის აღიარება? თქვენ კიდევ უთხარით: შენც გეთაკილება პირჯვარის გადასახვა, მაგრამ ესეც ხომ აღიარებაა უფლისა! მაშ, შენ თვითონაც გრცხვენია უფლის აღიარება კაცთა წინაშე-თქო.

წმ. ბასილი დიდი გვიმოწმებს, რომ პირჯვარის გადასახვა მოციქულთა შემოღებულთა, და იგი, სარწმუნოებით როცა სრულდება, განაგდება უხილავ მტრებს. განაქარვებს მთელ მათ მზაკვრობას და გვიცავს მათი თავდასხმისაგან. უფალი ჭვარით მუსრავს მტრის ძალას. ეს იციან ჩვენმა მტრებმა და გაუბრძან ჭვარს, ხოლო ვინც არ ისახავს პირჯვარს, და ვინც არ იყენებს ჭვარის ძალას, იმას მტერი ადვილად ერევა. უიარალო მეომარსა ჰგავს ის ქრისტიანი, რომელიც პირჯვარს არ იწერს, საითაც უნდა, იქით უზამს თავს მტერი ასეთ კაცს. პირჯვარის გადასახვით იკურთხება ყველა საღმრთო საიდუმლოება, ჭვართავე ხდება ყველა ნივთის კურთხევა. ასე მიიღო წმ. ეკლესიამ მოციქულთაგან, და ასე იქცევა ყველა ქრისტიანი. ამიტომ ბუნებრივად ისმის კითხვა: არის თუ არა ქრისტიანი ის, ვინც ჭვარის გადასახვას ერიდება?

თავის მოღრეკით ჩვეულებრივ ჩვენს პატივისცემასა და მორჩილებას ვადასტურებთ. ხომ აუცილებელია, რომ ადამიანი, რომელიც ღმერთს აღუვლენს ლოცვას, ღრმა მოწიწებისა და სრული მორჩილების გრძნობით შეუდგეს ამ საქმეს? ამდენადვე აუცილებელია ამ გრძნობის გარეგნული გამოხატვა თაყვანისცემით. ამიტომაცაა, რომ ქრისტიანები თაყვანს სცემენ უფალს გარეგნულადაც, შინაგანი შიშისა და სრული მორჩილების ნიშნად. ვინც გარეგნულ თაყვანისცემას ერიდება, ის საეკვოდ ხდის, ნამდვილად განიცდის თუ არა შინაგანად ამ გრძნობას — კრძალვასა და მორჩილებას. და თუ ეს გრძნობები არა აქვს, რაღაა მაშ მისი ლოცვა? არსებობს გამოთქმა — ქედს არ იღრეკსო. ეს იმას ნიშნავს, რომ კაცს დაუმორჩილებელი სული აქვს, არავის არა სცნობს უფროსად. ასეთივე სული აქვს იმას, ვინც ლოცვის დროს მუხლს არ იყ-

რის. ცუდი ჩვევაა. უბრალოდ რომ ვთქვათ, ქედს არ იღრკეს, მერედა ვის წინაშე? ღმრთის წინაშე.

13) მწერ: „სანდო ხალხმა მითხრა, რომ თურმე არც ჩვენია ახალი მასწავლებელი და არც მისი მიმდევრები ეკლესიაში არ დადიან, წმიდანებს არ უხმობენ ლოცვებში, არც ღმრთის, - მშობელს, არც ანგელოსებს, არც მოციქულებს და წინასწარ-მეტყველებს, არც დიდ მღვდელმთავრებს, არც მოწამეებს და ღირს მამებს, მარხვებს არ ინახავენ, აღსარებას არ ამბობენ, ქრისტეს წმ. საიდუმლოებებს არ ეზიარებიან და ღღესასწაულებს არ სცნობენ“.

ხედავ, რა ყოჩალი ხალხია? ნამდვილი მალაკნები. თუმცა ინგლისელისაგან კი ისწავლეს მთელი ეს „სიბრძნე“. ჩვენი მალაკნები და დუხობორები საკუთარ თავს სულიერ ქრისტიანებად, ღმრთის კაცებად, წმიდანებად თვლიან, რომლებსაც გარეგნული საეკლესიო წესები აღარაფრად სჭირდებათ, არც რაიმე მოღვაწეობა, მაკურთხეველი საიდუმლოებები და მღვდელმოქმედება არგიათ რადმე. თქვენი პირლიებიც მაგ ყაიღის ხალხია. მაინც არ მესმის, რას დასდევთ კულში იმ თქვენს ახალ მასწავლებელს, რატომ აძლევთ იმის ნებას, რომ ფუჭი ლაპარაკით გამოგიჟედოთ ყურები? შენ რაც თქვი, იქიდან სრულიად ნათელია, რომ იგი განუდგა წმიდა მართლმადიდებელ ეკლესიას, და თავის სწავლებას იმიტომ ქადაგებს, რომ თქვენც განვაშოროთ ეკლესიას და რაიმე სექტა შექმნას, ეკლესიისთვის უცხო და ღმრთისათვის შეუწყნარებელი. თქვენ კიდევ ისე ეწებებით, როგორც უგუნური ბუზები მოწამლულ სითხეს. იმის მოყოლას არ დაგიწყებთ, რომ თქვენი მასწავლებელიც და მთელი მისი გუნდიც მწარედ ცდება, ეკლესიასა და შენგან ჩამოთვლილ სხვა პუნქტებს რომ არ იღებს. მაგრამ გირჩევ წაიკითხო სტეფანე იავორსკის წიგნი „ლოდი სარწმუნოებისა“, სადაც ავტორი ყველა ამ პუნქტს იცავს და მათ უარყოფელებს ამხილებს. ყურადღებით წაიკითხე და შეითვისე ეგ წიგნი. მაშინ ამ ლოდით დაუყოფ პირს სიცრუის მლაღადებელთ და შემუსრავ ჰეშმარიტების წინაშე მცოდველთა კბილებს, რომლებიც კადნიერად ამბობენ თავიანთ სათქმელს, ტყუილითა და ცბიერებით სავსეს. ეს წიგნი პროტესტანტების წინააღმდეგაა მიმართული, პროტესტანტები კი იგივე მალაკნე-

ბი არიან, ოლონდ გერმანელები. ისევე როგორც ეგ თქვენი სიახლის შემომტანები არიან ინგლისური ყაიდის მალაქნები.

14) მწერ: „ჩვენთან არ ესმით, რატომ სდუმან ჩვენი მწყემსები. ეს მასწავლებელი ყველგან მოგზაურობს, რალაციებს ცდილობს, ასწავლის, შთაგონებით ლაპარაკობს ჩვენები კიდევ ჩუმად არიან. ეკლესიაშიც იშვიათად თუ ქადაგებს რომელიმე მათგანი, მხოლოდ წირვა-ლოცვას ატარებენ. ცოცხალი სიტყვააა საჭირო, ის კი არსად ჩანს“.

ერთ რამეს გკითხავ: რომელიმე თქვენგანი თუ მივიდა მოძღვართან და უთხრა, ასეა, ერთი მასწავლებელი გამოჩნდა ჩვენთან, თავს გვიყრის და გვასწავლის, ნახეთ ერთი, სწორად გვასწავლის თუ არაო? — არც ერთი. თუნდაც შენი მაგალითი ავიღოთ: ვინ იცის რამდენჯერ მომწერე მე, ცხრა მთას იქით მყოფს, და აზრადაც არ მოგსვლია შენი მოძღვრისთვის მიგემართა, რომელიც მანდვეა და ყოველ კვირას, ყოველ დღესასწაულზე ხედავ. მერე, მოძღვრებმა საიდან უნდა გაიგონ, რა ხდება თქვენთან ჩუმ-ჩუმად? თქვენი მოძღვარი მოდის ეკლესიაში, ხედავს თავის მრევლს, ეკლესიაში რომ შეკრებილა და გულმოდგინედ ლოცულობს, და მშვიდადაა, რადგან დარწმუნებულია, რომ მის სამწყსოში ყველაფერი რიგზეა. დოგმატები იცით, მცნებები გახსოვთ, ეკლესიას ემორჩილებით. რალა უნდა გითხრათ? შეიძლება ხანდახან კიდევ ერთხელ განგიმარტონ რაიმე დოგმატი, მცნება ან საიდუმლო. მაგრამ ეს ასეც ხდება ხანდახან, როგორც თავადვე მწერ. უამისოდაც მთელი ჩვენი ღმრთისმსახურება ისეა შედგენილი, რომ გულისყურიან კაცს დოგმატებსაც შეახსენებს და ცხოვრების წესებსაც, და საერთოდ მთელი თავისი ქმედებით ღმერთთან კავშირს განამტკიცებს. და მხოლოდ ყოფნა ეკლესიაში განაახლებს მთელ რელიგიურ სულს, ეს ალბათ ყველას გამოუცდია. გეტანხმები, რომ მოძღვრები უფრო ხშირად უნდა ესაუბრებოდნენ სამწყსოს წევრებს ეკლესიაში და ეკლესიის გარეთ, მაგრამ იმაში კი ვერ დაგეთანხმები, რომ რაკილა ასეთი საუბრები არ ტარდება, სამწყსო მთლიანად მოკლებულია ყოველგვარ სულიერ საზრდოს. სხვათა შორის, იმაშიც, რომ ასეთი საუბრები არ ტარდება, მზადა ვარ უფრო თქვენ, სამწყსო დაგდანაშაულოთ, ვიდრე თქვენი მწყემსები. სურვილი გა-

მოთქვით, სთხოვეთ, და განა რომელი მოძღვარი გეტყვით უარს ასეთი კეთილი სურვილი ასრულებაზე? თქვენ თვითონ ერიდებით მოძღვრებს, სადმე თუ შეხვდით, არც კი ჩამოუგდებთ სიტყვას სარწმუნოების საკითხზე. თქვენი შემყურე აღარც ის ამბობს რაიმეს, და ეკლესიაშიც აღარ ქადაგებს, რადგან შიშობს, თავი არ მოგაბეზროთ და ეკლესიას არ მოგწყვიტოთ. თუმცა მწყემსების ღუმილს როდი ვამართლებ — მათი ვალია კეთილი ინებონ და ილაპარაკონ, სამწყსომ კი უნდა უსმინოს. მხოლოდ იმის შეხსენება მინდა, რომ ამ ამბავში თქვენცა ხართ დამნაშავე. ამბობ: „ჩვენები სღუმან, ის კი რაღაცეებს ცდილობს“. ცდილობს, იმიტომ რომ მოწაფეები და მიძღვერები უნდა შეაგროვოს, და როცა შეაგროვებს, ისიც გაჩუმდება, რადგან მის გარშემო თავმოყრილ მოწაფეებს უკვე ყველაფერი ეცოდინებათ, რასაც იგი ასწავლის. ისიც უნდა ვიცოდეთ, რომ მცდელობა, ფუსფუსი, ყვირილი — ეს ყოველივე სულაც არ არის სიჯანსაღის ნიშანი. სხეულს დააკვირდი: როცა იგი ჯანმრთელია, მასში ყველა პროცესი მშვიდად მიდის: პულსი აუჩქარებელია, სუნთქვა — წყნარი, გონება დადინჯებული, ნერვები და კუნთები ზომიერადაა დაძაბული. მაგრამ როგორც კი სხეულში რაიმე ფუნქცია იშლება, მაშინვე ირღვევა ეს მშვიდი პროცესიც და სხეულის ჯანმრთელობაც ირყევა. ასევეა სარწმუნოებისა და ცხოვნების საქმეშიც. თქვენ, მთელი თქვენი მრევლი, ხართ მცირე სხეული ეკლესიისა. მშვიდად მიედინება თქვენში ყველა მაცხოვრებელი პროცესი: სარწმუნოებას იმარხავთ, ცდილობთ ქრისტიანულად იცხოვროთ, საიდუმლოებებში მონაწილეობთ, საეკლესიო წესებს იცავთ და ცდილობთ დაემორჩილოთ თქვენს მოძღვრებს. საცხოვრებელი საქმეები თქვენთან სწორადაა წარმართული, თუმცა თქვენ შორის გამორჩეული არავინ ჩანს. ჯანსაღი სხეული შეუმჩნეველად ცხოვრობს და იზრდება, და ასევე თქვენც ცხოვრობთ და იზრდებით სულიერად, თუმცა კი ეს შეუმჩნეველია. ამრიგად, ის ამბავი, რომ ის აქეთ-იქით აწყდება და ფუსფუსებს, თქვენთან კი ყველაფერი წყნარად მიდის, იმას როდი ნიშნავს, რომ თქვენ მასთან შედარებით უარეს დღეში ხართ, არამედ პირიქით, ეს მშვიდი დინება ცხოვნების საქმეში სიჯანსაღის დასტურია. თქვენ კეთილად აღასრულებთ სული-

ერ ღვაწლს, მჩხავანას მდგომარეობა კი არაჯანსაღია, და აქეთ-იქით რომ აწყდება, იმას მაფიქრებინებს, რეტიანთაგანი უნდა იყოს-მეთქი. ცუდია, თუ ვინმე თქვენგანი რელიგიური ცხოვრების მშვიდი დინების დროს უღებებასა და უზრუნველობას ეძლევა. მაგრამ თუკი ყოველი კაცი ძალისაებრ გულმოდგინედ იქმს ყველაფერს, რასაც მისგან ქრისტიანული სინდისი მოითხოვს, და არავინ არაფრით გამოირჩევა სხვებისგან, მაშინ ჩვენი ცხოვრების საქმე სწორად მიდის, და მაშინ აღარაფერია სადარღებელი, ან რატომღა უნდა გაეკიდო ვილაცას მხოლოდ იმიტომ, რომ ის რაღაც განსაკუთრებულს წარმოადგენს. გაიხსენე, რას გეუბნებოდი თავიდან მგალობელთა გუნდის შესახებ — ცუდად იქცევა ის, ვინც გამოირჩევა გუნდიდან. იგივე მაგალითი გამოდგება იმის დასტურადაც, რასაც ახლა გეუბნები.

ახლა კი, ვგონებ ყველაფერი გითხარი, რისი თქმაც მინდოდა შენი წერილის პასუხად. ალბათ შენც ხვდები, რომ ერთი-ღა შემიძლია დავუმატო ნათქვამს: მოეშვი მაგ ახალ მასწავლებელს, მოცთუნებულ მალაქანს, და, როგორც აქამდე, დღე-იდანაც წმ. მართლმადიდებელი ეკლესიისა და მისი მწყემსების ერგულება დაიმარხე. სხვა შენიანებსაც იგივე ურჩიე. ვლინეთ ამ მჩხავანას, ვუყურეთ, მისი დაშაქრული საუბრებიც მოვისმინეთ და გვეყო. ეს სიკეთეს არ მოგვიტანს. ხოლო იმისათვის, რომ უფრო მტკიცედ იდგე სარწმუნოებაში და მისი ტყბილი სიტყვებით არ მოიხიბლო, იშოვე, როგორც უკვე გირჩიე, „ლოდი სარწმუნოებისა“ და იკითხე. ან უმჯობესია, ერთად შეიკრიბოთ ყველანი, ვინც ეკლესიისთვის უცხო, მწვალებლური საუბრებით შეიბღალეთ სმენა, და ერთად იკითხოთ, თან საკუთარ თავს აყვედროთ, მტრის ხლართებში რომ გაებით.

თარგმნა რ უ ს უ დ ა ნ ბ უ ა ჩ ი ძ ე მ.

მღვდელმონაზონი სერაფიმ როუზი

მღვდელმონაზონი სერაფიმე როუზი (ერისკაცობაში იუჯინ როუზი), იყო ჟურნალ „მართლმადიდებლური სიტყვის“ ერთ-ერთი დამაარსებელი და რედაქტორი. მან საფუძველი ჩაუყარა წმიდა გერმანე ალიასკელის სახელობის მონასტრის შექმნას. პლატინში (კალიფორნია, აშშ).

როუზი დაიბადა 1934 წელს კალიფორნიაში, იზრდებოდა ტიპიურ ამერიკულ პროტესტანტულ ოჯახში. კოლეჯის დამთავრების შემდეგ მან ბერკლის უნივერსიტეტში განაგრძო სწავლა, სადაც მიიღო ხელოვნებათა მაგისტრის ხარისხი. მართლმადიდებლობას იგი პირველად 1961 წელს გაეცნო, ჯორდანვილის სასულიერო სემინარიის კურსდამთავრებულის, ამჟამად იღუმენი გერმანეს ლექციაზე დასწრებისას. 1963 წელს ინგლისურენოვანი მოსახლეობის მოსაქცევად გადაწყდა შექმნილიყო ძმობა, რომელიც წმიდა გერმანე ალიასკელის სახელს ატარებდა. სერაფიმე როუზი ერთ-ერთი ავტორი იყო ამ მისიონერული ჩანაფიქრისა. თავდაპირველად ძმობა სან-ფრანცისკოში დაარსდა 1965 წელს. მათ დაიწყო ჟურნალ „მართლმადიდებლური სიტყვის“ გამოცემა, აგრეთვე გახსნეს ხატებისა და წიგნების მაღაზია, სადაც როუზი ხშირად იმყოფებოდა, რათა მომსვლელთა შეკითხვებზე ეპასუხა და სულიერად დაემოძღვრა ისინი. 1967 წელს ძმობამ სამონასტრო ცხოვრებისათვის შესაფერისი ადგილის ძებნა დაიწყო. მრავალი ძიების შემდეგ ჩრდილოეთ კალიფორნიაში ასეთი ადგილი მართლაც მოიხაზა და გადაწყდა მონასტრის მშენებლობა. 1970 წელს როუზი ბერად აღიკვეცა. მას მთის ფერდობზე პატარა კელია ჰქონდა აშენებული, სადაც განმარტოებით ცხოვრებასა და ლოცვით ღვაწლს ეწეოდა. აქ დაწერა მან წიგნები: „მართლმადიდებლობა და „მომავლის რელიგია“, „სული სიკვდილის შემდეგ“, ცნობილი წერილი „სამეუფო გზა“ და სხვა. აქ ლოცულობდა და ემზადებოდა იგი იმპვეყნიური ცხოვრებისათვის. 1977 წელს იგი იეროდიაკონად იქნა ხელდასხმული, მცირე ხნის შემდეგ კი — მღვდელმონაზონად. მამა სერაფიმესთან ათასობით ადამიანი მოდიოდა სულიერი საზრდოს მისაღებად. ასე იხსენებს მას ერთი ახალგაზრდა კაცი, რომელმაც

ეს მონასტერი მოინახულა: „მონასტრის სულიერი მოძღვარი არის მამა სერაფიმე და მრავალი აქ სწორედ მის სანახავად მოდის. მისი წარსულის შესახებ ვიცი, რომ ის ამერიკელია, სან-ფრანცისკოდან, უაღრესად განათლებულია, დაამთავრა რამდენიმე უმაღლესი სასწავლებელი და მრავალი რელიგია საკმაოდ ღრმად შეისწავლა. მანგალითად, იუდაიზმს იგი ძველებრაულ ენაზე გაეცნო, კონფუციუსის მოძღვრებას კი — ძველ ჩინურზე. გარდა ამ ენებისა, იგი ინდურსაც ფლობს; ადრე იოგათი და ოკულტიზმითაც იყო გატაცებული, მაგრამ ერთხელ მართლმადიდებელ ეკლესიაში მოხვედრილა ლიტურგიის შესრულების დროს და მოხდა სასწაული, რომელმაც მთლიანად შეცვალა მისი ცხოვრება“. სიცოცხლის ბოლო წლებში იგი თითქოს გრძნობდა აპოკალიფსური დროის მოახლოებას და ხშირად იმეორებდა ხოლმე: „ახლა გაცილებით უფრო გვიახია, ვიდრე თქვან გგონიათ“. მამა სერაფიმე გარდაიცვალა 1982-წლის 2 სექტემბერს.

საუკუნოდ იყოს ხსენება მისი.

მღვდელმონაზონი სერაფიმ როუჯი

ს ა მ ე უ ჟ ო გ ჯ ა

უკიდურესობანი ორკერძოთვე თნაბრად სახი-
ფათონი არიანო, ნათქვამია. ჩვენ სამეუფო გზას
უნდა მივსლიოთ და ორივე უკიდურესობისაგან
ვეკრძალოთ.

წმიდა იოანე კახიანე, „ხაუბრები“

მართლმადიდებელ ქრისტიანებს აწ ქრისტეს ეკლესიის ის-
ტორიაში ერთ-ერთი გადამწყვეტი ჟამი დაგვიდგა. კაცთა გა-
მონხნის მტერი, ეშმაკი, ყოველი მხრიდან გვესხმის თავს და
ყოველ ღონეს ხმარობს, რათა არა მარტო მორწმუნენი აც-
თუნოს ეკლესიის მიერ უწყებულ გზას ცხოვნებისა, არამედ,
მაცხოვრის აღთქმისდა მიუხედავად (მათე 16. 18), თვით ეკ-
ლესიაც — გვამი ქრისტესი, და გადააქციოს იგი „ეკუმენის-
ტურ“¹ გაერთიანებად, რომელიც გზას განუშაადებს ეშმაკის-
სავე რჩეულს, ანტიქრისტეს, უკანასკნელ ჟამთა დიდ სოფლის-
მპყრობელს.

ჩვენ, რა თქმა უნდა, ვიცით, რომ სატანის ეს მეცადინე-
ობა გაქარწყლდება, და ეკლესია ქრისტეს სასძლოდ დარჩება
სოფლის აღსასრულამდე, რათა მეორედ მოსვლისას სიძეს
თვისას — ქრისტეს წარუდგეს უმწიკვლო, აწინდელ დროთა
ღმრთისგანდგომილებასთან კავშირის სიბილწით არშესვარუ-
ლი. გარნა დღეს ყოველი მართლმადიდებელი ქრისტიანის
წინაშე საჭირბოროტო საკითხი აღიძვრის: ეკლესია გადაჩე-
ბა, მაგრამ მრავალნილა დავადგრებით მის თანა? მრავალნი
შევეძლებთ წინააღვეუდგეთ მძლავრებას ეშმაკისა, რომელიც
ეკლესიისგან მორწმუნეთა მოწყვეტას ცდილობს?

¹ ეკუმენისტური — ეკუმენიზმი არის მოძრაობა სხვადასხვა
ქრისტიანულ მიმდინარეობათა გაერთიანებისათვის. წარმოიშვა პროტეს-
ტანტებში XIX ს. ბოლოს. თაოსნობს „ეკლესიათა მსოფლიო საბჭო“. ეკუ-
მენისტები მიზნად ისახავენ მთელი მსოფლიოს სხვადასხვა აღმსარებლობის
ქრისტიანეთა გაერთიანებას, მაგრამ არა საერთო კეშმარიტი მრწამსისა და
ეკლესიის წმიდა გადმოცემის საფუძველზე, არამედ სარწმუნოებრივი კომ-
პრომისებითა და პოლიტიკური თანამშრომლობის გზით.

ჩვენი დრო ბევრი რამით ჰგავს წმიდა მარკოზ ეფესელის* ხანას, როდესაც ეკლესია ლამის შერთვოდა ლათინებს უკეთურ კავშირში. თუმცა არა, ჩვენი დრო უარესია და უსაშინლესი, რამეთუ მაშინ ეკლესიას გარედან აიძულებდნენ კავშირში შესვლას, ახლანდელი მართლმადიდებელნი კი დიდი ხნის მომზადებულნი არიან ყოველთა ეკლესიათა და რელიგიათა „ეკუმენური“ შეერთებისათვის ათეული წლების უდებებით, განურჩევლობით, გამიწიერებითა და იმ დამლუპველ სიცრუესთან შეგუებით, რომ თითქოს ჩვენ არსებითად არაფერი განგვასხვავებდეს ყოველთა სხვათაგან, რომელნიც თავს ქრისტიანად მიიჩნევენ. მართლმადიდებელმა ეკლესიამ უარყო მცდარი ფლორენციული უნია**, მერმე შინაგანი აყვავებისა და გარეგანი კეთილდღეობის ეამიც ჰქონდა, მაგრამ შემდგომად ახალი ცრუ კავშირისა, რომელსაც უმეტესი და უმეტესი ძალით ესწრაფვიან, გადარჩება კი სადმე მართლმადიდებლობა კატაკომბებსა და უდაბნოს გარე?

დღეს მეტი შესაძლებლობაა, ვიდრე ოდესმე ყოფილა უღმერთობის საუკუნეში მართლმადიდებელ გადმოცემათა დასაცავად ორმოცდაათწლიანი ბრძოლის მანძილზე, რომ ქეშმარიტი და განუდრეკელი მართლმადიდებლობის ხმა ყოველსა ქვეყანასა განხდეს და მართლმადიდებელ ეკლესიათა მომავალ-

* მარკოზ ეფესელი — XV ს. ეფესოს ეპისკოპოსი. მართლმადიდებლობის უდიდესი დამცველი, იერუსალიმის საპატრიარქოს წარმომადგენელი ფერარა-ფლორენციის კრებაზე (შენიშვნები ყველგან მთარგმნელისა).

** ფლორენციის უნია — ეკლესიათა გაერთიანების ხელშეკრულება მართლმადიდებლებსა და კათოლიკეებს შორის. შედგა ფერარა-ფლორენციის კრებაზე 1437—1439 წ.წ. ამ ხელშეკრულების ძალით მართლმადიდებლებს უნდა ეცნოთ რომის პაპის პრიმატი, სარწმუნოების სიმბოლოში „და ძისაგან“ ჩამატება და სხვა; თუმცა მშობლიურ ენაზე წირვა-ლოცვის უფლება კი რჩებოდათ. ამ დათმობაზე მიდიოდნენ ბიზანტიის კეისრის მოთხოვნით, რომელსაც ამის საფასურად რომის პაპი სამხედრო-პოლიტიკურ დახმარებას აღუთქვამდა. ხანგრძლივი კამათისა და ძალდატანების შემდეგ უნიას ხელი მოაწერა თითქმის ყველა მართლმადიდებელმა (ბიზანტიის, რუსეთის, სერბეთის და სხვა ქვეყნების მიტროპოლიტებმა და ეპისკოპოსებმა), გარდა მარკოზ ეფესელისა, საქართველოს ეკლესიის წარმომადგენლის გრიგოლ მანგლელისა, ისაია ქრისტიანელისა და სოფრონის ანკირაელისა. უნია დამტკიცებულად სცნეს, მაგრამ რომის პაპმა, რა დარწმუნდა, რომ მარკოზ ეფესელი ხელს არ მოაწერდა, თქვა, ჩვენ ვერაფერს მივალწიეთო. მართლაც. უნიამ მთელი მართლმადიდებელი მსოფლიო აღაშფოთა. 1443 წ. იერუსალიმის კრებამ განკვეთა უნიატები, საბოლოოდ კი უნია დაიგმო 1450 წ. კონსტანტინოპოლის კრებაზე.

ზე სასიკეთოდ იმოქმედოს. ამიტომ ფრიად მნიშვნელოვანია, რომ ეს სწორედ ქვეშარბიტი, ანუ წმიდა მამებისეული მართლმადიდებლობის ხმა იყოს. ზოგჯერ, სამწუხაროდ, თავისი არსებით კეთილგონიერ მართლმადიდებელ დამოკიდებულებას ერთი მხრივ გადააქარბებენ, მეორე მხრივ — ვერ სწვდებიან ხოლმე. ამის გამო ზოგიერთს რჩება მცდარი შეხედულება, რომ თითქოს ჩვენს დროში ქვეშარბიტ მართლმადიდებელთა საქმე იყოს ერთგვარი „ექსტრემიზმი“, „მემარჯვენე“ რეაქცია ოფიციალური ეკლესიის წინააღმდეგ. ეს პოლიტიკური თვალსაზრისი ქვეშარბიტ მართლმადიდებელთა ბრძოლისთვის ამჟამად სავსებით მცდარია. პირიქით, ამ უკანასკნელ ხანს მართლმადიდებლობის რჩეული მოღვაწენი, საბერძნეთსა, რუსეთსა თუ განზნეულობაში, უბრუნდებიან წმიდა მამებისეულ გზას ზომიერებისა, ორ უკიდურესობას შორის საშუალისა, რომელსაც წმიდა მამები ს ა მ ე უ ფ ო გ ზ ა დ იტყვიან.

მოძღვრებას სამეუფო გზისთვის გვაძენებს, მაგალითად, წმინდა აბბა დოროთე „სწავლათა“ X თავში, სადაც იგი ძირითადად „მეორე სჯულის“ წიგნს ემყარება: „ნუ მისდრკები მარჯულ, ნუცა მარცხულ, არამედ გზასა სამეუფოსა ვიდოდეთ (2 სჯ. 5. 32, 17. 11), და წმიდა ბასილი იტყვის, ვითარმედ, წრფელი გულითა იგი არს, რომლისა გული არა იყოს მოყვარე მეტისა, გინა ნაკლულისა, არამედ რათა დგეს იგი საშუალოსა გზასა ზედა სათნოებათასა“. მაგრამ ალბათ ეს მოძღვრება ყველაზე განცხადებულად ჰქადაგა V საუკუნის დიდმა მართლმადიდებელმა მამამ იოანე კასიანემ, რომლის წინაშე იგივე ამოცანა იდგა, რაც აწინდელ მართლმადიდებელთა წინაშეც დგას — აღმოსავლელ მამათა ქვეშარბიტი მოძღვრება უნდა განემარტა დასავლელ ქრისტიანეთათვის, რომელნიც, საიმდროოდ ჭერაც ჩვილნი სულით, უმეცარ იყვნენ აღმოსავლური სულიერი მოძღვრების სიღრმესა და სისრულეს, და მისი ხმევისას ერთი მხრივ განშვებად მიდრკებოდნენ, მეორე მხრივ — გადამეტებულ სიმკაცრედ. სამეუფო გზის მართლმადიდებლურ მოძღვრებას წმინდა იოანე კასიანე გადმოგვცემს „საუბრებში“, რომელიც წმიდა იოანე კიბისაღმწერელმა აქო მშვენიერი და ამაღლებული ფილოსოფიისთვის:

ჯერ არს ჩვენდა, სრული მონდომებითა და ძალისხმევით

ვესწრათოდეთ, რათა სიმდაბლითა ჩვენითა მოვიხვექოთ კურთხეული ნიჭი სიფრთხილისა, რაიც ნამეტნავისაგან ორკერძოთვე დაგვიფარავს, რამეთუ, მამათა თქმით, ორივე უკიდურესობისაგან კრძალვა გვმართებს: მარჯვნივ გარდამატებული მარხვით შევცვივით განსაცდელსა, მარცხნივ — უზრუნველობისობისაგან კრძალვა გვმართებს: მარჯვნივ გარდამეტებული მარცხენაზე“ უარესია: „გარდამატებული დათმენა უფროვე გვაენებს, ვიდრე უძღებება, რამეთუ ამ უკანასკნელისაგან სინანულით კვალად მივიქცევით ჭეშმარიტსა გზასა, პირველისგან კი — ველარა“ (რადგან საკუთარი „სათნოებით“ აღძრული ამპარტავნება წინააღუდგება მდაბალ სინანულს, რომელიც უნდა ექმნეს კაცს საცხოვნებლად).

უკეთუ ამ მოძღვრებას ჩვენს დროს მიეუსადაგებთ, ითქმის, რომ დღეს ჭეშმარიტი მართლმადიდებლობის სამეუფო გზა არის გზა საშუალო ორ უკიდურესობას შორის: ერთი მხრივ — ეკუმენიზმსა და რეფორმაციას, მეორე მხრივ — „შურსა საღმრთოსა არა მეცნიერებით“ (რომ. 10. 2). ჭეშმარიტი მართლმადიდებლობა არც დრო-ჟამისაებრ იცვლება და არც იმას ცდილობს, რომ „სიფრთხილე“, „სიმართლე“ და „კანონიერება“ (თავისთავად მშვენიერი თვისებები) გამოიყენოს ფარისევლური თვითკმაყოფილების, უნდობლობისა და განკერძოების შესანიღბად. გარნა ნუ გავრევთ ჭეშმარიტ მართლმადიდებლურ ზომიერებას ნელთბილობასთან, განურჩევლობასთან ან პოლიტიკურ უკიდურესობათა მიმართ რაიმე სახის კომპრომისთან. „რეფორმისტული“ სული ისე მოედო დღეს ქვეყანას, რომ ყოველი კაცი, „თანადროული სულისკვეთებით“ ჩამოყალიბებული, ჭეშმარიტ მართლმადიდებლობას ფანატიზმისდაგვარ რადმე მიიჩნევს. მაგრამ ვინც უფრო ჩაულრმავდება და წმიდა მამათა საზომით მიუდგება ამ საკითხს, დარწმუნდება, რომ სამეუფო გზა შორს არის ყოველგვარი ექსტრემიზმისგან.

ღმრთის განგებით საზღვარგარეთის რუსული მართლმადიდებელი ეკლესია ერთობ ხელსაყრელ ვითარებაში აღმოჩნდა საიმიხოდ, რომ მეოცე საუკუნის მართლმადიდებლობაში დატრიალებული არეულობისდა მიუხედავად სამეუფო გზას არ ასცდენოდა. დევნილებასა და სიღარიბეში, იმ გარემოში, სა-

დაც მისი ერის სატკივარი ვერვინ გაიზიარა, რუსულმა ემიგრანტულმა ეკლესიამ მთელი ძალა რწმენის სიმრთელის დასაცავად მიმართა, რაც მის წევრთა ერთობას განამტკიცებდა. ამიტომ მისთვის თავისთავად მიუღებელი აღმოჩნდა საზოგადო ეკუმენისტური განწყობილება, დამყარებული რელიგიურ განურჩევლობასა და თვითკმაყოფილებაზე, ნიეთიერ კეთილდღეობასა და უსულგულო ინტერნაციონალიზმზე. მეორე მხრივ იგი არც „მარჯვენა“ უკიდურესობისკენ“ მიდრეკილა, რისი ნიშანიც იქნებოდა, თუნდაც, მოსკოვის რუსული ეკლესიის საიდუმლოთა მადლსმოკლებულად გამოცხადება, რადგან გაითვალისწინა, რომ რუსეთის სერგიანული ეკლესია* თავისუფალი არ არის. ცხადია, უღმერთოთა ხელმწიფებაში მყოფ კრებულთან კავშირი არ ეგების, მაგრამ ჭეშმარიტი შეფასება მისი მდგომარეობისა სჯობს მივანდოთ რუსეთის ეკლესიის სამერმისო თავისუფალ კრებას.

ამ ბოლო დროს მთელს მსოფლიოში — რუსეთის კატაკომბურ ეკლესიასა, ამერიკის რუსულ ეკლესიასა თუ საბერძნეთის მქძველსტილეთა** შორის — ჭეშმარიტ მართლმადიდებელთა ერთობის შეგნების ზრდამ ზოგიერთნი იმ დასკვნამდე მიიყვანა, რომ საჭიროა „აღმსარებელ ეკლესიათა საერთო ფრონტის შექმნა ოფიციალურ მართლმადიდებლობაში გაბატონებული ეკუმენისტური მოძრაობის წინააღმდეგ“. გარნა ღღევანდელ ვითარებაში ამის განხორციელება ნაკლებად შესაძლებელი ჩანს; ყოველ შემთხვევაში ასეთი „პოლიტიკური“ თვალსაზრისი ჭეშმარიტი მართლმადიდებლობის ისტორიულ მისიას ერთობ გარეგნულად სახავს. „ეკუმენისტური“ მართლმადიდებლობის, განურჩეველი, ნელთბილი, ღმრთის გარეგანი მართლმადიდებლობის წინააღმდეგ ჭეშმარიტ მართლმადიდებელთა პროტესტის საზომი ჭერაც დასადგენია, მეტადრე — რუსეთში; გარნა ყოვლად შეუძლებელია ამაოდ ჩაველო

* სერგიანული ეკლესია — იგულისხმება 20-იან წლებში რეპრესირებული პატრიარქის ტიხონის შემცველი სერგი, რომელიც კომუნისტურ მთავრობასთან გარკვეული კომპრომისებზე წავიდა.

** მქძველსტილენი — XX ს. დასაწყისში მართლმადიდებელ საპატრიარქოთა ნაწილი ახალ სტილზე გადავიდა. ელადის ეკლესიაში ზოგიერთმა დაჯგუფებამ არ სცნო შესწორებული კალენდარი და ძველ სტილსავე დაადგა.

მეოცე საუკუნის მრავალთა მოწამეთა, აღმსარებელთა და მართლმადიდებლობის სარწმუნო მოსაგრეთა მოწმობას. ღმერთმა დაიცვას თვისი მოშურნენი ქეშმარიტი მართლმადიდებლობის სამეუფო გზაზე უფლისა და მისი წმიდა ეკლესიის ერთგულებით უკუნისამდე.

მართლმადიდებელი მსოფლმხედველობა

მოხსენების დასაწყისში მინდა რამდენიმე სიტყვით მოგი-თხრათ, რატომაა მნიშვნელოვანი მართლმადიდებელი მსოფლ-მხედველობის ქონა და რატომ გაძნელდა მისი მოღება დღეს უწინდელზე უმეტეს.

წარსულ საუკუნეებში მართლმადიდებელი მსოფლმხედვე-ლობა მართლმადიდებელთა ცხოვრების განუყოფელი ნაწილი იყო და მის არსებობას მთელი გარემომცველი სინამდვილე განაპირობებდა. რაიმე კერძო მოვლენად არც განიხილებოდა იგი — კაცნი მართლმადიდებლურად ცხოვრობდნენ, გარემომ-ცველ მართლმადიდებელ საზოგადოებასთან თანხმობით. მრავალ ქვეყანაში მთავრობაც ამავე სარწმუნოებას აღიარებდა, მართლმადიდებლობა საზოგადოებრივი ცხოვრების საფუძვე-ლი იყო და, სხვათა უწინარეს, თავად მეფე თუ მთავარი აძ-ლევდა ერს ქრისტიანული ცხოვრების მაგალითს. ყოველ ქა-ლაქში იდგა მართლმადიდებელთა ტაძრები, სადაც ყოველ დი-ლა-სალამოს ღმრთისმსახურება აღესრულებოდა; დიდსა და მცირე ქალაქებში, დაბნებსა და უდაბნოებში მონასტრები მოქ-მედებდა; მარტო რუსეთში ოფიციალურად აღნუსხულ მონ-ასტერთა რიცხვი, სხვა ძმობათა ჩაუთვლელად, ათასს სჭარ-ბობდა. მონაზვნობა საყოველთაოდ იყო მიღებული, თითქმის ყოველ ოჯახში იპოვებოდა მონაზონი სახლეულთაგანი — და, ძმა, ბიძა თუ პაპა... აღარას ვიტყვი მართლმადიდებელი ცხოვ-რების სხვა სახეებზე — მწირებსა და სალოსებზე. მთელი ყო-ფა განმსჭვალული იყო მართლმადიდებლობით, რომლის

ბურჯს, ცხადია, ბერ-მონაზვნები შეადგენდნენ. მართლმადიდებლური ჩვეულებანი მართლმადიდებელთა ცხოვრების ნაწილი იყო; ერში საკითხავ წიგნთა უმეტესობა — მართლმადიდებლური. ხალხის უმრავლესობა რთულ პირობებში ცხოვრობდა, თავის სარჩენად ბევრს შრომობდნენ, საწუთროს დიდად არ მინდობოდნენ, სიკვდილიანობაც ხშირი იყო... ყოველივე ეს ემოწმებოდა ქრისტეს მოძღვრებას ცათა სასუფეველის არსებობასა და სიახლოვეზე. ასეთ ვითარებაში მართლმადიდებლად ყოფნა მართლმადიდებელი მსოფლმხედველობის ქონასაც თავისთავად გულისხმობდა და ამას საგანგებო აღნიშვნა არ უნდოდა.

აწ საქმე სხვაგვარადაა. მართლმადიდებლობა მცირე კუნძულადღა შემორჩა სრულიად განსხვავებული პრინციპებით მცხოვრებ მსოფლიოში. და ეს პრინციპები დღითიდღე იცვლება, უფრო და უფრო გვაუცხოებს ამა სოფლისგან. დღესდღეობით მრავალ ადამიანს ემოქჩრება ცხოვრების ორად განწეალების საფრთხე: ერთი მხრივ — სამარადლეო ცხოვრებად, რაცა არს სამსახური, საერისკაცო საქმენი, საამსოფლო მეგობრები... მეორე მხრივ — მართლმადიდებლობად კვირადლეობითა და მოცალეობის ჟამს. თუ დავაკვირდებით, ვნახავთ, რომ ამ ადამიანთა მსოფლმხედველობაში ხშირად უცნაურად თანააღრეულან ქრისტიანული და საამსოფლო ღირებულებანი, რომელნიც სინამდვილეში ურთიერთს არ ეთავსებიან. ჩვენი მოხსენების მიზანია მოვნიშნოთ, რა გზას უნდა დაადგეს ახლანდელი ადამიანი, რათა უფრო ღირებული, ყოვლადვე მართლმადიდებელი მსოფლმხედველობა დაიმკვიდროს.

მართლმადიდებლობა ცხოვრებაა. უკეთუ მართლმადიდებელივით არ ცხოვრობ, მართლმადიდებელი არა ხარ, ეკლესიის ფორმალური წევრობისდა მიუხედავად.

აწინდელ მსოფლიოში ცხოვრება ფრიად ხელოვნური, ფრიად უგულისხმო, ფრიად არეული გახდა. მართლმადიდებლებს თუმცა თავისი ადგილი აქვთ, მაგრამ დიდად არ განსხვავდებიან ქვეყნიერებისგან, ამიტომ თვით ქვეშარითი მართლმადიდებელი ქრისტიანების ცხოვრებაშიც ამა თუ იმ სახით მაინც აღიბეჭდება იგი. დღეს თვით მართლმადიდებლობაშიაც შემოვიდა ერთგვარი უგულისხმობა და არეულობა. ჩვენს მოხსენ-

ნებაში შევეცდებით ერთი მხრივ თანამედროვე საერო ცხოვრება მიმოვიხილოთ, მეორე მხრივ — მართლმადიდებლობა და ვნახოთ, რა გზას უნდა დავადგეთ, რათა უმჯობესად აღვასრულებდეთ ჩვენს ქრისტიანულ მოვალეობებს, ამ ბოროტ ეპოსაც ვრჩებოდეთ არასოფლისაგანნი* და ჩვენს აწინდელ ცხოვრებაზე გვეპოვებოდეს მართლმადიდებელი თვალსაზრისი, რომელიც ამგვარ გარემოში დაგვიცავს და რწმენის სიმართლეს შეგვინარჩუნებს.

ცხოვრება აწ არანორმალური გახდა. უკეთუ თანამედროვეობას განიხილავთ გარდასულ დროთა ამერიკის, რუსეთისა თუ ნებისმიერი დასავლეთევროპული ქვეყნის ნორმალური ყოფის ფონზე, უთუოდ განგაცვიფრებთ ახლანდელი ცხოვრების არანორმალურობა. ჩვენს დროში მკვეთრად შეიცვალა თვით ცნებები ავტორიტეტისა და მორჩილებისა, ღირსებისა და თავაზიანობისა, საზოგადოებრივისა თუ პირად ცხოვრებაში ქცევისა — ყველაფერი წინაუქმო დადგა, თუ არ ჩავთვლით ადამიანთა ცალკეულ ჯგუფებს, ძირითადად ამა თუ იმ მიმდინარეობის ქრისტიანთ, რომელნიც ეგრეთ წოდებული „ძველებური“ ცხოვრების წესის შენარჩუნებას ცდილობენ.

აწინდელი არანორმალური ცხოვრება შეიძლება დახასიათდეს, ვითარცა გარყვნილი და ნებისმიერი. ჩვენს დროში ბავშვს აკვიდანვე ისე ანებივრებენ, თითქოს საოჯახო კერპი იყოს: ნებისმიერ სურვილს უსრულებენ, ყოველგვარ ყინს უკმაყოფილებენ, სათამაშოებით, გასართობითა და კომფორტით აფუფუნებენ. მას არ განსწავლიან, არ ზრდიან ქრისტიანული ქცევის მკაცრ პრინციპთა შესატყვისად, არამედ იქით მიუშვებენ, საითკენაც წადილთა ნება მისდრეკს. საკმარისია „მინდა“ ან „არ მინდა“ თქვას, რომ დამყოლი მშობლები მსწრაფლ ქედს უხრიან და თავნებობის საშუალებას აძლევენ. ამგვარი დამოკიდებულება ისე გახშირდა, რომ შეგვიძლია აღზრდის თანამედროვე პრინციპადაც მივიჩნიოთ. თვით ყველაზე კეთილგო-

* არასოფლისაგანნი — მაცხოვარი ასე მიმართავს მოციქულებს: „უკეთუშცა სოფლისაგანნი იყვნეთ, სოფელიმცა თვისთა ჰყვარობდა; რამეთუ არასოფლისაგანნი ხართ თქვენ, არამედ მე გამოგირჩიენ თქვენ სოფლისაგან, ამისთვის ჰსძულთ თქვენ სოფელსა“ (იოანე, 15. 19).

ნიერი მშობლებიც კი ვერ ახერხებენ მის თავიდან აცილებას. დადათუმცა მშობლებს ეწადათ ყმაწვილის მკაცრი აღზრდა, ახლობელნი ეცდებიან სხვაგვარად ზემოქმედებას. ეს უნდა გავითვალისწინოთ ბავშვის აღზრდისას.

ბუნებრივია, ასე გაზრდილი კაცი მომავალშიაც არ მოიკლებს, რასაც ბავშვობიდან მიჩვეულა: კომფორტს, გართობას, მოზრდილთა თამაშებს... მისი ცხოვრება დაუსრულებელ გართობად იქცევა. წინათ ვერც ერთ ჭკუადაძვარ საზოგადოებაში ვერ გაიგებდნენ ამ სიტყვის მნიშვნელობას. ახლანდელი ცხოვრება კი „გართობის“ გამუდმებულ ძიებადაა ქცეული. და ეს გართობა იმდენად უშინაარსოა, რომ მეცხრამეტე საუკუნის ადამიანი, ჩვენი პოპულარული ტელეპროგრამების, ატრაქციონების, რეკლამის, კინოფილმების, მუსიკის, ერთი სიტყვით, ჩვენი კულტურის თითქმის ყოველი დარგის მხილველი, იფიქრებდა, შეშლილთა ქვეყანაში მოეხვდი, სადაც ყოველდღიურ ცხოვრებასთან კავშირი სრულიად დაუკარგავთო. ჩვენ უმეტესწილად ვერც კი ვგრძნობთ ამას, რადგან თვითონაც ამავე საზოგადოების მკვიდრნი ვართ და ჩვენთვის ამგვარი ყოფა თავისთავად ნაგულსიხმეკია.

თანამედროვეობის ზოგიერთი მკვლევარი ახლანდელ ახალგაზრდობას „მე“-ს თაობას უწოდებს, ჩვენს დროს კი — ნარცისიზმის ხანას, ალბეჰდილს თავის თვისის თაყვანისცემისა და გაღმერთების ნიშნით, რაც კაცის ბუნებრივ განვითარებას აფერხებს. სხვანი უბნობენ „პლასტმასის სამყაროსა“ თუ ფანტასტიურ მსოფლიოზე, სადაც მრავლის უმრავლესი ადამიანი ცხოვრობს სინამდვილის პირისპირ ჭკრეტისა თუ მასთან შეგუების, ან საკუთარ შინაგან პრობლემებში ჩაღრმავების უნარდაკარგული.

როდესაც „მე“-ს თაობა რელიგიას მიმართავს, რაც უკანასკნელ ათწლეულებში ფრიად გახშირდა, მაშინაც, ჩვეულებრივ, რაღაც პლასტმასური თუ ფანტასტიური სახის რელიგიას მოძებნის ხოლმე. ასეთებია: „თვითგანვითარების რელიგია“ სადაც თაყვანისცემის ობიექტად საკუთარი „მე“ (რჩება), გონების გამოწმენდა და აზრთა კონტროლი, „განდმართობილი“

გურუსა თუ სვამის თაყვანისცემა, „ა. მ. ო.“*-სა და „კოსმო-სელ სტუმართა“, არაბუნებრივ სულიერ მდგომარეობათა და შეგვრძნებათა ძიება... აქ არ განვიხილავთ ამ მოვლენებს მრავალი ჩვენგანისთვის ალბათ ისედაც კარგად ცნობილთ, მხოლოდ აღვნიშნავთ, როგორ ზემოქმედებენ ისინი თანამედროვე მართლმადიდებელ ქრისტიანეთა სულიერ ცხოვრებაზე.

უკეთეს ჩვენს დროში ქრისტიანულ ცხოვრებას ვაპირებთ, ისიც უნდა გულისხმავყოთ, რომ ამ ფუფუნეული ეპოქის დამბადებელი მსოფლიო, რელიგიურსა თუ საერისკაცო ცხოვრებაში, ტოტალიტარულ მოთხოვნებს უყენებს სულს. ეს ნათლად ჩანს ამ ბოლო ეამს საჭვეყნოდ გავრცელებულ სულისდამასახიჩრებელ კულტებში, რომელნიც თვითმარქვია „წმიდათა“ მიმართ მორჩილებას ითხოვენ. მაგრამ ასევე თვალსაჩინოა ეს საერო ცხოვრებაში, სადაც კაცი აქა-იქ კი აღარ ხვდება ცალკეულ საცთურებს, არამედ გამუდმებული საცთურის ზემოქმედებაშია: ფონური მუსიკა იქნება ეს, მაღაზიებსა და დაწესებულებებში რომ ხშიანობს თუ — განცხადებები და რეკლამები ქალაქის ქუჩებში; როც მუსიკა, ტყის ბილიკებსა და ბანაკებშიც რომ შეუღლწევია, თუ — ტელევიზორი, იდუმალი სახლისგანმგებელი, რომელიც კაცს თანადროულ ღირებულებებს, თვალსაზრისებსა და გემოვნებას ახვევს თავს. ბავშვის პატრონები დამეთანხმებიან: ერთხელ თუ რამე იხილა ბავშვმა ტელევიზორში, მერე უკვე ძნელადღა შეუცვლით ახალშეძენილ თვალსაზრისს, ტელევიზიის ავტორიტეტით ჭეშმარიტებად დასახულს.

ეს ყოვლისმომცველი ცთუნება, თანამედროვე ადამიანებზე თავსდატეხილი, საერო ცხოვრებაში სრულიად აშკარად, რელიგიურში კი, ჩვეულებრივ, უფრო შეფარულად, ამგვარი მნიშვნელობის მქონეა: „იცხოვრე დღესინდელი დღით, განისვენე, იშვებდე, განსცხერ“!... ამ აზრს მიღმა ილანდება სხვა, უფრო შავბნელი ობერტონი, რომელიც დაუფარავად გაისმის ოდენ ოფიციალური ათეიზმის ქვეყნებში, ამ მხრივ ერთი ნაბიჯით რომ უსწრებენ თავისუფალ სამყაროს; დიახ, ჩვენ უნდა

* ა. მ. ო. — ამოუცნობი მფრინავი ობიექტები, ე. წ. მფრინავი თევზები.

გულისხმავყოთ, რომ ის, რაც დღეს სოფელზე მოიწია, ერთია ყველგან — რკინის ფარდის მიღმა თუ თავისუფალ სამყაროში. ვარიანტები სხვადასხვაა, მაგრამ ჩვენი სულების მოსანადირებლად გამიზნული თავდასხმები მეტად მსგავსია. კომუნისტურ ქვეყნებში, სადაც კომუნიზმის დოქტრინა ოფიციალურად მოქმედებს, ყველა აშკარად მოუწოდებენ, დაივიწყონ ღმერთი და ყოველგვარი სხვა ცხოვრება აწინდელს გარდა, სულიდან განაძონ შიში ღმრთისა და წმიდათა პატივისცემა, მოსაწყვეტელ მტრებად შეერაცხონ ძველებური გაგების მორწმუნენი... ამ ჩვენი უზრუნველი, გართობას აყოლილი, თავისმოტყუებას მინებებული დროის სიმბოლოდ ამერიკული დისნეილენდი გამოდგებოდა. მაგრამ მხედველობიდან ნუ გამოგვეპარება უფრო ავბედითი სიმბოლო, „მე“-ს თაობის ჭეშმარიტი გეზის განმცხადებელი: საბჭოთა გულაგი, საკონცენტრაციო ბანაკთა რკალი, რომელიც უკვე განაგებს თითქმის ნახევარ ქვეყნიერებას.

ორი მცდარი დამოკიდებულება

სულიერი ცხოვრებისადმი

იკითხავთ, რა კავშირი აქვს ყოველსავე ამას ჩვენთან, ვინც შეძლებისდაგვარად ფხიზელ მართლმადიდებელ ქრისტიანობას ვცდილობთო? — მკვიდრო კავშირი! ჩვენ უნდა გულისხმავყოთ, რომ გარემომცველი სოფელი, რაგინდ არანორმალური იყოს, ის ასპარეზია, სადაც ქრისტიანულ ცხოვრებას ვიწყებთ. რაოდენ სწორადაც უნდა ვცხოვრობდეთ, რაოდენ ჭეშმარიტი ქრისტიანული შინაარსითაც უნდა აღვივებდეთ ცხოვრებას, მაინც შეგვრჩება „მე“-ს თაობის რაიმე ბეჭედი. საკმაო სიმდაბლე გვმართებს, რათა ეს ვსცნოთ. ამითვე დავიწყით.

არსებობს ორი მცდარი დამოკიდებულება სულიერი ცხოვ-

რებისადმი, რომელთაც მრავალნი მართლმადიდებელი ქრისტიანისთვის სანიმუშოდ მიიჩნევენ. პირველი, უფრო გავრცელებული, გულისხმობს, უბრალოდ, ჟამისაებრ სვლას — შეგუებას როკ მუსიკასთან, თანადროულ მოდებსა და გემოვნებებთან, და ჯაზის ეპოქის საერთო რიტმთან. ხშირად ამგვარი ცხოვრებისგან შორიელი, ძველმოდური მშობლებიც შემწყნარებელი ღიმილით უყურებენ, თუ ვითარ შეცვივიან შეილნი მათნი გულისტქმათა უცნაურთა და მავნებელთა.

ეს გზა ქრისტიანული ცხოვრების სრული გაცამტვერებაა, ეს არის სულის სიკვდილი. ზოგიერთნი ჭერაც ინარჩუნებენ გარეგნულ წესიერებას ამა სოფლის სულთან უბრძოლველად; მაგრამ შინაგან ესენიც მკვდარნი ან მომაკვდავნი არიან, და, რაც ყველაზე უფრო სავალალოა, სანაცვლოდ მათი შვილები ზღავენ სხვადასხვაგვარი სულიერი აშლილობითა და სნეულებით, რომლებიც უმეტეს და უმეტეს ვრცელდება. თავის-მკვლელთა სექტამ რომ ეგზომ ეფექტურად დაასრულა არსებობა ამ ოთხი წლის წინ ჯოუნსთაუნში, მისი ერთ-ერთი ლიდერი ბერძენი მართლმადიდებელი მღვდლის ახალგაზრდა ქალიშვილი იყო; „ქისს“-ის მსგავსი სატანისტური როკ-ჯგუფები ყოფილი მართლმადიდებელი რუსი ჰაბუკებისგან შედგება... ეს ორიოდ თვალსაჩინო ნიშნეშია. მართლმადიდებელთა უმრავლესობა ამ ზომამდე არ მიდის, ისინი ოდენ მისდევენ გარშემომყოფთ, გარემომცველ არაქრისტიანულ მსოფლიოს და ქრისტიანული ცხოვრების უმცირეს სახედაც აღარავის ექმნებიან. ეს არასწორია, ქრისტიანი უცხო უნდა იყოს სოფლისგან — ეს არის ერთ-ერთი უმთავრესი თვისება, რომლის შეძენაც აუცილებელია კაცის ქრისტიანად აღზრდისათვის. უმისოდ ნურავინ მიიჩნევს თავს ქრისტიანად, მით უფრო — მართლმადიდებელ ქრისტიანად.

მცდარია მეორე უკიდურესობაც, რომელსაც ცრუ სულიერება შეიძლება ეწოდოს. ჩვენს დროში, რაც უმეტესად ხელმისაწვდომი ხდება სულიერი ცხოვრების ამსახველი მართლმადიდებელი ლიტერატურა და უმეტესად ვრცელდება სულიერი ბრძოლის გამომხატველი ტერმინოლოგია, მით უმეტესთა და უმეტესთათვის იქცევა ბჭობისა და განმარტების საგნად

ისიქაზში*, იესუს ლოცვა**, ასკეტური ცხოვრება, მაღალთა შინა ლოცვით გება და უაღმატებულესი წმიდა მამები — სიმეონ ახალი ღმრთისმეტყველი, გრიგოლ პალამა თუ გრიგოლ სინელი. ცხადია, თავისთავად ფრიად კარგია მართლმადიდებელი სულიერი ცხოვრების ამ ქეშმარიტად საზეო საკითხთა ცოდნაცა და იმ დიდ წმიდათა პატივისცემაც, რომელნიც თავად შედგომილ იყვნენ მას. ოღონდ უდიდესი სიფხიზლითა და სიმდაბლით თუ არ ვსცანიოთ, რაოდენ შორსაა ჩვენ ყოველთაგან ისიქასტთა ღვაწლი და რაოდენ მოუშზადებელნი ვართ მასთან მისაახლოებლადაც კი, მაშინ ჩვენი მისდამი ღტოლვა დარჩება მორიგ გამოხატვად ჩვენი ეგოცენტრული, პლასტმასის ეპოქისა.

ბოლო ხანებში ამ თემაზე ფრიად პოპულარული წიგნები იბეჭდება. კათოლიკენი, მართლმადიდებელთა გავლენით, თვითონაც აქტიურად გამოეძიებენ ამ საკითხებს და მართლმადიდებლებზევე ახდენენ უკუგავლენას. მაგალითად, იეზუიტი მღვდელი ჯორჯ მელონი თარგმნის მაკარი დიდსა და სიმეონ ახალ ღმრთისმეტყველს, და ცდილობს ისიქასტებად აქციოს ყოველდღიურ ყოფაში ჩართული ადამიანები. მსგავსი მიზნების მისაღწევად იყენებენ ყოველგვარ „განმარტებას“, ჩვეულებრივ — „ქარიზმატიულს“^{***}. ადამიანებს ჰგონიათ, რომ მათზე სული წმიდა გარდამოდის, მიმართავენ ასკეზის ყველა სახეს, რომელიც კი წმიდა მამათაგან გვსმენია და რომლებიც ჩვენს ახლანდელ დონეს ბევრად აღემატება. ქალბატონი კატრინ დე ჰეტ დოპერტი (რუსეთში დაბადებული და მერმე გაკათოლიკებული) ისე წერს წიგნებს უდაბნოზე, მღუშარებასა და სხვა მისთანებზე, რისი დანერგვაც ჰსურს ცხოვრებაში, თითქოს ახალ კამფეტებს უკეთებდეს რეკლამას. ამგვარი დამო-

* ისიქაზში — მართლმადიდებელ ბერთა მოღვაწეობის ერთ-ერთი სახე — მოუკლებელი მღუშარება და სულიერი ლოცვა. მამები გვიასწავლიან, რომ ღმერთი ღირსყოფს ყველაზე უფრო განწმენდილთ. სულიერი თვალით იხილონ ხელთუქმნელი ნაძელი ღაღაღასა, რომ ღვთისმაცხოვარმა ფერისცვალებისა გამოუჩინა მოცუქელთ. რიგითი მორწმუნისათვის ისიქასტური მოღვაწეობა, ცხადია, მიუწვდომელია.

** იესუს ლოცვა — წმიდა მამებისეული ღმადსულიერი, განსაკუთრებული ძალის ლოცვა. ისიქასტები ძირითადად ამ ლოცვას მიმართავენ.

*** ქარიზმა — ნიკი სულისა წმიდისა.

კიდებულება, ცხადია, მეტად ზერელეა და ჩვენი დროის ტრაგიკული ნიშნითაა აღბეჭდილი. საღმრთოდ გასაგონ საკითხებზე ხალხი ისე მსჯელობს, რომ წარმოდგენაც კი არა აქვთ, რას ეხებიან. ზოგიერთისთვის ეს ოდენ ჩვეულებაა, ან გასართველი; ხოლო მათთვის, რომელნიც სერიოზულად მოჰკიდებიან, საქმე შეიძლება დიდი ტრაგედიით დასრულდეს. ამ ადამიანებს ქაონიათ, ღრმა სულიერი ცხოვრებით ვცხოვრობთო, ნამდვილად კი თავისი შინაგანი პრობლემებიც ვერ მოუგვარებიათ.

ნება მომეცით, კიდევ ერთხელ შევახსენოთ, რომ ორსავე უკიდურესობას უნდა ვერიდოთ — გამიწიერებასაც და გადაჭარბებულ სულიერებასაც; გარნა ეს იმას კი არ ნიშნავს, რომ ერთი მხრივ, ამა სოფლის კანონიერი მოთხოვნები უგულვებელვყოთ, ხოლო მეორე მხრივ, ისიქაზმის დიდ მამათა პატივისცემა დავუტყევოთ და მათი გონიერი სწავლებით სარგებლობაზე უარი ვთქვათ, ან ჩვენი შესაძლებლობისა და გარემოებათა შესაფერი იესუს ლოცვა მოვიშალოთ. არა, ეს ყოველივე უნდა ვყოთ, ოღონდ ჩვენსავე დონეზე, მიწასთან ანლოს, საჭიროა (და დღესდღეობით ყოვლად აუცილებელია მართლმადიდებელ ქრისტიანად ყოფნისათვის), ნათლად შევიცნოთ, რა ეპოქაში გვიწევს ცხოვრება, რაოდენ ცუდად გულისხმავყოფთ და მცირედ ვგრძნობთ ჩვენს მართლმადიდებლობას, რაოდენ შორსა ვართ არამეტყუ გარდასულ დროთა წმიდათაგან, არამედ ასიოდე წლის წინ, გინდა ერთი თაობის წინ მცხოვრებ უბრალო მართლმადიდებელ ქრისტიანთაგან, და რაოდენი ძალა უნდა ვიხმაროთ, რომ აწ თუნდაც თავი გავიტანოთ მართლმადიდებელ ქრისტიანებად.

სახელდობრ, როგორ მოვიპოვოთ ამგვარი დამოკიდებულება და როგორ ნაყოფიერ ვყოთ იგი ცხოვრებაში? შევეცდებით, ამ კითხვას ორ ნაწილად ვიპასუხო. ცალკერძო განვიხილავ დამოკიდებულებას გარემომცველ სოფელთან, რომელიც აწინობიერ მტრად გვექცა ესეზომ, რაზომ არასდროს ყოფილა ქრისტიანობის ისტორიაში; ცალკერძო — ჩვენს დამოკიდებულებას მართლმადიდებლობასთან, რომელსაც, ვეიშობ, ჩვენი უმრავლესობა ბევრად უარესად იცნობს, ვიდრე საჭიროა, ბევრად უარესად, ვიდრე უნდა იცნობდეს, თუკი მისი შენარჩუნება სურს.

უპირველეს ყოვლისა, ვინაიდან, გვინდა თუ არა, მკვიდრნი ვართ სოფლისა (და მისი გავლენა თვით ჩვენი მონასტრისაებრ მარტოქმნულ ადგილებშიაც ფრიად იგრძნობა), ხამს, რამეთუ ფხიზლად და წრფელად ვუშვებდეთ, გარნა არ დავუვებთ სოფელსა და საცთურთა მისთა. სახელდობრ, უნდა განვაძლიანოთ ჩვენი ახალგაზრდები მოსალოდნელ განსაცდელთათვის, უნდა ჩავუხერგოთ მათ ამქვეყნიურ საცთურთა წინააღმდეგობის უნარი. ჩვენ უნდა გულისხმავყოთ, რომ სოფელი იშვილათად თუ შეგვეწევა, ნიდაგ კი ხელს გვიშლის ყმაწვილის ქეშმარიტი მართლმადიდებელი სულით აღზრდაში. მარადღე მზადყოფნა გემართებს, რათა საწუთროს ზემოქმედებას ქრისტიანული აღზრდის კეთილგონიერი პრინციპები დაუშპირისპიროთ — საამისოდ კი ყოველივე, რასაც ყმაწვილს სკოლაში ასწავლიან, შინ უნდა შევუმოწმოთ და გავუსწოროთ. ნუვინ იფიქრებს, რომ ყმაწვილის მიერ სკოლაში შექმნილი ცოდნა უბრალოდ სასარგებლო, ან საამსოფლო, მართლმადიდებლური აღზრდისაგან სრულიად განცალკევებული რამ იყოს. სკოლაში, შესაძლოა კიდევ შეასწავლონ გამოსადეგი ხელობა და საგნები (თუმცა ახლანდელ ამერიკულ სკოლებში ამასაც ვერ ართმევენ თავს. ბევრ მასწავლებელს უთქვამს ჩვენთვის, კლასში წესრიგის დამყარება თუ მოვახერხებ, ისიც კარგია, სწავლებაზე ხომ ლაპარაკიც ზედმეტიაო), მაგრამ ამ შემთხვევაშიაც მრავალ მცდარ თვალსაზრისსა და დამოკიდებულებას უნერგავენ. მოზარდის ძირეული დამოკიდებულებანი და შე-

ფასებანი ლიტერატურის, ისტორიის, მუსიკის, ხელოვნების, ფილოსოფიის, თვით მეცნიერებისა და, ცხადია, ცხოვრებისა და რელიგიის მიმართ, სკოლიდან კი არ უნდა მოდიოდეს, სადაც თანამედროვე ფილოსოფიით შეზავებულს აწვდიან ყოველსავე, არამედ, უწინარესად, ოჯახიდან და ეკლესიიდან. უამისოდ არასწორ განათლებას მიიღებს იგი, რამეთუ ღდეს საერთო განათლება უმჯობეს შემთხვევაში აგნოსტიკური ხანიათისაა, უარესში — ათეისტური ან ანტირელიგიური. საბჭოთა კავშირში, რალა თქმა უნდა, მოზარდს ძალით ახვევენ თავს ამ ყველაფერს, ყოველგვარი რელიგიის გარეშე, ათეისტური აღზრდის აქტიური პროგრამის გამოყენებით.

მშობლებმა ზუსტად უნდა იცოდნენ, რას ასწავლიან შათს შვილებს სხვადასხვა ზოგადსაგანმანათლებლო კურსებზე, ამერიკის სკოლებში რომ თითქმის საყოველთაოდ გავრცელდა, და შინ შეუსწორონ ნასწავლი. ამასთან, გარდა გულახდილი დამოკიდებულებისა (განსაკუთრებით მამისა — ვაჟის მიმართ, რაც ესოდენ იშვიათია ამერიკაში), ჰმართებთ მკაფიოდ წარმოჩენა საკითხის ზნეობრივი ასპექტისაც, რასაც საზოგადოებრივი განათლება სავსებით უგულვებელყოფს.

მშობლებმა უნდა იცოდნენ, რა მუსიკას უსმენენ შათი შვილები, რა ფილმებს უყურებენ (თუ საჭიროება მოითხოვს, მათთან ერთად უსმინონ და უყურონ), რა ყაიდის მეტყველება ესმით, თავად როგორ მეტყველებენ, და ყოველსავე ამას ქრისტიანული შეფასება უპოვონ.

მათ, რომელთაც ტელევიზორის ფანჯრიდან გადაგდება ვერ გადაუწყვეტიათ, მკაცრი კონტროლი უნდა დააწესონ ამ მანქანის მომწამვლელი ზემოქმედების ასარიდებლად, რამეთუ ტელევიზორი ანტიქრისტიანულ შეხედულებათა და იდეათა მთავარი მასწავლებელი გახდა ოჯახში, მოზარდთათვის განსაკუთრებით.

ბავშვთა აღზრდაზე იმიტომ გესაუბრებით, რომ სოფელი, პირველ ყოვლისა, სწორედ ამ დროს მძლავრობს მართლმადიდებელ ქრისტიანებზე და თავის კვალობაზე აღზრდის მათ. ერთხელ თუ ჩამოუყალიბდა მოზარდს მცდარი დამოკიდებულება, მერმე მისი ქრისტიანული აღზრდა ერთიორად ძნელდება.

მაგრამ მართო მოზარდნი კი არა, ჩვენ ყველანი ვდგავართ ამა სოფლის პირისპირ, რომელიც ცდილობს ანტიქრისტიანებად გვაქციოს სკოლის, ტელევიზიის, კინოს, პოპულარული მუსიკისა და მრავალი სხვის მეშვეობით, უპირატესად დიდ ქალაქებში რომ გვატყდება თავს. ჩვენ გვმართებს გულისხმავყოთ, რომ ყოველივე ეს ერთი სათავიდან მომდინარეობს. მას აქვს გარკვეული რიტმი, გარკვეული შინაარსი — ჩვენთვის განკუთვნილი; საკუთარი თავის სათნოყოფა, მოდუნება, ყველაფრის არადჩაგდება, განშვება, ზესთასოფელზე ყოველგვარი ფიქრის უარყოფა — ეს ყოველივე, სხვადასხვა სახით, ერთსადაიმავე შინაარსს შეიცავს — თავს გვახვევს უღმერთობას. ვინაიდან გვესმის, რას გვიპირებს ეს სოფელი, მაშასადამე თავის დასაცავად ბრძოლაც გვმართებს, თანაც ამ საკითხზე ჩვენი მართლმადიდებელ-ქრისტიანული თვალსაზრისის ჩამოყალიბებისა და საანჯმნოყოფის* გზით.

გულახდილად რომ ვთქვათ, თუ დააკვირდებით, როგორ ცხოვრობენ და რა სულიერ მემკვიდრეობას გადასცემენ თანამედროვე მართლმადიდებელი ოჯახები, იფიქრებთ, რომ ეს ბრძოლა, უმეტესწილად, წაგებული აქვთ. ნამდვილად, ძლიერ მცირეა იმ მართლმადიდებელ ქრისტიანეთა რიცხვი, რომელთაც საკუთარი სახე სრულებით შეუნარჩუნებიათ და თანადროული ქვეყნიერების კვალად არ იცვლებიან.

გარნა წუთისოფელს ყოვლადვე უვარგისად ნუ მივიჩნევთ. უკეთუ მართლმადიდებელ ქრისტიანებად გადარჩენა გვსურს, საკმაო გონიერებაც გვმართებს ქვეყნად არსებული ყოველი კეთილი შესაძინელის ჩვენი მიზნისათვის სახმევად. აქ განვიხილავ რამდენსამე საკითხს, რომლებსაც მართლმადიდებლობასთან თითქოს უშუალოდ არაფერი აკავშირებს, მაგრამ ჩვენი მართლმადიდებელი მსოფლმხედველობის სასიკეთოდ კი გამოგვადგება.

ყმაწვილი, თავიდანვე მიჩვეული კარგ კლასიკურ მუსიკას, ვისი სულიც ამ მუსიკის ზემოქმედებით აღშენებულა, ესეზომ აღარ დაჰყვება უხეში რიტმის, როკისა და თანამედროვე ფსევდომუსიკის სხვა სახეობათა საცთურს, რაზომ — სხვა, სამუ-

* ს ა ა ნ ჯ მ ნ ო ყ ო ფ ა — საჯაროდ გამოტანა, განცხადება.

სიკო აღზრდას მოკლებული. ამგვარი სამუსიკო აღზრდა, ზოგიერთ ოპტინელ ბერთა თქმით, განსწმედს და სულიერ ნაყოფთა მასალებად განამზადებს სულს.

ყმაწვილი, მიჩვეული კარგ ლიტერატურას, დრამასა და პოეზიას, ვისაც სულით მათი ზემოქმედება უგრძნია, ესე იგი, ქეშმარიტი ტკობა უგემია, ადვილად აღარ მოიხიბლება თანამედროვე კინოთი, ტელევიზიითა და მდარე რომანებით, რომელნიც სულს იავარპყოფენ და ქრისტიანული გზიდან აცთუნებენ.

ყმაწვილს, რომელსაც კლასიკური ფერწერისა და ქანდაკების შვენიერების ქვრეტა უსწავლია, იოლად ვეღარ გაიტაცებენ თანამედროვე ხელოვნების გულარძნილებანი* და აღარ მიიზიდავს თანადროული რეკლამისა და პორნოგრაფიის უგემოვნო ნაწარმი.

ყმაწვილი, რომელსაც მსოფლიოს ისტორიის, მეტადრე, ქრისტიანობის დროისა რაიმე გაეგება, იცის, როგორ ცხოვრობდა და რას ფიქრობდა ხალხი ძველად, რა საცთურებსა და საფრთხეებში შეეცვიოდნენ ღმრთისა და მისთა მცნებათაგან განდგომილნი, რაოდენი დიდების ღირსნი გახდნენ სარწმუნონი უფლისა, შეიძლებს სჯას თანამედროვე ცხოვრებასა და ფილოსოფიაზე და აღარ მიმოიტაცება ყოველსა მას ქარსა მოძღვრებისასა. ახლანდელი სასკოლო განათლების ერთ-ერთი ხარვეზი ისიცაა. რომ მოზარდს წარსულთან კავშირის გრძნობას არ უვითარებენ. ეს საბედისწერო ნაკლი იმას მოასწავებს, რომ მოზარდს წარსულის მაგალითით სარგებლობის შესაძლებლობა ესპობა. ისტორია, არსებითად, ნიადაგ მეორდება. კაცმა უნდა იცოდეს, წარსულში როგორ წყვეტდა ხალხი საძნელო საკითხებს, რა ბედი ეწიათ ღმრთის წინააღმდეგომთ, ან მათ, რომელთა ცხოვრებამ საჩინო მაგალითად მოატანა ჩვენს დრომდე. ისტორიის გრძნობა ფრიად მნიშვნელოვანია და ადრიდანვე უნდა ჩავუნერგოთ ყმაწვილებს.

საერთოდ, კაცი, რომელიც კარგად იცნობს საერო კულტურის რჩეულ ნიმუშებს, დასავლეთში თითქმის მოუკლებელად აშკარა რელიგიური, ქრისტიანული ელფერიით შემოსილს,

* გულარძნილება დამახინჯება, გამრუდება, გადახევა.

ბევრად უკეთ შესძლებს ნორმალურ, ნაყოფიერ მართლმადიდებელ ქრისტიანად ყოფნას, ვიდრე იგი, რომელიც. ოდენ თანადროული პოპულარული კულტურის ამარა მოსულა მართლმადიდებლობაში. უშუალოდ როკ-კულტურიდან მართლმადიდებლობად მოქცეულთ, და მათაც, რომელთ ამგვარი კულტურისა და მართლმადიდებლობის შეთავსების იმედი აქვთ, კიდევ მრავალი ვნების დათმენა მოუწევთ, ვიდრემდე ქეშმარიტი მართლმადიდებელნი გახდებოდნენ, რომელნი შემძლებელ იქნებიან სხვათაც სწავლად. მართლმადიდებელ მშობელთა შვილებს, უჭირველად, უგულისხმოდ გაზრდილთ, თანამედროვე მსოფლიო შთანთქამს. საუკეთესო საერო კულტურა, მართებულად შეთვისებული, განწმენდს და აღაშენებს სულს, ხოლო აწინდელი პოპულარული კულტურა სწყლავს. ამახინჯებს და მართლმადიდებელ მოწოდებაზე ჭეროვან პასუხს უშლის სულებს.

ამიტომ, ამა სოფლის სულთან ბრძოლაში ჯერ არს ვიხმიოთ ის უმჯობესი, რისი შემოთავაზებაც სოფელს ძალუცს, რათა ამ უმჯობესსაც აღვემატოთ. ქვეყნად ყოველივე უმჯობესი ღმერთსა და მართლმადიდებლობაზე მიაინიშნებს, და ჩვენ კი ამით სარგებლობა გვმართებს.

მართლმადიდებელი მსოფლმხედველობა

ამგვარი დამოკიდებულების მქონეთ (უკეთეს სოფლად კეთილსაც ვჭკრეტთ და ბოროტსაც), შეგვიძლია შევიძინოთ მართლმადიდებელი მსოფლმხედველობა, ესე იგი, მართლმადიდებელი თვალსაზრისი მთელს ცხოვრებაზე და არა ოდენ საეკლესიო საკითხებზე. დღეს, სამწუხაროდ, ფრიად გავრცელდა მცდარი აზრი, თითქოს მართლმადიდებლისთვის საკმარისი იყოს ეკლესიაში სიარული და ჩვეულებრივი „მართლმადიდებლური საქმიანობა“ — განსაზღვრულ ქამს ლოცვა და პირჩვარის გადასახვა, დანარჩენ დროს კი — სხვებივით ცხოვრება და, რამეთუ ცოდვას არა იქმს, თანადროულ კულტურასა და ყოფას სავსებით თანაზიარება. უკეთეს კაცმა უწყის

მართლმადიდებლობის ძალი, ქეშმარიტი მართლმადიდებელი ქრისტიანის მოვალეობათა ძალი, უწყის, აგრეთვე, თანამედროვე მსოფლიოს მიერ ჩვენზე დაკისრებულ მოვალეობათა და ტოტალიტარულ მოთხოვნათა რაობა, ადვილად შეამჩნევს ამ თვალსაზრისის სიმცდარეს: ვინც ყოველი დღის ყოველ ეკმს, ყოველ ცხოვრებისეულ სიტუაციაში მართლმადიდებელი არ არის, იგი საერთოდ არ არის მართლმადიდებელი. ჩვენი მართლმადიდებლობა ოდენ ჩვენი რელიგიური შეხედულებების სიზუსტეში კი არ ცხადდება, არამედ — ჩვენს თითოეულ სიტყვასა და მოქმედებაში. უმრავლესნი ჩვენგანნი თითქმის ვერცა გრძნობენ ქრისტიანულ პასუხისმგებლობას მათი საერისკაცო ცხოვრებისათვის; ხოლო რომელთაც ქეშმარიტი მართლმადიდებელი მსოფლმხედველობა შეუმოსიათ, ცხოვრების ნებისმიერ საკითხში მართლმადიდებელნი არიან. აქ ისმის კითხვა: როგორ შევიძლოთ ყოველდღიურ ცხოვრებაში ჩვენი მართლმადიდებელი მსოფლმხედველობის გამოზრდა და განმტკიცება?

საამისოდ უპირველესი და უსაჩინოესი გზაა მოუკლებელი ზიარება ქრისტიანული საზრდოს წყაროსთან, რასაც ეკლესია გვაძლევს გასანათლებლად და საცხოვნებლად. ესენია: ღმრთისმსახურება და წმიდა საიდუმლონი, საღმრთო წერილი, წმიდათა ცხოვრება, წმიდა მამათა თხზულებანი. ცხადია, ჩვენი დონის შესაფერისი წიგნები უნდა ვიკითხოთ, საეკლესიო სწავლება კი ცხოვრებისეულ ვითარებათა შესატყვისად ვიხმით — მაშინ მოიღებენ ისინი ნაყოფს, წარგემართავენ და ქრისტიანებად გვაქევენ.

გარნა ხშირად ეს უმთავრესი ქრისტიანული წყარონი ნაკლულად ზემოქმედებენ, ან სულაც არ ზემოქმედებენ ჩვენზე, რაც გამოწვეულია ჩვენი მცდარი დამოკიდებულებით მათ მიმართ, იმ ქრისტიანული ცხოვრების მიმართ, რომელსაც მათ უნდა შთაბერონ სული. ახლა ნება მომეცით მოგახსენოთ, როგორი უნდა იყოს ჩვენი დამოკიდებულება, უკეთუ გვსურს ქეშმარიტი სარგებელი მოვილოთ და ქეშმარიტი მართლმადიდებელი მსოფლმხედველობის დასაბამად გვექმნან ისინი.

პირველ ყოვლისა, ქრისტიანული სულიერი საზრდო თავისი ბუნებით ცხოველი და ცხოველსმოყველი რამ არის.

უკეთუ მისდამი წმინდად თეორიული და მწიგნობრული დამოკიდებულება გვექნა, ვერ მოვიღებთ მ-სგან პაღლთ, რომელთა მონიკებაც მას ძალუცს. ასე რომ, თუ ოდენ ინფორმაციის შესაძენად ან ჩვენი ცოდნით სხვათა წინაშე დასაქადებლად ვკითხულობთ მართლმადიდებლურ წიგნებს, თუ ოდენ საამისოდ გვინდა მართლმადიდებლობა, მაშასადამე არსებას ვერ ვწვდომივართ. უკეთუ ღმრთის მცნებებს, საღმრთო სჯულს, ქრისტეს ეკლესიის კანონებს მხოლოდ იმისთვის ვსწავლობთ, რომ „მართლად“ ვიღოდეთ და სხვათა „უმართლობას“ განვსჯიდეთ, მაშასადამე არსებას ვერ ვწვდომივართ. მათ მარტოდენ ჩვენს აზრებზე კი არ უნდა იმოქმედონ, არამედ უშუალოდ ჩვენს ცხოვრებას უნდა შეეხონ და სცვალონ. კაცობრივ საქმეთა ყოველი დიდი კრიზისის, კერძოდ — აწინდელი, თავისუფალ სამყაროზე მოწეული კრიზისის ქამს დაცემა ელით სჯულს, კანონებისა და წესების ცოდნას მინდობილთ. გადარჩებიან ისინი, რომელთაც მართლმადიდებლური განათლებით ქეშმარიტი ქრისტიანობა შეუმოსიათ, რომელთა მართლმადიდებლობა მათს გულებში დანერგულა და სხვათა გულების წვდომაც ძალუცს.

რაოდენ ტრაგიკულად გამოიყურება მართლმადიდებელ გარემოში აღზრდილი კაცი, რომელიც კატეხიზმოს იცნობს, წმიდათა ცხოვრებას კითხულობს, ღმრთისმსახურების ზოგიერთი სახე ესმის, მართლმადიდებლობის ზოგადი მიზნებიც გაეგება, მაგრამ ვერ მიმხვდარა, რა ხდება მის გარშემო. იგი საკუთარ შვილებს ორმაგი ცხოვრების სახედ ექმნება: ერთი მხრივ — უმრავლესობისაებრ, მეორე მხრივ — მართლმადიდებელთაებრ, კვირადღეებსა და მართლმადიდებლური წიგნების კითხვისას. ამ ორმაგი ცხოვრების შემყურე ყმაწვილი მართლმადიდებლობას ძნელადღა აირჩევს, იგი მისი ცხოვრების ერთობ უმნიშვნელო ნაწილადღა დარჩება, რამეთუ თანამედროვე ცხოვრება მეტისმეტად მომხიბლავია, მეტისმეტად ბევრნი მიელტვიან მას. იგი სინამდვილეს უცვლის იმ ადამიანთ, რომელთათვის არავის უსწავლებია მისი მანე ზემოქმედებისგან თავდაცვა და ყოველი კეთილი ქვეყნიერი შესაძინების თავისდასასარგებლოდ ხმევა.

ამ მხრივ ჩვენი დამოკიდებულება უნდა იყოს მისაღები და

ბუნებრივი, რეალურ გარემოებათა შესატყვისი და არა წარმოსახვის, ცხოვრებისგან გაქცევის, საწუთროს უსიამო მოვლენათა უგულვებელყოფის შედეგი. ზედმეტად ამაღლებული, ღრუბლებში მოლივლივე, სათბურში გამოზრდილი მართლმადიდებლობა კაცს სამარადილო ცხოვრებაში არას არგებს. საწუთრო ფრიად სასტიკია და ადამიანთა სულებს უხეშად სწყლავს. ჩვენ, უპირველესად, მღვიძარე ქრისტიანული სიყვარული და სულგრძელობა უნდა მივაგოთ, ხოლო ისიქაზმი და ლოცვის აღმატებული ხარისხები მათ დაეუთმოთ, ვისაც წვდომა ხელეწიფება.

ჩვენი დამოკიდებულება უნდა იყოს არა ეგოცენტრული, არამედ—ღმრთისა და სულიერი ცხოვრების მეძიებელთა მიმართ მიქცეული. დღესდღეობით სადაც კი არსებობს ჩამოყალიბებული ქრისტიანული თემი, იმის საშიშროებაც დიდია, რომ იგი ვაქციოთ საკრებულოდ, რომელშიაც ურთიერთს მოვიკითხავთ და სიხარულს მოგვეგვრის ჩვენივე სათნოებანი და მიღწევები, ჩვენი ტაძრებისა და სატაძრო აღჭურვილობის ქმნულკეთილება, ჩვენი ღმრთისმსახურების დიდებულება და თვით ჩვენი მოძღვრების შეურყვნელობაც კი. გარნა ჭეშმარიტი ქრისტიანული ცხოვრება, მოციქულთაგან მოყოლებული, წარმოუდგენელია სხვათა თანაზიარების გარეშე. მართლმადიდებლობა სწორედ იმითაა ცხოველი, რომ ჰნათობს ყოველთა და არ საჭიროებს „სამისიონერო განყოფილებების“ დაწესებას. უკეთეს ჭეშმარიტი მართლმადიდებლობის ცეცხლი ჩვენთვისვე ოდენ შესაკრძალად და თავთა თვისთა სათნოყოფად გვინდა, მაშ, მკვდარნი ვყოფილვართ, დამფლველნი თვისთა მკვდართა; არადა სწორედ ამ მდგომარეობაშია დღესდღეობით მრავალი მართლმადიდებელი მრევლი, თვით ისინიც, რომლებშიაც ბევრი ახალგაზრდაა, რამეთუ სარწმუნოება ღრმად არ დანერგულა მათში. არ კმარა იმის თქმა, ახალგაზრდები ეკლესიაში დადიანო. ჩვენ ის ვიკითხოთ, რა მიაქვთ ეკლესიაში, რას იძინენ იქ, და თუ აღმოჩნდა, რომ მთელი მათი ყოფა არ განუმსჭვალავს მართლმადიდებლობას, მაშინ ამაოდ ითქმის, ახალგაზრდობა ეკლესიაში დადისო.

ამავე დროს კაცთა მიმართ ჩვენი დამოკიდებულება უნდა იყოს სიყვარული და სულგრძელება. დღეს მართლმადიდებ-

ლებში რალაცნაირი გულქვაობა გაჩნდა: „მაგასთან ურთიერთობა ნუ გექნება, მწვალაბელია!“... „ეს იქნებ მართლმადიდებელიცაა, მაგრამ სარწმუნო არ უნდა იყოს“... „ეს კი ნამდვილად ჯაშუშია“... არაეინ უარყოფს, — ეკლესია აწ მტრებითაა გარემოცული, და არიან ვიეთნიმე, რომელნიც უარს არ იტყოდნენ ჩვენი ნდობით სარგებლობაზე. გარნა ეს მოციქულთაგანვე ასე ყოფილა და, ამ პრაქტიკული მიმართებით, ქრისტიანად ყოფნა მუდამ გარკვეულ რისკს უკავშირდებოდა. ამიტომ, თუნდაც ზოგჯერ ჩვენით ისარგებლონ კიდევ და ამის გამო სიფრთხილე გვიხმს, მაინც ვერ გადაუხვევთ სიყვარულისა და ნდობის ჩვენი ძირეული პოზიციიდან, უროძლისოდაც ქრისტიანული ცხოვრების საფუძველთა საფუძველს მოვწყდებოდით. ქრისტეს გარეშე ქვეყანა ცივია და უნდობელი. ხოლო ქრისტიანებს პირიქით, სიყვარული და შემწყნარებლობა გემართებს, თუ არა, ჩვენში ქრისტეს მარტილი განქარდება და ამა სოფლისებრნი შევიქნებით, გამოსადეგნი ოდენ განგდებად გარე და დათრგუნვად კაცთა მიერ (მათე 5, 13).

ჩვენივე თავის შეფასებაში მცირედი სიმდაბლე სულგრძელებასა და მიმტევებლობას შეგვმატებს. ჩვენ სხვათა განკითხვა გვიყვარს უცხო საქციელისათვის, „ყვავებსა“ და „უცნაურ ახალმოქცეულებს“ ვუწოდებთ ერთმანეთს. კიდევაც უნდა ვეკრძალოთ ნამდვილ არეულ კაცთაგან, რომელნიც შემძლებელ არიან ფრიად ავნონ ეკლესიას, მაგრამ ჩვენს დროში განა რომელი ჰკუადამჯდარი მართლმადიდებელი ქრისტიანი არ გამოიყურება ცოტა „უცნაურად“? ამა სოფლის ჩვეულებებს ჩვენ არ ვეთანადებით; ხოლო უკეთუ ვეთანადებით, მეტადრე — აწინდელ მსოფლიოში, მამ ჰეშმარიტი ქრისტიანენიც არ ვყოფილვართ. ჰეშმარიტ ქრისტიანს არ ძალუცს საწუთროში თავს კარგად გრძნობდეს და საკუთარსა თუ სხვის თვალში ცოტა „უცნაური“ არ ჩანდეს. საბჭოთა კავშირსა და ბევრ სხვა ქვეყანაში საკმარისია კაცი არასოფლისაგანი ქრისტიანობის იდეალს მისდევდეს, ან ზრდასრული კაცი განცხადებულად პირველად იწერდეს, რომ ფსიქიატრიულში ამოყოს თავი. ეს ქვეყნები კი მთელს მსოფლიოს უკვალავენ გზას.

ამიტომ, ნუ შეგვაშინებს, რომ ერში „უცნაურებად“ მიგვიჩნევენ და კვლავაც დავიმარხოთ ქრისტიანული სიყვარული

და სულგრძელება, რომელთაც სოფელი ვერასოდეს გაიგებს, თუმცა გულის სიღრმეში საჭიროებს და სწყურია კიდევც.

დასასრულ, ჩვენი ქრისტიანული დამოკიდებულება უნდა იყოს — უმჯობესი სიტყვის ნაკლებობის გამო ვუწოდებ — უბრალო. აწინდელ მსოფლიოში დიდი მნიშვნელობა ენიჭება სირთულეს, საამსოფლო გამოცდილებას, „პროფესიონალიზმს“. მართლმადიდებლობა არაა ფასს არ სდებს ამ თვისებათ, ისინი კლავენ ქრისტიანულ სულს. და მაინც, ისინი განუწყვეტლად შემოდიან ეკლესიასა და ჩვენს ცხოვრებაში. რაოდენ ხშირად მოისმენთ, მეტადრე, აღფრთოვანებულ ახალნერგთაგან, მართლმადიდებლობის დიდი ცენტრების მოხილვის სურვილს, ეკლესია-მონასტრებისა, სადაც ათასობით მორწმუნე იკრიბება, საეკლესიო საკითხები განიჭობა და მართლმადიდებლობის დიდმნიშვნელოვანება იგრძნობა. მართლმადიდებელთა რიცხვი მცირეა დანარჩენ მსოფლიოსთან შედარებით, მაგრამ ამ დიდ ეკლესია-მონასტრებში იმდენი ხალხი იყრის თავს, რომ გეგონებათ, თითქოს ქვეყნად მართლმადიდებლობა სჭარბობდეს... და რაოდენ ხშირად იხილავთ იმავე კაცს შესაბრალის მდგომარეობაში, როდესაც სურვილის აღსრულების შემდეგ „მართლმადიდებლობის დიდი ცენტრიდან“ ბრუნდება პირქუში და გაწილებული, საამსოფლო-საეკლესიო ჭორებით გავსილი, განკითხვით სნეული და მართოდენ თავისი „მართლმადიდებლობისა“ და „საეკლესიო პოლიტიკაში გამოცდილებისთვის“ მზრუნველი. ერთი სიტყვით, ამ კაცს დაუკარგავს „უბრალოება“, „არასოფლისაგანობა“, გზას ასცდენია ეკლესიის ცხოვრების საამსოფლო საკითხებით მონუსხული.

ამგვარი განსაცდელი სხვადასხვა სახით ყოველი ჩვენგანის წინაშე დგას და ჩვენ მასთან ბრძოლა გემართებს. ნუ დაეუშვებთ, რომ ეკლესიაში გარეგნულს მიენიჭოს ზედმეტი მნიშვნელობა, არამედ მარადეამს „კეთილი ნაწილი“ გამოვირჩიოთ, რომელი ერთი მხოლო არს სახმარ — ქრისტე, და განვეშოროთ ყოვლისაგან ნათესავისა ბოროტისა. ცხადია, კი არ უნდა გავუუშეცარდეთ საამსოფლო და საეკლესიო საქმეებს — მათი ცოდნა თვით ჩვენთვისვეა საჭირო, — ოღონდ ცოდნა ზამს წრფელი, ფხიზელი, სადაგი, და არა რთული და ამქვეყნიური.

ყოველი მართლმადიდებელი ქრისტიანისთვის, რომელიც გულისხმავოფს, რა ხდება მის გარშემო, ნათელია, რომ სოფელი აღსასრულს უახლოვდება. ნიშნები ეამთანი ეკსომ თვალსაჩინონი არიან, რომ შეიძლება ითქვას: სოფელი მოსწრაფებით ირღევა.

რა ნიშნები გვაქვს მხედველობაში?

— სოფლის არანორმალურობა: ჩვენთა დღეთა მსგავსი უცხო, არაბუნებრივი მოვლენები და საქციელნი ადრე არასდროს შეუწყნარებიათ როგორც რამ თავისთავად ნაგულისხმევი. მოდით, გადავხედოთ ჩვენს გარემომცველ სოფელს — რას წერენ გაზეთებში, რა ფილმებს აჩვენებენ, რას გადმოსცემენ ტელევიზიით, რას მიიჩნევს ხალხი საგულისხმოდ და თავშესაქცევად, რაზე იცინიან — ეს ყოველივე შემზარავია. და არიან ვიეთნიმე, რომელნიც განზრახ ხელს უწყობენ ყოველსავე ამას, ცხადია, თავისივე სარგებლისათვის და იმის საფუძველზე, რომ ხალხში არსებობს მახინჯი მისწრაფება მსგავსი საგნებისადმი.

— ბრძოლანი და ამბავნი ბრძოლათანი, ერთიმეორეზე უფრო შემზარავნი და უღმობელნი. ყველაფერს კი ჩრდილავს საშიშროება იგავმიუწოდნელი ბირთვულ კატასტროფისა, რომელიც ღილაკზე თითის ერთი დაჭერით შეიძლება დაგვატყდეს თავს.

— საყოველთაო სტიქიური უბედურებანი: მიწისძვრები და ახალ-ახალი ვულკანები (უახლესი ჩვენს სიახლოვეს იწყებს მოქმედებას, ცენტრალურ კალიფორნიაში, იოსემიტის ნაკრძალში), რომელნიც უკვე ცვლიან დედამიწის კლიმატს.

— ინფორმაციის ცენტრალიზაცია და პიროვნების კონტროლის ზრდა: ამის მაგალითია ლუქსემბურგში ამოქმედებული ახალი გიგანტური კომპიუტერი, რომელსაც შეუძლია დედამიწის თითოეულ მცხოვრებზე აწარმოოს დოსიე. მისი კოდური მერია „ნნ“, ხოლო მასთან მომუშავე პერსონალმა მეტსახელად „მხეცი“ შეარქვა. ამ ტიპის კომპიუტერთა მუშაობის გაიოლების მიზნით ამერიკის ხელისუფლება აპირებს 1984 წლიდან შემოიღოს სოცულზრუნველყოფის ჩეკები რომელთა ნომრები

(კოდური რიცხვის 666-ის აშკარად შემცველნი) მოქალაქეებს ხელზე ან შუბლზე ექნებათ აღბეჭდილი. აპოკალიპსის მიხედვით კი (თავი 13) სწორედ ეს უნდა იქცეს ძირითად მოთხოვნად ანტიქრისტეს მეუფების ეამს. ცხადია, არ ვგულისხმობ, რომ „666“-ით აღბეჭდილი პირველივე კაცი ანტიქრისტე ან მისი მსახური იქნება, მაგრამ საყოველთაო თუ გახდა ეს მოთხოვნა, ვინლა შეძლებს წინააღმდეგობას? ხალხს ჯერ ამას მიაჩვენენ, მერე კი ანტიქრისტეს თაყვანისცემასაც აიძულებენ.

— ქრისტემტყუართა და ცრუ წინასწარმეტყველთა მომრავლება: უკანასკნელმა კანდიდატთაგანმა სწორედ წლევეანდელ ზაფხულს ალბათ მილიონობით დოლარი დახარჯა, რათა მსოფლიო ტელევიზიით რეკლამა გაეკეთებინა თავისი გარდაუვალი გამოცხადებისთვის, თანაც საიმდროოდ დედამიწის ყოველ მოსახლეს ტელეპატიური შეტყობინება აღუთქვა. ამგვარ საქმეებში მონაწილედ საგულეებელ სხვადასხვა ოკულტურ ძალთა გარდა ჩვენთვის უკვე ისიც კარგადაა ცნობილი, რომ რადიოთი და, მით უფრო, ტელევიზიით შესაძლებელია არაცნობიერ სიგნალთა გადაცემა, და რომ ჩვეულებრივ ტელე-რადიო სიგნალებში ჩართვა, ყოველგვარი კანონიერი აკრძალვისდა მიუხედავად, ძალუცს ყველას, ვისაც კი ტექნიკური საშუალება მოეპოვება საამისოდ.

— ჭეშმარიტად ავისმაუწყებელი რეაქცია ახალ ფილმზე, ამერიკაში ლამის ყველამ რომ ნახა და ყველას სალაპარაკოდ აქვს: მილიონობით ადამიანი, გარეგან ნორმალური, ნდობასა და სიყვარულს გამოთქვამს ფილმის გმირის, „კოსმოსიდან მოვლენილი მხსნელის“ მიმართ, რომელიც აშკარად დემონია. ეს უკვე განცხადებული მზადებაა მომავალი ანტიქრისტეს თაყვანსაცემად (სიტყვას მოყვა და ამერიკის ბერძნული საარქიეპისკოპოსოს ოფიციალურ გაზეთში კინოს განყოფილების რედაქტორი, მართლმადიდებელი მღვდელი, მთელი გულით უქებს მართლმადიდებელთ ამ ფილმს: ეს მშვენიერი ფილმი სიყვარულს გვასწავლის და ყველამ უნდა ნახოსო. რაოდენ მკვეთრია განსხვავება მათ შორის, ვინც მოვლენებში გარკვევას ცდილობს და ვინც ოდენ საზოგადო განწყობილებას აპყობია).

სხვა მაგალითებისა და წვრილმანების მოტანაც შემეძლო, მაგრამ თქვენი დაშინება კი არ განმიზრახავს, მინდა დაგანა-

ხოთ, რა ხდება ჩვენს გარშემო. ჰეშმარიტად, აწ უკვე უფრო გვიანია, ვიდრეა ჩვენ ვპგონებთ. აპოკალიპსი აწვე აღესრულება, და რაოდენ სამწუხარო სახილველნი არიან ქრისტიანენი, მეტადრე — ახალგაზრდები, მართლმადიდებელი ახალგაზრდობა, რომელთაც კარს მოსდგომიათ ეს წარმოუდგენელი განსაცდელი და მათ კი ჰგონიათ, რომ ამ საშინელ დროსაც შეუძლიათ განაგრძონ ეგრეთ წოდებული „ნორმალური ცხოვრება“, ბოლომდე თანაეზიარონ გულისწადილებს უგუნური, თავისმაცთუნებელი თაობისა — რომელსაც ექვადაც არ მოსდის, რომ სულელთა სამოთხე, სადაც ჩვენ ვცხოვრობთ, საცა დაიქცევა — და სრულიად განუშადებელნი შეხვდებიან მოსალოდნელ ბოროტ ჟამს. დღესდღეობით საკითხი ის კი აღარ არის, „კარგი“ მართლმადიდებელი ქრისტიანენი ვიქნებით თუ „ცუდი“, დღეს საკითხი ასე დგას — შევიწარჩუნებთ თუ ვერა, საერთოდ, რწმენას?! მრავალნი ვერ შეინარჩუნებენ... მომავალი ანტიქრისტე იმდენად მომხიბლავი იქნება, იმდენად თანაშეეწყობა დროის სულს, ამა სოფლის სულს, რომლისკენაც ჩვენ მივისწრაფით, რომ უმრავლესობა ვერც კი შეიტყობს თავისი ქრისტიანობის წარწყმედას, ისე თაყვანისსცემს მას.

მაგრამ ქრისტეს მოწოდება კვლავაც აღწევს ჩვენამდე. მოდით, ყური მივუპყრათ მას. აწ ყველაზე განცხადებულად ეს მოწოდება მოისმის დამონებული, უღმერთო სამყაროდან, სადაც ჰერ კიდევ ნამდვილად არსებობს დევნილება ქრისტესთვის, არსებობს ცხოვრების სერიოზულობა, რომელსაც ჩვენ სწრაფად ვკარგავთ, თუ არ დაგვიკარგავს უკვე. რუმინელი მართლმადიდებელი მღვდელი გეორგ კალჩუ ამჟამად კომუნისტურ საპატიმროში კვდება, რადგან სტუდენტებსა და სემინარისტებს თამამად მოუწოდა, განეშორებინათ ბრმა შემსკვალულება ჟამთა სულისადმი და ქრისტეს სამსახურად გასულიყვნენ. ათეიზმის სიცარიელეზე რა ისაუბრა, მან ასე მიმართა თანამედროვე ახალგაზრდებს: „მე თქვენ ბევრად უმეტეს აღფრთოვანებად მოგიწოდებთ, თავის თვისის სრულ უარყოფად, კადნიერებად, რათა არად შერაცხოთ სიბრძნე ამის სოფლისა. მე მოგიწოდებთ თქვენ უფლისა მიმართ, რომელსაც უძლევებს სოფელი. მოგიწოდებთ, რათა სცნათ სულის სიხარულის დაუსრულებელი სამოთხე, რასაც თქვენ ბრმად ეძიებთ თქვენსა-

ვე ჭოჯობეთში, ეძიებთ უნებლიე წინააღმდეგობის უამსაც კი. იესუმ გამოგირჩიათ და შეგიყვარათ, და აწ თქვენ გეძლევათ არჩევანი მის მოწოდებაზე საპასუხოდ. პასუხი ნიშნავს განემზადოთ, რათა წახვიდეთ და ნაყოფი გამოიღოთ და ნაყოფი თქვენი ეგოს სავსებით, რათა იყოთ ქრისტეს მოციქულნი ამა სოფლად, რათა შეიყვაროთ მოყვასი თქვენი, ვითარცა თავი თვისი და ყოველი კაცი მეგობრად შერაცხოთ, რათა ყოველი თქვენი საქმით მიუთხრობდეთ ერთადერთსა და უსაზღვრო სიყვარულს, რომელიც მონას ღმრთის მეგობრად შეიქმს, რათა მოციქულნი იყოთ ამ განმათავისუფლებელი სიყვარულისა, რომელიც ყოველი კრულებისაგან გიხსნით და სიწმიდეს მოგმადლებთ, როგორც კი ღმერთს განუკუთვნებთ თავს“.

ახალგაზრდებს, რომელთაც მამა გეორგი მიმართავს, გული არ მიუწევდათ ქრისტეს ეკლესიის სამსახურად, რადგან მიღებული ჰქონდათ ამქვეყნიური შეხედულება (ჩვენთვის, თავისუფალი სამყაროს მკვიდრთათვისაც ასევე ჩვეულებრივი), თითქოს ეკლესია ოდენ უნობათა ერთობლიობა ან საამსოფლო დაწესებულება იყოს. მამა გეორგი მათთან ერთად ჩვენც მოგვიწოდებს, უფრო ღრმად ჩავწვდეთ ქრისტეს ეკლესიის რაობას და ვსცნათ, რომ ცხოვნებისათვის ეკლესიის ფორმალური წევრობა არ კმარა.

ქრისტეს ეკლესია ცხოველია და თავისუფალი. ჩვენ მასში ვიქცევით და ვართ ქრისტეს მიერ, რომელიც არის თავი გვაშისა მის ეკლესიისა. მასში ჩვენ დავიმკვიდრებთ თავისუფლების სავსებას, ეკლესიაში უნდა ვსცნათ ჭეშმარიტი და ჭეშმარიტება განგვათავისუფლებს ჩვენ (იოანე 8. 32). ქრისტეს ეკლესიაში ხართ ყოველთვის, რაჟამს დაცემულს აღადგენთ, გლახაკს მოწყალებას აძლევთ ან სნეულს მიჰხედავთ; ქრისტეს ეკლესიაში იმყოფებით, რაჟამს სულგრძელი ხართ და მომთმენი, რაჟამს ძმისადმი რისხვას განიშორებთ, თუნდაც მისგან გულმოწყლული იყოთ. ქრისტეს ეკლესიაში ხართ, რაჟამს ლოცულობთ: „მიუტევე, ღმერთო“!, რაჟამს პატიოსნად აღასრულებთ სამუშაოს, დამაშვრალი, მაგრამ პირნათელი შედიხართ შინ, რაჟამს ბოროტების წილ სიყვარულს მიაგებთ — ამ დროს ხართ თქვენ ქრისტეს ეკლესიაში. ნუთუ ვერ ხედავ,

კაბუკო, მეგობარო, რაოდენ ახლოა სუფევა ქრისტესი? შენ ხარ კლდე, და ამას კლდესა ზედა ადაშენოს ღმერთმან ეკლესია თვისი და ბჭენი ჯოჯოხეთისანი ვერ ერეოდენ მას. მაშ ალვაშენოთ ტაძრები ჩვენი რწმენით, ტაძრები, რომელთაც ვერავითარი ამქვეყნიური ძალა ვერ დაარღვევს, ეკლესია, რომლის საფუძველია ქრისტე! იგრძენ, რომ გვერდით ძმა გყავს. ნურასდროს იტყვი, ეს ვინ არისო. სჯობს თქვა: „იგი უცხო არ არის, ჩემი ძმაა, ჩემსავით იგიც ქრისტეს ტაძარია“.

რადგანაც გულში ეს მოწოდება გვაქვს, მაშ ჭეშმარიტად განუუკუთვნოთ თავი ქრისტეს ეკლესიას, მართლმადიდებელ ეკლესიას. ეკლესიის გარეგნული წევრობა არ კმარა, ჩვენს შინაგან უნდა მოხდეს ძვრა, რაც გარემომცველი სოფლისგან უცხოდ შეგვიქმს, თუნდაც ეს სოფელი „ქრისტიანულად“ და „მართლმადიდებლურად“ კი რაცხდეს თავს. მაშ შევიკრძალოთ და ვზარდოთ ჭეშმარიტი მართლმადიდებელი მსოფლმხედველობის ზემოთდასახელებული თვისებები: ცხოველი, ბუნებრივი დამოკიდებულება, მოყვარული და მიმტყევებელი, არა ეგოცენტრული, მაგრამ ჩვენი უბრალოებისა და არასოფლისაგანობის დამცველი მაშინაც კი, რაჟამს სავსებით და მდაბლად ვუწყით უსჯულოება ჩვენი და ძალა ზედამოსეულ საცთურთა ამა სოფლისათა. უკეთუ ჭეშმარიტი მართლმადიდებელი მსოფლმხედველობით ვიცხოვრებთ, ჩვენი რწმენა გაუძლებს მოსალოდნელ დარტყმებს, და შთაგონებისა და ცხოვნების წყაროდ ექმნება მათაც, რომელნიც აწლა შეუღებებთან ქრისტეს ძიებას, თუნდაც უკვე აღსრულებად მიწევნულ წუთისოფელში.

თარგმნა ზ ა ზ ა მ თ ვ ა რ ა ძ ე მ
1982 წ.

„მართლმადიდებლობა და „მოხაველის რელიგია“

თ ა ვ ი VI

ზეციური სასწაულები

(ამოუცნობი მფრინავი ობიექტების — „მფრინავი თევზების“
(მართლმადიდებლურ-ქრისტიანული ახსნა)

მეორე მსოფლიო ომისშემდგომ ათეულ წლებში შეინიშნება აღმოსავლური რელიგიური კულტების მომრავლება და დასავლეთში მათი გავლენის გასაოცარი ზრდა. პარალელურად ჩაისახა და მომძლავრდა ამავე პერიოდში მოვლენა, რომელსაც, ერთი შეხედვით, თითქოს არავითარი კავშირი არ უნდა ჰქონდეს რელიგიასთან; თუმცა, ახლოს თუ განვიხილავთ, იგი აღმოჩნდება „შემდგომ ქრისტიანული ხანისა და „ახალი რელიგიური შეგნების“ ნიშანი — ისევე, როგორც აღმოსავლური რელიგიური კულტები. ეს მოვლენაა „ამოუცნობი მფრინავი ობიექტები“. იგი შეინიშნება მსოფლიოს თითქმის ყველა კუთხეში მას შემდეგ, რაც 1947 წ. აღნიშნულ იქნა პირველი „მფრინავი თევზი“.

ადამიანის ბუნებისათვის ჩვეულმა გულუბრყვილობამ და ცრუმორწმუნეობამ — რაც ჩვენი ეპოქისთვისაც ისევე დამახასიათებელია, როგორც კაცობრიობის ისტორიის ნებისმიერი პერიოდისათვის, გამოიწვია ის, რომ ეს მოვლენა დაუკავშირეს ფსიქიურად დაავადებულთა ამაღას, რომლებითაც სავსეა კულტურული სამყარო. თუმცა, მისდამი ინტერესი გამოამყლავნა საკმაოდ სერიოზულმა და პასუხისმგებელმა პირებმა; ასე რომ, შეიქმნა სახელმწიფო საკვლევო ცენტრები და ამ საკითხთან დაკავშირებით გამოქვეყნდა ცნობილ მეცნიერთა რამოდენიმე წიგნიც. ამ გამოკვლევებმა ამ ობიექტების, როგორც ფიზიკური რეალობის ამოცნობაში, დადებით შედეგს ვერ მიაღწიეს. თუმცა უახლესი თეორიები, ადრე წამოყენებულიებთან შედარებით, უფრო დამაკმაყოფილებლად ხსნიან

ამ ფენომენის არსს. მაგრამ მათ მიეყავართ „რეალურობის ზღვართან“ (ასე ჰქვია ერთ-ერთ ახალ სამეცნიერო წიგნს ამ თემაზე), ფსიქიკური და სულიერი რეალობის ზღვრამდე, რისი კვლევის არავითარი შესაძლებლობაც ამ მეცნიერებს არ გააჩნიათ. საღმთო წერილსა და მართლმადიდებლური ეკლესიის წმიდა მამების შრომებში თავმოყრილი მდიდარი ცოდნა, რაც სწორედ ამ მეორე რეალობას ეხება, აძლევს მართლმადიდებელ ქრისტიანს პოზიციას, უნიკალურს თავისი უპირატესობით, საიდანაც მას შეუძლია ამ ახალი ჰიპოთეზების და თვით ამოუცნობი მფრინავი ობიექტების მოვლენის შეფასება.

მართლმადიდებელ ქრისტიანს თვით ფენომენებზე უფრო მეტად მათთან დაკავშირებული მენტალობა (აზროვნების წესი) აინტერესებს: როგორ ხსნის ხალხი „ამოუცნობ მფრინავ ობიექტებს“ და რატომ? ერთერთი პირველი მეცნიერი, რომელიც ამ მოვლენებს სერიოზულ გამოკვლევაში ამგვარი პოზიციით მიუდგა, იყო ცნობილი შვეიცარელი ფსიქოლოგი კ. გ. იუნგი. თავის წიგნში „მფრინავი თეფშები: თანანედროვე მითი საგნებზე, რომლებიც ჩანს ცაზე“ (1959), იგი განიხილავს ამ ფენომენს, როგორც უპირველეს ყოვლისა, რაღაც ფსიქოლოგიური და რელიგიური მნიშვნელობის მქონეს. და თუმცა იგი არ ცდილობს ამოიცნოს ისინი როგორც „ობიექტური რეალობა“, მაინც სწორად მიუთითებს ადამიანური ცოდნის იმ სფეროზე, რომელსაც ისინი განეკუთვნებიან, თანამედროვე მეცნიერები, თუმცა ამ პრობლემას „ობიექტური“ და არა ფსიქოლოგიური მხრიდან უდგებოდნენ, აღიარებენ იმის აუცილებლობას, რომ ამ მოვლენის ასახსნელად საჭიროა „ფსიქიკური“ ჰიპოთეზები.

ამოუცნობი მფრინავი ობიექტების მოვლენას თუ რელიგიური და ფსიქოლოგიური თვალსაზრისით შევხედავთ. უპირველეს ყოვლისა საჭირო იქნება, ამ საკითხის ისტორიის გააზრება იმ ტერმინებით, როგორითაც ჩვეულებრივ განმარტავდნენ „მფრინავ თეფშებს“ (ისინი, ვისაც მათი არსებობა სწამთ) 40-იანი წლების პირველი დაკვირვებებიდან მოკიდებული, რის დანახვას ელის ხალხი ცაზე? ამ კითხვაზე პასუხს ადვილად ვიპოვით პოპულარული სამეცნიერო-ფანტასტიკური ლიტერატურის მოკლე მიმოხილვაში.

სამეცნიერო ფანტასტიკის შემადიანეები მის წარმოშობას მე-19 ს-ის დასაწყისის მიაკუთვნებენ. ზოგი მის სათავეებს ეძებს ედგარ ალან პოს მოთხრობებში, რომლებიც თავის მხრივ დამაჯერებელი რეალისტური სტილის „საიდუმლოს“ და ოკულტურ შინაარსთან შერწყმას წარმოადგენს. სხვები, პირველ მეცნიერ ფანტასტად მიიჩნევენ პოს თანამედროვე ინგლისელ მწერალ ქალს მერი უოლსტონკრაფტ შელის (ცნობილი პოეტის ცოლს); მისი „ფრანკენშტეინი“ ანუ „თანამედროვე პრომეთე“ არის შეთავსება ფანტასტიკური მეცნიერებისა ოკულტიზმთან, რაც შემდგომ დამახასიათებელი გახდა მრავალი სამეცნიერო-ფანტასტიკური წიგნისათვის.

მაგრამ, ტიპიური სამეცნიერო-ფანტასტიკური წიგნები გაჩნდა უფრო მოგვიანებით, მე-19 ს-ის ბოლოსა და მე-20 ს-ის დასაწყისში, დაწყებული ჟიულ ვერნითა და ჰერბერტ უელსით და დღევანდელი დღით დამთავრებული. 30-იან და 40-იან წლების სამეცნიერო ფანტასტიკა მეორე ხარისხოვანი, ძირითადად ამერიკული პერიოდიკის „მაკულატურული“ ლიტერატურული ჟანრიდან იქცა უკანასკნელი წლების საკმაოდ რესპექტაბელურ ინტერნაციონალურ ლიტერატურულ ჟანრად. გარდა ამისა, ბევრმა კინო-სურათმა, რომლებსაც გაუგონარი წარმატება ჰქონდათ, გვიჩვენა თუ რამდენად დაიპყრო ფართო მასების წარმოდგენა სამეცნიერო ფანტასტიკის სულმა. 1950 წლების უფრო მდარე და სენსაციურმა სამეცნიერო ფანტასტიკურმა ფილმებმა ადგილი დაუთმეს სხვა მოდურ „იდეურ“ ფილმებს, მაგ.: „2001: კოსმოსური ოდისეა“, „ვარსკვლავთ ომები“¹ და „მესამე რიგის ახლო კონტაქტები“, რომ აღარაფერი ვთქვათ ყველაზე პოპულარულ და ხანგრძლივი სიცოცხლის მქონე სატელევიზიო სერიალზე „კოსმოსური ექსპედიცია“².

სამეცნიერო ფანტასტიკის სული გამომდინარეობს იმ ფილოსოფიისა და იდეოლოგიისაგან, რომელიც მას საფუძვლად უდევს და რომელსაც პრაქტიკულად იზიარებს ყველა სამეც-

¹ „Star Wars“

² „Star Trek“

ნიერო ფანტასტიკის სფეროში მოღვაწე, თუმცა იგი უფრო მეტად იგულისხმება, ვინემ გამოიხატება სიტყვიერად. ეს ფილოსოფია შეიძლება შემდეგ ძირითად პუნქტებად ჩამოვაყალიბოთ:

1. რელიგია, ტრადიციული გაგებით, არ არის წარმოდგენილი, ანდა წარმოდგენილია ძალზედ ზედაპირულად ან დამახინჯებულად. თავისთავად ეს ლიტერატურული ჟანრი უეჭველად გვევლინება „ქრისტიანობის შემდგომი“ ერის პროდუქტად. სამყარო, სამეცნიერო ფანტასტიკაში, მთლიანად ერულია, თუმცა, არცთუ იშვიათად, ოკულტური ან აღმოსავლური ხასიათის მისტკური ობერტონების მატარებელი. „ღმერთი“, თუკი იგი საერთოდ იხსენიება, იხსენიება როგორც განუსაზღვრელი და არა პიროვნული ძალა და არა როგორც პიროვნული არსება (მაგ. „ძალა“ — „ვარსკვლავთ ომები“. კოსმოსური ენერჯია, როგორც კეთილი ასევე ბოროტი მხარის შემცველი). თანამედროვე ადამიანის სამეცნიერო ფანტასტიკური თემებით სულ უფროდაუფრო მეტად გატაცება, ტრადიციული რელიგიური ღირებულებების დაკარგვის პირდაპირი ასახვაა.

2. სამეცნიერო-ფანტასტიკური სამყაროს ცენტრად (ნაცვლად ღმერთისა, რომელიც არ არის წარმოდგენილი) გვევლინება ადამიანი — არა ისეთი, როგორც ამჟამადაა. არამედ როგორც იგი „გახდება“ მომავალში, თანამედროვე ევოლუციის მითოლოგიის შესაბამისად. და თუმცა, სამეცნიერო-ფანტასტიკურ ისტორიებში ჯერ კიდევ შეიძლება ადამიანების ცნობა, ავტორის მთელი ინტერესები მიმართულია მათ ურთიერთობაზე სხვადასხვა სახის სუპერმენებთან („ზეადამიანებთან“) მომავალი ღროის (ხანდახან წარსულისაც) მაღალგანვითარებული რასით დაწყებული და სხვა გალაქტიკის ბინადრებით დამთავრებული. სხვა პლანეტებზე „მაღალ განვითარებული“ გონიერი სიცოცხლის არსებობის იდეა იმდენად იქცა თანამედროვე შეგნების ნაწილად, რომ თვით ანგარიშ გასაწევ მეცნიერულ (და ნახევრად მეცნიერულ) მსჯელობებში ისინი წარმოდგენილია როგორც თავისთავად ცხადი. ასე მაგ., წიგნების ერთ-ერთი პოპულარული სერია (ერის ფონ დანიკენ „ღმერთების ეტლები“, „ღმერთები კოსმოსიდან“) გვაძლევს საყარაუდო მოწმობებს ძველ ისტორიაში „არამიწიერი“ არ-

სებების ანუ „ღმერთების“ არსებობის შესახებ, რომლებთაც მიაწერენ ადამიანში გონის გაღვიძებას, რაც ჩვეულებრივი ევოლუციის თეორიით ძნელი ასახსნელია. საბჭოთა კავშირში სერიოზული მეცნიერები მსჯელობენ იმის თაობაზე, რომ სოდომისა და გომორის განადგურება მოხდა ბირთვული აფეთქების შედეგად, რომ „არამიწიერი“ არსებანი უკვე მრავალი საუკუნის წინათ ეწვეოდნენ ხოლმე დედამიწას, რომ იესო ქრისტე, შესაძლოა იყო „კოსმონავტი“, და რომ დღეს ჩვენ იქნებ ვდგევართ კოსმიური სამყაროდან გონიერი არსებების „მეორედ მოსვლის წინაშე“¹.

ასევე სერიოზულ მკვლევარებს დასავლეთში იმდენად სწამთ „არამიწიერი გონიერი არსებების“ არსებობა, რომ სულ უკანასკნელი 18 წლის განმავლობაში ცდილობენ მათთან კონტაქტის დამყარებას რადიოტელესკოპების მეშვეობით, და ამჟამადაც მსოფლიოს ასტრონომები არა უმცირესნ ადვილისა, ეძებენ გონივრულ რადიოსიგნალებს კოსმოსიდან. თანამედროვე კათოლიკე და პროტესტანტი „ღვთისმეტყველები“, — რომლებიც მიჩვეული არიან მიჰყვნენ მეცნიერებას საითაც არ უნდა მივყავდეთ მას, — თავის მხრივ მსჯელობენ სიახლეზე „ეკზოთეოლოგიის“ („კოსმოსური სამყაროს ღვთისმეტყველება“) დარგში „არამიწიერი“ არსების შესაძლებელ ბუნებაზე იხ. ეურნ. „Time“, 24 აპრილი, 1978 წ.) თითქმის შეუძლებელია უარყოფა იმისა, რომ მითი, რომელიც ბადებს სამეცნიერო ფანტასტიკას, ფლობს დაუძლეველ მიმზიდველ ძალას თვით ბევრი სწავლულისათვის ჩვენს დროშიც.

სამეცნიერო-ფანტასტიკურ ლიტერატურაში მომავალი „ევოლუცია გავლილი“ არსებები უცვლელად გვევლინებიან როგორც თანამედროვე კაცობრიობის ყოველგვარ შეზღუდვებზე, და განსაკუთრებით „პიროვნების“ საზღვრებზე „ამაღლებული“ არსებები. როგორც სამეცნიერო ფანტასტიკის

¹ Sheila Ostvander and Lynn Schvoeder. *Psychic Discoveries Behind the Iron Curtain*. Bantam Books, 1977, pp. 98-99.
Вячеслав Зайцев, «Гости и космоса», Спутник, янв. 1967. «Храмы и корабли», Спутник, янв. 1968.

„ღმერთი“. ადამიანიც გახდა უპიროვნო. არტურ კლარკის წიგნში „ბავშვობის დასასრული“, ადამიანთა ახალი მოდგმა წააგავს ბავშვებს, ყოველგვარ ინდივიდუალობას მოკლებული სახეებით, ისინი უკვე მზად არიან შემდგომი „ეკოლუციური“ ტრანსფორმაციებისათვის -- რათა საბოლოო ჯამში შთანთქმულ იქნან უსახო „უმაღლესი გონის“ მიერ. საერთო ჯამში, სამეცნიერო-ფანტასტიკური ლიტერატურა — ქრისტიანობისაგან განსხვავებით — და აღმოსავლური აზროვნების ზოგიერთ სკოლასთან სრული თახმობით — „ეკოლუციურ განვითარებასა“ და „სულიერებას“ ხედავს ინდივიდუალობის სულ უფრო და უფრო მეტად დაკარგვაში.

3. მეცნიერ-ფანტასტებს მომავლის სამყარო და კაცობრიობა ესახებათ, როგორც თანამედროვე მეცნიერული აღმოჩენების გარკვეული პროექცია; სინამდვილეში კი, ეს „პროექციები“ გასაოცრად ახლოს დგას მრავალი საუკუნის ოკულტური და აშკარად დემონური ცდების ყოველდღიურ რეალობასთან. მომავლის „მალაღგანვითარებულ“ არსებებს ახასიათებთ შემდეგი თვისებები: ურთიერთობის დამყარება ტელეპათიის მეშვეობით, ლევიტირების უნარი, უნარი მატერიალიზირებისა თუ დემატერიალიზირების, საგნების ხილული ფორმის გარდაქმნა, ანდა „ილუზორული სცენებისა და არსებების შექმნა „წმინდა აზრის“ მეშვეობით, გადაადგილების დიდი სისწრაფე, რომელიც თანამედროვე ტექნიკის შესაძლებლობებს ძალზედ აღემატება, დედამიწაზე მცხოვრები არსებების სხეულის დაუფლება; გარდა ამისა, „სულიერი“ ფილოსოფიის განვითარება, რომელიც „ყველა რელიგიაზე მალაღგას“ და გვიქადის მდგომარეობას, რომელშიც „განვითარებული გონიერი არსებები“ აღარ იქნებიან დამოკიდებული მატერიაზე. ეს ყველაფერი ჯადოქრებისა და ეშმაკების სტანდარტული ფანდები და დაპირებებია. სამეცნიერო-ფანტასტიკის ისტორიის ახალ წიგნში აღნიშნულია, რომ „სამეცნიერო ფანტასტიკის თანამედროვე ასპექტს წარმოადგენს სწრაფვა გასცდეს ნორმალური ცდის ფარგლებს... იმით, რომ წარმოადგინოს მოქმედი პირები და მოვლენები, რომლებიც დროისა და

სივრცის ზღვარს სძლევენ იმ სახით, რა სახითაც ჩვენ მათ ვიცნობთ“¹.

„კოსმოსური ექსპედიცია“ და სხვა სამეცნიერო-ფანტასტიკური ისტორიების სცენარები, თავისი ფუტურისტული „სამეცნიერო“ გამოგონებებით, ხანდახან შეიძლება წაკითხულ იქნენ, როგორც ნაწყვეტები მართლმადიდებელი წმიდანების ცხოვრებიდან, რომლებშიც აღწერილია ჯადოქრების საქმიანობა, როცა ჯადოქრობა წარმართული ცხოვრების ერთ-ერთ მთავარ მოვლენას წარმოადგენდა. სამეცნიერო ფანტასტიკა მთლიანობაში აღებული არც თუ მაინცდამაინც მეცნიერულია და არც ფუტურისტული. უფრო სწორად, ეს არის თანამედროვე მეცნიერების უკან დახვევა „მისტიურ“ საწყისებისაკენ — მე-17-18 ს-ის „განმანათლებლობის“ წინა მეცნიერებისაკენ, რომელიც უფრო მეტად ახლოს იდგა ოკულტიზმთან. იმავე ნაშრომში აღნიშნულია, რომ „სამეცნიერო ფანტასტიკის ფესვები“ ისევე როგორც თვით მეცნიერების ფესვები, მაგიასა და მითოლოგიაშია საძებნი (შოლესი და რაბკინი, გვ. 183). დღევანდელი გამოკვლევები და ექსპერიმენტები „პარაფსიქოლოგიაში“ ასევე მიუთითებენ მომავალში მეცნიერების ოკულტიზმთან შერწყმაზე — აი პერსპექტივა, რომელსაც თანამედროვე ფანტასტიკა სავსებით ეთანხმება.

„სამეცნიერო-ფანტასტიკა როგორც აღმოსავლეთში, ასევე დასავლეთში თანამედროვე კულტურის სხვა ასპექტების მსგავსად — ამბობს გ. ვ. გრებენსი, — სავსებით ადასტურებს იმ ფაქტს, რომ ჰუმანიზმის უმაღლესი საფეხური ესაა ოკულტიზმი“².

4. როგორც „ფუტურალური“ ჟანრი, სამეცნიერო-ფანტასტიკა თავისი ხასიათით მიდრეკილია უტოპიურობისაკენ; მომავლის სრულყოფილი საზოგადოების აღწერას მთლიანად ეთმობა მხოლოდ მცირედი რომანი თუ ისტორია; უმეტესობაში ავტორები წერენ თანამედროვე საზოგადოების „ეკოლუ-

¹ Robert Scholes and Eric S. Rabkin, *Science Fiction: History. Science, Vision* Oxford University Press. 1977, p. 179.

² G. V. Grebens, *Ivan Efremov's Theory of Soviet Science Fiction*. Vantage Press, New York, 1978, pp. 108, 110.

ციის“ შესახებ, რაც მას უფრო მაღალ საფეხურზე აიყვანს, ანდა სხვა პლანეტების მაღალგანვითარებულ ცივილიზაციასთან შეხვედრების შესახებ, იმ იმედით, რომ შესაძლებელი გახდება დღევანდელი პრობლემების გადაჭრა და კაცობრიობის ყოველგვარი მანკიერი მხარეების დაძლევა. „სრულყოფილი არსებები“, მოსულნი კოსმოსური სივრცეებიდან, ხშირად დაჯილდოებულნი არიან „ყოვლისმცოდნეობის“ უნარით, და მიწაზე კოსმოსური ხომალდების დაჯდომა „აპოკალიპსის“ ამბებთან გვაბრუნებს — როგორც წესი, ესაა „კეთილმოსურნე“ არსებების ჩამოსვლა იმ მისიით, რომ წარმართონ ადამიანების „ევოლუციური სრულყოფა“. ერთი სიტყვით, მე-20 ს-ის სამეცნიერო-ფანტასტიკური ლიტერატურა უკვე მიგვანიშნებს სამყაროს ქრისტიანული აზრისა და ქრისტიანული ღირებულებების დაკარგვაზე; იგი იქცა არაქრისტიანული ფილოსოფიის დამკვიდრების მძლავრ საშუალებად, ცხოვრებასა და ისტორიაზე იმ თვალსაზრისების გაბატონების იარაღად, რომლებიც შეფარვით თუ ცხადად ოკულტიზმისა და აღმოსავლეთის რელიგიების გავლენის მატარებლები არიან; კაცობრიობის გარდამავალი მდგომარეობისა და კრიზისების დაძაბულ ეპოქაში იგი იქცა ძირითად ძალად, რომელიც გვაძლევს საშუალებას იმედი ვიქონიოთ ანდა ველოდოთ „სტუმრებს კოსმოსიდან“; და ისინი გადაჭრიან კაცობრიობის ყველა პრობლემას და წარუძღვებიან ადამიანებს ისტორიაში ახალი „კოსმიური“ საუკუნისაკენ. და თუმცა, ერთი შეხედვით, სამეცნიერო-ფანტასტიკური ლიტერატურა მეცნიერული ხასიათისაა და არა რელიგიურისა, სინამდვილეში იგი (ერული ფორმით) ძირითადი მქადაგებელია იმ „ახალი რელიგიური მრწამსისა“, რომელშიც სულ უფრო და უფრო ინთქმება კაცობრიობა ქრისტიანული პოზიციების დათმობასთან დაკავშირებით.

საჭიროა ყოველივე ეს გვახსოვდეს და ისე შევუდგეთ „მფრინავი თეთშების“ შესახებ არსებული მონაცემების განხილვას. ეს მონაცემები გასაოცრად ესადაგებიან იმ ფსევდორელიგიურ იმედებს, რომლებსაც უნერგავდნენ „ქრისტესშემდგომ“ ადამიანებს.

2. უახვედრები „მფრინავ თევზათან“ და მათი
მეცნიერული კვლევა

თუმცა ფანტასტიკამ ხალხი გარკვეული წესით მოამზადა ამოუცნობი მფრინავი ობიექტების გამოჩენისათვის, ჩვენ მათი „ობიექტური“ რეალობის შეფასებაში, რა თქმა უნდა, ვერ დავეყრდნობით ლიტერატურასა ან ადამიანების იმედებსა და მოლოდინს. მანამ, სანამ გავიგებდეთ თუ რას წარმოადგენენ ისინი თავის თავად, ჩვენ უნდა გავერკვეთ იმ დაკვირვებების ბუნებასა და უტყუარობაში, რომლებიც ტარდებოდა. არის თუ არა „იქ“ ცაში, მართლაც რაიმე ამგვარი, თუ ესაა უბრალოდ შედეგი დამახინჯებული აღქმისა და ფსიქოლოგიური და ფსევდო რელიგიური სწრაფვისა — „რეალობად მივიჩნით სასურველი“.

ნდობას იმსახურებს ამოუცნობი მფრინავი ობიექტების ფენომენის აღწერა დოქტორ ჟაკ ველეს მიერ, ფრანგ სწავლულთან, რომელიც ამჟამად კალიფორნიაში ცხოვრობს და რომელსაც აქვს მაღალი სამეცნიერო ხარისხები ასტროფიზიკისა და კიბერნეტიკის დარგში, და უკვე დიდი ხნის განმავლობაში მეცნიერულ ანალიზს უკეთებს მონაცემებს „მფრინავი თევზების“ შესახებ. მისი მოწმობა ჩვენთვის განსაკუთრებით მნიშვნელოვანია იმიტომაც, რომ იგი შეისწავლიდა ამოუცნობ მფრინავ ობიექტებთან შეხვედრის შემთხვევებს აშშ-ს ფარგლებს გარეთ, განსაკუთრებით საფრანგეთში, და ამდენად შეუძლია მოგვცეს ამ მოვლენის გავრცელების ობიექტური საერთაშორისო სურათი.

დოქტორი ვალე თვლის¹, რომ თუმცა ამოუცნობი მფრინავი ობიექტები წარსულ საუკუნეებშიც დროდადრო ჩნდებოდა ხოლმე, მათი „თანამედროვე ისტორია“, როგორც მასობრივი მოვლენის ისტორია, იწყება მეორე მსოფლიო ომის შემდეგ. ამერიკა ამ მოვლენებით 1947 წლის დაკვირვებების შემდეგ დაინტერესდა; მაგრამ ევროპაში უკვე არსებობდა დაკვირვებების ციკლი უცნაურ მანათობელ ობიექტებზე, რომ-

¹ UFOs in Space: Anatomy of a Phenomenon, Ballantine Books. N. Y. 1977. (First published by Henry Regnery Company. 1965).

ლებსაც თითქოსდა გონიერი არსებები მართავდნენ (გვ. 47). 1946 წ. განსაკუთრებით კი ივლისის თვეში, შვეციასა და ჩრდილოეთ ევროპის ქვეყნებში ადგილი ჰქონდა შეხვედრების მთელ სერიას (გვ. 47—53). ამ „სკანდინავიური ტალღის“ დაკვირვებების შესაბამისად მათ მიიჩნევდნენ „მეტეორებად“, შემდეგ „რაკეტებად“ (ანდა „რაკეტების აჩრდილებად“), ან „ბომბებად“ და ბოლოს, „ახალი ტიპის საჰაერო ხომალდებად, რომლებსაც შეეძლოთ უჩვეულო მანევრირება ცაში, თუმცა არ ტოვებდნენ კვალს მიწაზე, მაშინაც კი, როცა გვეჩვენებოდა, რომ დასხდნენ. ევროპის პრესა აქრელებული იყო მონათხრობებით ამ დაკვირვებათა შესახებ, და შვეციაშიც კი მათზე იყო ლაპარაკი; რეგისტრირებული იყო ათასამდე დაკვირვება, მაგრამ არასოდეს წამოჭრილა ჰიპოთეზა მათი წარმოშობის „არამიწიურ“ ან „საპლანეტათშორისო“ ხასიათზე. დოქტორი ვალე ასკენის, რომ ამ „ტალღის“ მიზეზი არის რეალურად არსებული. მაგრამ ამოუცნობი ობიექტები, და არა რომელიმე მითქმა-მოთქმა „მფრინავ თეფშებზე“ ანდა მოლოდინი „სტუმრებისა კოსმოსიდან“ (გვ. 53). ამ და მომდევნო „ტალღებში“ იგი ვერ აღმოაჩინს სრულ დამთხვევას სამეცნიერო-ფანტასტიკისადმი ინტერესის ფართო გავრცელებასა და ამოუცნობი მფრინავი ობიექტების აქტიობის პიკს შორის. და აღრეც, „მფრინავი თეფშების ტალღა“ არ შეინიშნებოდა, თუმცა პანკია ამერიკაში დაიწყო ორსონ უელსის რადიო-დადგმის შემდეგ: „სამყაროთა ომები“ 1938 წ. ჰერბერტ უელსის რომანის მიხედვით¹. იგი ასკენის, რომ „ამოუცნობი მფრინავი ობიექტების ფენომენის ჩასახვა, ზრდა და გავრცელება არის ობიექტური მოვლენა, რომელიც არ არის დამოკიდებული მნახველების შეგნებულ თუ შეუგნებელ გავლენასა და მათ რეაქციაზე ობიექტების მიმართ“ (გვ. 31).

პირველი, პუბლიკისათვის ხელმისაწვდომი დაკვირვება ჩატარდა ამერიკაში 1947 წ. ივნისში, როცა კომივოიჯორმა კუნეტ არნოლდმა, რომელიც მგზავრობდა საკუთარი თვით-

¹ ორსონ უელსის მიერ განხორციელებული რადიოდადგმა იწყებოდა როგორც ნამდვილი რეპორტაჟი მარსის მკვიდრების დედამიწაზე ვაღმოს-ზმის შესახებ, რამაც გამოიწვია მოსახლეობაში პანკია.

მფრინავით, შენიშნა 9 დისკოსმაგვარი ობიექტი, რამდენადმე „თეფშების“ ფორმისა, რომლებიც დაფრინავდნენ რენეს მთის მახლობლად, ვაშინგტონის შტატში. მონათხრობი აიტაცეს გაზეთებმა და ასე დაიწყო ერა „მფრინავი თეფშებისა“. საინტერესოა ის, რომ ეს არ იყო პირველი დაკვირვებები ამერიკაში; მანამდე რამდენიმე თვით ადრე ჩატარებულ იქნა დაკვირვებები, რომლებიც არ გამოქვეყნებულა. „მფრინავი თეფშების“ ტალღამ მოიცვა უნგრეთიც ივნისის დასაწყისში (50 ცნობა). ცხადია ეს შემთხვევა არ უნდა მივაკუთვნოთ არნოლდის შემთხვევის შემდეგდროინდელ ისტერიას. დაკვირვებანი 1947 წ. საკმაოდ ხშირი იყო, განსაკუთრებით ივნისის თვეში, ივლისსა და აგვისტოში. და თუმცა ზოგიერთ გაზეთში ლაპარაკი იყო „საპლანეტათშორისო სტუმრებზე“ — მეცნიერები ამ დაკვირვებებს სერიოზულად მოეკიდნენ — ვარაუდობდნენ, რომ ეს იყო „მაღალგანვითარებული ადამიანური ტექნიკის“, ყველაზე უფრო სავარაუდოა, ამერიკულის, ანდა შესაძლოა რუსული ტექნიკის პროდუქტი (გვ. 54—57).

მეორე ტალღამ — 1947 წ. ივლისში — გადაიარა ამერიკასა და საფრანგეთში. ამერიკის შეერთებულ შტატებში ადგილი ჰქონდა ეფექტურ ღამის შეხვედრას: ისტერს ეირლანდს დ—3 ტიპის თვითმფრინავის მფრინავებმა შენიშნეს ტორპედოს მსგავსი საჰაერო ხომალდი. „ილუმინატორების“ ორი რიგით, რომელსაც გარშემო ცისფერი ნათება და ნარინჯისფერი ცეცხლოვანი კუდი ახლდა. შეჯახება რომ თავიდან აეცილებინა, მან მანევრირება გააკეთა და გაუჩინარდა. იმავე წლის აგვისტოში საიგონსა და სამხრეთ-აღმოსავლეთი აზიის სხვა რაიონებში იყო დაკვირვებები „გრძელ რაკეტისმაგვარ ობიექტებზე“ (გვ. 57—59). 1949 წელი აღინიშნა შვეიციაში უცნაური დისკებისა და სფეროების შესახებ ცნობებით, ხოლო ამერიკაში „მფრინავი თეფშების“ დიდი რაოდენობით. მათ შორის ორი დაკვირვება ეკუთვნის გამოცდილ დამკვირვებელ-ასტრონომებს (გვ. 60—61). ამოუცნობი მფრინავი ობიექტების მცირე ტალღები, ასევე ცალკეული დაკვირვებანი გრძელდებოდა 1950—51 წლებში, განსაკუთრებით ამერიკაში, თუმცა ადგილი ჰქონდა ევროპაშიც გვ. 62—65).

1952 წ. წარმოიქმნა პირველი ინტერნაციონალური ტალღა

ამოუცნობი მფრინავი ობიექტებისა და მათზე ჩატარებული დაკვირვებებისა შეერთებულ შტატებში, საფრანგეთსა და ჩრდილოეთ აფრიკაში. ამ ტალღის მწვერვალი იყო ორი სენსაციური დაკვირვება კაპიტოლიუმისა და თეთრი სახლის თავზე ვაშინგტონში (სივრცეში, რომელიც განუწყვეტლივ რადარების კონტროლის ქვეშ იმყოფებოდა). სექტემბერში ტალღამ მოიცვა დანია, შვეიცია, ჩრდილოეთ გერმანია და პოლონეთი. ერთდროულად იქნა მიღებული პირველი ცნობები საფრანგეთიდან „მიწაზე დაშვებისა“ და „პატარა კაცუნების“ შესახებ (გვ. 65—69).

1953 წ. ამგვარი ტალღები აღარ ყოფილა, თუმცა იყო ცალკეული დაკვირვებები. ყველაზე მნიშვნელოვანი მათ შორის ჩატარდა ბისმარკში (ჩრდილოეთ დაკოტაში), სადაც ღამით 3 საათის განმავლობაში საჰაერო-მფილტრავი სადგურის თავზე ეკიდა ოთხი ობიექტი და მანევრირებდა. ამ შემთხვევის შესახებ ოფიციალურმა პატაკმა შეადგინა რამდენიმე ასეული გვერდი, რომელიც შეიცავდა მრავალი მოწმის, ძირითადად მფრინავებისა და სამხედრო პირების ჩვენებებს.

1954 წლის ინტერნაციონალური ტალღა ყველაზე მაღალი იყო. საფრანგეთი თითქმის ჩაიძირა ცნობების კორიანტელში — დღეში ათობით დაკვირვებები სექტემბრის, ოქტომბრისა და ნოემბრის თვეებში. საფრანგეთის ამ ტალღაში გამოიკვეთა „მფრინავი თეფშების“ კვლევის სერიოზული პრობლემები: „ამ მოვლენამ ისეთ საწყისს მიაღწია, საზოგადოებრივ აზრზე ისეთი შემადიწუნებელი შთაბეჭდილება მოახდინა და გაზეთების ისეთი ემოციური რეაქცია გამოიწვია, რომ ყველა მეცნიერს დაეკარგა ჰამის მადა, სანამ მოხდებოდა სერიოზული მეცნიერული კვლევის ორგანიზება. შედეგი იყო ის, რომ არცერთ მეცნიერს არ უნდოდა თავისი რეპუტაციის შელახვა და ამ ემოციური დამახინჯებული ფენომენის შესწავლისათვის ხელის აშკარად მოკიდება: ფრანგი სწავლულები სდუმდნენ, სანამ ტალღამ გადაიარა და მინელდა“ (გვ. 71).

ფრანგული ტალღა შეიცავდა ამოუცნობ მფრინავ ობიექტებთან უფრო გვიანდელი შეხვედრების დახასიათებებს: „მიწაზე დაფრენა“ (გარემოებათა თუნდაც ზოგიერთი აღწერებით), სინათლის სხივების ნაკადი „მფრინავი თეფშებიდან“

მხილველებისაკენ მიმართული: შეხვედრის ადგილის მახლობლად ძრავების გამორთვა, უცნაური პატარა არსებები „სკაფანდრებში“, მხილველები ფსიქიური და ფიზიკური ტრავმით.

1954 წლიდან სხვადასხვა ქვეყნებში აღინუსხა შეხვედრების ციკლის მსხვილი ინტერნაციონალური ტალღები: 1965, 1967 და 1962—73 წლებში; განსაკუთრებით მრავალრიცხოვანი და ღრმა იყო დაკვირვებები სამხრეთ ამერიკის ქვეყნებში.

სახელმწიფო ორგანიზაციების მიერ „მფრინავი თევზების“ შესწავლის ყველაზე უფრო ფართოდ ცნობილი შემთხვევაა — აშშ-ის საჰაერო სამხედრო ძალების მიერ ჩატარებული კვლევა, რომელიც ჩატარდა 1947 წ. მალე ამერიკული შეხვედრების შემდეგ. ეს კვლევა, რომელიც 1951 წლიდან ცნობილია სახელწოდებით „პროექტი ლურჯი წიგნი“, გაგრძელდა 1969 წლამდე, როცა იგი შეწყდა „კონდონის პატაკი“ რეკომენდაციით, რომელიც შედგენილი იქნა 1968 წელს სწავლული კომიტეტის მიერ. მას სათავეში ედგა კოლორადოს უნივერსიტეტის ერთ-ერთი წამყვანი ფიზიკოსი. ყველა, ვისაც კი მოუხდა დაკვირვებოდა როგორც „ლურჯი წიგნის“, ასევე „კონდონის კომიტეტის“ მუშაობას, აღნიშნავს, რომ არცერთი ამ ჯგუფთაგანი ამოუცნობი მფრინავი ობიექტების ფენომენს სერიოზულად არ ეყურებდა, და რომ ისინი ძირითადად იკვლევდნენ „საზოგადოებრივ აზრს“, რათა გაეხსნათ ეს საიდუმლოებით მოცული ზეციური მოვლენები და განეკურნათ ხალხი მათდამა შიშისაგან. ზოგიერთი დაჯგუფების წარმომადგენლები, რომლებიც შეისწავლიდნენ „მფრინავ თევზებს“, ბრალს სდებდნენ ამერიკის შეერთებული შტატების მთავრობას, რომ იგი ამ გამოკვლევებს იყენებდა „საფარად“, რათა დაემალა ამოუცნობი მფრინავი ობიექტების „ჭეშმარიტი ბუნების“ შესახებ საკუთარი ცოდნა.

თუშეცა ყველა საბუთი მოწმობს, რომ ეს გამოკვლევები ზერელე ხასიათისა იყვნენ და მათ სერიოზულად არც არავინ იყენებდა, მით უმეტეს, რომ ზოგიერთი ზედმეტად უცნაური ამბავი მეცნიერთა წრეში ამ თემისადმი ზიზზსაც კი იწვევდა. „ლურჯი წიგნის“ პირველი დირექტორი კაპიტანი ედვარდ რაპპელტი გამოტყდა, რომ „საჰაერო-სამხედრო ძალებს მიზ-

ნად რომც დაესახათ ამის ყველაფრის ბურუსით შენიღბვა და დახლართვა, ამაზე უკეთ საქმის გართულება ვერ მოხერხდებოდა... პრობლემას მიუღდგნენ დახლართვის პოზიციით... ყველაფერი ფასდებოდა წინასწარ განსაზღვრული თვალსაზრისით — რომ ამოუცნობი მფრინავი ობიექტები არ არსებობენ¹. „კონდონის პატაკი“ შეიცავს ამოუცნობი მფრინავი ობიექტების რამოდენიმე კლასიკურ „ახსნას“; ერთერთი მათგანი მაგ., ამტკიცებს, რომ ეს არაჩვეულებრივი დაკვირვება უნდა შევიდეს ბუნებრივი მოვლენების იმ უეჭველი კატეგორიების რიგში, რომელიც ძალზედ იშვიათია და როგორც ჩანს, არც მანამდე და არც ამ შემთხვევის შემდეგ არ შეინიშნებოდა. „ლურჯი წიგნის“ მთავარი მეცნიერ-კონსულტანტი, ჩრდილო დასავლეთის უნივერსიტეტის ასტრონომი ჯ. ალენ გინეკი, ამ პროექტის არსებობის თითქმის 22 წლის მანძილზე, აშკარად უწოდებს ამას ყველაფერს „ფსევდო-მეცნიერულ პროექტს“².

22 წლის მანძილზე წარმოებულ თავის გამოკვლევებში, როგორც არ უნდა იყვნენ ისინი, „ლურჯი წიგნის პროექტმა“ შეკრიბა ცნობები 12 900-ზე მეტი საიდუმლოებით მოცული ზეციური მოვლენების შესახებ, რომელთა 25 პროცენტი ამოუცნობი დარჩა, მიუხედავად საკმაოდ ნაძალადევი „ახსნებისა“. მრავალი ათასი სხვა შემთხვევა შეაგროვა და გროვდება აშშ-სა და სხვა ქვეყნებში კერძო ორგანიზაციების მიერ, თუმცა თითქმის ყველა სახელმწიფო ორგანიზაცია გაურბის მათ ხსენებას. სსრკ-ში ამ თემას პირველად 1967 წ. შეეხნენ, როცა მოსკოვის საავიაციო ინსტიტუტის დოქტორმა ფელიქს ზიგელმა ჟურნალში «Смена» ახსენა, რომ „საბჭოთა რადარები აგერ უკვე 20 წელია, რაც მფრინავ ობიექტებს იჭერენ“³. ამავე დროს მიმდინარეობდა საბჭოთა სამეცნიერო

¹ Ruppelt, Report on Unidentified Flying Objects, Ace Books, N.Y. 1956. pp. 80, 83.

² Hynek, the UFO Experience: A Scientific Inquiry, Ballantine Books, N.Y. 1977, pp. 215, 219.

³ «НЛО, что это такое? Смена, 7 апр. 1967, №. ასევე სტატია «Неопознанные летающие объекты» ჟურნალში «Советская жизнь», февр., 1968; «О возможном обмене информацией с внеземными цивилизациями», доклад во Всесоюзном инженерном институте в Москве 13 марта 1967: Психические открытия, გვ. 96.

კონფერენცია „კოსმოსური ცივილიზაციების“ შესახებ სომეხი ასტრონომის ვიქტორ ამბარცუმიანის ხელმძღვანელობით. ეს კონფერენცია იწონებდა ამგვარ „ცივილიზაციებთან“ კომუნიკაციის სამეცნიერო და ტექნიკური პრობლემების წინასწარ შესწავლას, რადგანაც მათი არსებობა ეჭვს არ იწვევდა. მაგრამ მომავალ წელს ამოუცნობი მფრინავი ობიექტების თემა სსრკ-ში კვლავ აიკრძალა და ამ დროიდან მოკიდებული საბჭოთა მეცნიერები თავის დასავლეთელ კოლეგებს საკუთარი გამოკვლევებისა და ჰიპოთეზების შესახებ მხოლოდ კერძო საუბრებში მოუთხრობდნენ.

შეერთებულ შტატებში ამოუცნობი მფრინავი ობიექტების თემა სამხედრო და მეცნიერ-მუშაკებისათვის რამდენადმე „მეცნიერების ფარგლებს მიღმა“ რჩება; თუმცა უკანასკნელ წლებში ამ პრობლემას სულ უფრო მეტი მეცნიერი, განსაკუთრებით კი ახალგაზრდა მეცნიერი, ეკიდება სერიოზულად და იკრიბებიან მისი შესწავლის მეთოდებისა და პრობლემების განხილვის მიზნით. დოქტორები გინეკი და ვალლე ახსენებენ მეცნიერთა „უხილავ კოლეჯს“, რომლებიც ახლა აქტიურ ინტერესს იჩენენ ამოუცნობი მფრინავი ობიექტების ფენომენის მიმართ, თუმცა უმეტეს მათგანს არ სურს, რომ მათი სახელები საჯაროდ იხსენიებოდეს.

რალა თქმა უნდა, ისეთებიც არიან, რომლებიც ამ მოვლენების არსებობას კატეგორიულად უარყოფენ, და მათ მიიჩნევენ ბუნებრივი ობიექტების, აეროსტატების, თვითმფრინავების და ა. შ. მცდარ აღქმად, თვალთმაქცობასა და ფსიქოლოგიურ „პროექციას“ რომ აღარაფერი ვთქვათ. ერთერთი ამგვარ მოღვაწეთაგანი, ფილიპ კლასი, კმაყოფილებას იმაში პოულობს, რომ ამოუცნობი მფრინავი ობიექტები „დაამხოს“. იგი განიხილავს ზოგიერთ დაკვირვებას და მათში აღმოაჩენს ან ბუნებრივ მოვლენებს ან ცრუ ჩვენებებს. წარმოებულმა გამოკვლევებმა იგი დაარწმუნა, რომ „შორეული პლანეტებიდან მოსული სასწაულებრივი კოსმოსური ხომალდების იდეა“ — სინამდვილეში არის მშვენიერი ზღაპარი. გადაკეთებული დი-

¹ Philip J. Klass, UFOs Explained, Random House, N.Y. 4-9, The UFO Experience, chs 5-10.

დებისათვის“¹. ამგვარი უზღვევარო მკვლევარები, ხშირად იფარგლებიან შემთხვევებით, როცა ამოუცნობი მფრინავი ობიექტების დაშვების უტყუარი ნივთიერი მტკიცებანი არსებობენ (ე. წ. „მეორე რიგის ახლო კონტაქტები“; როგორც ამას ქვემოთ დავინახავთ); ამოუცნობი მფრინავი ობიექტების არსებობის რეალურობის ჯიუტი დამცველებიც კი იძულებული არიან აღიარონ, რომ ამგვარი დამამტკიცებელი საბუთები ძალზედ ცოტაა თვით ყველაზე სარწმუნო ცნობებშიც კი მათ შესახებ. ერთადერთი, რამაც უკანასკნელ წლებში აიძულა მრავალი მეცნიერი სერიოზულად მოჰკიდებოდა ამ მოვლენებს, არის არა ნივთიერი მტკიცებანი მათი რეალურობის შესახებ, არამედ ის ფაქტი, რომ ბევრმა სერიოზულმა და სანდო პირმა იხილა ის, რაც არ ექვემდებარება ახსნას და რამაც მათზე წარუშლელი შთაბეჭდილება დატოვა. დოქტორ გინეკი წერს, რომ „ყოველთვის მქონდა ისეთი გრძნობა, თითქოს ველაპარაკები ადამიანს, რომელიც აღწერს რეალურ მოვლენას. მისთვის (ქალისა ან მამაკაცისათვის) ეს იყო განსაკუთრებული განცდა, ცოცხალი და არავითარ შემთხვევაში არ ჰგავდა სიზმარს; ეს იყო განცდა, რომლისთვისაც დამკვირვებელი, როგორც წესი, აბსოლუტურად მოუზადებელი იყო — თუმცა სწრაფად ხვდებოდა, რომ ეს იყო მოვლენა, რომლის შედარებაც არაფერთან არ შეიძლებოდა“ (The UFO Experience გვ. 14).

ამოუცნობ მფრინავ ობიექტებთან შეხვედრის (განსაკუთრებით „ახლო კონტაქტების“) შემთხვევაში შთაბეჭდილებების უტყუარი რეალურობას და ამასთანავე ნივთიერი მტკიცებების თითქმის სრულ არარსებობას, იქამდე მივყავართ, რომ მათ შევისწავლით ძირითადად არა როგორც ფიზიკურ მოვლენებს, არამედ ესაა მოწმეთა ჩვენებების ანალიზი, მათი უტყუარობის შეფასება, თანმიმდევრობა და ა. შ. უკვე მარტო ესეც საკმარისია, რომ იგი ფსიქოლოგიის სფეროს კვლევის საგნად იქცეს და დაგვარწმუნოს, რომ „ნივთიერი მტკიცებების შეუპოვარი ძიება — პრობლემის განხილვის არასწორი გზაა, თუმცა, მისტერ კლასის გამონათქვამი იმის თაობაზე რომ „მშვენიერი კოსმოსური ხომალდები“ მხოლოდ და მხოლოდ „ჯადოსნური ზღაპრებია დიდებისათვის“ იქნებ არც ისე შორ-

საა ჭეშმარიტებისაგან. დაკვირვება ამოუცნობ მფრინავ ობიექტებზე ეს ერთია, და ინტერპრეტაცია, რომელსაც ხალხი საკუთარ (ან სხვის) დაკვირვებებს აძლევს — ეს სხვაა — პირველი შეიძლება იყოს სავსებით რეალური, მეორე კი ხდება „ჯადოსნური ზღაპარი“ ანდა ჩვენი ღრვის მითი.

ლოქტორმა გინეკმა ბევრი რამ გააკეთა იმისთვის, რომ თავიდან აეცილებინა ბევრი მცდარი აზრი ამოუცნობ მფრინავ ობიექტებთან შეხვედრის შესახებ. ასე მაგ., იგი ხაზგასმით აღნიშნავს, რომ „მფრინავ თევზებზე“ დაკვირვებების უმეტესი ნაწილი ჩატარებულია ურწმუნო, მერყევი ან უცოდინარი ადამიანების მიერ. ამგვარი ადამიანების მიერ მოწოდებული ცნობები უცბადვე გამოიკვეთება როგორც არა სანდო და შესასწავლ მასალაში არ შედის. მაგრამ უმეტესად დაწვრილებით და შინაარსიან ცნობებს გვაწვდიან ნორმალური, თავის სიტყვებზე პასუხისმგებელი ადამიანები, ხშირად მეცნიერული განათლების მქონე, რომლებიც გულწრფელად შეცბუნებული ან შეძრწუნებული არიან განცდილით და უბრალოდ არ იციან, როგორ ახსნან ეს („The UFO Experience“, pp. 10—11); რაც უფრო ძლიერია განცდა და რაც უფრო ახლო იყო მნახველის კონტაქტი „მფრინავ თევზთან“, მით უფრო ნაკლებადაა ეს პირი განწყობილი ცნობების მოწოდებისათვის. ამოუცნობი მფრინავი ობიექტების კართოთეკა — ეს არის კოლექცია „სანდო ადამიანების მიერ მოთხრობილი დაუჭერებელი ამბებისა“, როგორც იტყვის სამხედრო-საჰაერო ძალების ერთ-ერთი გენერალი. საღი აზრი არ გვაძლევს საშუალებას ეჭვი შევიტანოთ იმაში, რომ „მფრინავ თევზების“ შესახებ მრავალი ათასი ცნობების უკან ჭეშმარიტად რაღაც დგას.

**8. ამოუცნობ მფრინავ ობიექტებთან („მფრინავ
თეფშებთან“) კონტაქტის ექვსი კაბაჰორია**

დოქტორმა გინეკმა, რომელიც ამ საკითხს უფრო დაწვრილებით შეისწავლიდა, ვინემ რომელიმე ფართოდ ცნობილი მკვლევარი, მოხერხებულობის თვალსაზრისით „მფრინავი თეფშების“ ფენომენები რ კატეგორიად დაჰყო¹.

პირველი, „ლამის მანათობელი ობიექტები“, რომლებიც ყველაზე უფრო ხშირად გვხვდება და ნაკლებ გაცეხას იწვევს. ამგვარი ობიექტების უმრავლესობა ადვილად ამოიცნობა, როგორც ციური სხეულები, მეტეორიტები და ა. შ. და მათ არ მიაკუთვნებენ ამოუცნობ მფრინავ ობიექტებს. ნამდვილი, საიდუმლოებით მოსილი „ლამის მანათობელი ობიექტები“ (ისინი, რომლებიც „ამოუცნობი“ რჩებიან) დაკავშირებული არიან გონივრულ მოქმედებასთან, მაგრამ ვერ გვიცვნიან როგორც ჩვეულებრივი თვითმფრინავი და ხშირად შეინიშნება მრავალი მნახველის მიერ და მათ შორის პოლიციელების, მფრინავებისა და აეროპორტების დისპეჩერების მიერ.

ამოუცნობი მფრინავი ობიექტების მეორე კატეგორია, ეს არის „დღის დისკოები“, რომლებიც „ლამის მანათობელი ობიექტების“ მსგავსად მოქმედებენ. ესენია „მფრინავი თეფშები“ და ამ კატეგორიაში შემავალი თითქმის ყველა ობიექტი წარმოადგენს დისკოს, რომელიც ფორმის მიხედვით ვარირებას განიცდის: მრგვალი ფორმიდან სივარის ფორმამდე. ხშირად ისინი მეტალისა გვეჩვენება (მეტალისაგან დამზადებულს ჰგავს) და გადმოცემით მაღალ სისწრაფეზე წარმოუდგენლად სწრაფი შეჩერებისა და სტარტის უნარი გააჩნიათ; ასევე ავლენენ გასაოცარი მანევრირების უნარს (მაგ.: უეცრად ცვლიან მიმართულებას ანდა უძრავად დაეკიდებიან), რაც ჩვენთვის ცნობილი თვითმფრინავებისათვის ტექნიკურად შეუძლებელია. ამგვარი დისკოების მრავალი ფოტოდოკუმენტი არსებობს, თუმცა ისინი ნაკლებ დამაჭერებელია, ობიექტების სიშორის გამო, არაა გამორიცხული სიყალბეც; „ლამის მანათობელი ობიექტების მსგავსად“, ამ კატეგორიის „ამოუცნობი

¹ The Hynek UFO Report, Dell Publish Co., N.Y. 1977. chs. 1974 p. 360.

მფრინავი ობიექტები“, თითქმის ყოველთვის უხმაუროდ მოძრაობენ და ხშირად მას ორს ან მეტს ერთდროულად ხედავენ.

მესამე კატეგორია — ესაა „რადიო-ვიზუალური“ ცნობები, ე. ი. დაკვირვებები რადარზე, დადასტურებული უშუალოდ ვიზუალური დაკვირვებებით (რადგანაც რადარს თვით შეუძლია მოგვეცეს სხვადასხვა არასწორი გამოსახულებები). ამათგან უმეტესობა ხდება ღამით და მათ შორის ყველაზე თვალსაჩინოა ის შემთხვევები, როცა დაკვირვებები ხდება საკმაოდ ახლო მანძილიდან „მფრინავი თევზების“ საძიებლად ზეცაში ერთდროულად აფრენილი რამდენიმე თვითმფრინავიდან.

ასეთ დროს „მფრინავი თევზი“ თვითმფრინავზე სწრაფად მანევრირებს, ხან მისდევს მას და ბოლოს უჩინარდება, ავითარებს რა გაუგონარ სიჩქარეს (400 ან მეტ მილს საათში). ხან, როგორც ამას ადგილი აქვს პირველ და მეორე კატეგორიებთან, ობიექტი თითქოს იყოფა და 2 ან მეტ კარგად გასარჩევ ობიექტად გადაიქცევა. ხდება ასეც, რომ მფრინავების მიერ ჰაერში კარგად დანახულ ამ ობიექტებს, რადარის ეკრანი სულაც არ აღნიშნავს.

ამ კატეგორიაზე დაკვირვებები, ისევე როგორც I და II-შემთხვევაში, რამდენიმე წუთიდან რამდენიმე საათამდე გრძელდება. პირველი სამი კატეგორიის ბევრი შემთხვევა კარგადაა წარმოდგენილი დოკუმენტებით, სარწმუნო, გამოცდილი და დამოუკიდებელი მხილველების მიერ. მიუხედავად ამისა, როგორც აღნიშნავს დოქტ. გინეკი, ყოველი ამ დაკვირვებათაგანი შეიძლება მოხდეს, იშვიათი, უჩვეულო გარემოებების გამო, და არა როგორც ახალი მანამდე უცნობი ფენომენი. მაგრამ, როცა დაგროვილია მრავალი ერთმანეთის მსგავსი კარგად დოკუმენტირებული ჩვენება, ალბათობა იმისა, რომ ისინი ჩვეულებრივი ობიექტების დამახინჯებული აღქმანი არიან, მინიმალური ხდება („The UFO Experience“, გვ. 92). აი, რატომაა, რომ ამოუცნობი მფრინავი ობიექტების შემსწავლელმა სერიოზულმა მკვლევარებმა ყურადღება გაამახვილეს კარგად დოკუმენტირებული ჩვენებების შეგროვებაზე და მრავალი სარწმუნო ჩვენებების შედარებით უკეთ

გამომჟღავნდა „მფრინავი თეფშების“ აქტიობის გამოკვეთილი მოდელები.

იმათი რეაქცია, ვინც ამოუცნობ მფრინავ ობიექტებთან პირველი საში სახის კატეგორიების კონტაქტში მოხვდა — არის შეფიქრიანება და შეცბუნება. მათ იხილეს რაღაც საე-სებით ამოუხსნელი და აქვთ მტანჯველი სურვილი „სულ ცოტათი უფრო ახლოს“ ნახონ იგი. მხოლოდ რამოდენიმე შემთხვევაში, უმეტესად მფრინავებს, რომლებიც ცდილობდნენ დადევნებოდნენ მათ, ამ ობიექტებთან შეხვედრისას გაუჩნდათ შიში. მათ უდაოდ გონიერი არსებები მართავდნენ, რომლებიც თავისი მონაცემებით შორს უსწრებდნენ თანამედროვე ტექნიკას. „ახლო კონტაქტების“ შემთხვევაში კი აღამიანები გაცილებით უფრო ღრმა ემოციებს განიცდიან და წინა პლანზე იწვევს ფენომენის „ფსიქიკური“ მხარე.

„პირველი რიგის ახლო კონტაქტები“ — ესაა დაკვირვებები მანათობელ ობიექტებზე ახლო მანძილიდან (500-მდე ფუტი ან ნაკლები), ამასთანავე ნათება ძალზედ კაშკაშა და იწვევს მის ქვემოთ მდებარე მიწის ლუმინესცენციას. ობიექტების ფორმის აღწერისას მას ჩვეულებრივ განსაზღვრავენ როგორც ოვალურს, ხანდახან ზემოთ გუმბათით, სინათლე კი ბრუნავს, ჩვეულებრივ საათის ისრის საწინააღმდეგოდ. ეს ობიექტები ხშირად დედამიწის ზედაპირიდან არც თუ დიდ მანძილზე დაეკიდებიან ხოლმე, უხმაუროდ ან ჩუმი ზუზუნით, ხანდახან ზედ დედამიწის თავზე მოძრაობენ და გადაადგილდებიან დიდ მანძილებზე და როგორც წესი, უჩვეულო სისწრაფით უჩინარდებიან, სრულიად უხმაუროდ და ჩვეულებრივ ვერტიკალურად ზევით. ცნობები ამგვარი „ახლო კონტაქტების“ შესახებ, რომლის მოწმეც ერთდროულად რამდენიმე პირია, საკმაოდ ბევრია; ყველა ეს ცნობა ერთმანეთს ჰგავს, თითქოს ეს მართლაც ერთსა და იმავე ობიექტზე (ან მსგავს ობიექტებზე) დაკვირვების აღწერა იყო ყველა კარგად დოკუმენტირებულ ჩვენებაში. როგორც წესი, ყველა ამგვარი კონტაქტი ღამით ხდება ერთმანეთისაგან გაფანტულ წერტილებში და ყოველ მათგანს არც თუ ისე ბევრი მოწმე ჰყავს (დოქტორ გინეჯის მიერ შესწავლილ შემთხვევებში, საშუალოდ 3 ან 4).

„პირველი რიგის ახლო კონტაქტები“ ყოველთვის გასაოცარია და თავზარდამცემი, თუმცა არავითარ ხილულ კვალს არ ტოვებს, მხილველები, ჩვეულებრივ იმდენად შეძრწუნებული არიან, რომ ავიწყდებათ ფოტოს გადაღება, თუნდაც კამერა ხელთ ჰქონდეთ. მხილველებზე ზემოქმედების ტიპური სურათი მოცემულია 1955 წ. ამოუცნობი მფრინავი ობიექტის გამოჩენის მოწმის შენიშვნაში: „გარწმუნებთ, თუკი ვინმეს მოუწევს ამგვარი ობიექტის ისე ახლოს ნახვა, თუნდაც ერთი წუთით, ეს მის მეხსიერებაში სიკვდილამდე ჩაიბეჭდება“ („The Hynek UFO Report“, გვ. 145). ეს შეხვედრები იმდენად უჩვეულოა, რომ მხილველთა მონათხრობს ხშირად არ უჯერებენ, რის გამოც მრავალი ან სდუმს, ან მხოლოდ მრავალი წლის შემდეგ საიდუმლოდ გაგვანდობს მას. ამგვარი მოვლენები სავესებით რეალურია იმათთვის, ვისაც ის შეემთხვა — ყველა დანარჩენისთვის კი დაუჯერებელი.

ტიპური „პირველი რიგის კონტაქტი“ ჰქონდა 1966 წ. პორტაჯ კაუნტი, ოგაიოს შერიფის ორ თანაშემწეს. 16 აპრილს, დაახლოებით დილის 5 სთ-ზე ისინი გაჩერდნენ მანქანასთან, რომელიც სოფლის გზის კიდეზე მიეტოვებინათ. მათ დაინახეს ობიექტი „სიდიდით სახლის ზომისა“, რომელიც ჩამოეშვა ხის კენწეროებამდე (დაახლოებით 100 ფუტის სიმაღლეზე). მან დაიწყო ხალხთან მიახლოება, სულ უფრო და უფრო მეტად ნათლებოდა და კაშკაშა სინათლეს ჰფენდა ყველაფერს. შემდეგ გაჩერდა მათ თავზე ჩუმი ზუზუნით. შემდეგ ობიექტმა იწყო დაშორება და ისინიც დაედევნენ მას დაახლოებით 70 მილის მანძილზე პენსილვანიის შტატის ტერიტორიაზე 105 მილ. საათში სიჩქარით. ორმა სხვა პოლიციელმაც აშკარად იხილა ეს ობიექტი, როცა ის მალა ავიდა, შემდეგ სწრაფად აიჭრა ვერტიკალურად ზემოთ და გაუჩინარდა. ეს იყო გამთენიისას. „ლურჯი წიგნის პროექტი“ კონგრესის მოთხოვნით იძულებული გახდა განეხილა ეს შემთხვევა. იგი „ახსნეს“, როგორც „პლანეტა ვენერას მიერ წარმოებულ დავირვება“. ხოლო ოფიცრები, რომლებმაც ამის შესახებ მიაწოდეს ცნობები, მასხრად აიგდეს პრესის ფურცლებზე, რის გამოც ერთ-ერთ მათგანს დაენგრა ოჯახი, ჯანმრთელობაც შეერყა და კარიერაც (The UFO Experience, გვ. 114—124).

მსგავსი პირადი ტრაგედიები, რომლებიც შეემთხვა ამგვარი ტიპის კონტაქტის მქონე ადამიანებს, იმდენად ჩვეულებრივი მოვლენაა, რომ ისინი ამ ფენომენის „ტიპურ მახასიათებლებად“ უნდა ჩაითვალოს.

„მეორე რიგის ახლო კონტაქტები“ ძირითადად ჰგავს „პირველი რიგის ახლო კონტაქტებს“, მაგრამ იმით განსხვავდება მისგან, რომ თავისი ყოფნით ტოვებენ გასაოცარ კვალს, ფიზიკურს ან ფსიქოლოგიურს. ეს კვალია: ნიშანი მიწაზე, დამწვარი ან შეტრუსული ხეები ან სხვა მცენარეულობა, ელექტრომოწყობილობებზე ზემოქმედება, რაც ხელს უშლის რადიოხელსაწყობების მუშაობას, ავტომობილის ძრავების გაჩერება: მოუსვენრობა ცხოველებში, რაც თავს იჩენს მათ უცნაურ ქცევაში და ზემოქმედება ადამიანებზე: დროებითი პარალიზი, ენის ჩაქვრება (დამუნჯება), მხურვალება, ლებინება, სხვა უსიამოვნო შეგრძნებები, დროებითი უწონობის მდგომარეობა (რაც ხანდახან ლევიტაციას იწვევს), უეცარი განკურნება ტრავმიდან ან ტკივილისაგან და სხვადასხვა სახის ფსიქოლოგიური და ფიზიკური შედეგები. მაგ.: უცნაური ნიშნები სხეულზე. ამოუცნობ მფრინავ ობიექტებთან ამგვარი ტიპის კონტაქტები შედარებით ფართო შესაძლებლობას გვაძლევს შევისწავლოთ ისინი მეცნიერული თვალსაზრისით; რამდენადაც გარდა მხილველების ჩვენებისა ხელთ გვაქვს ნივთიერი მტკიცებანიც, რომლებიც შეიძლება შესწავლილ იქნას; თუმცა რეალურად ამგვარი გამოკვლევები ძალზედ მცირერიცხოვანი იყო, ნაწილობრივ იმიტომ, რომ მეცნიერები საერთოდ ერიდებიან სერიოზულად მოჰკიდონ ხელი ყველაფერს იმას, რაც „ამოუცნობ მფრინავ ობიექტებს“ ეხება, და ნაწილობრივ იმიტომაც, რომ თვით მტკიცებანი, როგორც წესი, არასრულია ანდა ნაწილობრივ სუბიექტური. შედგენილია კატალოგი, რომელშიც თავმოყრილია ამ ტიპის 800 შემთხვევა, რომელთაც ადგილი ჰქონდათ 24 ქვეყანაში („The Hynek UFO Report“, გვ. 30). ჯერ არცერთხელ არ ყოფილა რეგისტრირებული „მფრინავი თევზის“ ნაწილი, და დედამიწაზე დატოვებული ნიშნებიც ისევე საიდუმლოებითაა მოცული, როგორც თვით ობიექტები. უფრო ხშირად ეს ნიშნები რჩება ამოუცნობი მფრინავი ობიექტების მიწაზე დაშვებისას (როცა ისინი ადამიანების თვალ-

წინ იმყოფებოდნენ მიწაზე ან ამ ადგილის თავზე) და წარმოადგენს გადაბუგულ, გადამხმარ ნაკვეთს ანდა 29—30 ფუტის დიამეტრისა და 1—3 ფუტის სისქის რგოლის ფორმის ჩაღრმავებებს. ეს რგოლები კვირეებისა და თვეების განმავლობაში არ ქრებოდა და ცნობებიც არსებობს, რომ მიწა ამ რგოლების შიგნით უნაყოფო რჩება წელი ან ორიც. ამგვარი „რგოლების“ ნიადაგის მცირერიცხოვანი ქიმიური სინჯები არ გვაძლევს საშუალებას გავაკეთოთ დასკვნა ამ მდგომარეობის მიზეზების შესახებ.

„მეორე რიგის ახლო კონტაქტები“ აქვთ ადამიანებს, რომლებიც ღამით გზის მოცილებულ უბნებზე იმყოფებიან. მრავალ მსგავს შემთხვევაში მანათობელი ობიექტი ეშვება მინდორზე მსუბუქი ან სატვირთო მანქანის მახლობლად, ან გზაზე მათ წინ, მანქანის ძრავა და ფარები წყვეტს მუშაობას, ხოლო მასში მსხდომი ადამიანები შექრწუნებული შესცქერიან ამოუცნობ მფრინავ ობიექტს, სანამ იგი არ მიეფარება თვალს, უმეტესად უეცრად და უხმაუროდ აიჭრება რა ვერტიკალურად ზევით; ამის შემდეგ ძრავა ისევ ამუშავდება, ხანდახან თავისით ჩაირთვება ხოლმე.

მაგრამ ამოუცნობ მფრინავ ობიექტებთან შეხვედრებს შორის ყველაზე უფრო უცნაურია ცნობები ე. წ. „მესამე რიგის ახლო კონტაქტების“ შესახებ, სახელდობრ, შეხვედრა „მფრინავ თევზებთან“ დაკავშირებულ „სულიერ არსებებთან“ („მგზავრებთან“ ან „ჰუმანოიდებთან“) .ამგვარი ცნობების შეტყობისას ადამიანთა უმრავლესობას უჩნდება პირველი რეაქცია — წარმოიდგინოს „პატარა მწვანე კაცუნები და უარი სთქვან მთლიან ფენომენზე, როგორც ჰემსარიტებისათვის შეუსაბამოზე და ჩათვალონ იგი თვალთმაქცობად ან ჰალუცინაციად. თუმცა, ამ მოკლე ხნის წინ ამერიკაში გადაღებული სამეცნიერო-ფანტასტიკური ფილმის წარმატებამ, რომელსაც ასევე ჰქვია „მესამე რიგის ახლო კონტაქტები“ (მისი მეცნიერ-კონსულტანტი იყო დოქტორ გინეკი), და ასევე 1974 წ. მონაცემები გოლოპას ცნობების მიხედვით, რომლის თანახმადაც მფრინავ თევზებს“ რეალურად არსებულად თვლის 5 პროცენტი იმ ადამიანებისა, ვისაც მათზე რაიმე სმენიათ, ხოლო 46 პროცენტს გამოკითხულთა საერთო რიცხვისა, სწამს გო-

ნიერი სიცოცხლის არსებობა სხვა პლანეტებზე¹ (დღეს ეს პროცენტული რიცხვი უეჭველად უფრო მაღალი იქნებოდა) — მიუთითებს იმაზე, რომ თანამედროვე ადამიანი სულ უფრო მეტ შზადყოფნას ამჟღავნებს, რათა მიიღოს „არაადამიანურ გონთან“ რეალური კონტაქტების იდეა.

სამეცნიერო ფანტასტიკამ შვა სახეები, „ევოლუციამ“ შექმნა ფილოსოფია, ხოლო „კოსმოსური ეპოქის“ ტექნოლოგიამ უზრუნველყო ამგვარი კონტაქტების შესაძლებლობა.

რა გასაოცრაც არ უნდა გვეჩვენებოდეს, ამგვარი კონტაქტები, როგორც ჩანს, იგი ჩვენს დღეებშიც ხორციელდება, რასაც მოწმობს სანდო პირების მიერ მოწოდებული ცნობები. ეს კი ნიშნავს, რომ ინტერპრეტაცია — ახსნა, რომელიც ამ მოვლენებს უნდა მიეცეს, იძენს პირველად მნიშვნელობას. რა არის ეს მოვლენები? დგას მათ უკან „კოსმოსიდან მოსულ“ სტუმრებთან რეალური კონტაქტი, თუ ეს მხოლოდ ახსნაა, შთაგონებული „დროის სულით“, სულ სხვა რიგის კონტაქტებისა?

როგორც ეს ქვემოთ გამოჩნდება, თანამედროვე მეცნიერებმა, რომლებიც ამოუცნობ-მფრინავ ობიექტებს შეისწავლიან, უკვე დასვეს ეს საკითხები.

დოქტორი გინეკი გულწრფელად აღიარებს, რომ არ სურს სცნოს „მესამე რიგის ახლო კონტაქტების“ შესაძლებლობა: „გულახდილად რომ ვთქვათ, მოხარული ვიქნებოდი დუმილით ამეველო გვერდი ამ საკითხისათვის და მიმეცა საკუთარი თავისათვის ამისი ნება ისე, რომ მეცნიერული კეთილსინდისიერების პრინციპი არ დამერღვია“ („The UFO Experience“, გვ. 158). მაგრამ ისწრაფვის რა შეინარჩუნოს მეცნიერული ობიექტურობა, მას შეუძლებლად მიაჩნია, გვერდი აუაროს ამ უცნაური ფენომენის კარგად დოკუმენტირებულ შემთხვევებს, ცნობებს საიმედო მხილველებისა. თითქმის 1250 „ახლო კონტაქტის“ შემთხვევიდან, რომლებიც რეგისტრირებულია დოქტორ ჟაკ ვალლეს კატალოგში, 750-ში ლაპარაკია ხომალ-

¹ J. Allen Hynek and Jacques Vallee, *The Edge of Reality. A Progress Report on Unidentified Flying Objects*, Henry Regnery Co., Chicago, 1975, pp. 289-290.

დის მიწაზე დაშვებასა, და 300-ზე მეტში კი აღნიშნულია „ჭუმანოიდების“ ყოფნა ხომალდზე ან მის მახლობლად; ხოლო ერთი მესამედი ის შემთხვევებია, რომლებიც დასტურდება რამოდენიმე მოწმის მიერ (იქვე, გვ. 161).

აი „ჭუმანოიდებთან“ შეხვედრის ერთი შემთხვევა, რომელიც 1961 წ. ნოემბერში მოხდა აშშ ჩრდილოეთის ერთერთი შტატის ტერიტორიაზე: ოთხი მონადირე გვიან ღამით შინ ბრუნდებოდა. ერთმა მათგანმა შენიშნა გავარჯარებული ობიექტი, რომელიც დაბლა ეცემოდა, თითქოს თვითმფრინავს ავარია შეემთხვა და გზაზე დავარდა მათგან თითქმის ნახევარი მილის დაშორებით. როცა მათ „ავარიის“ ადგილს მიაღწიეს, ოთხივემ დაინახა მინდორში მიწაში კუთხით ჩარჭობილი ვრცელი ცილინდრის ფორმის ობიექტი. მის გარშემო იდგა ოთხი ადამიანის მსგავსი ფიგურა (დაახ. 160 მ. დაშორებით). მათ ფარები მიანათეს ერთ-ერთ ფიგურას (სიმაღლით 4,5 ფუტი-135 სმ), რომელიც რაღაც თეთრი კომბინიზონის მსგავს სამოსს ატარებდა. მან თითქოს ანიშნა არ მომიახლოვდეთო. მონადირეებმა ცოტა შეიცადეს (ეგონათ თვითმფრინავს ავარია მოუვიდაო) და შემდეგ პოლიციელის მოსაყვანად წავიდნენ, ხოლო როცა დაბრუნდნენ, დაინახეს რამდენიმე სუსტი წითელი სინათლე, რომელიც მანქანის სინათლეს წააგავდა. მონადირეები პოლიციელებთან ერთად მანქანით გამოვიდნენ მინდორში და გაჰყვნენ შუქს; მაგრამ აქვე შეამჩნიეს, რომ ნათება უცებ აბსოლუტურად უკვალოდ გაქრა, მაგრამ მინდორი სველი იყო. მას შემდეგ რაც შეცბუნებული პოლიციელი წავიდა, მონადირეებმა კვლავ დაინახეს „ცილინდრი“, რომელიც ციდან ეშვებოდა მოწითალო ნათებით. როგორც კი დაეშვა მიწაზე ეს საგანი, მის მახლობლად გაჩნდა ორი ფიგურა; გაისმა გასროლის ხმა (თუმცა არცერთი მონადირე არ ტყდება, რომ მან ისროლა) და ერთერთი მხარში „დაჭრილი“ ფიგურა (გაისმა ყრუ დარტყმა) მოტრიალდა და მუხლებზე დაეცა. პანიკით შეპყრობილი მონადირეები თავიანთ მანქანასთან მივარდნენ და გაიპარნენ. მათ მოილაპარაკეს, რომ ამ შემთხვევის შესახებ არავისთვის არაფერი ეთქვათ. ისინი შინ საოცარი შეგრძნებით დაბრუნდნენ, რომ ღამის განმავლობაში იყო რაღაც „დაკარგული“ დროის პერიოდი. მეორე დღეს ერთ-ერთ ამათგანს

სამსახურში ეწვია რამდენიმე პეწიანად ჩაცმული ადამიანი, რომლებიც „ოფიციალურ წარმომადგენლებს“ ჰგავდნენ, და შეკითხვებს აძლევდნენ ამ შემთხვევასთან დაკავშირებით (თუმცა გასროლის შესახებ კრინტიც არ დაუძრავთ). იგი თავისი მანქანით სახლში მიიყვანეს, სადაც თავისი ტანსაცმელისა და ფეხსაცმლის შესახებ ჰკითხავდნენ. შემდეგ ისინი წავიდნენ და ითხოვეს ამის თაობაზე არაფისთვის არაფერი ეამბნათ. მონადირეს ეგონა, რომ ესენი იყვნენ აშშ-ს საჰაერო-სამხედრო ძალების ოფიციალური წარმომადგენლები, რომლებიც ცდილობენ დაფარონ რაღაც ახალი „საიდუმლო აღმოჩენა“, თუმცა ეს ხალხი თავის თავზე არაფერს ამბობდა და არც მათ შეხვედრიან. ოთხივენი უკიდურესად შეძრწუნებულები იყვნენ ამ შემთხვევით და მხოლოდ ექვსი წლის შემდეგ ერთერთმა მათგანმა ჩათვალა თავის მოვალეობად მოეთხორო ამის შესახებ აშშ-ს ხაზინის აგენტისათვის („The Edge of Reality“, გვ. 129—141).

ამ ისტორიის ძირითადი მოვლენები ტიპიურია „მესამე რიგის ახლო კონტაქტებისათვის“. მისგან მცირედით განსხვავებულია ის გარემოებანი, რომელშიც მოხდა ცნობილი „გადმოსხმა“ კელიში, ჰოპკინსვილლის მახლობლად, კენტუკში; იგი დეტალურად იქნა გამოკვლეული პოლიციისა, სამხედრო-საჰაერო ძალებისა და დამოუკიდებელი მკვლევარების მიერ. 1955 წლის 21 აგვისტოს, ღამით ერთ-ერთი ფერმერის მეურნეობის 7 მოზრდილსა და ოთხ ბავშვს ჰქონდა ხანგრძლივი შეხვედრა „ჭუმანოიდებთან“. შეხვედრა დაიწყო 7 საათზე, როცა ფერმერის ვაჟმა დაინახა თუ როგორ დაეშვა მფრინავი ობიექტი სახლის უკან. მას არავინ არ დაუჯერა, მაგრამ ერთი საათის შემდეგ დაინახეს, რომ სახლისკენ მოაბიჯებდა ზემოთ აწეული (აწვერილი) ხელებით „პატარა კაცუნა“, „რომელიც უცნაურად ანათებდა“, როცა იგი სახლს 20 ფუტის მანძილზე მიუახლოვდა, ორმა მამაკაცმა შიშისაგან მას სროლა აუტეხა. „კაცუნა“ გატრიალდა და სიბნელეში გაუჩინარდა. მალე ამის შემდეგ ფანჯარაში გამოჩნდა სხვა ასეთივე არსება. მასაც ესროლეს და ისიც თვალს მიეფარა. გარეთ გამოსულმა მამაკაცებმა კიდევ ერთ არსებას აუტეხეს სროლა. მას ხელი ბრჭყალს მიუგავდა. ეს არსება სახლის სახურავზე შენიშნეს.

როცა ტყვია მოხვდა, იგი მიწაზე დაეშვა. მამაკაცებმა დაინახეს და ესროლეს კიდევ რამდენიმე „პატარა კაცუნას“ (შესაძლოა ესენი ერთი და იგივე არსებები იყვნენ), მაგრამ ტყვია სხლტებოდა და ისინი უვნებელი რჩებოდნენ. ხმით ეს წააგავდა ვედროზე მოხვედრის ხმას. როცა მათ სროლაში დახარჯეს 4 კოლოფი ვაზნებისა, 11 ადამიანმა შეშინებულმა სიკვდილამდე, მანქანით ჰოპკინს ვილისის პოლიციის განყოფილებას მიაშურა, პოლიციელები ფერმაში დაბრუნდნენ ნაშუალამევს, იჭაურობა გულდასმით გაჩხრიკეს და რამდენიმე უჩვეულო ნაკვალევი აღმოაჩინეს. მათ შენიშნეს რამდენიმე უცნაური მეტეორი, რომელიც ფერმას ეცემოდა, მაგრამ „არსებები“ არ ჩანდნენ. მას შემდეგ, რაც პოლიცია წავიდა, ისინი კვლავ გამოჩნდნენ, რითაც კიდევ უფრო მეტად დააშინეს ფერმის მცხოვრებლები.

ამ შემთხვევისას „ჰუმანოიდები“, აღწერის თანახმად, 3.5-დან 4 ფუტამდე (1—2 მ.) სიმაღლისანი იყვნენ, უზარმაზარი ხელისგულებითა და თვალებით (გუგებისა და ქუთუთოების გარეშე), დიდი წაწვეტებული ყურებით, და გრძელი ხელები მიწამდე დასთრევდათ. ისინი თითქოს ჩაცმულები არ იყვნენ, მაგრამ „ნიკელის ჯავშანში“ მსხდართ ჰგავდნენ და სახლს ბნელი მხრიდან უახლოვდებოდნენ. გარეთ თუ სინათლე ენთო, მაშინ ახლოს არ მოდიოდნენ¹.

დოქტორი გინეკი მკვეთრად გამიჯნავს „მესამე რიგის ახლო კონტაქტებს“ „კონტაქტიორებისაგან“. ეს უკანასკნელნი გამუდმებით ხვდებიან „მფრინავი თეფშების“ ობიექტებს, ხშირად გადმოგვცემენ მათგან ფსევდო-რელიგიურ შეტყობინებებს სხვა პლანეტების „მაღალგანვითარებული“ არსებების შესახებ, რომლებიც აპირებენ მოსვლას, რათა „მშვიდობა“ მოუტანონ დედამიწას, და ხშირად კავშირში იმყოფებიან ამოუცნობი მფრინავი ობიექტების რელიგიურ კულტებთან. ჩვეულებრივი „მესამე რიგის ახლო კონტაქტები“, პირიქით, როგორც წესი, ძალიან ჰგავს „სხვა ახლო კონტაქტებს“; იგი ემართებათ მსგავსი პროფესიის ადამიანებს, ერთნაირად სანდოებს, ერთნაირად მოულოდნელად და ერთნაირად სცემს

¹ Vallee, UFOs in Space, pp. 187-191, Hynek, The UFO Experience, pp. 172-177.

თავზარს რაღაცა ძალზედ წარმოუდგენელის დანახვისას. „მფრინავი თეფშების“ წარმომადგენლების შესახებ, რომლებსაც ხედავენ, ამბობენ, რომ ისინი აგროვებენ ნიადაგისა და ქვების სინჯებს, აინტერესებთ ადამიანთა სადგომები, შეტყობინებების (ურთიერთობის) საშუალებები, ანდა აკეთებენ თავიანთ ხომალდს. აღწერების მიხედვით „ჰუმანოიდები“ დიდთავები არიან, და სახის ნაკეთებიც ადამიანისას არ მიუგავთ (არა აქვთ თვალი, ანდა აქვთ უზარმაზარი ერთმანეთისაგან ძალზედ დაშორებული თვალები, — ცხვირი პატარა ან სულაც არა აქვთ, პირის ნაცვლად — ღრიჭო), წერილი ფეხები, არა აქვთ კისერი; ზოგიერთი მონათხრობის მიხედვით, ისინი ნორმალური ადამიანის სიმაღლისანი არიან. სხვანი, როგორც კალი-ჰოპკინსვილლის შემთხვევაში, სიმაღლით 3,5 ფუტი. ცოტა ხნის წინ დასრულდა კატალოგი, რომელშიც შედის „მესამე რიგის ახლო კონტაქტების“ შეხვედრის 1000 შემთხვევა *Hypnek, The UFO Experience*, p. 31). არის შემთხვევები, რომლებზეც მოგვითხრობენ სერიოზული, სანდო პირები, „მფრინავი თეფშების“ წარგზავნილების მიერ „ტესტირების“ მიზნით ხალხის „მოტაცებისა“. ასეთი ჩვენებები, თითქმის ყველა (თუ გამოვრიცხავთ „კონტაქტიორებს“), მიღებულია ღრმა ჰიპნოზის დროს; შთაბეჭდილება იმდენად დიდ ტრავმას აყენებს მხილველებს, რომ გონება არ ახდენს მის ფიქსირებას. ისინი მხოლოდ გარკვეული დროის შემდეგ თანხმდებიან ჰიპნოზის სეანსზე, რათა გაერკვნენ საიდუმლოებით აღსავსე „დროის ამოვარდნაში“, რაც მოჰყვება „ახლო კონტაქტებს“ და რომლისგანაც მხოლოდ დასაწყისი ახსოვთ.

ერთი-ერთი ყველაზე ფართოდ ცნობილი „მოტაცება“ მოხდა 1961 წ. 19 სექტემბერს ნიუ-ჰემპშირში უიტფელდის მახლობლად. ამ თემაზე დაწერილია წიგნი „შეწყვეტილი მოგზაურობა“ (ჯონ ფულერის მიერ), რომელიც შემოკლებული სახით დაიბეჭდა ჟურნალში „*LOOK*“. იმ ღამეს ბარნი და ბეტტი ჰილლები ბრუნდებოდნენ მოგზაურობიდან (ასე ატარებდნენ ისინი თავიანთ შვებულებას); უეცრად მათ შენიშნეს „მფრინავი თეფში“, რომელიც ეშვებოდა და დაჯდა შარავზაზე, ზედ მათი მანქანის წინ. მათ მიუახლოვდა რამდენიმე „ჰუმანოიდი“, და ესაა რაც მათ ახსოვთ იმ მომენტამდე, როცა 2 საათის

შემდეგ აღმოჩნდნენ გზაზე 35 მილის დაშორებით. ეს ამნეზია მათ აწუხებდათ, რაც იწვევდა ფიზიკურ და ნერვიულ დარღვევებს, და ბოლოს მათ მიმართეს ფსიქიატრს. ჰიპნოზისას ისინი, ერთმანეთისაგან დამოუკიდებლად, ჰყვებოდნენ თუ რა მოხდა ამ დაკარგული დროის განმავლობაში. ორივე ირწმუნებოდა, რომ ისინი აიყვანეს „ხომალდზე“ და ჩაუტარეს ფიზიკური შემოწმება, ანალიზისთვის აიღეს კანის ნაწილები და ფრჩხილებიც კი. ბოლოს ისინი გაათავისუფლეს და ჰიპნოზით შთააგონეს, რომ არ ემახსოვრებოდათ არაფერი რაც ნახეს. ჰიპნოზის დროს ისინი ძლიერი ემოციური რეაქციით ლაპარაკობდნენ თავიანთ განცდებზე („The UFO Experience, 178—184).

მსგავს შემთხვევაში, 1967 წლის 3 დეკემბრის ღამის 3 საათზე პოლიციელმა ეშლანდში, ნებრასკაში დაინახა გზაზე ობიექტი, მოციმციმე სინათლეების რიგით, რომელიც მიახლოებისას აფრინდა. პოლიციელმა უფროსებს მოახსენა „მფრინავი თეფშის“ შესახებ და წავიდა სახლში ძლიერი თავის ტკივილით. ყურებში ზუზუნი ესმოდა, ხოლო მარჯვენა ყურის ქვეშ აღმოაჩნდა წითელი ნაკდევები. მოგვიანებით გამოირკვა, რომ ღამით მას ჰქონდა 20 წუთიანი ამოვარდნა, პერიოდი, რომელიც მას არ ახსოვდა; ჰიპნოზის ძალით იგი მოჰყვა, რომ გაჰყვა „მფრინავ თეფშს“, რომელიც ისევ დაფრინდა. „თეფშის“ ბინადრებმა მას მიანათეს კაშკაშა სინათლე და თავის ხომალდში აიყვანეს, სადაც მან სამართავი პულტი ნახა და მანქანები, რომლებიც წააგავდა კომპიუტერებს (ფრანგმა ინჟინერმა, რომელიც 18 დღე იყო „მოტაცებული“ მსგავსი რამ ნახა). კომბინიზონში გამოწყობილმა „ჰუმანოიდებმა“ (მათ კომბინიზონზე გამოხატული იყო ფრთიანი გველი) მას უთხრეს, რომ ისინი მეზობელი გალაქტიკიდან მოფრინდნენ, რომ მათ აქვთ ბაზა აშშ-ის ტერიტორიაზე და თავის ხომალდებს „უკუმაგნეტიზმის“ საშუალებით მართავენ. ისინი შემთხვევით შედიან კონტაქტში ადამიანებთან და „უნდათ ხალხის დაინტერესება“. მათ გაუშვეს პოლიციელი და უბრძანეს „არ ეტლიკინა იმაზე, რაც მოხდა“ („The Invisible College“, გვ. 57—59).

ერთი შეხედვით ეს შემთხვევები უბრალოდ არ ჰგავს სი-

ნამდვილეს, მსგავსად ზოგიერთი უცნაური პალეონტოლოგისა ან ავადმყოფური წარმოსახვის ნაყოფისა. მაგრამ ახლა ისინი ძალზედ ბევრია იმისათვის, რომ უბრალოდ ხელი ჩაევიწიოთ. ეს რომ იყოს შეხვედრა ჩვეულებრივ მიწიერ საპაერო ხომალდებთან, ცნობები არ იქნებოდა დამაჯერებელი. შემდეგ, თვით ფსიქიატრები გვაფრთხილებენ, რომ ღრმა ჰიპნოზის შედეგები საიმედო არაა; თვით ჰიპნოზის ქვეშ მყოფს ხშირად არ შეუძლია განასხვავოს ჭეშმარიტი ფაქტი „შთაგონებისაგან“, რომელიც მის გონებაშია შთაბეჭდილი ჰიპნოტიზირის მიერ ან სავარაუდო „ახლო კონტაქტის“ დროს ვინმეს მიერ. მაგრამ თუნდაც სრულიად არარეალურიც რომ იყოს ეს განცდები (როგორც ობიექტური მოვლენები სივრცესა და დროში), თვით ის ფაქტი, რომ უკანასკნელ წლებში ხალხში ამდენია „შთაგონებული“, დიდ მნიშვნელობას იძენს. ეჭვი არ არის, რომ „მოტაცების“ შემთხვევების უკან იმალება რაღაც, და ამოუცნობი მფრინავი ობიექტების მკვლევარები, არც თუ დიდი ხანია შეუდგნენ ამ მოვლენების სხვა მიმართულებით ახსნას.

მსგავსი შემთხვევები, განსაკუთრებით 1970-იანი წლების „ახლო კონტაქტები“, საგრძნობლად უკავშირდება „პარანორმალურ“ და ოკულტურ ფენომენებს. ამოუცნობ მფრინავ ობიექტებთან უშუალოდ შეხვედრის წინ ადამიანები ხედავენ უცნაურ სიზმრებს, ანდა ესმით კაკუნი კარზე, როცა იქ არავინაა, ანდა მათთან მოდიან უცნაური მნახველები. „მფრინავ თეფშებთან“ შეხვედრის შემდეგ, ზოგი მოწმე ამოუცნობი მფრინავი ობიექტების თანამგზავრებისაგან იღებს ტელეპათიურ ცნობებს; ამოუცნობი მფრინავი ობიექტი მატერიალიზდება ან ხდება მისი დემატერიალიზება, ნაცვლად იმისა, რომ დიდი სიჩქარით მოფრინდეს და გაფრინდეს; ხანდახან ხდება „სასწაულებრივი განკურნება“ მათ მახლობლად ან მათ მიერ დასხივების შემდეგ¹. თუმცა „ახლო კონტაქტებს“ ამოუცნობ მფრინავ ობიექტებთან მოპყვება ხოლმე ლეიკემია და რადიაციული დაავადებანიც. ხშირად იწყება ტრაგიკული ფსიქო-

⁹⁸ Laonic. Chaleocondyl. Histor. Lib. I. pag. 25 et seg. edit. New York, 1975. p. 17, 21.

ლოგიური მოვლენები: პიროვნების დეგრადაცია, თვითმკვლელობა, შეშლილობა (სიგიჟე)¹.

ამოუცნობ მფრინავ ობიექტებთან დაკავშირებით „ფსიქიური კომპონენტის“ დამატებამ მკვლევარები აიძულა ეძებნათ ანალოგია „მფრინავ თევზებზე“ დაკვირვებებსა და ოკულტურ ფენომენებს შორის, და ეცადათ ეპოვათ მის ამოსახსნელად გასაღები იმ ფსიქიკურ ეფექტებში, რომლებსაც ისინი იწვევენ („The Invisible College“, გვ. 29). ბევრი მეცნიერი აღნიშნავს ამოუცნობი მფრინავი ობიექტის ფენომენის მსგავსებას მე-19 ს-ის სპირიტუიზმთან, რომელიც ასევე ათავსებდა ფსიქიკურ მოვლენებს უცნაურ ფიზიკურ ეფექტებთან, მაგრამ ეყრდნობოდა პრიმიტიულ „ტექნოლოგიას“. საერთო ჯამში, 1970-იანი წლები მოწმე გახდა იმ უფსკრულის თანდათანობითი გაქრობისა, რომელიც წარსულში არსებობდა ამოუცნობი მფრინავი ობიექტების „ნორმალურ“ ფენომენსა და მის კულტებს შორის, რაც შეიძლება აიხსნას ამ ათეულ წლებში ოკულტური პრაქტიკისადმი კაცობრიობის სულ უფრო მზარდი აღქმის უნარით.

4. ამოუცნობი მფრინავი ობიექტების ფენომენის ახსნა

დოქტორი დაკ ვალლე თავის ბოლო წიგნში „უხილავი კოლეჯი“ მოგვითხრობს იმის თაობაზე, რომ ცნობილი მეცნიერ-მკვლევარები უკვე ფიქრობენ ამოუცნობი მფრინავი ობიექტების შესახებ, და თვლის, რომ ჩვენ „მჭიდროდ მივუახლოვდით“ ამ მოვლენის არსის გაგებას. მასში აღნიშნულია, რომ „არამიწიერი“ გონიერი ცხოვრების იდეა უკანასკნელ წლებში ძალზედ მოღურად იქცა, ერთნაირად როგორც მეცნიერებისათვის, ასევე მკითხავეებისთვის და ეს შედეგია „გონის (გონიერების) უმაღლეს ფორმებთან კონტაქტების დამყა-

² John A. Keel, UFOs: Operation Trojan Horse, G. P. Putnam, & Sons, N.Y. 1970, p. 303.

რების დაუოკებელი სწრაფვისა“, რამეთუ მათ შეუძლიათ უჩვენონ გზა ჩვენს უბედურ, განაწამებ, მძიმედ დაავადებულ (მძიმე სენით შეპყრობილ) პლანეტას“ (გვ. 95). აღსანიშნავია, რომ იგი ხედავს: თუ როგორ გადაიქცა აზრი კოსმოსიდან მოსული სტუმრების შესახებ „უდიდეს მითად“, ანდა „ჩვენი დროის საოცარ სიცრუედ“. ხალხთა დიდი მასებისათვის უჩვეულოდ მნიშვნელოვანი გახდა კოსმოსიდან წვეულთა მოლოდინი (გვ. 207).

მიუხედავად ამისა, ამ მითის დაჭერებას იგი გულუბრყვილობად თვლის: „ამგვარი ახსნა ძალზედ მიაბიტურია და ვერ ახსნის ამოუცნობი მფრინავი ობიექტების ბინადართა სხვადასხვაგვარ ურთიერთობას ადამიანებთან“ (გვ. 27). დოქტორი გინეკი აღნიშნავს, რომ ამ ობიექტების ყოველგვარი ზემოქმედების ასახსნელად ჩვენ უნდა დავუშვათ, რომ ისინი წარმოადგენენ „ფენომენს, რომელსაც უდაოდ აქვს ფიზიკური ზეგავლენის უნარი, თუმცა ასევე ახასიათებს ფსიქიკური სამყაროს თვისებებიც“ („The edge of Reality“, გვ. 259).

დოქტორი ვალლე მიიჩნევს (აღნიშნავს), რომ „ისინი კონსტრუირებული არიან ერთდროულად როგორც ფიზიკური ეკიპაჟი (ეს ფაქტი ჩემში დიდი ხანია ექვს არ იწვევდა), და როგორც ფსიქიკური მოწყობილობანი, რომელთა ზუსტი თვისებები ჯერ კიდევ განსასაზღვრია („The Invisible College“, გვ. 191). თეორია, რომელიც ამტკიცებს, რომ ამოუცნობი მფრინავი ობიექტები არ წარმოადგენენ ფიზიკურ ეკიპაჟებს, არამედ „პარაფიზიკური“ ანდა ფსიქიკური მოვლენების სახესხვაობაა, რიგი მეცნიერების მიერ ჯერ კიდევ 50-იანი წლების დასაწყისში იქნა წამოყენებული; მაგრამ მოგვიანებით იგი უარყვეს, ერთის მხრივ, კულტების მიმდევრებმა, რომლებიც ამტკიცებდნენ ამოუცნობი მფრინავი ობიექტების „არამიწიერ“ წარმოშობას, და მეორეს მხრივ, სახელმწიფო ორგანოებმა ოფიციალური განმარტებებით, რომელთა თანახმადაც ყველა ეს მოვლენა მნახველთა (მომსწრეთა) წარმოსახვის ნაყოფია (Keel, UFOs: Operation Trojah Horse“, გვ. 38—41). და მხოლოდ ამ მოკლე ხნის წინ, მკვლევარებმა სერიოზულად დაიწყეს დათანხმება იმაზე, რომ ამოუცნობ მფრინავ ობიექტებს თუმცა აქვთ ზოგი „ფიზიკური“ მახასიათებლები, არ შეიძლება იყვნენ ვინ-

მეს „კოსმოსური ხომალდები“ და ნამდვილად მიეკუთვნებიან როგორც პარაფიზიკურ, ასევე ოკულტურ მოვლენებს.

და მართლაც, რატომ, ვთქვათ, ასე ბევრი „მფრინავი თეფში“ ეშვება“ პირდაპირ შუა გზებზე? რატომ. სჭირდება ეგზომ სრულყოფილ ხომალდებს ასე ხშირად „შეკეთება“?, ხოლო მის მობინადრებს ამდენი ქვისა და ჯოხის შეგროვება? (აგერ 25 წელზე მეტია კვლავ და კვლავ აგროვებენ) ანდა „ტესტირება“ ამდენი ადამიანისა — თუ ისინი მართლაც სხვა პლანეტებიდან გამოგზავნილი სადაზვერვო ხომალდებია, როგორც ამას ჩვეულებრივ „კუმანოიდები“ ამტკიცებენ? დოქტორი ვალლე, არც თუ უსაფუძვლოდ, სვამს კითხვას, „კოსმოსიდან სტუმრობის იდეა“ ხომ არ ემსახურება „დაფარვას და შენიღბვას რეალური, უსასრულოდ უფრო რთული ტექნოლოგიისა. რომელმაც დაკვირვების საბაზი მოგვცა?“ (The Invisible College, გვ. 28). იგი ამტკიცებს, რომ ჩვენ საქმე გვაქვს არა კოსმოსიდან ერთმანეთზე მიყოლებით შემოტევის ტალღებთან, არამედ კონტროლის სისტემასთან“ (გვ. 195). „იმას, რაც ამოუცნობ მფრინავ ობიექტებთან კონტაქტის დროს ხდება, შეიძლება ვუწოდოთ ადამიანთა რწმენის კონტროლი“ (გვ. 3). „მფრინავი თეფშების“ ყოველი ახალი ტალღა, მათი გავლენა საზოგადოებაზე სულ უფრო მეტ მნიშვნელობას იძენს. სულ უფრო მეტად იზრდება ახალგაზრდობის გატაცება კოსმოსით, ფსიქიკური ფენომენებით, ცნობიერების ახალი სფეროებით. ჩნდება სულ უფრო მეტი და მეტი წიგნი და სტატია, რაც ჩვენს ცივილიზაციას ცვლის“ (197,8). სხვა წიგნში იგი წერს, რომ „სავსებით შესაძლებელია ნებისმიერი საზოგადოების უმეტესი ნაწილი აიძულო ირწმუნოს ზებუნებრივი რასების არსებობა, მფრინავი მანქანების რეალურობა, ბინადარი სამყაროების სიმრავლე, თუ მათ წინაშე გაითამაშებ კარგად დამუშავებულ სცენას, რომლის ცალკეული დეტალებიც შეწყობილია მოცემული დროისა და ადგილის კულტურასა და ცრურწმენებთან“¹.

¹ Vallee, Passport to Magania Henry Regnery Co Chicago. N.Y. 1965, pp. 46-41.

მნიშვნელოვანი გარემოება, რომელიც ნათელს ჰყენს ამ „ზედმიწვენიტ დამუშავებულ სცენებს“, შენიშნული აქვთ და ხშირად ხაზს უსვამენ ხოლმე ამოუცნობი მფრინავი ობიექტების ფენომენის დაკვირვებული მკვლევარები, განსაკუთრებით „მესამე რიგის ახლო კონტაქტებისა“ და „კონტაქტიორების“ შემთხვევაში: ყველა ეს სცენა ღრმად „აბსურდულია“ ანდა მათში იმდენივეა აბსურდული, რამდენიც რაციონალურია“, — („Valle, The Invisihle Gollege“, გვ. 195). „ახლო კონტაქტის“ ცალკეული შემთხვევები შეიცავენ უაზრო (შეუსაბამო) დეტალებს, ასე მაგ: ოთხი კვერი, რომლებიც ამოუცნობი მფრინავი ობიექტების ბინადარმა მისცა მეფრინველუ ფერმერს შტატ ვისკონსიდან, 1961 წ. და კიდევ უფრო მეტად ნიშანდობლივია, რომ თვით ეს კონტაქტები გასაოცრად შეუსაბამოა, უმიზნო და უაზრო. პენსილვანიელმა ფსიქიატრმა წამოაყენა ვარაუდი, რომ აბსურდულობა, დამახასიათებელი ამოუცნობ მფრინავ ობიექტებთან ახლო კონტაქტის თითქმის ყველა შემთხვევისათვის, არის თავისი არსით, ჰიპნოზური ხერხი, „როცა ადამიანებს დაკარგული აქვთ სულიერი წონასწორობა შეუსაბამობისა და წინააღმდეგობრიობის გამო, და ძაბავენ გონებას, რათა აღმოაჩინონ აზრი, ისინი საოცრად გახსნილნი ხდებიან აზრთა გადაცემისთვის, ფსიქიკური განკურნვის აღსაქმელად და ა. შ. („The Invisihle Gollege“, გვ. 11). დოქტორი ვალლე ამ ხერხებს ადარებს ირრაციონალურ „კოანებს“ ძინბუდიზმის მასწავლებლებს (გვ. 27) და აღნიშნავს მსგავსებას „მფრინავ თეფშებთან“ კონტაქტებისა და ინიციაციისა ოკულტურ წესებთან, რომლებიც „ცნობიერებას ხსნიან“ „(სიმბოლოების ახალი სისტემებისათვის“ (გვ. 117). ეს ყველაფერი მიუთითებს იმაზე, რასაც იგი „რელიგიის შემდგომ ფორმას“ უწოდებს (გვ. 202).

მაშასადამე, ამოუცნობ მფრინავ ობიექტებთან კონტაქტები სხვა არაფერია თუ არა უკვე მრავალი საუკუნეების განმავლობაში არსებული ოკულტური ფენომენების თანამედროვე ფორმა. ადამიანებმა უარი თქვეს ქრისტიანობაზე და ელიან „მხსნელს კოსმოსიდან“; სწორედ ამიტომ, ფენომენი გვაძლევს საპლანეტათშორისო ხომალდებისა და სხვა პლანეტების ბინადართა სახეებს, მაგრამ რას წარმოადგენს თავის თავად ეს

ფენომენი? ვინ და რა მიზნით „ამუშავებს“ ამ სცენებს. თანა-
მედროვე მკვლევარებმა უკვე იპოვეს პასუხები — ყოველ
შემთხვევაში, პირველ-ორ შეკითხვაზე; მაგრამ თავისი არაკომ-
პეტენტურობის გამო რელიგიური ფენომენების სფეროში,
სრულად ვერ შეიცნობენ თავისი აღმოჩენების მთელ მნიშვნე-
ლობას. ერთ-ერთი მკვლევარი, ბრედ სტაიგერი, მასწავლებელი
აიოვას შტატის კოლეჯისა, რომელმაც ამ თემაზე რამდენიმე
წიგნი დაწერა, სამხედრო-საჰაერო ძალების „ლურჯი წიგნის“
კარტოტეკის შესწავლის შემდეგ, ცოტა ხნის წინ ამგვარ დას-
კვნამდე მივიდა: „ჩვენ საქმე გვაქვს მრავალგანზომილებიან
პარაფიზიკურ მოვლენასთან, რომელიც მნიშვნელოვნად მიეკუ-
თვნება პლანეტა დედამიწას“ (Canadiah UFO Report, Sum-
mer, 1977). დოქტორებმა გინეკმა და ვალემ, იმ იმედით.
რომ შესძლებდნენ ამოუცნობი მფრინავი ობიექტების ფე-
ნომენის ახსნას, წამოაყენეს ჰიპოთეზა „დედამიწასთან დაკავ-
შირებულ სხვა პლანეტების მკვიდრთა“ შესახებ და ლაპარაკო-
ბენ „ურთიერთშელწევად სამყაროებზე აქ, დედამიწაზე, საი-
დანაც მათ შეუძლიათ მოგვევლინონ (გამოგვეცხადონ) და-
ახლოებით ისე, როგორც „პოლტერგაისტი“, რომელიც ფიზი-
კურ მოქმედებებს ატარებს და ამავე დროს უხილავი რჩება.
ჯონ კილი, რომელიც ამოუცნობ მფრინავ ობიექტებს სკეპ-
ტიციზმის პოზიციებიდან უდგებოდა და არის ურწმუნო აგ-
ნოსტიკოსი, წერს: „ამოუცნობი მფრინავი ობიექტის ისტო-
რია — ეს არის ისტორია სულეებსა და მოჩვენებებზე, უცნა-
ურ გონებრივ აშლილობაზე, უხილავ სამყაროზე, რომელიც
გარს გვარტყია და დროდადრო შემოიჭრება ჩვენს სამყარო-
ში... ესაა ილუზორული სამყარო..., რომელშიც იდუმალი ძა-
ლებით დამახინჯებულია თვით რეალობა. მათ, როგორც ჩანს,
შეუძლიათ სივრცის, დროისა და ფიზიკური მატერიების მარ-
თვა — ძალები, რომელთა გაგებაც ჩვენთვის მიუწვდომე-
ლია... მოკლედ რომ ვთქვათ, თვისებები და მახასიათებლები
წარმოადგენენ დემონოლოგიის ცნობილი მრავალსაუკუნოვან
ფენომენების წვრილ ვარიაციებს“ („UFOs: Opeation
Trojan Horse“, გვ. 46, 299).

აშშ-ის სამხედრო-საჰაერო ძალების სამეცნიერო განყოფი-
ლებისათვის „მფრინავი თეფშების“ ფენომენთან დაკავშირე-

ბით კონგრესის ბიბლიოთეკაში შემუშავებული ბოლო ბიბლიოგრაფიული ნუსხის წინასიტყვაობაში ნათქვამია, რომ „ამჟამად პოპულარულ პრესაში გამოქვეყნებულ ბევრ სარწმუნო მონათხრობში ამოუცნობი მფრინავი ობიექტების შესახებ ვიპოვით გასაოცარ მსგავსებას ეშმაკეულებთან და ფსიქიკურ მოვლენებთან, რაც უკვე დიდი ხანია ცნობილია ღვთისმეტყველებისა და პარაფსიქოლოგებისათვის“¹. ამოუცნობი მფრინავი ობიექტების მკვლევარ სპეციალისტთა უმრავლესობა ახლა მიმართავს ოკულტურ სფეროს და დემონოლოგიას, რათა უკეთ გაეცნოს შესასწავლ მოვლენებს.

ამ საკითხებზე გამოცემული რამდენიმე უკანასკნელი მეცნიერული წიგნის ავტორები, პროტესტანტი — ევანგელისტები, აჯამებენ რა ამ დამამტკიცებელ საბუთებს, მიდიან დასკვნამდე, რომ ამოუცნობი მფრინავი ობიექტები თავისი ბუნებით დემონურია და სხვა აზრი ამაზე არ არსებობს². მართლმადიდებელი ქრისტიანი საეკვოა სხვა დასკვნამდე მივიდეს. ზოგი, ანდა ბევრი ამ ცნობიდან — სიყალბეა და ჰალუცინაციის შედეგი; მაგრამ შეუძლებელია ასე უბრალოდ უგულვებელყო მრავალი ათასი ცნობა ამოუცნობი მფრინავი ობიექტების შესახებ იმით, რომ ამ კატეგორიას მიაკუთვნო. თანამედროვე მედიუმების დიდი უმრავლესობა და მათი სპირიტული ფენომენებიც თაღლითობაა; თუმცა თვით მედიუმური სპირიტისმი, უტყუარი სახით, გვაძლევს რეალურ „პარანორმალურ“ მოვლენებს დემონების ზეგავლენით. ამოუცნობი მფრინავი ობიექტების ფენომენები, რომლებთან იგივე წარმომავლობა აქვთ, სულაც არ არის ნაკლებ რეალური.

იმ ადამიანების ისტორიები, რომლებიც ჩათრეული არიან „მფრინავ თეფშებთან“ კონტაქტებში, გვიჩვენებენ სტანდარტულ დახასიათებებს, რომლებიც უპირატესობას ანიჭებენ დემონებთან ურთიერთობას ოკულტურ სფეროში. მაგალი-

¹ Lynn G. Catoe, UFOs and Related Subjects: An Annotated Bibliography, U. S. Government Printing Office, Washington, O.C. 1969.

² Clifford Wilson and John Weldon, Close Encounters: A Better Explanation, Master Books, San Diego, 1978; Spiritual Counterfeits Project Journal, Berkeley, Calif., August, 1977: „UFOs: Is Science Fiction Coming True?“.

თად, კალიფორნიელმა პოლიციელმა „მფრინავი თეფში“ დაინახა 1966 წ. ივნისში, და ამის შემდეგ ხშირად ხედავდა, როგორც წესი, ღამით. ერთი „დაფრენის“ შემდეგ მან ცოლთან ერთად ნახა ნაკვალევი მიწაზე. „გამალიზიანებელი მოვლენების ამ კვირებში მე ვიქეცი „მფრინავი თეფშების“ ადგილზე შეპყრობილ ადამიანად და დარწმუნებული ვიყავი, რომ რაღაც დიდი უნდა მომხდარიყო. თავი მივანებე ბიბლიის ყოველდღე კითხვას, ზურგი ვაქციე ღმერთს, რადგან შევეუდექი ამოუცნობ მფრინავ ობიექტებზე დაწერილი ყველა წიგნის კითხვას, რის შოვნასაც მოვახერხებდი...

ბევრი ღამე გამითენებია ამაო ლოდინში და ვცდილობდი აზრით დამემყარებინა კონტაქტი მათთან, ვისაც არამიწიერ არსებებად ვთვლიდი. თითქმის ვევედრებოდი მათ, რომ გამოჩენილიყვნენ და ჩემთან რაიმე კონტაქტი დამემყარებინათ“. და ბოლოს, ელირსა კიდევ „ახლო კონტაქტი“. ეს იყო დაახლოებით 80 ფუტი დიამეტრის ხომალდი, თეთრი, მწვანე და წითელი მბრუნავი სინათლეებით, რომელმაც ჩაუქროლა და დამკვირვებელი დატოვა რაღაცა „დიდის“ მოლოდინში. მაგრამ სხვა აღარაფერი მომხდარა. „მფრინავი თეფში“ აღარ გამოჩნდა და იმედგაცრუებულმა ალკოჰოლს მისცა თავი, დეპრესიაში ჩავარდა და თავის მოკვლაზე დაიწყო ფიქრი, სანამ ქრისტესთან მობრუნებამ არ დაუსვა წერტილი მისი ცხოვრების ამ პერიოდს. ადამიანებმა, რომელთაც ახლო კონტაქტები ჰქონდათ ამოუცნობ მფრინავ ობიექტებთან და მის თანამგზავრებთან, ბევრად უფრო უარესი განიცადეს; „მფრინავი თეფშების“ არსებები ცდილობდნენ „დაუფლებოდნენ“ მათ და წინააღმდეგობის შემთხვევაში მათი მოკვლაც უცდიათ UFOs: A. Better Explanation, pp 298—375). ეს შემთხვევები თვალნათლივ გვანახებენ, რომ ამოუცნობი მფრინავი ობიექტების ფენომენის მნიშვნელობისაგან აბსოლუტურად დამოუკიდებლად, მათთან „ახლო კონტაქტს“ აქვს სპეციალური მიზანი „დააბნოს ადამიანი“ („შეცდომაში შეიყვანოს ადამიანი“), რომელთანაც ამყარებს კონტაქტს, და მიიყვანოს იგი შემდგომ „კონტაქტებამდე“ და „მფრინავი თეფშების“ კულტის გავრცელებამდე თუ არა, საკუთარი სულის დაბნელებამდე ან სრულ დეზორიენტაციამდე მიიწი.

მეცნიერთა უმრავლესობისათვის ყველაზე მეტად საიდუმლოებით მოცული ამოუცნობი მფრინავი ობიექტების ფენომენების ასპექტები — სახელდობრ მათთვის დამახასიათებელი ფიზიკური და ფსიქიკური მახასიათებლების უცნაური ნარევი — სულაც არ არის გასაკვირი მათთვის, ვინც მართლმადიდებლურ სასულიერო წიგნებს, განსაკუთრებით წმიდანთა ცხოვრებას კითხულობს. ეშმაკებსაც აქვთ „ფიზიკური სხეულები“, თუმცა „მატერია“ მათი იმდენად თხელია, რომ ადამიანისათვის უხილავია, თუ მისი „აღქმის კარი“ არაა გახსნილი ღვთის ნებით (როგორც ეს წმიდანებს აქვთ) ანდა მის საპირისპიროდ (როგორც ჯადოქრებსა და მედიუმებს)!

მართლმადიდებლური ლიტერატურა გვაძლევს მრავალ მაგალითს ეშმაკების გამოცხადებისა, რაც ზუსტად თავსდება ამოუცნობი მფრინავი ობიექტების სქემაში: „სხეულებრივი“ არსებებისა და „შეხებით შეგრძნებადი“ საგნების ჩვენება რომლებიც ან თავად ეშმაკებია ან მათი ილუზირებული ქმნილებები, რომლებიც წამში „მატერიალიზდება“ (იღებს ან კარგავს მატერიალურ სახეს) ან „დემატერიალიზდება“, ადამიანების დაღუპვისა ან მათი დაშინების მიზნით. მე-4 ს. წმიდანის ანტონი დიდის (The Orthodox Word, 1976, no. 5) და მე-3 ს. წმიდანის კიპრიანეს, ყოფილი მოგვის, ცხოვრებები სავსეა მსგავსი შემთხვევებით).

წმ. მარტინ ტურელის (გარდ. 397) ცხოვრებაში, რომელიც დაწერილია მისი მოწაფის სულპიცია სევერის მიერ, მოცემულია საინტერესო მაგალითი ეშმაკების ხრიკებისა უცნაურ „ფიზიკურ“ მოვლენებთან დაკავშირებით, რომლებიც იდენტურია „მფრინავი თევზების“ ახლო „კონტაქტებთან“. ვინმე ახალგაზრდამ, სახელად ანატოლიმ, წმ. მარტინის მონასტრის მახლობლად, სამონაზნო ცხოვრება დაიწყო; მაგრამ ცრუ მორჩილების გამო მსხვერპლი გახდა ეშმაკთა საცდურისა. მას წარმოედგინა, რომ ესაუბრება „ანგელოსებს“ და რომ სხვებიც დაერწმუნებინა თავის წმიდანობაში, ეს „ანგელოსები“ შეკპირდნენ მიეცათ მისთვის „ზეციური მბრწყინავი სამოსე-

¹ მართლმადიდებლური დოქტრინა ღვთისებისა და ანგელოსების შესახებ, მათ გამოვლინებებსა და ჩვენებებზე, რაც დაჯამებულია მე-19 ს-ის მართლმადიდებელი მამის ეპისკოპოსის ეგნატე ბრიაჩანინოვის მიერ, განხილულია წიგნში «Душа после смерти».

ლი“, ნიშნად იმისა, რომ მასში დაევანებულია „ღვთის ძალა“. ერთხელ, შუალამეს, მისი სავანეს მახლობლად გაისმა მოცეკვავეთა ფეხების ბაკუნი და თითქოსდა მრავალი ხმის დრტინვა და ანატოლის სენაკი გაბრწყინდა თვალისმომკრელი სინათლით. შემდეგ დაისადგურა სიჩუმემ და სენაკის ზღურბლზე გამოჩნდა შეცდომილი თავის „ზეციურ“ სამოსელში. „მოიტანეს სინათლე და ყველამ ყურადღებით დაათვალიერა სამოსი — იგი იყო საოცრად რბილი, არაჩვეულებრივად მოელვარე და კაშკაშა ალისფერი; მაგრამ შეუძლებელი იყო განსაზღვრა, თუ რა ქსოვილისა იყო. ამავე დროს ჩაცვივებით დათვალიერებისას და ხელით გასინჯვისას ეს იყო ტანსაცმელი და სხვა არაფერი. მეორე დღეს ანატოლის მისმა სულიერმა მამამ მოჰკიდა ხელი და სცადა წაეყვანა იგი წმ. მარტინთან, რათა შეეტყო ეშმაკების ხრიკები ხომ არ ერია ამ საქმეში. შეცდომილი, შეშინებული, უარს ამბობდა წასვლაზე, ხოლო როცა იძულებით წაიყვანეს, სამოსელი ხელიდან გაუქრათ მათ, ვისაც იგი მიყავდათ“. ამ ამბის მთხრობელი (რომელიც ან თვით იყო მომსწრე ამისა, ან მნახველისაგან მოესმინა) ასკვნის, რომ „ეშმაკი უძლური აღმოჩნდა გაეგრძელებინა თავისი ცდუნება ან დაეფარა მათი ბუნება, როცა ისინი წმინდა მარტინის წინაშე უნდა წარმდგარიყვნენ“. „იგი იმდენად იყო ძალით შემოსილი დაენახა ეშმაკი, რომ მათ ნების მიერ სახეში ამოიცივებდა, თავისი სახით თუ სხვადასხვა გარეგნობით „სულიერი ბოროტებისა“ — მათ შორის წარმართული ღმერთების (კერპების) სახით ანდა თვით მაცხოვრის სახით, სამეფო სამოსელსა და გვირგვინში გაბრწყინებულს კაშკაშა წითელი ნათებით“¹.

აშკარაა, რომ დღევანდელი „მფრინავი თევზების“ მოვლენა სრულია და დემონური „ტექნიკის“- შესაძლებლობების ფარგლებშია. და მართლაც, ამ მოვლენებს უკეთეს ახსნას ვერც მოუძებნი. მრავალი ეშმაკების საცდური, ცნობილი მართლმადიდებლური წერილებიდან, მისადაგებული იყო კოსმოსურ მითოლოგიასთან; სულ ეს იყო და ეს. ანატოლი,

¹ F. R. Hoare tr., *The Western Fathers*, Harper Torchbacks, U.Y. 1965. pp. 36-41.

რომლის შესახებაც ზემოთ იყო თხრობა, დღეს ცნობილი იქნებოდა როგორც „კონტაქტიორი“ და მიზანიც „ამოუცნობი“ ობიექტებისა ამგვარი კონტაქტების დროს ცხადზე უცხადესია: მოპგვაროს შიშის ზარი (თავზარი დასცეს) მხილველებს და შთააგონოს „საიდუმლოების“ შეგრძნება და დაუდასტუროს „გონების უფრო მაღალი ფორმების“ არსებობა („ანგელოსებისა“ თუ მსხვერპლს მათი სჯერა, ანდა „სტუმრებისა კოსმოსიდან“ თანამედროვე ადამიანისათვის) და ამრიგად, უზრუნველყოს რწმენა იმ წერილისა (message), რომელიც სურთ გადასცენ. მას ჩვენ ქვემოთ განვიხილავთ.

მოტაცება ეშმაკების მიერ, რომელიც საოცრად ჰგავს ამოუცნობი მფრინავი ობიექტების მიერ „მოტაცებებს“, აღწერილია წმ. ნილოს სორელის ცხოვრებაში. იგი იყო მე-15 ს-ში სავანის დამაარსებელი. გარდაცვალების შემდეგ, მის მონასტერში ცხოვრობდა ვიღაც მღვდელი ვაჟითურთ. ერთხელ, როცა ყრმა რაღაც დავალებით გაგზავნეს, „უცებ მას თავს დაეცა უცხო ადამიანი, ხელი დასტაცა მას და წაიღო, თითქოს ქარის ფრთებით გაუვალ ტყეში; შეიყვანა თავისი სადგომის უზარმაზარ ოთახში, დააყენა შუაში ფანჯრის პირდაპირ“. როცა მღვდელი და მისი სამოლოცულობდა (ევედრებოდნენ წმ. ნილოსს, რათა დახმარებოდა მათ ყრმის პოვნაში), წმიდანი მოვიდა საშველად და დადგა ოთახის საწინააღმდეგო მხარეს, სადაც ყრმა იდგა, და როცა კვერთხი შემოჰკრა ფანჯარას, მთელი შენობა შეიძრა და ყველა არაწმინდა სული დაეცა მიწაზე“. წმიდანმა უბრძანა ეშმაკს დაებრუნებინა ყრმა იმ ადგილზე, საიდანაც წაიყვანა და გაუჩინარდა. შემდეგ, როცა ბოროტმა სულებმა ერთი პერიოდი იღრიალეს, იმავე უცნობმა დასტაცა ხელი ყრმას და თივის ზვინში, გაქრა“. როცა იგი ბერებმა იპოვეს, „ბიჭი ყველაფერს მოუყვა მათ, რაც კი შეემთხვა, რაც გაიგონა და ნახა. ამის შემდეგ ყრმა წყნარი და მორჩილი გახდა, თითქოს გამოშტერდა. შეძრწუნებულმა მღვდელმა ვაჟთან ერთად დატოვა სავანი“¹. ამგვარი ეშმაკეული „მოტაცების“ შემთხვევაში ყრმა, მას შემდეგ, რაც

¹ The Northern Thebaid, st. Herman of Alaska Brotherhood, 1975, pp. 91-92.

დედამ იგი დასწყევლა, იქცა ეშმაკის მონად 12 წლით, და უჩინარად შეეძლო ხალხში მოსვლა, რათა ეშმაკს შესძლებოდა მისი მეშვეობით ადამიანების სულიერი სიმშვიდის დარღვევა¹.

ეშმაკის საქმიანობის ამსახველი ეს მართალი ამბები გასულ საუკუნეებში ჩვეულებრივ მოვლენას წარმოადგენდა. და ჩვენი დროის სულიერი კრიზისის ნიშანია, რომ თანამედროვე ადამიანი, მიუხედავად თავისი „განათლებისა“. და „სიბრძნისა“ ისევ აქცევს ყურადღებას ამგვარ შემთხვევებს — მაგრამ მას უკვე აღარ გააჩნია ის ქრისტიანული საფუძველი, რომელიც მოეშველებოდა მათ ახსნაში. ამოუცნობი მფრინავი ობიექტების თანამედროვე მკვლევარები, ამ მოვლენის ახსნის ძებნაში, რომელიც იმდენად შესამჩნევი გახდა, რომ მისი უგულებელყოფა უკვე აღარ შეიძლება, უკავშირდებიან დღევანდელ ფსიქიკურ მკვლევარებს, რათა შექმნან „ერთიანი თეორია ველისა“, რომელიც მოიცავდა როგორც ფსიქიკურ, ასევე ფიზიკურ ფენომენებს. მაგრამ ეს სწავლულები მხოლოდ აგრძელებენ თანამედროვე „განათლებული“ ადამიანების მიდგომის გზას და იმედოვნებენ, რომ მათი მეცნიერული დაკვირვებანი პასუხს გასცემენ სულიერ სფეროს, რომელსაც საერთოდ არ შეიძლება „ობიექტურად“ მიუდგე, არამედ ნხოლოდ რწმენით. ფიზიკურ სამყაროს მორალური ნეიტრალობა გააჩნია და შეიძლება მეტ-ნაკლებად კარგად იქნას შეცნობილი ობიექტური დამკვირვებლის მიერ; უხილავი სულიერი სამყარო კი, დასახლებულია კეთილი და ბოროტი არსებებით, და „ობიექტური“ დამკვირვებელი უძლურია გაარჩიოს ერთი მეორისაგან, თუ მას არ ექნება ზეშთაგონება, რომელსაც უხილავი ღმერთი აძლევს ადამიანს. „მფრინავი თეფშების“ თანამედროვე მკვლევარები ერთ საფეხურზე აყენებენ ბიბლიის ღვთაებრივ შთაგონებასა და სპირიტუალისტების ავტორიტეტულ წერილებს, რომლებიც სატანის მიერაა შთაგონებული, და ვერ გაურჩევიან ანგელოსების საქმიანობა ეშმაკ-

¹ С. Нилус, «О силе Божией и слабости человеческой» (на русском языке) троице — Сергеевская Лавра, 1908. Братство св. Германа, 1976, гл. 279—98.

თა ხრიკებისაგან. ახლა მათ უკვე ესმით (კარგა ხნის შემდეგ, როცა მეცნიერებს შორის გაბატონებული იყო მატერი-ალისტური ცრურწმენები), რომ არსებობს არაფიზიკური სამყარო, რომელიც სავსებით რეალურია, და ისინი მის გამოვლენას „მფრინავი თევზების“ სახით ხედავენ; თუმცა, სანამ ისინი განაგრძობენ ამ სამყაროს შესწავლას „მეცნიერული თვალსაზრისით“, ისევე ადვილი იქნება მათი შეცდომაში შეყვანა, როგორც თვით გულუბრყვილო „კონტაქტიორისა“. როცა ისინი ცდილობენ განსაზღვრონ ვინ ან რა დგას და რა მიზანი ამოძრავებს მათ, ისინი იძულებული არიან გამოთქვან საკმაოდ უცნაური ვარაუდები. ასე მაგ., დოქტორი ვალე აღიარებს, რომ იგი გავიწყებულია და ვერ გაუგია, ამოუცნობი მფრინავი ობიექტები წარმოქმნილია მორალურად ნეიტრალური „თვითმმართველი მექანიზმებიდან“, თუ მომდინარეობს კეთილმოსურნე „ბრძენთა საზეიმო კრებისაგან“ (სარწმუნოებისაკენ გადაგვხრის მითი „არამიწიერ არსებებზე“), ანდა „შეშხარავი ზეადამიანური ურჩხულებისაგან“, რომელთა სახელის გაფიქრებაც კი, ადამიანს ჰკუიდან შეშლის“, ე. ი. ეშმაკთა საქმიანობისაგან (The Invisible Gollage, გვ. 206).

ამოუცნობი მფრინავი ობიექტების მოვლენის ქეშმარიტი შეფასება შეიძლება გაკეთდეს მხოლოდ ქრისტიანული ზეშთავონებისა და ცდის საფუძველზე, და ხელეწიფება მხოლოდ მორჩილ მორწმუნე ქრისტიანს, რომელსაც აქვს ნდობა ამ წყაროებისა. ცხადია, ადამიანს არ ძალუძს სრულად „ახსნას“ ანგელოსთა და დემონთა უხილავი სამყარო; მაგრამ ჩვენ საკმარისი ქრისტიანული ცოდნა გავგაჩნია, რომ გავიგოთ, თუ როგორ მოქმედებენ ეს არსებები დღეს და როგორ უნდა ვუპასუხოთ მათ მოქმედებაზე, როგორ დავაღწიოთ თავი ეშმაკის მახეს. ამოუცნობი მფრინავი ობიექტების მკვლევარები იმ დასკვნამდე მივიდნენ, რომ მოვლენები, რომლებსაც ისინი შეისწავლიან, თავისი ბუნებით იდენტურია „დემონური“ მოვლენებისა; მაგრამ მხოლოდ ქრისტიანს — მართლმადიდებელ ქრისტიანს, რომელიც წმ. წერილის წმინდა მამებისეულ განმარტებებით და წმიდანების უხილავ არსებებთან 2000 წლიანი კონტაქტის გამოცდილებითაა განათლებული, შეუძლია სრულად ჩაწვდეს ამ დასკვნების აზრს.

მაშ, ჩვენს დროში ამოუცნობი მფრინავი ობიექტების გამოჩენას რა აზრი უნდა ჰქონდეს? კაცობრიობის რატომ სწორედ ამ პერიოდში გამოჩნდნენ ისინი? რაში მდგომარეობს მათი მისია? რა მომავლისაკენ მივყავართ მათ?

უწინარეს ყოვლისა, „მფრინავი თეფშების“ გამოჩენა — მხოლოდ ნაწილია ზვავივით მოვარდნილი „პარანორმალური“ მოვლენებისა, რომელთაც სულ რამდენიმე წლის წინათ ადამიანების უმრავლესობა „სასწაულებად“ მიიჩნევდა. დოქტორი ვალლე „უხილავ კოლეჯში“ ამ ფაქტს ერული თვალსაზრისით უდგება. „ჩვეულებრივ შემთხვევებზე დაკვირვებებმა უეცრად წაგვლეკა“ (გვ. 187), რითაც გამოიწვია „ადამიანებისათვის ჩვეული მრწამსის საფუძვლის საერთო გადაწევა“, გადაწევა მათი მიმართებისა უხილავის აღქმასთან დაკავშირებით“ (გვ. 114). „ადამიანის შეგნებაში რაღაც ხდება (გვ. 34). იგივე „მძლავრი ძალა, რომელიც კაცთა მოდგმაზე მოქმედებდა წარსულში, ისევ მოქმედებს მათზე ჩვენს დროსაც“ (გვ. 14). ქრისტიანული გაგებით ეს ნიშნავს—ადამიანთა მოდგმას კვლავ შემოესია ეშმაკები. ქრისტიანული აპოკალიპსური შეხედულებებისაგან გამომდინარე, ვხედავთ, რომ ძალა, რომელიც იჭერდა და აკავებდა დედამიწაზე დემონური ზემოქმედებების უკანასკნელ შემზარავ გამოვლინებას, მოცილებულია გარემოს (2 თესალ; 2—7), ქრისტიანული მსოფლმხედველობა როგორც მთლიანობა, აღარ არსებობს, და სატანა „განთავისუფლებულია ქვესკნელიდან“, სადაც მას აკავებდა ქრისტიანული ეკლესიის მადლი. რათა აცდუნოს ადამიანები“ (გამოცხ. 20, 7—8), და შეამზადოს ისინი ანტიქრისტეს თაყვანისცემისათვის ბოლო ყვამს. ქრისტიანული ხანიდან მოყოლებული, ეშმაკები არასდროს არ გვევლინებოდნენ ასე აშკარად და ყოველნაბიჯზე, როგორც დღეს. „სტუმრები კოსმოსიდან“ მხოლოდ-დამხოლოდ საბაბია, რომელთა დახმარებითაც ისინი ცდილობენ შთააგონონ ადამიანებს აზრი, რომ „უმაღლესი არსებე-

ბი“ ამიერიდან მზად არიან თავს იღონ კაცობრიობის მომავალ ბედ-იღბალზე ზრუნვა¹.

მეორეც, ამოუცნობი მფრინავი ობიექტები — მედიუმური ხერხებისაგან უახლესია, რომელთა საშუალებითაც ეშმაკი მომხრეებს ითრევს თავისი ოკულტური სამყაროსთვის. ეს არის საშინელი ნიშანი იმისა, რომ ადამიანი ხელმისაწვდომი შეიქნა დემონური გავლენებისათვის: როგორც არასდროს უწინ ქრისტიანულ ეპოქაში. მე-19 საუკუნეში როგორც წესი საჭირო იყო სეანსებისათვის ბნელი ოთახის მოძებნა, რომ ეშმაკებთან კონტაქტი დაემყარებინათ, ახლა კი საკმარისია ავხედოთ ზეცას (მართალია ღამით). კაცობრიობამ დაჰკარგა ყველაფერი, რაც ჯერ კიდევ შემორჩენილი იყო ქრისტიანული მოძღვრების საფუძვლებიდან, და ახლა პასიურად იმ ნებისმიერი „ძალების“ განკარგულებაშია, რომელიც შეიძლება დაეშვან ციდან. — ახალი კინოფილმი — „მესამე რიგის ახლო კონტაქტები“ — გასაოცარი მხილებაა იმისა, თუ რაოდენ ცრუმორწმუნე გახდა თანამედროვე ადამიანი — რომელიც მზადაა იმწამსვე უყოყმანოდ ირწმუნოს და გაჰყვეს თითქმის სახეუცვლელ ეშმაკებს, საითაც არ უნდა წაიყვანონ მათ².

მესამეც, აი რაშია „მფრინავი თეფშების“ მისია: მოუმზადოს გზა ანტიქრისტეს; შეცდომილთა სამყაროს მხსნელი მოდის, რათა იბატონოს მათზე. შესაძლოა იგი თვით მოვიდეს ზეციით, რათა დაემგვანოს ქრისტეს (მათე 24, 30; საქმენი 1, 11); ვინ იცის, მხოლოდ „სტუმრები კოსმოსიდან“ დაეშვებიან ყველას თვალწინ დედამიწაზე რათა „თავიანთ მბრძანებელს კოსმოსურად სცენ თაყვანი, ან „ცეცხლი გარდამოხდეს ზეციით“ (გამოცხ. 13, 13). ვინ იცის, იქნეს ბოლო ჟამის დიდი

¹ მრავალი ცნობები „დიდტერფინებზე“ და სხვა „ურჩხულებზე“ იგივე ოკულტურ თავისებურებებს ამჟღავნებენ, რასაც „მფრინავ თეფშებთან“ შეხვედრები, და ხშირად ისინი ეთხვევიან ერთმანეთს.

² ორი სხვა „პარანორმალური“ მოვლენა, რომელიც ამ ცოტა ხნის წინ აღმოაჩინეს, გვიჩვენებს რამდენად თავბედურად იყვნენ დემონები ფიზიკურ საშუალებებს (ნაწილობრივ თანამედროვე მოწყობილობებს), რათა დაემყარონ კონტაქტები ადამიანებთან (1). ერთმა ლატვიელმა სწავლულმა (და მასთან ერთად სხვებმა) აღმოაჩინა იღუმალი ხმების მოვლენა; ეს ხმები მაგნიტოფონის ფირზე ისმის, თუნდაც ჩაწერა მოხდეს კლინიკურ პირობებში, სრული სიჩუმისას, და შედეგები გვაგონებს მედიუმური სეანსების შედეგებს, მედიუმის ანდა „ფსიქიკის“ არსებობა ოთახში თითქოსდა ხელს უწყობს ამ მოვლენას.

დემონური სანახაობის მხოლოდ ნაწილი. როგორც არ უნდა იყოს, თანამედროვე კაცობრიობისათვის წარგზავნა ასეთია: ელოდოს ხსნას, მაგრამ არა ქრისტიანული გამოცხადებისაგან და უხილავი ღრმთისადმი რწმენით, არამედ კოსმოსიდან მოსულთა მხრივ.

ეს ბოლო ეპის ერთადერთი ნიშანთაგანია, როცა იქნება „საშინელებანი ზეცით და სასწაულნი დიდ-დიდნი“ (ლუკა 21, 11). ჯერ კიდევ ასი წლის წინ ეპისკოპოსი ეგნატე ბრიანჩანიზოვი წერდა თავის წიგნში: „О чудесах и знамениях» (Ярославль, 1870; переиздано монастырем св. Троицы, Джорданвилль, Н. — Йорк, 1960), „სწრაფვა, რაც გვხვდება თანამედროვექრისტიანულ საზოგადოებაში, იხილონ სასწაულები და ჰქმნან იგინი... ამგვარი მისწრაფება ხსნის თავის მოტყუებას, რაც ემყარება თავმოყვარეობასა და ამპარტავენებას, რაც გამეფებულია სულში და მოიცავს მას“ (გვ. 32). ჭეშმარიტი სასწაულთმოქმედები იშვიათობა გახდა და ქრებიან კიდევ, მაგრამ ადამიანებს უფრო მეტად, ვინემ ოდესმე სწყურიათ სასწაული... ჩვენ თანდათან ეუახლოვდებით ეპს, როცა გაიშლება ფართო სარბიელი მრავალრიცხოვანი და გასაოცარი ყალბი სასწაულებისა, რათა დაღუპონ ის უბედური შთამომავალნი ხორციელი სიბრძნითმოყვარეობისა, რომლებიც იქნებიან შეცთომილნი და ცთუნებულნი ამ სასწაულებით“ (გვ. 48—49).

აი რა დააინტერესებთ განსაკუთრებით ამოუცნობი მფრინავი ობიექტების მკვლევარებს: „ანტიქრისტეს სასწაულები

(Konstantin Raudive, Breakthrough: An Amazing Experiment, in Electronic Communication with the Dead, Taplinger Publishing Co, N.Y. 1971).

„ადამიანები კოსმოსიდან“ ლითონის მსგავსი ხმებით უკვე რამოდენიმე ხანია თთქოს და სარგებლობენ ტელეფონებით, რათა დაამყარონ ურთიერთობა „კონტაქტიორებთანაც“ და „მფრინავი თეფშების“ მკვლევარებთანაც. რა თქმა უნდა, ალბათობა გამასხრებისა ამ შემთხვევაში ძალზედ დიდია. მაგრამ უკანასკნელ წლებში გარდაცვალებულთა ხმები საესებით დამაჯერებელია (სარწმუნო) იმათთვის, ვინც მათ ელაპარაკა, ნებისმიერ ადამიანს აქვს მოსმენილი ტელეფონით საუბრისას. როგორც ავტორი ამ მოკლენების მოწოდებისას აღნიშნავს, თითქმის შეუძლებელია უარყოფა იმისა, რომ „ძველი დემონები კვლავ დაბიჭებენ ჩვენ შორის“ და იმ როდენობით, რაც აღრე ვერც კი წარმოედგინათ (Keel, UFO. Operation Trojan Horse, გვ. 306).

უმეტესად მოხდება ჰაერში (საჰაერო სივრცეში), სადაც სატანას მთავარი სამფლობელო იმყოფება, ნიშნები ძირითადად ხილვადი იქნება (მხედველობის ორგანოებით აღიქმება), მოაჯადოებს და მოატყუებს თვალს. წმ. იოანე ღვთისმეტყველი, ჰერეტდა რა გამოცხადებაში (მოვლენებს) შემთხვევებს, მომასწავებელთ სამყაროს აღსასრულისა, ამბობს, რომ ანტიქრისტე აღასრულებს „სასწაულთა დიდთა, და რაბთა ცეცხლი გარდამოხდეს ზეცით წინაშე კაცთა (გამოცხ. 13, 13). ესაა ნიშანი, აღნიშნულია წერილში, როგორც ყველაზე მნიშვნელოვანი ანტიქრისტეს ნიშნებს შორის, და მისი ადგილია ჰაერში (ცაში): ეს იქნება „ბრწყინვალე და შემზარავი სანახაობა“ (გვ. 13). წმ. სვიმეონ ახალი ღვთისმეტყველი ამასთან დაკავშირებით აღნიშნავს, რომ „მლოცველი მხედარი ძალზედ იშვიათად უნდა იცქირებოდეს ცაში, და ეშინოდეს ზეციური ბოროტი სულელებისა. რომლებიც ახდენენ სხვადასხვაგვარ საცდურებს ჰაერში“ («Добротолюбие», три вида внимательности»). ადამიანები ვერ მიხვდებიან, რომ ანტიქრისტეს სასწაულებს არ ექნებათ არავითარი კეთილი, გონივრული მიზანი, არც გარკვეული აზრი, რომ ისინი უცხოა ჰეშმარიტებისათვის, სავსეა სიცრუით (სიყალბით), რომ ეს ურჩხულისებრი ბოროტი, უაზრო გამონატულება, რაც იზრდება, რათა დაამარცხოს, შეშფოთებაში ჩაგძიროს (აგამღვრიოს) და თავდავიწყებაში, მოგატყუოს, გაცდუნოს, ცარიელი, სულელური, მაღალფარდოვანი დაპირებებით (გვ. 11). „ეშმაკების ყველა გამოვლინებას აქვს საერთო თვისება — სულ მცირე ყურადღების გამოჩენითაც კი, თუნდაც ყოველგვარი სიმპათიის გამოვლენის გარეშეც, ადამიანი შეიძლება შეიპყრას საზიანო შთაბეჭდილებამ და სერიოზული ცდუნების წინაშე აღმოჩნდეს“ (გვ. 50). ათასობით „კონტაქტიორმა“ „მფრინავ თეფშებთან“ და უბრალო მოწმეებმაც კი გამოსცადეს თავის თავზე ამ სიტყვების შემადრწუნებელი ჰეშმარიტება; მხოლოდ მცირე რიცხვმა მოახერხა თავის დახსნა მას შემდეგ, რაც ისინი სერიოზულად იქნენ ჩათრეული ამ კონტაქტში.

„მფრინავი თეფშების“ საერო მკვლევარებმაც კი ჩათვალეს საჭიროდ გაეფრთხილებინათ ადამიანები ამ კონტაქტების საფ-

რთხესთან დაკავშირებით. ასე მაგ., ჯონ კილი წერს: „ამოუცნობ მფრინავ ობიექტებთან ხუმრობა ისეთივე ცუდია, როგორც შავ მაგიასთან. ეს მოვლენა თავის მსხვერპლად ხდის ნევროტიკებს, გულუბრყვილოებს და უმწიფარ ადამიანებს. პარანორმული შიზოფრენია, დემონომანია და თვითმკვლელობაც კი შეიძლება ჩაიდინონ მათ და არა ერთხელ ჩაუდენიათ კიდეც. „მფრინავი თეფშებისადმი“ მცირე ცნობისმოყვარეობა შეიძლება გადაიქცეს დამანგრეველ შეპყრობილობად. ამიტომ, მე დაბეჯითებით მოვითხოვ მშობლებისაგან აარიდონ ბავშვები ამ ინტერესებს. სკოლის მასწავლებლებმა და სხვა მოზრდილებმა არ უნდა წაახალისონ მოზარდი თაობის გატაცება ამითი“ (UFOs: Operation Trojan Horse, გვ. 220).

სხვა ადგილს ეპისკოპოსი ეგნატე ბრიანჩანინოვი ძრწოლითა და ცუდი წინათგრძნობით აღნიშნავს უბრალო რუსი მკვდლის ჩვენების შესახებ პეტერბურგის მახლობელ სოფელში ურწმუნოებისა და რევოლუციის საუკუნის გარიჟრაჟზე (1817 წ.) შუადღისას მან უეცრად დაინახა უამრავი ეშმაკი ადამიანების სახით, ჩამომსხდრები ტყეში ხის ტოტებზე, უცნაურ ტანსაცმელსა და წვეტიან ქუდეებში, რომლებიც მღეროდნენ უხილავი და ველური მუსიკალური ინსტრუმენტების თანხლებით: „ჩვენი დრო! ჩვენი ნება!“¹

ჩვენ უფრო ახლოს ვიმყოფებით მოზეიმე და გალადებული ეშმაკების ამ საშინელი საუკუნის დასასრულთან, როცა შემზარავი „ჰუმანოიდები“ (ეშმაკთა კიდეც ერთი ნაირსახე) ხილული ზღებიან ათასობით ადამიანებისათვის და ეუფლებიან მათ სულებს, ვინც დასტოვა ღვთის მადლმა. ამოუცნობი მფრინავი ობიექტების ფენომენი — არის ნიშანი მართლმადიდებელი ქრისტიანისათვის, რომ მათ კიდეც უფრო ფრთხილად და მღვიძარედ იარონ ხსნის გზით, და იცოდნენ რომ ისინი შეიძლება ცთუნებულ იქნან და მოხიბლულნი არა მხოლოდ ყალბი რელიგიური მოძღვრებებით; არამედ გარეგნულად სავსებით მატერიალური საგნებითაც კი, რაც თვალში ხვდებათ. ადრეულ საუკუნეებში ქრისტიანები დიდი სიფრთხილით ეკიდებოდნენ უცნაურ და ახალ ჩვენებებს (მოვლენებს), ახსოვდათ

¹ С. Нилус, «Святые под спудом», Сергиев посад, 1911, 33-122.

რა ეშმაკის ხრიკები; მაგრამ ახალი ერის დადგომის შემდეგ, განათლებული ადამიანები მათ მხოლოდ ცნობისმოყვარეობით გვიღებინან, ხანდახან მისდევენ კიდევ მათ, გადასწევენ რა ეშმაკს ნასვერად-წარმოსასვით სამყაროში, ამიტომ, „მფრინავი თეფშების“ კემშიარტი ბუნების გაგებამ შეიძლება გვიშველოს მართლმადიდებელ ქრისტიანებს, რათა გამოვიღვიძოთ შეგნებული სულიერი ცხოვრებისა და შეგნებული მართლმადიდებლური მსოფლმშედველობისათვის, რომელიც არც ისე იოლად გამოსაყვანია ჩვენი დროის მოღუპი იდეებიდან.

შეგნებული მართლმადიდებელი ქრისტიანი ცხოვრობს.. სამყაროში, რომელიც უდაოდ დაცემულია, როგორც დაბლა დედამიწაზე, ასევე მაღლა ვარსკვლავებში — ყველაფერი ერთნაირადაა დაშორებული დაკარგულ სამოთხეს, რისკენაც იგი მიისწრაფვის. იგი არის ნაწილი ტანჯული კაცობრიობისა, რომელიც წარმოშობილია ერთი ადამისაგან, პირველი ადამიანისაგან, და ყველას ერთნაირად სჭირდება ცოდვების მონანიება, რომელსაც უსასყიდლოდ გვიბოძებს ზე ღმრთისა თავისი მაცხოვრებელი ჯვარცმით. მან იცის, რომ ადამიანს არ უწერია „ევოლუცია“ რაღაც „უფრო მაღალში“, და არც არსებობს არავითარი მიზეზი გვჯეროდეს, რომ სხვა პლანეტებზე არის „მაღალგანვითარებული“ არსებები; მან კარგად იცის, რომ მის გარდა სამყაროში მართლაც არსებობს „უმადლესი გონიერი არსებები“. და ისინი ორი სახისანი არიან, ასე რომ, იგი მიისწრაფვის იყოს მათთან, ვინც ღმერთს ემსახურება (ანგელოსებთან) და გაურბის კონტაქტს სხვებთან, რომლებმაც უარყვეს ღმერთი და ცდილობენ შურისა და სიბრანის გამო ჩაითრიონ ადამიანი თავის გასაცოდებულ მდგომარეობაში (ეშმაკები). მან იცის, რომ ადამიანი, თავისი თავის სიყვარულისა და სისუსტის გამო, ადვილად ვარდება ცდუნებაში და სჯერა „ჯადოსნური ზღაპრებისა“, რომლებსაც ჰპირდება „მაღალ მდგომარეობასთან“ კონტაქტები ან „მაღალ არსებებთან“ კავშირი, ქრისტიანული ცხოვრების ღვაწლის გარეშე — ფაქტიურად სწორედ გადარჩენით, გაქცევით ქრისტიანული ცხოვრების ღვაწლიდან მას არ სჯერა საკუთარი შესაძლებლობებისა გამოააშკარაოს ეშმაკების ხრიკები, და მით უფრო ახლოს მისდევს წმ. წერილის სწავლე-

ბებს და წმ. მამების მოძღვრებებს, რომელთაც ეკლესია და ქრისტე მისცემს მას მის სიცოცხლეში.

ასეთ ადამიანს შეუძლია წინ აღუდგეს მომავლის რელიგიას, ანტიქრისტეს რელიგიას, რა სახითაც არ უნდა გამოვლინდეს: დანარჩენი კაცობრიობა, თუ ის არ იქნება გადარჩენილი უფლის სასწაულით, განწირულია დასაღუბად.

თარგმნა ლ ა ლ ი ნ ა ფ ე ტ ვ ა რ ი ძ ე მ .

წინასიტყვაობა	5
შემღვენელთაგან	8
უცნობი ავტორი	9
ეპისტოლე დიოგენეტესადმი	9
ჰერმენი	23
მწყემსი, წიგნი I, ჩვენებები	25
წ. თეოფილე ანტიოქიელი	44
ეპისტოლე ავტოლიკესადმი; წიგნი III (ფრაგმენტები)	53
წ. ვლადელმონოზამი კიპრიანე კართაგინის ეპისკოპოსი	62
ეკლესიის ერთიანობის შესახებ	66
წ. ბრიგოლ ღვთისმეტყველი	80
კითხვები საკუთარ თავს	85
წ. ბრიგოლ ნოსელი	87
მოსეს ცხოვრება	96
წ. იოანე ოქროპირი	119
ეკლესიაში სიარულის შესახებ	123
ბაქშეთა აღზრდის შესახებ	128
მარხვის შესახებ	135
უცნობი ავტორი	
ევსტათი მცხეთელის მოთმინება და მარტილობა	137
უცნობი ავტორი	
კოლაელთა წამება	155
წ. სვიმიონ ახალი ღვთისმეტყველი	158
სინანულისა და ღოცვის შესახებ	160
წ. ბრიგოლ კალამა	165
ქადაგება თქმული სასიკვდილო ეპიდემიის მძვინვარების ეამს	169
ეპისკოპოსი ილია მინიატინი	177
ლოდი საცდურისა, წიგნი I	178
ამბროსი ნეპრესელი ეპისკოპოსი	237
სიტყვა, თქმული სარწმუნოებისათვის	
მართლ-აღსარებისა	238
წ. ეპისკოპოსი ეზნატი	248
სიტყვა თქმული ღიღი მარხვის პირველ კვირიაკეს	
მართლმადიდებლობის შესახებ	252
წერილები ერის კაცთა მიმართ	261
წ. ეპისკოპოსი თეოფანე დაუუდებული	272
მართლმადიდებლობის საფუძველი ერთაზრობაშია	
ქრისტიანობაში ღრობის სულისკვეთების მიხედვით	
არაფერი არ უნდა შეიცვალოს	275
პირველი წერილი სანკტ-პეტერბურგში იქაური	
მწველებლობის გამო	289
გლვდელმონაზონი სერაფიმი (როუზი)	325
სამეუფო გზა	327
ზეციური სასწაულები (ამოუცნობი მფრინავი ობიექტების „მფრინავი თევზების“, მართლმადიდებლურ-ქრისტიანული ახსნა), წიგნიდან — „მართლმადიდებლობა და მომავალის რელიგია“	356

მხატვარი დ. ხიდაშელი
მხატვრული რედაქტორი მ. დედანაშვილი
ტექნიკური რედაქტორი ო. კახანაძე
კორექტორი ნ. ფხაკაძე

ამწეობი ლ. შენგელია
დამკაბადონებელი ც. გიგანი

ს. ბ. 5895

ჩაბარდა წარმოებას 9.02.90 წ. ხელმოწერილია საბეჭდად 25 04.90 წ.
ფორმატი 84X108 1/32. ქაღალდი საბეჭდი № 1. გარნიტურა
ჩვეულებრივი. ბეჭდვა მაღალი. პირობითი ნაბეჭდი ფურცელი 21,42.
საღრიცხვო-საგამომცემლო ფურცელი 19,33.
პირობითი საღებავგატარება. 21,42. ტირაჟი 5.000. შეკვეთა № 330

ფასი 10 მან.

გამომცემლობა „მეჩანი“, რუსთაველის პრ. 42, თბილისი
1990.

საქართველოს სსრ ბეჭდვითი სიტყვის სახელმწიფო კომიტეტის
თბილისის № 17 სტამბა, ქ. თბილისი, სურამის ქ. 13.

Государственный комитет Грузинской ССР по печати.
Тбилисская типография № 17. г. Тбилиси, ул. Сурамская, 13.